

ТОҒАЙ МУРОД

ОТАМДАН
ҚОЛГАН
ДАЛАЛАР

Роман

«ШАРҚ» НАШРИЁТ-МАТБАА
КОНЦЕРНИНИНГ
БОШ ТАҲРИРИЯТИ
ТОШКЕНТ — 1994 ЙИЛ

«Отамдан қолган далалар» — рамзий роман.

Муаллиф ўз романида бутун умр далада кетмон чопиб, серқүёш ютида елкаси офтоб кўрмаган, кут-баракот ютида косаси оқармаган мунис ўзбек халқи сиймосини Дехқонқул тимсолида бадиий талқин этади.

*Бирлашган Миллатлар Ташкилоти
аъзоси — Озод Ўзбекистон
учун битдим.
МУАЛЛИФ.*

БИРИНЧИ БОБ

1

Мен фарғоначи Жамолиддин кетмон набираси бўламан.

2

Бобомиз ҳовлиси Фарғонада бўлади.
Даласи Фарғона адогида бўлади.
Бобомиз даласи олдидан бир ариқ сув оқади.
Сув гавҳар зилол-гавҳар зилол сув бўлади.
Сув эгилмиш толлар мажнун-мажнун солланади.
Ариқ ўнгида шаҳардан келажак йўл бўлади.
Йўл ариқ ёқалаб ўтади. Йўл мажнунтол соялаб ўтади.
Бобомиз ана шу йўлдан сахар-сахар далалайди.
Толга хуржун илади. Таҳорат олади. Қиблалатиб белбоғ ёяди.
Чўлпон юлдуз пойида қулоқ қоқади. Чўлпон юлдуз пойида сажда этади.

3

Бобомизда нима бўлади — кетмон бўлади. Кетмон эмас — бир балои бад бўлади!

— Жамолиддинни кетмени даласидай келади! — дейди эл.
Эл қаерда қандай улкан нима күрса бўлди—бобомиз кетменига нисбат беради.
— Ол-а, Жамолиддинни кетменидай келади-я! — дейди эл.

4

Бобомиз урмиш кетмени ўзидан ўзга ердан тортиб ололмайди.
Бобомиз калима қайтариб-қайтариб кетмени чопади. Худони ёдлаб-ёдлаб кетмени чопади.
Худога шукронга айтиб-айтиб кетмени чопади.
Йўлдан ўткич-кеткичлар бобомизга ҳорманг этади.
Бобомиз йўлга қиё-да боқмайди. Даладан бош қўтармайин бор бўлинг, этади.
Шу боис, йўлдан ким ўтади-ким кетади — билмайди. Билгиси-да келмайди. Ким бўлса-да —
бир мўмин, мусулмон-да, дейди.

5

Саратон жингиртоб-жингиртоб куйдирмиш бир маҳал йўлдан ажабтовур овозлар
эшитилади.
Ажабтовур овозлар ўз йўлида кета беради. Бир оғиз ҳорманг этмайди.
Шунда, бобомиз кетменини ер ботиради. Энгашмиш кўйи тиззаларига кафт тирайди. Ер
остидан йўлга қўз ташлайди.
Бобомиз кўзимга тер томди-ёв, дея ўйлайди. Кўли юзи билан кўзларини артади.
Бобомиз бошқатдан қарайди.
Во дариғо, шу кўринмиш ажина бўлдими? Ҳа, йўғ-а! Умри шу далада ўтди — бир нима-да
кўрмади.

Ё, шу кўринмиш туш бўлдими? Ҳ-а, йўғ-а! Ўлик-тирик сергак вақт-а!
Мусичалар узиб-узиб ку-кулайди.
Кун ёнади.
Саратон сап-сариқ товланади.
Ўткинчи балолар саратондай сап-сариқ бўлади.
Саратон балолардан сариқ бўлади, балолар саратондан-да сариқ бўлади.
Бобомиз қад ростлаб қарайди. Йўлга бетма-бет бўлиб қарайди. Ўнг кафтини қоши узра
соябон қилиб қарайди.
Бобомиз пичир-пичир калима қайтаради. Кетменини елка ола-ола қадамлайди.
Ариқ лабида ювиниб-чайнади. Хуржунидан тушлигини олади. Ариқ бўйида ёяди.
Бобомиз чордона қуриб ўтиради. Ариққа нон ботириб-нон ботириб тушлик қиласди. Ариқдан
кўшховучлаб-кўшховучлаб сув олиб тушлик қиласди.

6

Кун қиёмдан-қиём бўлади.
Йўлдан Салоҳиддин бўйрачи ўтади.
Бобомиз бўйрачини гапга солади.
— Сиздан олдин ашиёққа бир бало ўтди, — дейди бобомиз.
Салоҳиддин бўйрачи ариқ ўнгидаги оёқ илади.
— Ажина бўлиб ажина бўлмади, одам бўлиб одам бўлмади, — дейди бобомиз.
Бўйрачи ариқ бўйида соялайди. Бобомиз билан муқобил бўлади.
— Кўрдим, Кетмени, кўрдим, — дейди бўйрачи. — Ўзимни йўлдан четга олиб турдим.

- Нега-нега?
- Ғайридинлар билан йўлим бир бўлмасин, дедим-да.
- Бизнинг кўчамизда ғайридинлар... еб юрибдими?
- Э-э, Кетмон, Кетмон. Сенга кетмон бўлса бўлди. Сен ҳам одамдай бўлиб, кетмондан бош кўтартсанг экан, дунёдан хабардор бўлсанг.
- Мана, кетмондан бошимни олиб ўтирибман?
- Корнинг очгандир-да. Бўлмаса, кетмондан бош кўтарармидинг.
- Салоҳидин бўйрачи шундай дея, йўл бош-адоfiga қараб олади. Бобомиз, олдига лик этиб сапчиб ўтади. Бобомиз қабатига чўкади. Бобомиз билан елкама-елка бўлади.
- Фарғонаға Оқпошшо келди, — дея пичирлайди.
- Муллалар Оқпошшо бизни ололмайди, деятиб эди-ю?
- Олибди-да.
- Қўқондан Олимқули лашкарбоши Чимканга лашкар тортиб кетибди, деятиб эди-ю?
- Олибди, олибди. Ололмас экан-у, Бухоро амири Музafferхон ўтириб қўйибди. Олимқули лашкарбоши Чимканда Оқпошшо елкасини ерга теккизибди. Оқпошшолиларни битта қўймай қиличдан ўтказмоқчи бўлиб турса, Музafferхон бизнинг Қўқонга дафъа қилибди.
- Бўламан дегич эл, бир-бирини ботирим дейди, бўлмайман дегич эл, бир-бирини этини ейди.
- Олимқули лашкарбоши ғазот майдонини ташлаб, ўзимизнинг Қўқонни ўзимизнинг Бухоро амири билан мудофаалаш учун қайтиб келибди. Оқпошшо бундан фойдаланибди. Чалажон оқ лашкарлар тағин дафъа қилибди. Олдин Чимканни олибди, кейин Тошканни олибди.
- Ҳа, тавқи лаънатлар! Тошканниям олибдими-а?
- Олибди, Тошканниям олибди. Саидазимбой дегич савдогар бой Оқпошшога Тошканни сотибди. Тошканда Кайковус дегич улкан бир ариқ бор экан. Тошкан ёлғиз ана шу Кайковусдан сувлар экан, Саидазимбой Оқпошшога ана шу Кайковусни чиппа бўғиб, Чирчиққа буриб юборишни маслаҳат берибди. Оқпошшо Саидазимбой гапи билан Кайковусни чаппа қайириб, Чирчиққа оқизибди. Ана шундан Тошкан қирқ икки кеча-кундуз сувсиз қолибди. Халқ ҳолдан тойиб, Тошканни мудофаа қилолмай қолибди. Оқпошшо сахарлайнин Тошканни босибди.
- Ила-била, Қўқонгача келибдими-а?
- Тошкан билан Қўқон ораси икки қош оралиғидай келади. Етиб келади-да. Ўзимизнинг Қўқон хони ҳе йўқ, бе йўқ, шаҳар дарвозасини очиб берибди. Марҳамати учун Оқпошшодан «Аслзода» фахрия унвони олибди, нишон олибди...
- Бобомиз чапараста-чапараста сўкади:
- Ҳе, эна...!

Худо бермиш кун бўлади — йўлда Оқподшо бўлади.

Бобомиз Оқподшога кет буриб кетмон чопади. Бобомиз Оқподшога терс бўлиб кетмон чопади.

Бобомиз Оқподшо бетини кўрмайин-да, куймайин-да, дейди.

Оқподшо арава миниб ўтади. Оқподшо соз чалиб ўтади. Оқподшо ашула айтиб ўтади. Оқподшо хуштак чалиб ўтади.

Бобомиз шунда-да Оқподшо бетига қайрилиб қарамайди. Энкаймиш кўйи бутлари орасидан мўралайди.

Оқподшо оёқлари осмонда бўлиб кўринади, бошлари ерда бўлиб кўринади.

Оқподшо олабўжи бўлиб кўринади!

Бобомиз тушликда-да Оқподшога кет буриб ўтиради.

Даласига юз солиб-юз солиб тушлик қиласы.

Оқподшолик арава ариқ ёқасида оёқ илади.

Аравадан тап-тап Оқподшо тушади.

Бобомиз Оқподшо тарафга күз қирида қарайди. Шунда ажаб синоат күради.

Бир жуфт оқбадан-оқбадан олабўжи дала оралаб боради. Олдин-кетин боради. Ғоз-ғоз боради.

Оқбадан олабўжилар боради-боради — дала киндигида оёқ илади. Ғоз туради-туради — узала тушиб ётиб олади.

Бобомиз кўзларини юмиб-очиб қарайди. Бобомиз кўзларини пирпиратиб қарайди.

— Ё, тавба-а! — дейди.

Бобомиз оҳиста-оҳиста тўркалади. Кетмонини елка олади. Сўқмоқ бўйлаб боради.

Бобомиз бир капа жойни кафтдай поллаб эди. Тупроғини кафтларида эзиб-эзиб майдалаб эди. Кепакдай-кепакдай мулойимлаб эди. Кепак тупроққа дон сепиб-сепиб ташлаб эди. Чумчук териб кетмасин дея, кепак тупроқ узра ун мисол тупроқ сепиб-сепиб қўйиб эди.

Ана шу кепак тупроқда, ана шу ун тупроқда бир жуфт Оқподшо ялпайиб-ялпайиб ётади!

Оқподшо қип-яланғоч ётади! Оқподшо онадан энди туғилмишдай ётади!

Эркакзот Оқподшода ақалли бир энлик лунги бўлмайди.

Аёлзот Оқподшо маммалари осма қовундай-осма қовундай осилиб ётади.

Бобомиз билаклари билан бетларини бекитади.

— Ийя-ийя! — деб чаппа бурилади. Оқподшолар ана шунда калла кўтариб қарайди.

Ёнбош ётиб қарайди. Кўз қисиб қарайди. Эркакзот Оқподшо кафтида тупроқ ўйнайди.

— Тупроғингни биз учун мулойимлаб қўйибсан, миннатдорчилик билдирамиз, — дейди.

— Юриб-юриб, охири сенинг тупроғингни танладик. Бахтинг бор экан, — дейди аёлзот

Оқподшо.

— Ўзиям бизбоп тупроқ бўлибди-да.

— Ана энди, қуёшда мазза қилиб тобланиб ётамиз.

— Нима учун юзингни яширасан? Сен ҳам қуёшда тоблан.

Бобомиз шу зайли лўкиллаб-лўкиллаб қайта беради.

Бобомиз ариқ лабида музтар бўлиб-музтар бўлиб ўтиради. Бетларини чанглаб-чанглаб ўтиради.

Бобомиз нима кўрди, қачон кўрди — ақли-да бовар этмайди.

Оқподшолар жойидан жилади. Далани қоқ оралаб келади. Ўзларини сувга ташлайди.

Оқподшолар сув шалоплатиб-сув шалоплатиб чўмилади.

Оқподшолар бобомизга тақлидан билаклари билан бетларини бекитади.

Ийя-ийя! — дея, бобомизни майна этиб-етиб сув ғарқоб бўлади. — Ийя-ийя! — дея хохолашиб-хохолашиб сув ғарқоб бўлади.

Оқподшолар қийқириб-қийқириб чўмилади.

Толларда тушламиш чумчуқлар гурр-гурр учади.

Гавҳар сув бўтана бўлади.

Шу-шу бўлади — бобомиз даласи юзини қайтиб кўрмас бўлади.

— Тоқقا кетаман, — дейди бобомиз. — Тоғдан ер оламан.

— Тоғ олис-да, — дея минғиллайди момомиз.

— Олис бўлса бўлар. Ана, тоғдан ер олиб ишляптилар. Ўлиб қолмаяптилар.

— Энди дейман-да, олисни шўрвасидан яқинни ёвғони, дейман-да.

— Даламда мусулмон оёқ босар ер қолмади. Даламда дехқон оёқ босар ер қолмади. Бўлди, энди қайтиб оёқ босмайман.

— Далада нима айб.

— Кофир юмалаб ётар далада файз қоладими?

Момомиз қувватламиш бўлиб бош иргайди.

— Танасида мана мунча либоси бўлса, ўлсин агар! — дейди бобомиз. — Бир жойлари даламда мана бундай диркиллаб турибди!

Момомиз оғзини ушлаб-ушлаб кулади.

— Бир ётса, ётибди-да.

— Бўлди, энди у даладан барака кўтарилиди.

— Босиб-босиб сувланг. Сув нималарни ювмайди.

— Сув? Сув қолдими! Оқ тўнғиздай ариқ ағнай бериб, сувни-да ҳаромлади! Ит-да ариқ лабидан ялаб-ялаб сув ичади! Оқподшо бўлса, оқ тўнғиздай ариқ ағнади!

Момомиз гап билан андармон бўлиб билмайди.

Кўйлак этаклари йифилади-йнғилади — тиззала боради. Тағин йифилади-йифилади — тиззадан сонлаб-сонлаб боради.

Момомиз лозим улоғлари намойиш бўлади. Бобомиз бўш пиёлани зарда билан тўнтариб ташлайди. Лик этиб жойидан туради.

— Этагингизни ёпсангиз бўлмайдими? — дея ўшқиради. — Нима, Оқпошшомидингиз?

9

Бобомиз тоғлаб боролмай қолади.

Хуфтон вақти-хуфтон вақти гузардан аччиқ-аччиқ бақириқ-чақириқ келади.

Бобомиз нима гап, дея чопқиллаб-чопқиллаб боради.

Гузар олатўполон бўлади. Гузар олатасир бўлади.

— Ғазот, ғазот!

— Муҳораба, муҳораба!

Бобомиз ўз дардини ўзи тужади. Бобомиз ўз куйигини ўзи тужади.

Гап йўқ, сўз йўқ — қинидан пичоғини олади.

Бирор пичноқ олади. Бирор таёқ олади. Бирор тош олади.

Эл оқсалтак-коракалтак бўлади.

Эл мулла Намозни оппоқ кигиз солади. Кигиз тўрт бурчидан олади.

Эл кигиз кўтариб-кўтариб такбир айтади. Эл кигиз кўтариб-кўтариб зикри самоъ айтади.

Эл ушбу кигиздайн оппоқ от етаклаб келади.

Эл мулла Намозни ана шу оппоқ кигиздан ана шу оппоқ отга миндиради.

— Пирим, йўл бошласинлар! — дейди. Мулла Намоз оқ отда кафт очади. Эл ёппа барака омин қилади. Мулла Намоз оқ отда йўл олади.

Эл кўтарилади. Эл оқ отлиқ кетидан йўл олади.

Йўлда ушоқдай Ибодин соқов қатиқ сотади. Элга кадида қатиқ тутади. «Ап-ап-ап», дейди.

«Қатиқдан ичиб кетинглар, қатиқдан», демоқчи бўлади.

Алвир-шалвир Ибодин соқов Ҳаётхон дегич момонинг ёлғиз ўғли бўлади. Туғма соқов Ибодин илжайиб-илжайиб юради. Бақрайиб-бақрайиб юради.

Елғиз ўғил Ибодин, соқов ўғил Ибодин, қатиқ сотиб она бокади.

Эл Ибодин соқовни айланиб ўтади. Эл Ибодин соқовни йўлдан қоч, дея туртиб ўтади.

Ибодин соқов кети билан ўтириб қолади.

Бобомиз ушоқдай Ибодин соқовни даст кўтариб, чет олади. Ўнгири билан бет-бошини артади. Қатифини бир кўтаришда ичади. Қўлига чақа беради. Елкасига қоқа-қоқа уйига

жүннатади.

Эл Оқподшо қароргоҳилаб келгүничайин олақароқ тун бўлади.

Эл ўқлоғдай-ўқлоғдай чўян панжаралар билан ўралмиш қароргоҳни ўраб олади.

Оқ отлиқ қароргоҳ эшигидан от қўяди.

Оқкалтак-қоракалтак эл-да ўзларини эшик уради.

Эшикоғалар данг қотиб қолади. Отишларини-да билмайди, отмасларини-да билмайди.

Эшиқдан бошлаб қон тўкилади.

Эл иккита эшикоғани-да пичоқлаб ўлдиради.

Эл ичкарида оёқ узатиб ётмиш Оқподшоларни жойида босади.

Эл Оқподшони бўғиб-бўғиб ўлдиради. Эл Оқподшони бўғизлаб-бўғизлаб ўлдиради. Эл Оқподшони пичоқлаб-пичоқлаб ўлдиради.

Қароргоҳда тирик жон қолмайди.

Ана энди қароргоҳга ўт қўйиб юборажак бўладилар.

— Минбаъд, мусулмонлар, минбаъд! — дея амр беради оқ отлиқ. — Бу иморатни Оқпошибо Петербургдан олиб келмади! Бу иморат ўзномизнинг иморатдир! Онқадарким, Оқпошибо келиб жойлашиб олди! Шундай экан, минбаъд иморатга зиён бермангиз.

Эл тутантириқни оёқ остига ташлайди. Тепкилаб-тепкилаб ўчиради.

— Мусулмонлар — зафарона дайди оқ отлиқ. — Мана, Оқпошибони ер билан яксон этдик! Эл-юртимизни Оқпошибодан озод этдик! Алхол, энди ўз юртларингизга ўзларингиз бек бўлиб кун кечиргайсизлар!

Эл шод-хуррамлигини шойи этиш учун карнай-сурнай йўқлайди.

Зим-зиё тунда карнай-сурнай қани?

Шунда эл ҳовучлари билан карнай чалади. Ҳовучлари билан сурнай чалади. Ҳовучлари бнлан сибизға чалади.

Гафлатда ётмишлар уйларидан ташқарилайди. Аланг-жаланг бўлади.

— Нима бўлди? — дейди.

Эл зафарларини шойи этади:

— Ўз юртимизни қайтиб олдик!

— Оқпошибони пичоқдан ўтказдик!

Эл ана шундай кайфиятда тарқалади.

10

Оқпошибо келади — ана энди келади!

Фарғонани Оқподшо босади.

Оқподшо шаҳар оралайди.

Шаҳарда тирик жон бўлади — гузар ҳайдайди.

Оқподшо бобомиз уйини-да босади. Момомиз билагидан олиб отади.

Момомиз жалп этиб ташқари тушади.

Момомиз уввос-уввос йиғлайди. Момомиз ер таяниб турайин, дейди — туролмайди.

Оқподшо момомиз сочидан бурайди. Оқподшо момомиз сочидан судрайди.

Момо ер қучиб-қучиб йиғлайди. Момомиз ер тирнаб-тирнаб йиғлайди.

Момомиз қонқора қақшайди.

— Ўлдим, ўлдим-а!.. — дея вовайло этади.

Момомиз нимкала соз-нимкала соз оёқ олади. Момомиз мункиб-мункиб одимлайди. Момомиз алпон-талпон одимлайди.

Кетидан ушоқ ўғлонлари ияради.

Олдиларидан Ибодин соқов келиб қолади. Қўлтиғида бир кади қатиқ бўлади.

Ибодин соқов элга илжайиб-илжайиб ўтади. Ибодин соқов Оқподшога бақрайиб-бақрайиб ўтади.

Оқподшо бирор-бировига қараб олади. Ажабона-ажабона елка қисади.

— Эй, чучела, йўл бўлсин? — дейди. Ибодин соқов илжайиб-илжайиб ўта беради.

— Эй, чучела, сенга айтаяпман?!

Ибодин соқов Оқподшога қайрилиб-да қарамайди. Бақрайиб-бақрайиб ўта беради.

Оқподшо отини йўрттириб боради. Ибодин соқов олдини олади.

Ибодин соқов от тумшуғига илжайиб қарайди. Отлик подшога илжайиб қарайди. Отликни айланиб ўтарман бўлади.

Шунда, бошқа бир отлик тўғаноқ бўлади.

Ибодин соқов бир ўнг отликқа илжаяди, бир чап отликқа илжаяди. Бўш қўлинин гузар тараф «ниш» этади. «У-у-у», дейди:

«Ҳай, анави гузарга кетаяпман».

Сўғин, қўлтиғидаги қатиққа ишора беради:

«Қатиқ олиб кетаяпман».

Оқподшо қатиққа эгилиб қарайди.

— Қатиғини олиб ичамизми? — дейди.

— Кўй-е, буларни қатиғини ичиб бўладими!

— Ким билади, энасини соғиб қатиқ қиласдими! Оқподшо қамчи сопини Ибодин соқов пешонасига нуқилайди.

— Олдимга туш! — дея зуғумлайди.

Ибодин соқов элга бир қараб олади. Бошини сарак-сарак этади. «Па-па-па», дейди:

«Эл олдидан ўтдим, бировиям қатиқ сўрамади».

Ибодин соқов илжайиб-илжайиб тура беради. «Ав-ав-ав», дейди:

«Энди гузарга бораман. Гузарда қатиқ кетади».

Оқподшо кадига эгилиб қарайди. Қатиққа тупурари. Балғамлаб-балғамлаб тупурари:

— Туф, ах, туф!

Оқподшо этик учи билан Ибодин соқов иягиға туртади.

— Бўлдими, чучела? — дейди. — Қани, энди юр.

Ибодин соқов бир қатиққа қарайди, бир Оқподшога қарайди. Лабларини буради-буради...хўнграб йиғлаб юборади. Қатиғини кўрсатиб-кўрсатиб йиғлайди: «Эа-эа-эа», дейди:

«Энди, аямга нима дейман?»

Ибодин соқов йиғлайди-йиғлайди... қатиғини Оқподшога сепиб юборади. Забт билан уйи тараф қочади.

— Тўхта, чучела!

— Тўхта дейман!

Ибодин соқов пир-пир чопиб қўя беради.

Шунда, Оқподшо милтиқ пешлайди. Ибодин соқов чуйдасини кўзлайди.

Ўқ дол нишонлайди.

Жулдур-жулдур Ибодин соқов чалпак бўлиб учади.

Оқподшо от йўрттириб боради.

Иркит-иркит Ибодин соқов юzlари илжая-илжая сўлади.

Иркит-иркит Ибодин соқов кўзлари бақрая-бақрая сўнади...

«Энди... аямга нима дейман?»

Оқподшо мүмин-мазлумни ана шу Ѓermозор масжид-мадраса қошида тўдалайди.
Мўмин-мазлум мунғайиб-мунғайиб туради. Мўмин мазлум жовдираб-жовдираб туради.
Мўмин-мазлум бир-бирови кўксига йиғлайди. Мўмин-мазлум бир-бирови елкасига
йиғлайди.
Мўмин-мазлум узун кун ана шундай туради.

12

Генерал Скобелев кунботарда ташриф этади.
Шақоватпаноҳ тўралар билан фалокатмаоб ҳокимлар ҳамроҳлигига келади.
Генерал Скобелев мўмин-мазлум узра қаҳр билан кариллади:
— Сарт-собакалар — дейди. — Ораларингдан бир нобакор сарт олампаноҳ олий
ҳазратларига қўйл кўтарди! Иғтишо ҳам исён қилди! Ўрусиya салтанатининг ўнта муаззам
аскарини шаҳид этиб, ғозий бўлди! Ул нобакор — мулла Намоздир! Мулла Намоз осия бўлди!
Мулла Намоз боғий бўлди! Биз ул осий ҳам боғийни бугун тополмадик, эрта-индин албатта
топамиз! Сиз ул нобакорни топишда олампаноҳ олий ҳазратларига мадад берингиз!
Кўрқмангиз, олампаноҳ ул осий ҳам боғий бандада қонидан кечади!
Мўмин-мазлум сукутда қолади. Мўмин-мазлум нафас ютади.
Генерал Скобелев карр-карр этади:
— Осийлик ҳам боғийлик кимдан қўзғолди — биламиз! Аммо бу нонкўрлик қаерда
кўзғолди? Жавоб берингиз! Полковник Чайковский.
— Лаббай-лаббай?
Генерал Скобелев кетида мулла мушук бўлиб турмиш Чайковский лип этиб олға ўтади.
— Лаббай, тақсир, лаббай? — дейди.
— Айтингиз, бу осийлик ҳам боғийлик қаерда қўзғолди?
Чайковский боши билан муҳташам бинога имо беради.
— Манави чолдеворхонада қўзғолди, жаноби олийлари, — дейди.
— Бу қандай чолдеворхона бўлди?
— Бу масжид бўлди, жаноби олийлари!
— Осийлик ила масжид орасида не муштараклик бўлди?
— Мулла Намоз ана шу масжид имом хатиби, жаноби олийлари.
— Осий бандада мулла Намозни оқ кигизга ўтиргизувчи муридлари ана шу масжидда тоат-
ибодатланади, дейсиз-да?
— Топдингиз, жаноби олийлари, топдингиз.
— Масала равшан бўлди!
Генерал Скобелев узанги йўлдошлари билан машваратлашади.

13

Оқподшо мўмин-мазлумни йўл ўнгига ҳайдаб ўтади.
Оқподшо қўқони аравасимон учта тўп судраб келади.
Генерал Скобелев мўмин-мазлум билан тўплар оралиғига туради. От гижинглатиб-от
гижинглатиб туради.
— Сарт-собакалар! — дейди. — Ўрусиya подшо ҳазратлари ўз истибодод салтанати қувваи
кудратини қўз-қўз этмоқ учун тўп отади! Тўп отиш билан ҳам-оҳанг намоз ўқилади! Амр этувчи
ўзим бўламан!
Генерал Скобелев тўпчиларга амр беради:
— Тўплар шайлансин! Тўплар шарақ-шуруқ бўлади.

Генерал Скобелев мүмин-мазлумга амр этади:

— Ётилсин! Юзлар ерга қўйилсин! Қулоқлар ёпилсин! Намоз ўқилсин!

Мүмин-мазлум масжидга руку этади. Мүмин-мазлум ер чўккалайди. Мүмин-мазлум пешонасини ер қўяди — мисоли намоз ўқимиш бўлади.

— Ноғоралар чалинсин!

Ноғорачилар бодратиб-бодратиб ноғора чалади.

— Отилсин!

Учта тўўп бирваракай отади. Гумбур-гумбур отади. Масжид қуюқ-қуюқ тутунда қолади.

— Турилсин!

Мүмин-мазлум ердан бош олади. Мүмин-мазлум қўл қовуштириб-қўл қовуштириб туради.

— Отишга шайлансин!

Тўплар жангир-жунгур ўқланади.

— Ётилсин!

Мүмин-мазлум тагин пешонасини ер қўяди. Мүмин-мазлум тагин қулоқ-чаккасини ушлайди.

— Отилсин!

Масжид қоп-қора тўпон бўлади.

Ноғорачилар бодратиб-бодратиб ноғора чалади.

Шунда, бир нуроний чол мазлумни ёриб-ёриб олдинлайди. Нуроний чол йўлида ғов бўлмиш милтиқ-тиғларни қайириб-қайириб олдинлайди.

Нуроний чол генерални кўзлаб келади. Нуроний чол генерал этигига кафт қўяди.

Генерал Скобелев этиги билан нуроний чол ияқ-соқолидан итариб ташлайди.

— Йўқол, сарт-собака, этигимни ҳаром этасан! — дейди генерал Скобелев. — Мен, сен сарт-собакаларни этигим пошнасига олмайман!

Нуроний чол далбанглаб-далбанглаб боради-боради — кети билан ўтириб қолади.

— Капитан Кайшовский! — йўқлайди генерал. — Кайшовский дейман! Манави қари сарт-собака ким бўлди?

Кайшовский ҳадаҳалаб-ҳадаҳалаб боради. Генерал Скобелев узангиси олдида мулла мушук бўлади.

— Умархон эшон, жаноби олийлари, Умархон эшон! —дейди.

— Эшон тугул, — дейди генерал Скобелев. — Муҳамад Пайғамбар бўлсаям, этигим пошнасига олмайман!

— Ажаб қиласиз, жаноби олийлари, хўп ажаб қиласиз!

— Сўрангиз, қари сарт-собака нима мақсадда этигимга осилади?

Кайшовский Умархон эшонни генерал Скобелев узангиси қошида бетма-бет этади.

— Ҳа-а, эшон? — дея зуғумлайди генерал. — Нима дейсан?

Умархон эшон қалт-қалт этади. Умархон эшон дудуқлана-дудуқлана айтади:

— Таксир... — дейди, — таксир, мен бир кам саксонда бўлдим...

— Ақл ёшда эмас, ақл бошда, эшон! — дейди генерал Скобелев. — Мен ўттиз ёшимда Хивани тиз чўқтиридим! Мана, ўттиз икки ёшимда Қўқонни тариқдай тирқиратдим! Саксонни уриб қўйиб, сен нимани қотирдинг?

— Офарин, таксир, офарин, ўттизида эр атанган, қирқида шер атанар, дейдилар. Тақсир, мен бир кам саксонда...

— Масала равшан бўлди: саксон ёшимни ҳурмат эт, демоқчисан-да? Эшон, туземецлар ўзидан бир ёш катта бўлсаям хурматини бажо этади. Бобо, дейди, момо, дейди. Опа, дейди, ака, дейди. Туземецлар ўзидан бир ёш катта бўлсаям сиз-сизлаб мурожаат этади. Туземецлар ўзидан ёши катталарга қўлинни қўксига қўйиб салом беради, йўл беради, жой беради. Эшон, биз Улуғ Ўрусијамиз! Улуғ Ўрусија ёш билан қарини билмайди! У ўз оти ўзи билан — Улуғ Ўрусија!

Бўлди, энди туземецча урф-одатларингни йўқ этамиз! Энди Улуғ Ўрусиya урф-одатларини қабул этасан!

— Тақсир, мен ёшимни пешламоқчи эмас эдим. Мен... саксон ёшли бир мўйсафи, калом учун ижозат тиламоқчи эдим.

— Ижозат, айтингиз!

— Тақсир... Сиз тўпга тутажак даргоҳ масжид...

— Масжид бўлса нима бўпти?

— Масжид Худои таоло даргоҳидур, тақсир. Худои таоло даргоҳидур.

— Ол-а, эшон, ол-а! Ислом дини Туркистонга VIII асрда келди, VIII асрда! Ислом Туркистонда ўн асрдан зиёд ҳукмронлик қилди, ўн асрдан зиёд! Бўлди, етар энди! Энди Улуғ Ўрусиya ҳукмронлик қиласи, Улуғ Ўрусиya! Улуғ Ўрусиya Молия вазири Вишнегородский жаноблари нуқтадонлик ила башорат этганларидай, Туркистон — Ўрусиya тожидаги олий қиммат дур бўлади! XIX аср — Улуғ Ўрусиya асли бўлади!

— Қадамларига ҳасанот, тақсир, қадамларига ҳасанот. Аммо-лекин масжидимизни тўпон этсалар, мўмин-мусулмонлар қаерда фасоҳат ҳам балоғат сабоғин оладурлар, тақсир?

— Ўрис-тузем мактабларида сабоқ оласан! Петербургдан миссионер Остроумов жаноблари келмоқдалар! Миссионер Остроумов! Остроумов демак — нима демак, биласанми? Остроумов жаноблари ўз отлари ўзлари билан ўткир ақл соҳиби! Ўткир ақл соҳиби Остроумов ўрис-тузем мактаблари дастурил-амалини тузмоқдалар! Жаноб Остроумов ҳализамон ўз дастуриламали билан келиб қоладилар! Туркистонда ўрис-тузем мактаблари очадилар! Сен энди ўрис-тузем мактабларида Улуғ Ўрис имлосини ўқийсан! Сарт-собакача итдум имлонгни ёндириб ташлаймиз! Туркий тилларни йўқ этиб ташлаймиз!

— Бажонидил, тақсир, бажонидил, Оқпошшо ҳазратлари рушду хидоят этсалар, ўкурмиз. Аммо-лекин мўмин-мусулмонлар масжидида нафақат сабоқ оладурлар...

— Биламан, эшон, биламан! — чўрт бўлади генерал. — Энди... черковда тоат-ибодат этасан! Масжидларни йўқ этамиз — черковлар қурамиз! Ана, Тўхтамишхон нўғайлари! Нўғайлар Улуғ Ўрис черковларида чўқинмоқда! Бўлмаса, кимсан Тўхтамишхон авлодлари! Энди сени чўқинтирамиз!

— Бажонидил, тақсир, бажонидил. Оқпошшо ҳазратлари азму ихтиёр айлаганларидай бўла қолсин. Аммо-лекин аҳли ҳалқ қўзида Худои таоло даргоҳвни тўпга тутсалар, ҳалқ қарғайдур, тақсир, ҳалқ қарғайдур.

— Ҳалқ?!

— Шундай, тақоир, шундай. Ҳалқ қўлласа — бор бўладур, ҳалқ қарғаса — хор бўладур.

— Қанақа ҳалқ?!

— Ул мўлт-мўлт қора кўзлар оти — ҳалқдур, тақсир. Ҳалқ бор — ҳақ бор.

Генерал Скобелев димоқ-димоғида кулади.

— Ол-а, эшон, ол-а! — дейди. — Булар пода, эшон, пода! Булар олдин подадан одамга айланмоғи лозим бўлади! Одамдан оломонга айланмоғи лозим бўлади! Оломондан эса, ҳалқка айланмоғи лозим бўлади! Демак, булар ҳалқ бўлиш учун иккита-учта босқични босиб ўтмоқлари даркор бўлади! Биласанми, эшон, Улуғ Ўрусиya нима учун ёввойидан-ёввойи Осиёга ташриф буюрди? Манави сарт-собакаларни одамга айлантириш учун ташриф буюрди! Улуғ Ўрусиya олдида сарт-собакадан инсон яратишдай башарий ҳам савоб иш турибди! Улуғ Ўрусиya салтанати — ҳалоскор салтанат!

Генерал Скобелев кариллайди-кариллайди — тиззаси билан отини ниқтайди. Умархон эшондан беш-олти одим олислаб оёқ илади.

— Отишга шайлансин! — дейди. — Ётилсин! Намоз ўқилсин!

Ноғорачилар бодратиб-бодратиб ноғора чалади.

— Отилсин!

Худодаргоҳ кунпаяқун бўлади.

14

Бобомиз тоғда дала танлайди-танлайди — бинойидай дала тополмайди.
Бари ер кетмон кўрмаган ер бўлади.
Шунда, Курбон қорақирғиз ўз даласини беради.
— Ана, ол, ўзбак, — дейди Курбон. — Қорақирғизда дала бўлмайди. Дала ўзбакда бўлади.
Қорақирғизда мол бўлади. Қорақирғиз қир-адирда мол боқади. Ўзбак дашт-далада экин экади.
Бобомиз Курбон қорақирғизни қуруқ қўймайин дея, қўйин ковлади.
Курбон қорақирғиз бобомиз билагидан ушлайди.
— Тек ўтири, ўзбак, тек ўтири, — дейди. — Ўзбак қўйнида бўлди нима, қорақирғиз қўйнида бўлди нима.

15

Бобомиз узун кун кетмон чопади. «Бўлди, энди Оқиодшо йўқ бўлди». Бобомиз ана шундай ишонч билан кетмон чопади. Бобомиз олам бехабар бўлади.

16

Оқподшо қадамба-қадам кўради. Адирма-адир кўради. Қирма-қир кўради.
Тоғлаб-тоғлаб кўради.
Охир-оқибат — бобомиз даласини топиб келади.
Бобомиз аланг-жаланг бўлиб қолади. Бобомиз довдираб-довдираб қолади.
Аммо сир бой бермайди. Мезбон мисол бош иргаб тура беради. Мезбон мисол қўл қовуштириб тура беради.
— Отинг Жамолиддин кетмон-а? — дейди Оқподшо.
Бобомиз ҳа, дейишини-да билмайди, йўқ, дейишини-да билмайди.
Оқподшо бобомиз қўлларини кетига қайириб бойлади.
Ана шунда бобомиз Оқподшо кетида турмиш Холиқул мингбоши тилмочини таниб қолади.
Тайин, мени шу Асхал нўғай ушлаб бердиёв, дея ўйлади.
— Сенга нима эди, нўғай? — дейди бобомиз. — Сен тўққиз қайтганга нима эди?
— Мен бир тилмочман, Кетмон, кул тилмочман.
— Шу кунингдан кўра, кет юртингга, тўққиз қайтган, кет!
— Қозон Фарғонадан-да қул, Кетмон. Оқподшо бобомиз кетидан милтиқ ўқталиб-ўқталиб юради.
Бобомиз шудгор оралаб юради.
Оқподшо-да шудгор оралайди.
Ана шунда бобомиз бардоши дош беролмайди. Ғазабнок қайрилиб қарайди.
— Ай, кофир! — дейди. — Бир даламни ҳаром қилдинг! Энди бу даламни-да булғама!
— Нима-нима?
— Даламни қадамлаб булғама, дейман! Оқподшо анграяди-анграяди — бир нима-да англамайди. Ер анграйиб қарайди. Ерда тупроқдан бошқа нима тополмайди.
Оқподшо ердан бир сиқим тупроқ олади.
— Ана тупроқ, мана тупроқ! — дейди. — Бўрсилдоқ тупроқ, мағиздор тупроқ, ҳосилдор тупроқ! Тупроқмисан-тупроқ! Аммо бу тупроқ сеники эмас, чучела, сенинг тупроғинг эмас!
Бобомиз кўнгли бир увишиб олади.

«Оқпошто билибди, Қурбон қорақирғиз даласилигини билиб қолибди, — дея хаёлланади. — Бирөвнинг моли мол бўлмайди деб шуни айтадилар-да».

Шундай бўлса-да, бобомиз қўрқкан олдин мушт кўтарар қиласди:

— Менини бўлмай, кимники бўлади? — дейди.

— Бу тупроқ...

Оқподшо гапини тополмай қолади. Кетига қайрилиб қарайди. Бармоқларини қирс-қирс ўйнатиб, йўлдошидан сўрайди:

— Духовский, кунпаяқун масжид олдида генерал Скобелев жаноблари бир бало вазир деятиб эдилар...

— Эсимда йўқ, Назаров, эсимда йўқ, — дея елка қисади йўлдоши. — Ҳа, ўша-да! Пошто ҳазратлари айтди, деб қўявер. Бу чучелалар нимани билади.

— Ўзи... пошто каттами, вазир каттами?

— Генерал Скобелев жаноблари айтган бўлсалар, албатта вазир катта-да!

Оқподшо тағин бобомиз билан юзма-юз бўлади. Салмоқлаб-салмоқлаб баён этади:

— Гап лўндаси... Швеция вазири Фалончиев жаноблари айтганларидаи, бу тупроқ Ўрусиya тожидаги олий қиммат дур, ҳа, дур! Асло, асло сенинг тупроғинг эмас!

— Лаббай-лаббай?

— Сен бундай қаймоқ тупроққа ярашмайсан!

— Нима-нима?

— Чунки сен чучеласан, чучела!

— Сарт-собакасан, сарт-собака!

— Биз сен сарт-собакаларни Ўрусиya жўнатамиз!

— Ўрусиyaда сенинг башарангдай қоратупроқ бор. Сен ана ўша қоратупроққа ярашасан!

— Қоратупроқ — сарт-собака... Сарт-собака — қоратупроқ... Жуда ҳамоҳанг!

— Ўзи, бу чучелалар қандай қилиб бундай қаймоқ тупроқда яралиб қолди, Духовский?

— Айтгилиги йўқ, Назаров, айтгилиги йўқ. Шундай тупроқда шундай сарт-собакаларни яратган худогаям қойил эмасман.

— Қўявер, Духовский, бу тупроққа энди Улуғ Ўрис ҳалқи келади!

— Биламан, Самарадан икки юзта ўрис мужик кўчиб келади.

— Бизнинг Саратовдан бир юз элликта ўрис мужик келади.

— Мужикларимиз ҳадемай поезддан тушади!

— Энди бу қаймоқ тупроқда Улуғ Ўрис ҳалқи дехқончилик қиласди!

Бобомиз нафаси ичига тушиб кетади. Бобомиз ғарифона-ғарифона қадамлайди.

— Жамолиддин кетмон, намозингни ўқиб оласан-а? — дейди Асҳал нўғай. — Пешин намозингни ўқиб оласан-а?

Асҳал нўғай бош иргай-иргай шундай дейди. Асҳал нўғай бот-бот шундай дейди.

Асҳал нўғай Оқподшога юз солади.

— Бир мўмин банда намозини ўқиб олсин? — дейди.

— Ҳайда-ҳайда! — дея жеркийди Оқподшо.

— Кунпаяқун масжид жойида черков пойдеворини ташладик. Черков битсин, черковда намоз ўқиади! — дейди Оқподшо.

— Тоат-ибодатни қанда қилиш ёмон, — дея сарғаяди Асҳал нўғай. — Худо йўлда бирор кор-ҳолга гирифтор этади.

Оқподшо сергакланади. Оқподшо теварак-бошга назарланади. Оқподшо ҳадикланади.

— Майли, худо йўлида бўлса, майли, — дейди Оқподшо.

— Худо йўлида қўлларини бир бўшатиб олинг, — дейди Асҳал нўғай. — Қўлсиз намоз ўқиб бўлмайди.

Оқподшо бобомиз қўлларини озод этади. Бобомиз обтовадан таҳорат олади. Бобомиз қибла

тараф белбоғ ёяди.

17

Оқподшо ёнғоқ остилаб соялайди.

Милтиклари ўнгларида туради. Бош кийимлари чапларида туради.

Оқподшо бобомиздан күз узмай соялайди.

Асҳал нўғай бир бобомизга қарайди, бир Оқподшога қарайди. Қамзулини ола-ола, бобомиз тараф одимлади.

— Ҳа, йўл бўлсин, нўғай? — дейди Оқподшо.

— Мен ҳам намозимни ўқиб олайн, жаноблар, — дейди Асҳал нўғай.

— Сен чўқинтирилмаганмисан?

— Худога минг қатла шукур, мусулмон фарзандиман.

Асҳал нўғай бобомиз қабатидан камзул тўшайди. «Оллоҳу акбар»... дея, қулоқ қоқиб бошлайди.

Бир сўз намоздан бўлади, бир сўз амалдан бўлади:

— Қулоқ сол, Кетмон, қулоқ сол, — дейди. — Оқподшо мулла Намоз билан муҳорабачиларни қидирмоқда.

— Мени ким айтди?

— Бирор айтмади. Оқподшо эркак зотини ушлаб қамаяпти.

— Қамаса-қамар.

— Оқпошшо осий бандаларни осиб ўлдирмоққа ҳукм қилди. Ибрат бўлсин учун бутун халқ олдида осадилар. Битта шаҳид ўрис жони учун ўнта ўзбакни осадилар. Алҳол, сенга-да шул ҳукм жорий этилади.

— Менинг қўлим қон эмас.

— Унда, Ўрусијага сургун этадилар. Ҳали, анавилар сени қоратупроққа жўнатамиз, дейдилар. Шу гапда жон бўлади. Икки юздан ошиқ забардаст ўзбакни ичкари Ўрусијага сургун этадилар.

Бир сўз намоздан бўла беради, бир сўз амалдан бўла беради:

— Энди мен нима қиласин?

— Қоч.

— Бола-чақамни ташлаб қаёққа қочаман?

— Бошинг оққан тарафга қоч.

— Анавилар кўз узмайди, қандай қилиб қочаман³

— Ўзингни сойга от. Жойингдан турма-да, сой тубигача юмалаб-юмалаб бор. Бет-бошинг ёрилади, оёқ-қўлинг лат ейди. Алҳол, омон қоласан. Бўл-бўл.

Бобомиз бирдан сой тараф чопади. Мисоли сувга калла қилмишдай — ўзини сойга отади. Оқподшо ҳаяллаб келади.

— Тўхта, отаман, тўхта! — дейди.

Оқподшо қасур-қусур юмаламиш тошларни кўзлаб милтиқ бўшатади.

Оқподшо сой ёқалаб чопади-чопади — сой энажак сўқмоқ тополмайди.

Бобомиз тошлар билан юмалайди-юмалайди — ёввойи бодомлар аро ғойиб бўлади.

18

Бобомиз тоғ ёналаб энади-энади — Исфарада манзил олади.

Исфарада-да Оқподшо бўлади.

Фарғона бобомизга торлик қилиб қолади.

Бобомиз Оқподшо йўқ юрт излаб юради-юради — Душанба келади.
«Тили бошқа асло эл бўлмайди».
Бобомиз ана шундай ўй билан тағин йўл олади.
Юради-юради — Денов келади.
Денов беклиги Бухоро амирлигига бўлади.
Бобомиз Деновни макон этади.
Кузи билан мардикорлик қиласиди.
Қишида одам ёллайди— Фарғонадан бола-бақрасини олдириб келади.

19

Бобомиз бола-бақраси омон-эсон Деновлаб келади.
Айби — тўнгич ўғли бир бошқа бўлиб келади.
Ана шу тўнгич ўғил Ақраб бизнинг отамиз бўлади.

20

Отамиз қоқ тунда тўшақдан туриб кетади. Соя-шарпасиз ташқарилайди. Гап-сўзсиз ташқарилайди.

Зим-зиё супада қўл кет этиб туради. Теваракка оқпошона-оқпошона боқиб сўзлайди:
— Сартлар! — дейди.

Оёқлари остида ётмиш косовни милтиқ қилиб пешлайди. Милтиқ пешлаб-пешлаб одамлайди.

— Чучелалар! — дейди.

Ховлини айланади-айланади — нарвондан томлайди.

Томда қишлоқ узра милтиқ ўқталиб-ўқталиб туради.

— Ётилсин! — дейди. Қишлоқдан итлар ҳуради.

Отамиз ит ҳурмиш тарафга милтиқ ўқталади.

— Ўчир, сарт-собака, ўчир! — дейди.

Қиблада ой бир оқариш беради, бир қорайиш беради.

Отамиз оқариш бермиш ойга милтиқ ўқталади.

— Йўқол, сарт-собака, йўқол! — дейди.

21

Бобомиз ташқаридан эшитилмиш овоздан уйғонади.

Қабатини пайпаслайди. Нима гаплигини пайқайди. Сапчиб ташқарилайди.

Бобомиз супада ҳайкал мисол қотади.

Ошхона тараф қулоқ тутади. Дарвоза тараф қулоқ тутади. Молхона тараф қулоқ тутади.

Овоз қаердан келаяпти — билолмайди.

Ой қорайиш беради.

Отамиз қорайиш бермиш ойга милтиқ ўқталади.

— Отилсин! — дейди.

Отамиз: «пуп-пуп-пуп», дея, косовдан тўп отади.

Бобомиз ана шунда отамиз қаердалигини билиб олади.

Оёқ учидаги нарвонни топиб олади. Оҳиста-оҳиста томлайди.

Томда ўрмалаб боради-ўрмалаб боради — отамиз кетидан маҳкам қучоқлаб олади.

Отамиз том ташлаб-том ташлаб йифлайди. Отамиз оёқ тираб-оёқ тираб йифлайди.

Бобомиз отамизни томдан күтариб туширади.

22

Отамиз эсини танигуничайин томма-том юради.

ИККИНЧИ БОБ

1

Мен Сурхони Ақраб қўлигул ўғли бўламан.

2

Отамиз қадамиш чўп ниҳол бўлади. Отамиз қарамиши даражат шифил-шиғил бўлади. Отамиз кесмиши ток шокила-шокила бўлади. Отамиз қирқмиш гул шода-шода бўлади.

— Минг қилса-да, отаси фарғоначи-да, фарғона-чи! — дейди эл.

3

Бир эрта Абил жарчи кўчама-кўча жар солади:

— ...Барча-барча ҳовуз бўйлаб борсин! Йўқсиллар ҳукумати билан кўришув бўлади!

— Ювуқсизлар ҳукумати дейдими? — дейди онамиз.

Отамиз онамиздан бетини буриб-буриб кулади.

— Дехқонқул! — дейди отамиз. — Ювуқсизлар ҳукумати десанг-да бўлади, Шўролар ҳукумати десанг-да бўлади!

Бизнинг Сурхон тарафда хўжалар бекалар отини атамайди. Бекалар-да хўжалар отини атамайди. Бир-бирларини ё қизлари оти билан атайди, ё ўғиллари оти билан атайди.

Отамиз билан онамиз бир-бирларини менинг отим билан атайди.

— Барча борадими, Дехқонқул? — дейди онамиз.

— Йўқ! Катталар боради. Шўролар майдалар билан гапиришмайди.

— Ана, эшитдинг-а? — дейди онамиз. Шундай бўлса-да, мен отамиз кетидан ияраман.

Отамиз мени жеркиб-жеркиб дарвозада қолдиради.

Мен дарвоза суюниб ўтираман. Отамиз йўлини қарайман.

Отамиз тушларда қайтади.

Мен отамиз қўлидан ушлаб тортаман.

— Айтинг, Шўро қандай одам, айтинг! — дейман. Отамиз қобоқ уюб ичкарилайди. Телпагини тастиллатиб кўрпача уради. Болиш ёнбошлаб ич тортади. Шип тикилиб уҳ тортади.

Мен отамиз пинжига кираман. Мен отамиз белбоғидан тортаман.

— Ота, айтинг! — дейман.

— Э, ўчир-е, энағар! — дейди отамиз. — Энди сен қолдингми, қаллани гаранг қилмаган?

Мен отамиз пинжида ёта бераман. Шунда, онамиз ичкарилайди.

— Қани, гапирсин қани, — дейди онамиз. Отамиз тағин миқ этмайди.

— Гапирсин-да энди, ювуқсизлар ҳукумати қандайчикин одам экан, гапирсин-да энди.

Ана шунда отамиз онамизга юз буради.

— Дехқонқул! — дейди. — Шўролар, биз тўнгич, сиз кенжасиз, дейди. Биз сизларнинг катта акаларингиз бўламиз, дейди. Шундай экан, сизлар бизга бўйсунишларингиз лозим, дейди.

— Яхши, мусулмончиликни билар экан.

— Дехқонқул! Гап мусулмончиликда эмас... Дехқонқул! Шуни ўнг қулоғинг билан-да эшитиб ол, чап қулоғинг билан-да эшитиб ол: қизил ранг — яхшилика олиб келмайди. Қизил ранг — одамни алдайды.

— Нима, ювуқсизлар ҳукумати қизил одам эканми?

— Эса-чи, қизил-да. Қнп-қизил. Тут шохига қистирилган яловигача қип-қизил. Омбор деворларига илиғлиқ сўзаналаргача қип-қизил. Қаёққа қарама— қизил, қизил, қизил...

— Қизил бўлса бўлар, бу кишига нима.

— Дехқонқул! Қизил ёмон-да, қизил ёмон. Боиси, қизил ранг — қон ранг! Қон ёмон, ёмон!

— Замон тинч бўлса, бўпти-да.

— Дехқонқул Қон рангдан ёруғлик тилама. Қон рангдан рўшнолик тилама. Қон рангдан паноҳ тилама. Қон ранг — жаллод ранг!

4

Шу кундан эътиборан отамиз бир бошқа бўлади-қолади.

Бир маҳалгачайин ухламайди. Ҳовли айланиб-айланиб юради. Кўча девор мўралаб-мўралаб юради.

Ётса-да, уйқусида гапириб-гапириб ётади:

— Қизил, кет қизил!.. — дейди.

Онамиз отамиз ҳолидан қайғуда қолади. Енгига пул қистиради. Фолчига йўл олади.

— Эркагингиз яъжуж-маъжуҷга йўлиқиби! — дейди Жарқин фолчи— Яъжуж-маъжуҷ бўлгандаям, улай-булай эмас! Қип-қизил яъжуж-маъжуҷ. Қизил яъжуж-маъжуҷга қизил товук сўйинглар!

5

Қизиллар қулоғи қирқта бўлади!

6

Кечаси билан учта Қизил кириб келади.

— Ҳали, қизилларни даф этиш учун қизил товук сўяр бўлдингми?.. — дейди.

Қизиллар отамизни олдига солиб кетади. Мен отамиз кетидан эргашаман. Онамиз қўлимдан тортиб қолади.

7

Отамиз уч кундан кейин қайтиб келади.

Одатича — этиги пойларини қўли билан сугурмайди.

Ўнг оёғини бир тараф силкийди — ўнг пойи ўша тараф бориб тушади.

Чап оёғини бир тараф силкийди — чап пойи сандиқ остига бориб тушади.

Пайтавалари чувалаб-чувалаб қолади.

Кўкси билан кўрпача ташлайди. Болиш қучоқлайди. Бетларини болиш ботиради.

— Бир жойи оғрияптими? — дейди онамиз.

— Дехқонқул! Мен сенга айтиб эдим-ку, қизиллар эл бўлмайди, деб. Энагарлар мени Юрчига олиб борди. Юрчининг қўргонида қароргоҳи бор экан. Оқчурин дегич каттаси бир тергамоқлик қилди-е, бир тергамоқлик қилди-е! Қизиллар шаънига тагин бир ёмон гап қилсанг,

Сибир сургун бўласан, деди. Бир-иккита қоғозга бармоқ бостириб олди.

— Сибири қаерда бўлди?

— Ким билади, қаерда бўлди.

Мен отамиз этикларини териб-териб оламан. Бўсағада жуфт-жуфтлаб кўйман.

Пайтаваларини йиғиб-йигиб оламан. Этикларига ўраб-ўраб соламан.

— Дехқонқул! — дейди отамиз. — Энди қизиллар мени қўймайди.

— Энди қайтади, Дехқонқул?

— Энди кетаман. Ёмондан қоч-да қутул, ё, тон-да қутул, дейди.

Отамиз бир кечада йўқолади-қолади.

8

Мен тағин отамизни қидираман.

— Отанг бозор кетди, келади, — дейди онамиз. Мен энди онамиз кетидан ияраман. Онамиз бир одим босса-да, кетидан бораман.

Онамиз ҳовуз боради. Ҳовуз бўйида аёллар билан гурунглашади.

Аёллар бири қўйиб бири айтади.

— Бурноғи кеча тегирмон олдида иккита Қизилни бўғизлаб кетибди.

— Иккита-да гапми, Ҳайиткали жарида беш-олтитасини отиб кетибди.

— Ҳай, бир замонлар бўляяпти-да.

Онамиз кўзасини сув ботириб олади. Кўза елкалаб қайтади. Йўлда кўзиб дам олади.

Мен йўл бош-адоқ олазарак бўламан.

— Отам қани... — дея ингиллайман. Тўлиб-тошиб турмиш онамиз чўрт ёрилади:

— Иштонимни ичида! Эшилдингми? — дейди. — Манави иштонимни ичида!

Мен мана бўлмасам дейман-да, кўзадаги сувга тупуриб қочаман.

Онамиз кетимдан тош отиб қолади.

— Ҳа, ошингни ейин сен тентакни, ошгинангни ейин! — дейди.

Онамиз сувни тўкиб ташлайди. Тағин ҳовуз йўл олади.

9

Онамиз мени қарғаб-қарғаб ётқизади.

Мен онамиз рўмолини тортқилай-тортқилай ухлаб қоламан.

Бир маҳал эшигимиз ғижир-ғижир очилиб ёпилади.

Мен кўзимни очгани эринаман. Онамиз ташқарилаяпти, дея ўйлайман.

Ўн беш-йигирма кунда бир бор шундай бўлади.

Бир сафарида уйқум келмайин ётаман.

Онамиз оҳиста-оҳиста тўшакдан туради. Онамиз оёқ учиди-оёқ учиди айвонлайди.

Айвон тарафдан шивир-шивир эшитаман. Шивир-шивирда мени отим-да бўлади.

Гап-сўзларни алайна-алайна эшитолмайман. Аммо-лекин кўнглим туяди: ана шу шивир-шивирчи отамиз бўлади!

— Ота, ота! — дея лик этиб тураман. Онамиз ила-чила қайтади.

— Ҳа, нима, нима? — дейди. — Ота? Қани ота? Нима бало, эловраяпсанми? Ёт, ухла, ёт!

Онамиз бошимни силай-силай кетади. Онамиз бошимга кўрпани торта-торта кетади.

Мен тағин кўрпадан бошимни оламан. Кўзларимни катта-катта очаман. Пичир-пичир эшитаман.

— Мени қизиллар йўқламаяптими?

— Йўғ-а.

- Йүқласа, тоққа ўтинга кетиб эди, де.
— Ўзи қаерда юрибди?
— Ишинг бўлмасин.
— Нимага ишим бўлмайди? Ўлик-тиригини билайнинда.
— Ҳайиткални жарида ётибмиз.
— Жарда ётади?
— Аслида, тоғда ётамиз. Жарга кечаси келамиз.
— Тоғ қаерда, Ҳайиткални жари қаерда.
— Отни олдида нима дегич гап. Тоғдан Ҳайрондара энамиз. Ҳайрондарадан кейин Ҳайиткални жари-да.
— Бир ўзими?
— Бир ўзим қаёқда — ўнта жигит. Ўзимиздан Рашид бор. Бошқалари бошқа қишлоқдан. Ҳали тағин қўпаямиз. Теварак қишлоқлардан жигитлар келиб қўшилаяпти.
— Кечаси Ҳайиткални жарида нима қиласди-а? Уйгинасида, бола-бақрагинаси олдигинасида ётса бўлмайдими-а?
— Дехқонқул! Сен нимани биласан? Биз эл-юрт учун олишаяпмиз. Бирови-да Ҳайиткални жаридан тирик ўтолмаяпти. Ўтганини-да кўраман!
— Кимни айтаяпти?
— Қизилларни-да, кимни бўларди.
— Қизиллар Ҳайиткални жаридан ўтадими?
— Эса-чи. Деновдан Хўжасоатга келгич йўл Ҳайиткални жаридан ўтади-да. Бошқа иўл йўқ.
Шу жарда Қизилман, дегичини қонига белаяпмиз.
— Кўзига қарасин-да, қизилларда милтиқ бор, дейишади.
— Милтиқ бизда-да бор. Бир кечаси бешта Қизилни ўлдириб, пулемётини-да олиб олдик.
— Ишқилиб, кўзига қарасин, дейман-да.
— Дехқонқул! Кўзимга қарасам-қарамасам, Қизил зотини энасини жабдуқлайман!
— Кўп катта кетмасин.
— Дехқонқул! Катта кетсам-кетмасам, қишлоғимизга ўрис зотини ёнаштирмайман!
Пичир-пичир эшита бериб кўзим кетади.

10

- Тонглай айвон қарайман.
Айвонда кўрпа-тўшак бўлади — отамиз йўқ бўлади.
Мен ер тепиб-ер тепиб ингиллайман. Мен ер юмалаб-ер юмалаб ингиллайман.
Онамиз енгимдан олиб турғизади.
— Желакни кир қилдинг, қирғинни олдида қирилиб кетгур! — дейди. — Йўқ отани қаердан топаман? Сендан ота қарзим борми?
Мен ошхона чопаман. Сув тўла кўзаларга тупуриб-тупуриб қочаман.
Кетимдан отилмиш косов дарвоза тарақлаб тегади.

11

- Отамиз қачон келади, деб кун санайман.
Кун санай бериб, бармоқларим тақчил бўлиб қолади.
Кун санай бериб, кафтларим бармоқларим билан тўлиб қолади.

12

— Бўлди, энди қайтиб келсин. Анави Дехқонқули безорижонимни чиқарди, — дея пичирлайди онамиз.

— Бола бола-да, — дейди отамиз.

— Аёллар, эркагингиз босмачи бўп кетибди, шу чинми, дейди.

— Дехқонқул! Босмачи деманглар. Неча марта айтаман, босмачи деманглар деб.

— Бари аёл шундай дейди.

— Деса дея беради-да. Босмачи бўлиб, қайси юртни босиб олибмиз? Босмачи бўлиб, қайси элни талон-торож этибмиз? Дехқонқул! Босмачи дегич гапни улар ўйлаб топдилар.

— Кимлар?

— Кимлар бўларди — қизиллар-да. Кимлар бўларди — падар лаънат чўчқалар-да. Чўчқалар ўзлари юртимизга бостириб келди. Яна тағин, бизни босмачи деб атади. Падар лаънат чўчқалар ўзларини ёрликларини бизнинг пешонамизга ёпиштириди.

— Унда, бу киши ким бўлди?

— Мужоҳид! Билдингми? Мужоҳид!

— У нима дегани бўлди?

— Мужоҳид эл-юрт учун жиҳод этувчи одам бўлади. Эл-юрт йўлида шаҳид бўлиш учун шай одам бўлади.

— Ким билади, Дехқонқул, эл-юрт шундай деяпти-да.

— Дехқонқул! Эл-юрт қизиллар иғвосига учмасин. Мен қизилларни битта қўймай қираман. Омон қолмиш Қизилни қаердан келган бўлса — ўша ёққа қайтариб ҳайдайман. Эл-юрт ана ўшанда билади — мужоҳид ким, босмачи ким эканини. Ботар кунни отар тонги бўлади.

13

Бир оқшом дарвозамизда учта одам қора беради. Одамлар оstonамизда аланг-жаланг бўлиб туради.

Онамиз бет бекитиб-бет бекитиб пешваз боради.

— Қани у, туземец? — дейди бирови. Онамиз англамайди — ер боқиб тура беради.

— Мен сен чуркадан сўрайампан?

— Қани у, туземец, чурка?

— Ким-ким? — дейди онамиз.

— Босмачи эринг қани, деяпман?

Онамиз ана шунда англайди. Хиёл юз очади.

— Ҳа-а, отасими? — дейди. — Отаси тоғлаб кетиб эди.

— Қачон келади, туземец, чурка?

— Ўтин териб бўлса, келади-да. Келувчилар кет қайрилади.

— Ўзи бир туземец чурка бўлса, яна тағин бетини бекитади-я! — дейди.

14

— Келгичлар бирови Нормурод фаол бўлди.

— Дехқонқул! Шу энағарга айтиб қўй, қадамини тортса тортди, тортмаса, ўз қўлим билан калласини оламан.

— Ўзи, қизиллар қачон кетар эмиш?

— Дехқонқул! Қизиллар кетмайди, ҳайдамаса кетмайди. Кетмаса, ўзларини шўри. Бари Қизилни тутдай тўкаман. Қизиллар ўлигини ғожирларга ем қиласман.

— Бир Рашид босмачи билан икковини қўлидан нима келади.

— Дәхқонқул! Неча маротаба айтаман, босмачи дема деб. Босмачилар ана — қизиллар!

— Бари шундай деяпти-да, менда нима айб.

— Бари айтса-да, сен айтма. Чин, бизнинг қишлоқдан Рашид икковимиз, чин. Биз нима қиласылыш, бари дин-имонини сотаяпти. Бирори Шўро бўлаяпти, бирори фирмә бўлаяпти, бирори хосилот бўлаяпти. Дәхқонқул! Мен уларни жигит санамайман, Йўқ, жигит санамайман. Гапни ўроли келди, айтайнин... Улар хунаса! Ҳа, хунаса!

— Шундай дейишга уялмайдими?

— Бўлмаса, нима дейин? Кофир дейин десам — бари ўзбак бўзболалар. Ўзбак дейин десам — бари кофирлар йўлидан юрибди. Мусулмон бўп — мусулмон эмас, кофир бўп — кофир эмас. Бундайчиминларни ким дейди? Хунаса дейди-да!

15

— Бу сафар ҳаяллаб қолди?

— Кўлобда бўлдик. Иброҳимбек қўрбоши ҳазратлари қўлида машқ олдик.

— У киши ким бўлди?

— У киши ислом лашкари сорбони бўладилар.

Иброҳимбек ҳазратларини қўрбошимиз десак-да бўлади, амиримиз десак-да бўлади. Боиси, амиримиз ўз жойларига Иброҳимбек ҳазратларимизни тайинлабдилар-да, ўзлари Афғонистон сари сипориш берибдилар. Худо хоҳласа, Иброҳимбек ҳазратимиз сорбонлигига бари ўрисни битта қўймайин қирамиз.

— Кўлобга бир ўзи бордими?

— Йўқ! Элликтacha жигит бўлиб бордик. Иброҳимбек ҳазратимиз қароргоҳида туркий лашкарбошилар машқ берди. Ай, бир барлос жигитлар машқ оляяпти, ай, бир барлос жигитлар машқ оляяпти! Жигит эмас — лочин, лочин! Иброҳимбек ҳазратимиз барлослари олса олади — асло олдирмайди!

16

Тағин кун санайман.

Тағин бармоқларим тақчил бўлиб қолади. Тағин кафтларим бармоқларим билан тўлиб қолади.

17

Тунлардан бир тун ташқарида тапур-тупур бўлади.

Амрлар эшитилади:

— Қимирлама, отаман!

— Қаддингни кўтар!

— Қўлингни бер!

— Типирчилама!

Шунда, отамиз овози-да келади:

— Рашид айтди-я, шу кеча уйингга борма, деди-я! Рашидни гапини олмадим-а, ай, аттанг-а!

Онамиз отилиб ташқарилайди. Овоз бериб йифлайди.

— Эй, моча! — дейди бирор. — Ўчир, бўлмаса сениям бойлаймиз!

Ҳаминқадар тала-тўп бўлади. Ҳаминқадар дўқ-зуғум бўлади.

Ташқари бирдан ёришади.

Мен ана шунда ташқарилайман.

Ташқарыда құша фонус ёнади.
Құллари қуллиғлик отамиз супада ётади. Бет-боши қон отамиз ғужанак ётади.
— Успенский, Полторацкий! Отни олиб келинглар! — дейди бирор.
Бир фонуслык чопқиллайды. Күчадан от етаклаб келади. Супа олдидә бел қилади.
Амр этувчи отамиз бўйнидан эгар қошига арқонлайды.
— Ҳайда! — дейди. От кўча йўл олади.
Отамиз от кетидан оёқ тираб-тираб одимлайды. Ўзини кетига ташлаб-ташлаб одимлайды.
Девор суюниб турмиш онамиз тағин овоз бериб йиглайды.
— Эй, моча чурка, мен сенга ўчир деяпман! — дейди Успенский.
Онамиз дами ичига тушиб кетади.
— Чанишев! — дейди отамиз. — Манави чўчқаларингга айт, пошикаста-заифаларни ундейчикин сўкмайдилар!
— Сўкаётганим йўқ, — деди Успенский. — Мочани моча дейди-да. Сен ҳанги чурка, заифанг моча чурка! Юртинг — Чуркистон!
— Ундей дема! Туркистон де, Туркистон! Мен Ўрусијангни Чўчқаистон деётганим йўқ!
— Ўзи, Туркистон номи нимадан олиб айтилади, Полторацкий?
— Турк сўзидан олиб айтилади. Туркийлар макони, деган мазмун беради.
— Ҳа-а. Сея чурка туземец ўзингни буюк туркийлар деб биласанми? Буюк туркийлар...
Буюк Туркистон... Сассик чуркалар! Сассик Чуркистон! Ана, сен кимсан!
— Ўзи бир чурка туземец бўлса, Туркистон, туркийлар деган пўрим-пўрим гапларни қаердан билади, Колесов?
— Анави Ҳисор тарафларда турк офицерлари итдай изғиб юрибди. Ана ўшалар ўргатаяпти.
— Анвар пошони асфаласофилинга жўнатганимизга ўн икки йил бўлди-ю?
— Қаланги-қасанғилари ҳамон дайдиб юрибди.
Онамиз отамиз кетидан эргашиб боради. Ҳик-ҳиқ этиб боради.
Мен онамиз кетидан эргашиб бораман. Инг-инг этиб бораман.
Олдинма-кетин катта йўллаб келамиз.
Катта йўлда тағин иккита отлик бўлади.
Қизиллар ана шу манзилда оёқ илади.

18

— Чанишев! — дейди отамиз. Бир кун бўлмаса, бир кун сен суллоҳ келишингни билиб эдим. Айнан сен суллоҳни келади, деб ўйлаб эдим. Ўйлаганим бўлди, Чанишев!
— Ҳа, нима дейсан, нима? — захрини сочди Чанишев.
— Чанишев! Мен шу қишлоғимизга қадам қўяман дегич ўрис қонини ичдим. Олисдан кўрдим — отдим, яқиндан кўрдим — сўйдим. Ай, аттанг-а, қўллик бўлиб қолдим. Мен ўрис зоти қонини қолдирмайин ичаман деб эдим.
— Ичолмас эдинг. Босмачи зотини таг-томири билан қириб ташлаш учун бир юз олтмиш минг Қизил Қўшин бўлиб келиб эдик. Бир юз олтмиш минг оврупocha қуроллик сара лашкар-а!
— Қўллик бўлмаганимда, бир юз олтмиш мингини-да қонини ичар эдим! Чанишев! Бир ушлаш бўлса — ушладинг. Бўлар иш бўлди. Энди, қўлларимни қўйбер.
— Сендан қўрқулик, Ақраб, қўрқулик!
— Чанишев! Қўп қўрқа берма. Мана, эгар қошига қўй кўганлагандай кўганлаболдинг. Энди қаёққа-да борар эдим.
— Лазаревич, Фонштейн! Қўлини қўйиб юборинглар!
Қизиллар отамиз қўлини қўйиб юборади. Отамиз уюшиб-уюшиб қолмиш қўлларини ёйиш учун қулоч отиб-қулоч отиб олади.

Шунда, қизиллар ёппа барака милтиқ ёпишади.

— Ай, Чанишев-ай! Түккіз қайтган-ай! — дея кулади отамиз. — Юракдан-да бор экан-да!
Шу юрагинг билан мени ушлагани келдингми-а? Ақраб құрбошини-я? Ай, энағар нұғай-а, ай, занизар нұғай-а!

— Сүкма, туземец!

— Чанишев! Сен ким? Айт, сен ким? Нұғай мусулмон фарзанди. Сен мусулмон фарзанди бўла туриб, манави ўрислар гапига кириб келдинг. Ўрислар менинг калламни ейиш учун сен нұғайларни бекорга танламади. Боиси — ўзбак билан нұғайнини тили бир, дини бир, урф-одати бир. Билсанг — сен нұғай ўзингта ўзинг милтиқ ўқталиб келдинг! Энди айт, туземец менни ё сен түккіз қайтган нұғайми?

— Мен сен билан ҳарбий судда гапиришаман. Ақраб құрбоши! Рудзутак, йўл ол!

Қизиллар Денов тараф жилов буради, Ана шунда қизиллардан бир соя айрилиб қолади. У Нормурод фаол бўлади.

— Чанишев! — дейди отамиз. — Бир оёқ ил! Анави хунасага айттар гапим бор!

Қизиллар оёқ илади.

— Ай, Нормурод хунаса! — дея кет бурилади отамиз. — Сен мени ўрисларга ушлаб бердинг! Илойим, қариган чоғингда тентак бўл, аёлингни уч талоқ қўй, элга эрмак, халқка шалоқ бўлиб ўл, оллоҳу акбар!

19

Тун кўройдин бўлади.

Қиблагоҳда Керагатоғ оппоқ-оппоқ оқариш беради.

Чанишев тог хушрўйидан ҳузурланади.

— Бай-бай-бай! — дейди. — Ана жамол, мана жамол! Биз энди бу жамолистонни Ўзбакия деб атаймиз, Ўзбакия!

— Туркистон яхши эмасми?

— Йўқ, Ўзбакия деймиз, Ўзбакия. Ўртоқ Ленин Туркистонни Ўзбакия деб атаймиз, деб эдилар. Ўртоқ Ленин сўзи сўз, гапи гап! Биласанми, ўртоқ Ленин нима учун Туркистонни йўқ қилиб, Ўзбакия деб атамоқчи эди? Туркистон — туркий халқлар ота юрти. Шундан туркий туземецлар оталари юрти Туркистон учун қўлларига курол олмоқда. Туркий туземецлар оталари юрти Туркистон учун жонларини тикмоқда. Ана шу Туркистонни йўқ қилиб ташласак, туркий халқлар қайси отлик ота юрт учун жиҳод қиладилар! Бундай дохиёна ғоя факат Лениндан келади!

Отамиз ўнг қабатида иккита Қизил боради. Отамиз чап қабатида иккита Қизил боради.

Отамиз олдида Чанишев боради.

Фонулар лоп-лоп этиб боради.

Мен пешонамни онамиз таззасига нуқиб-нуқиб ҳиқиллайман.

— Эна, эна!.. — дейман.

Мен юзларимни онамиз қўлларига босиб-босиб ҳиқиллайман.

— Кетди, отам кетди!.. — дейман.

— Кўрдим... — дея озурда бўлади онамиз. — Кўрдим, отанг кетди...

Онамиз ўқсиб-ўқсиб йиғлайди. Онамиз увв-увв йиғлайди.

Онамиз овоз қўйиб йиғлайди — демак, хавф-хатар олислайди. Демак, энди қўрқмаса бўлади.

Шу боис, отамиз кетидан йўл олиб йиғлайман.

— Ота-а-а! — дейман. Отамиз қайрилиб қарамайди. Фонулар лоп-лоп этиб боради.

Қизиллар отда бўлсалар-да, милтиқ ўқталиб-ўқталиб боради.

Отамиз Қизил милтиқ тифида кетади.

Мен отамиз кетидан чопаман. Пилдир-пилдир чопаман.

— Ота-а-а!

Яланг оёқларим ерга тегиб-тегмай чопаман. Ана-ана етажак бўламан.

— Ота-а-а!

Жон-жаҳдим билан чопаман. Шунда, бетим билан ер учаман. Кафтларим билан ер бориб тушаман. Забтим билан бир-икки бор юмалаб оламан. Жойимдан турайин дейман — туролмайман.

Отамиз Қизил милтиқ тифида кетади.

Ерда ётмиш кўйи отамиз кетидан қарайман.

— Ота-а-а!

Фонулслар лоп-лоп этиб боради.

— Ота-а-а!

Отамиз Қизил милтиқ тифида кетади.

20

Отамиз чимзор оралаб боради.

Отамиз буғдойзор оралаб боради.

Буғдойзор адоги дарёча оқади.

Дарёча адок соҳили Сайрак қишлоғи бўлади. Дарёча қибла соҳили Хўжасоат қишлоғимиз бўлади.

Отамиз Қизил милтиқ тифида боради-боради — ана шу дарёча бўйида оёқ илади. Чап елкаси оша қиблагоҳда қолмиш қишлоғига боқади.

Боқади-боқади — ботинан-ботинан инқиллаб-инқиллаб олади.

Қизиллар отамиз чап елкасига милтиқ билан туртади.

— Олга, олға! — дейди.

Отамиз энди ўнг елкаси оша боқади. Боқади-боқади — хўрсиниб-хўрсиниб олади.

— Дехқонқул-ай! — дея овоз беради.

Отамиз онамизни йўқладими? Отамиз мени йўқладими? Мени йўқласа — нима учун йўқлади? Мен гўдақдан ҳимо тиладими? Мен ушоқдан паноҳ тиладими? Ушоқ ўғлон қўлидан нимада келади?

Қизиллар отамиз чорловини ўзларича йўяди. Мазкур буғдойзорда босмачилар бор, дея йўяди. Ана, Ақраб қўрбоши босмачиларни йўқлаяпти, дея йўяди.

Қизиллар апил-тапил буғдойзор милтиқ буради.

Аммо отамиз йўқламиш Дехқонқул... босмачидан шовур бўлмайди.

— Дехқонқул-ай!

Қизиллар ҳаминқадар жонсарак бўлади. Тап-тап отдан ташлайди. Шарақ-шарақ милтиқ ўнглайди.

— Дехқонқул-ай, Дехқонқул!..

Дехқонқул дегич... босмачидан ҳамон шовур бўлмайди.

Ана шунда отамиз Ақраб қўрбошилигини қилади!

Лик этиб от миниб олади. Тиззалири билан никтайди.

От жойидан забт олади. Аммо ўн-ўн беш қадамда бирдан тис бўлади. Жойида ер тепинади.

Боиси — юган учи ерда ётмиш Қизил билагида бўлади.

Қизил юган учиди судралиб-судралиб боради. Қизил бақириб-бақириб боради:

— Ақраб, агар қочсанг, болаларингни отамиз! Ақраб, болаларингни битта қўймай отамиз!..

Отамиз «бола» сўзидан кейин забтидан қайтади. Отамиз «бола» сўзидан кейин ниятидан кечади. Қизил сапчиб туради. Отамиз оёғига ёпишади. Отамиз Қизил кўкракка оёқ қўяди.

— Осилма! — дейди. — Ўзим тушаман!
Қизиллар отамизни ўраб олади.
Қизиллар юрак ҳовучлаб-юрак ҳовучлаб туради. Отамиз ана шу вазиятни англаб олади.
Отамиз ана шу вазиятдан келиб айтади:
— Дарё бўйини олиб ётасизлар, деб эдим, — дейди. — Булар бошқа жойни олибди-да.
Отамиз шундай дея-дея, теварак-бошга олазарак-олазарак боқади.
— Кимни айтаяпсан? — дейди Чанишев.
— Кимни бўласди — жигитларимни-да.
— Сен бизнинг келишимизни билиб эдингми?
— Чанишев! Сен мени ўзингдайин бир тўпори кофир деб ўйлаб эдингми? Эса-чи, билиб эдим, эса-чи. Жигитларимга дарё ёқасида ангниб ётинглар, деб тайинлаб эдим.
— Жигитларинг энди қаерда қарайди?
— Қаерда бўларди — худони бир ерида-да. Ҳали йўлимизда Ҳайиткални жари келади.
Анбарсой келади, Қизилсув келади...
Қизиллар йўлларида давом эттишларини-да билмайди, қишлоққа қайтиб боришларини-да билмайди.

21

Отамиз ана шунда гап индаллосидан олади:
— Чанишев! — дейди. — Ўзи, мени қаёққа олиб кетаяпсан?
— Юрчига.
— Ундан кейин-чи?
— Тошканга.
— Тошкандан кейин-чи?
— Ўрусиya.
— Ўрусиya олиб бориб нима қиласан?
— Ўрусиyaда суд бўласан.
— Чанишев! Суд-буд, деб ўтирма-да, жигити гапни айт: Шўро ҳукумати мени нима юилади?
— Нима қиласади, суд кесади.
— Нимани кесади?
— Каллангни кесади!
Отамиз Чанишев гапидан рози бўлади.
«Жигити гап бўлди, — дея ўйлайди. — Бўлмаса ўз оёғи билан қассобхонага боражак молдай бўп кетаберар эдим».
— Чанишев! — дейди отамиз. — Худодан-да ўтди, бандадан-да ўтди.
— Ўтди, Ақраб қўрбоши, бари ўтди
— Худо билибми-билмайми, сен ўрисларни юртимизга ҳайдаб келди...
— Бари ўтди-кетди, Ақраб қўрбоши. Энди биз сенга тўнгич ака бўламиш. Сен эса бизга кенжак ука бўласан.
— Худо билибми-билмайми, биз мусулмонлар қўлига милтиқ берди. Ўрисларни от, деди.
— Бари ўтди, Ақраб қўрбоши, биз ака-ука бўламиш.
— Ака-ука бўласан? Чанишев! Ўзи, кофир ўз оти билан кофир экан-да! Мусулмон билан кофир қачон ака-ука бўлиб эди-да, энди бўлади?
— Бўлади, мана биз бўламиш. Шарқда яхши-яхши шарқона урф-одатлар бор. Масалан, Шарқда кичиклар катталарга итоат этади. Шундай экан, сен бизга итоат этасан.
— Чанишев! Ўлсам ўламан — лекин сен ўрисларга ука бўлмайман!
— Бўласан, шундай кун келади, бўласан. Акайам гапми, ҳали Ленинни отам дейсан.

Крупскаяни онам дейсан.

- Чанишев! Ўлсам ўламан — лекин сен ўрисларни акам демайман!
- Дейсан, шундай кун келади, дейсан. Дейиш ҳам гапми, ҳали каллаи саҳарлаб ассалом, катта акам, дея ашула айтиб салом берасан.
- Мусулмон билан кофир бу дунё тугул, у дунёда-да эл бўлмайди. Боиси, мусулмон мозорга кофирни кўмиб бўлмайди, кофир мозорга мусулмонни кўмиб бўлмайди. Шундай экан, мусулмон билан кофир у дунёда-да ака-ука бўла олмайди.
- Бўлади, ўртоқ Ленин ғоялари шундай, бўлади.
- Унда, ўша Ленининг қушмия одам экан!
- Ўртоқ Ленинга тилингии теккизма, туземец!

22

— Чанишев! Айб сенда-да бўлмади, айб менда-да бўлмади. Бари Худодан бўлди! Чанишев! Сендан тилаяжак бир тилагим бор. Ана шу тилагимни бажо келтир. Ана шунда, сен-да болабақранг олдига борасан, мен-да бола-бақрам олдида қоламан.

- Айт, айт қани?
- Сен олдин, бажо келтираман, дея сўз бер. Ана ундан кейин айтаман.
- Сўз бераман! Ана, энди айт.
- Чанишев! Мени мана шу ерда от!
- Қаерда-қаерда?

Отамиз ўнг оёги билан ер тепиб-ер тепиб айтади:

- Мана! Мана шу ерда от!
- Кизиллар бир-бировига қараб-қараб олади. Кизиллар калла чайқаб-калла чайқаб олади.
- Чанишев! — дейди отамиз. — Мен ўзбакман, ўзбак! Ўзбак қаерда таваллуд топади — ана ўша ерда умр кечиради! Чанишев! Балиқ жаннатмакон соҳилда бўлса-да, ўлиб қолади. Балчиқдан-балчиқ сув бўлса-да, ташлаб юборса бўлди — тағин тирилади-қолади. Чанишев! Ўзбак-да ана шундай! Ўзбакка жаннатмакон-да татимайди. Ўзбак жаннатмаконда-да ўз эл-юртими қўмсаб-қўмсаб адo бўлади. Ўзбак жаннатмаконда дўзахмакон пахтазорини қўмсаб-қўмсаб қайтиб келади.

- Хўп, борайлик қани.
- Чанишев! Ўзбак қаерда таваллуд топади — ана ўша ерда ўлади! Ўзбак ўз эл-юртида ўлади! Ўзбак ўз ўлан-тўшагида ўлади! Ўзбак — ана шундай ўзбак!
- Ўлимга маҳкум учун ерни фарқи нима, туземец, — дейди Успенский.
- Ўрис! Чин, сен учун фарқи йўқ, чин. Қаерда хушхаво табиат бўлади — ўша ер ўрис учун юрт бўлади. Каерда қорни тўяди — ўша ер ўрис учун юрт бўлади. Ўрис — ана шундай ўрис!
- Эл-юрт, эл-юрт дейсан, ўзи, Ўзбакияда сени кўмиш учун эл-юрт қолдими? — дейди хиринг-хиринг кулади Успенский. — Икки милён босмачи қириб ташланди, дейишаётib эдими, Рудзутак?
- Шундай, икки милён босмачи қириб ташланди, шундай, — дейди Рудзутак.
- Ана, икки милён эл-юртинг асфалософилинга сафар қилиби.
- Топилади! — дейди отамиз. — Бир мени ўраб-чирмаб кўмажак эл топилади. Ўзбак элини қириб адo этолмайсан. Ўзбак эли — катта эл.
- Ҳали тағин қирамиз! — дейди Колесов.
- Асфалософилинда туркий туземецлар учун тағин милёнта жой тайинлаб қўйдик, — дейди Успенский.
- Ўрис! Сен ана шундай ўласан! Ўрис қаерда ўлади — ўлиги ўша ерда қолади. Ўрис учун ўлар ери мозор бўлади. Мозорига бир хоччўп қадаб кетади — бўлди! Ўрис! Ўзбак қаерда ўлади

— ўлигини ўз эл-юртига олиб келади. Ўзбак ўлигини ўз қиблагоҳига кўмади. Ўзбак ўлигини ўз бош-тожига кўмади. Шу боис, ўзбаки қабристон қиблагоҳда бўлади!

— Хўп, олдин борайлик, бир гап бўлар, — дейди Чанишев.

— Чанишев! Сен мени Ўрусиyaга олиб борасан-да — пақиллатаб отиб ташлайсан. Қайси бир ўрага кафансиз кўмиб ташлайсан. Ватан гадоси — кафан гадоси бўлиб ўламан. Кафансиз ўлигимни ким эл-юртимга олиб келиб кўмади? Кафансиз ўлигим ит ўлиқдайин Ўрусиya қолиб кетади! Ана ундан кейин, бола-бақрам мени қаерлардан йўқлаб йиғлайди? Бола-бақрам қаерларга бориб отамлаб йиғлайди? Бола-бақрам қайси мозорим бошига бориб йиғлайди? Бола-бақрам улуғ айём кунларда қайси мозоримга чироқ қўяди? Шундай экан, отарман бўлсанг, мана, кўкрак — от! Лекин — ўз эл-юртимда от! Шахид бўлсам — ўз эл-юртимда шахид бўлайин! Шахидимни ўз эл-юртим кўмсин!

Ана шунда Чанишев отини қайиради. Отамиз билан муқобил бўлади. Чанишев мулзам бўлади!

— Ақраб қўрбоши, — дейди сокин-сокин. — Мен сени бир йўлтўсар деб эшитиб эдим. Бир каллакесар деб эшитиб эдим. Бир ваҳший деб эшитиб эдим. Инчунун, ўгриям деб эшитиб эдим! Сени мана энди билдим. Ақраб қўрбоши, сен асл жигит экансан, асл жигит!

Чанишев сукут олади.

— Ақраб қўрбоши, — дейди. — Ихтиёр менда бўлса эди, мен сени ҳозироқ озод этар эдим. Ихтиёр менда бўлса эди, мен сени ўзимга ўринбосар қилиб олар эдим. Минг афсус! Ақраб қўрбоши, мен — полковник Чанишев, давлат арбоби Куйбишев олдида отдан тушмадим, мен — полковник Чанишев, буюк саркарда Фрунзе олдида отдан тушмадим. Ақраб қўрбоши, мен — полковник Чанишев, Ақраб жигит олдида отдан тушаман!

Чанишев шундай дея, вазмин-вазмин отдан тушади.

Бир қўлида юган Чанишев отамиз қошида бош эпиб-бош эгиб туради.

— Жигит!.. — дейди Чанишев.

— Чанишев! Бир қадам-да босмайман! Мен мана шу эл-юртда жон бераман!

— Жуда бўлмаса, Юрчиғачайин борайлик, жигит?

— Чанишев! Ошингни еса-да, мард есин, бошингни еса-да, мард есин! Мана, кўкрак — ма!

23

Отамиз тиламиш талак бажо бўлади. Қизиллар шахид отамизни буғдойзорда ташлаб кетади.

24

Эл-юрт отамиз қони тўкилмиш тупроқни девор билан ўраб олади.

Эл-юрт отамиз жон бермиш тупроқ узра оппоқ ялов қадаб олади.

Эл-юрт Ақраб шахид пойидан ўта-ўта бир оёқ илиб олади.

Эл-юрт Ақраб шахид учун фотиха ўқиб-ўқиб олади.

УЧИНЧИ БОБ

1

Тонг саҳарлаб кўчалайман.

Шахдам-шахдам қадамлайман.

«Юр, туземец, юр!»

Күлларимни узатиб-узатиб қадамлайман.

«Үчир, чурка, үчир!»

Милтиқ пешлаб-милтиқ пешлаб қадамлайман.

Шунда, пешонамдан бир соя кела беради.

— Эб-эй, эб-эй, Дөхқонкул? — дейди соя. — Ай, Дөхқонкулмисан?

Милтиқ ўқталиб-ўқталиб бора бераман.

«Үчир, туземец, үчир! — дейман. — Сен — моча чурка! Юртинг — Чуркистон!

Соя қимир этмай қолади.

Шу маҳал онамиз кетимдан қандай дохил бўлади — билмай қоламан. Кетимдан қандай кучоқлаб олади — билмай қоламан.

Қошимда қотмиш соя қўксига тупура-тупура калима қайтаради.

— Ай, Болхин ҳамсоя, — дейди соя. — Шугинангиз бир балога йўлиққан-ов. Улжон фолчига фол очириб келсангиз бўларди.

— Фолчи нимаям дерди, Холдон ҳамсоя.

— Фолчи айтади-да, Болхин ҳамсоя, фолчи айтади.

— Ўзи — бўлган-бўлдиги шул, холаси.

— Бўлган-бўлдиги шул, бўлган-бўлдиги шул! Ўтакамни ёриб юборайин, деди! Бовужуд, бўйимда йўқ — бўйимдан туширади-кўярди!

— Болада не айб, холаси. Боваси шундай эди, отаси шундай эди, боласи-да шундай бўлади-да.

2

Директоримиз барчамизни улкан синфхонага солади.

— Майлис бўлади! — дейди.

Синфхона лик тўлади. Тик туриш учун жой қолмайди.

Директоримиз эшикни ичкаридан қулфлаб жория этади:

— Ўртоқлар, бешинчи синфдан бошлаб барча пахта фронтига сафарбар этилади!

Ўйнаб қўяй, бешинчидан, ўйнаб қўяй, дейман! Тўртингидан бешинчига кўчганларимга пушаймон бўламан.

Унинчи синф гап қайтаради:

— Ўқиш нима бўлади, домла, ўқиш нима бўлади?

Директоримиз шаҳодат бармоғини шипга нишлайди. Тантанавор-тантанавор нишлайди.

— Пахтазор — дафтaring бўлади, ғўзалар хусни-хатинг бўлади! — дейди.

Муаллимларимиз уйма-уй юради. Кийим-бошларимиз билан кўрпа-тўшакларимизни олдириб келади.

Мен онамиз бериб юбормиш бўхчани олиб қарайман: бўхчада иккита кўрпача бўлади. Иккита нон бўлади. Майиз бўлади, тўртта маяк бўлади.

Мен маякларни арчиб-арчиб еб оламан.

3

Эшик тушдан кейин очилади.

Директоримиз жуғрофия таёгини эшикка ниш этади.

— Ўртоқлар, бирор-бирордан олға! — дейди. Мен бўхчамни орқалаб ташқарилайман. Мактабимиз дарвазаси олдида тўртта катта машина бўлади.

Муаллимларимиз мактабдан машинагачайин икки саф бўлиб туради.

Мен ана шу саф орасидан машина йўл оламан.

Катта синфлар бўхчаларини машина ичига отиб-отиб туширади.

Мен-да, бўхчамни отаман — бўхчам елкамга қайтиб келиб тушади. Тағин отаман — бўхчам кўксимга қайтиб келиб тушади.

Физика муаллимимиз бўхчамни машина ортиб беради. Оёғимдан олади-да, ўзимни-да ортади. Жўна-жўна бўлади. Ота-оналаримиз бот-бот тайинлаб қолади:

— Ариқдан сув ичма — пахтага дори сепади!

— Самолёт дори сепа берса — бекиниб ол!

— Қийналсанг — қочиб кела бер!

— Мабодо қочаман десанг — катта йўл четгинасидан юргин!

Машина оҳиста-оҳиста жилади. Ота-оналаримиз қўл силкиб-қўл силкиб қолади. Бирор кўзига ёш олади. Бирор юпатади:

— Бўлди-е, болангиз фронтга кетаяптими!

— Ўз оти ўзи билан пахта фронти-да!

— Жобида бир машина ёрдамчи бола сойга ағнаб кетибди!

— Болалар кори ҳол бўлмабдими?

— Эб-эй, бола қолибдими!..

Йўлда болалар қўшиқ айтади. Ким қандайчикин қўшиқ билади — ана шу қўшиқни айтади.

Шунда, машина йўл четлаб оёқ илади.

Директоримиз кабинадан ташқарилайди. Кабина пиллапоясида тикка бўлади.

— Ўртоқлар, ўлан-лапарлар айтманглар! — дейди. — Партия-совет қўшиқларидан айтинглар!

4

Машина юради-юради — Сталин колхози мактаби олдида оёқ илади.

Мен бўхчамни гурсиллатиб ер ташлайман. Бўхчам кетидан ўзим осилиб тушаман.

Мактаб қоровули хувиллаб ётмиш синфхоналарни очиб-очиб беради.

Мен бўхчамни орқалаб ичкари лўкиллайман.

Катта синф синфхона тўрини олади.

Майда синф остона олдида қолади.

Мен дераза остини оламан. Бўхчамни гупиллатиб ташлайман-да — устига узала тушиб ётиболаман.

— Ўйнаб қўяй, дераза остидан, ўйнаб қўяй! — дейман.

Ўнинчи синф болалар гапидан кулишиб-кулишиб гапиришадилар:

— Нега шу бола гапи ўролида ўйнаб қўяй, дейди?

— Одати-да.

— Нега ўйнаб қўяй, дейди?

— Ким билади. Зиёд дегичи гапи ўролида масалан, масалан, дейди. Шундай гап-да.

Шу вақт жой жанжали бўлади.

Бирор бирорини бўхчасини нари суради. Бирор бироричи бўхчасини нари отади. Бирор-бирори билан олишиб қолади.

Деворда осиғлик улкан битиктахта тарақ этиб тушади.

Битиктахтада қолмиш битикка кўзим тушади:

«5 сентябр.

Сарлавҳа: Совет халқи 1980 йилда коммунизмда яшайди».

Болалар битикларни овоз чиқариб-овоуз чиқариб ўқийди.

— Бечоралар! — дейди. — Бу йил ҳақидан бор-йўғи беш кун ўқибди-я!

— Қайтанга биз маза қилибмиз — бир ой ўқибмиз!

5

Ётарда түшагимни ёйиб ётаман. Бирор гапиришиб ётади. Бирор матал айтишиб ётади. Бирор ухлаб ётади.

Шунда, кимё муаллимимиз кириб келади.

— Туринглар, директор келаяпти! — дейди. Болалар мудраб-мудраб директоримиз йўлини қарайди.

Директоримиз қўли кетида кириб келади. Ўнгига жуғрофия муаллимимиз бўлади, чапида физика муаллимимиз бўлади.

Болалар жойларидан бир туриб олади.

Директоримиз теварак-бошга қайгули-қайгули назар солади.

— Ўртоқлар! — дейди. — Мен ҳозир марказдан — бюородан келдим! Вазият ёмон, ўртоқлар, ха, ёмон! Терим суст бормоқда, ўртоқлар, терим суст бормоқда! Ўртоқлар, қўлни қўлга бериб, жон-жаҳдимиз билан меҳнат қилиб, она сутидай оппоқ, ҳалол «оқ олтин»имизни йиғиб-териб олайлик! Ўртоқлар, пахта бизнинг кўзимизни эмас, биз пахтанинг кўзини қўрқитайлик! Ўртоқлар, кўз қўрқок, қўл ботир, жасоратга биз қодир! Бюорода район партия комитети биринчи секретари, ҳаммамиз учун хурматли ва азиз ўртоқ Мавлонов ана шундай деди, ўртоқлар!

6

Директоримиз сахарлаб наъра тортади:

— Подъём!

Мен сапчиб тураман. Уйқу аралаш ташқарилайман. Караҳт-караҳт бет-қўл юваман.

— Стройся!

Мен бўйсира бўламан. Ўзимни бўйсирага созлайман.

— Смирно!

Мен таёқ бўлиб қотаман. Муаллимларимиз идиш-тобоқ тарқатади.

— Ўртоқлар, бир кунлик норма саксон кило! — дейди директоримиз.

Унинчи синф эътиroz билдиради:

— Колхозчиларни бир кунлик нормаси олтмиш кило-ку, домла?

— Тўғри, олтмиш кило! Лекин сизлар ёрдамчисизлар! Ёрдамчилар колхоз ҳисобидан овқат ейди! Кўшимча йигирма кило ана шу кунлик овқат учун ушлаб қолинади! Тушунарлими? Қани, пахта фронти сари олға, ўртоқлар!

Унинчи синф олдинда боради. «Ўқувчи ёрдамчиларга аллангали салом!» дегич алвон кўтариб олади.

— Қўшиқ айтаман десаларинг, партия-совет қўшикларидан айтинглар! — дейди директоримиз.

Аммо бирор-да қўшиқ айтмайди.

— Фронт, фронт дейди, — дейди болалар, — фронтда пулемёт беради, автомат беради.

7

Мен умримда илк бор... илк бор пахтазор дея аталмиш дала билан юзма-юз бўламан.

Мен умримда илк бор... илк бор ғўза дея аталмиш ниҳол билан юзма-юз бўламан.

Пахтазор бошида серрайиб қоламан. Этагимни қандай бойлашимни билмайман, ўнинчи синфдан сўрайман.

Ўнинчи синф жеркиб ташлайди.

Мен энди Адабиётга юз соламан.

Адабиёт этагим икки учини белимга айлантириб бойлайди. Тағин икки учини бўйнимга осиб тугади.

Мен умримда илк бор ғўза анқаямаи.

«Эбо-эй, мунча пахта! — дея хаёлланаман. — Шуларни барини териб оламанми? Олдин қайси бирини оламан? Юқоридагини оламанми ё қуийдагини оламанми?

Ғўза учида турмиш пахтани кўшқўллаб ушлайман. Кафтларим жиққа шудринг бўлади.

Бир чаноқ пахтани чўзиб-чўзиб тортаман. Кафтларимда уқалаб-уқалаб оламан. Пуфлаб-пуфлаб шудрингини қуритаман. Сўғин —этагимга соламан.

Этагимни ланг очиб қарайман — бир чаноқ пахта этагим бир бурчида оппоқ moyқдай бўлиб туради. Аранг кўринади!

Этагимни кўтариб-кўтариб қарайман. Мунча чукурни қайтиб тўлдираман, дея ўйлайман.

Ҳафсалаларим пир бўлади. Ғўзаларга эриниб-эрениб қарайман. Ўнг-чапларимга эриниб-эрениб қарайман.

Ўйнаб қўяй, пахталаридан, ўйнаб қўяй, шу пахта дегични ким ўйлаб чиқарди экан-а, дейман.

Болалар олдинлаб-олдинлаб боради. Бошлари пахта ичиди кўриниб-кўринмай боради.

Белларим оғриб-оғриб қолади. Кўлларим толиб-толиб қолади.

Қадимни кўтариб-кўтариб керишаман. Кетимга чалқайиб-чалқайиб керишаман.

Шунда, бир маза қиласман, бир маза қиласман!

8

Бир маҳал Физика қабатимдан келиб қараб туради.

Мен бир қўлим билай ғўза учидан ушлаб тураман. Бир қўлим билан ғўза пахталарини бирор-бирорлаб териб оламан. Пахта чанг-ғуборларини пуфлаб-пуфлаб этагимга соламан.

Физика оғзини ушлаб-ушлаб кулади.

— Ай, Дехқонқул-а, Дехқонқул! Нимага кейинда қолаяпсан десам, гап буёқда экан-да, — дейди. — Ким айтади сени, оғироёқ боши билан ҳаммадан кўп пахта терган Болхин теримчининг боласи деб?

Физика чин айтади — катталар ўз вақтида онамизни ана шу Сталин колхозига пахтага ҳайдайди.

Онамиз оёқ тирайди, оғироёқман, дейди.

Катталар, пахта оғироёқни билмайди, дейди.

Онамиз тонгдан шомгача пахта теради. Мусобақада ғолиб бўлади. Байроқ олади. Сурати билан рўзномада чиқади.

Ой-куни бўлмаса-да, онамизни эгатда дард тутади.

Онамиз эгатда ичларини ушлаб-ушлабвой-войлайди.

«Эркаклар билан тенг ҳуқуқли бўлмай мен ўлайин-а! — дейди. — Шарқда машъал бўлмай мен ўлайин-а!»

Оппоқ далани чала чақалоқ овози олади...

Физика кўз-кўз этиб пахта теради.

— Ана, ана! — дейди. — Кўраяпсанми? Ғўзани ушлаб турма — ғўза қочиб кетмайди. Икки кўлинг ҳам чанокда бўлсин.

Мен Физика айтмишдайин тераман.

9

Кимё қийтиқда кафт карнай этади.

— Тушлик! — дея овоз беради.
Этагим түлар-түлмас бўлади. Тепкилай-тепкилай тарози орқалаб бораман.
— Уч кило! — дейди тарозибон. Болалар гурр кулади. Қийтиқда этак тўшайман.
Тўшагим-да этагим бўлади, дастурхоним-да этагим бўлади.
Нон билан чой тушлигим бўлади. Тушдан кейин икки кило тераман.

10

Етарда йўқлама бўлади.
Директоримиз кўп терувчиларни бир сафлаб улуғлайди.
— Машъалларни кўринг — ҳавас қилинг! — дейди. Оз терувчиларни бир сафлаб маззаллатлайди.
— Қолоқлардан ҳазар қилинг, ҳазар! — дейди. Директоримиз шўро пахтасидан нималар олинишини бармоқлаб-бармоқлаб санаб беради:
— Бир тонна совет пахтасидан икки минг тўрт юз йигирма метр газлама, саксон олти кило мой, икки юз йигирма олти кило кунжара, ўн беш кило кир совун... олинади! Шу сабабдан ҳам совет пахтаси «оқ олтин» дейилади! Совет «оқ олтин»ини термаслик — жиноят!
Тикка тура бериб, оёкларим зирқ-зирқ толади.
Ўзимни бир ўнг оёғимга ташлайман, бир чап оёғимга ташлайман.
— Эртага тайин бажараман, — дея қутуламан.

11

Эртаси Физика ўргатмишдайин тераман. Жон-жаҳдим билан тераман.
Ўн кило тераман— ўн кило! Ётарда тағин тикка турман.
— Ўртоқлар, мен бугун бюрова бўлдим! — дейди директоримиз. — Шахсан ўртоқ Мавлонов олдида бўлдим! Ўртоқ Мавлонов машъалларга офаринлар айтди!
Директоримиз қулоғимдан чўзади.
— Сен аталаларни эса жазолансин, деди, ха, жазолансин, деди! — дейди. Жазолайман, ха, жазолайман! Буни пахта фронти деб қўйибди! Пахта фронти жавобгарликка тортади! Пахта фронти қаматади!
Тикка тура бериб, уйқуларим келиб кетади.
— Эртаминан ғайрат қиласман, — дея сўз бераман.

12

Бир хафта ўтади, икки ҳафта ўтади.
Аззанча кучанмайин — ўз кучимдан зиёд теролмайман.
Ўн килодан ошиб ўтолмайман!
Холдан тойиб-тойиб қоламан. Эгат ичиди ўтириб-ўтириб қоламан.
Жуғрофия дала бошини олиб туради. Кимё дала адогини олиб туради. Бирорта бола кўринмай қолса бўлди — дарров бақиради:
— У-ў, Эгамов, тур! У-ў, Назирова, нимага рўмолинг кўринмай қолди?! Тур, кун кетаяпти!
Мен мудраб-мудраб ўтираман.
— У-ў, Жамолиддинов, кармисан — индамайсан?! Мен ўзимни эшитмасликка олиб ўтираман. Кимё эгат оралаб келади.
— У-ў, Жамолиддинов, нима бало, ўлиб-пўлиб қолдингми? — дейди.
Мен шунда-да тура бормайман.

Шунда, Кимё хивич билан оёқларимга солади.
Мен тұра солиб пахта тераман.

13

Теримчилар тера беради —теролмовчилар кучаниб юраберади.
Директоримиз ёнади.
— Еганинг бурнингдан чиққурлар! — дейди. — Мен сенлар учун бюорода гап әшитдим!
Үртоқ Мавлонов бюро ахли олдиде изза қилди! Йўқ, мен сенлар учун изза бўлмайман! Ё пахта тердираман, ё териларингни шилиб оламан!
Директоримиз бир қулочча ғўзапоя тарашлаб келади.
Ғўзапоя учи шода-шода кўсак бўлади. Ғўзапоя учи кўк-кўк кўсак бўлади. Ғўзапоя учи мояқдай-мояқдай кўсак бўлади.
Директоримиз сафбоши Зиёд билан муқобил бўлади. Зиёдни иягидан тутамлайди.
— Нима учун оз терасан?! — дея зуғумлайди. — Айт, нима учун оз терасан?! Давлат сени нима учун ўқитаяпти?! Давлат сени нима учун бокаяпти?! Манави Қораев саксон-тўқсон кило теради! Қораевдан қаеринг зиёд, айт, қаеринг зиёд?!
Зиёд қалт-қалт жавоб беради:
— Қораев ўнинчи синф, мен бешинчи синф, масалан.
— Жириллама! Бешинчи синф билан ўнинчи синф фарқи йўқ! Бари катта синф саналади!
Айт, нормани бажарасанми йўқми-бажарасанми йўқми!..
Директоримиз ғўзапоя билан Зиёд елкалари оша уради. Зиёд беллари оралатиб уради.
Зиёд билаклари билан бет-бошини пана этади. Зиёд зориллаб-зориллаб йиғлаб қўя беради:
— Бажараман, масалан, бажараман!.. Директоримиз мушт дўлайтириб-мушт дўлайтириб дўклайди.
— Бажармай кўр—оёғингдан осаман! Бюро ана шундай деди!

14

Уйдан олиб келмиш бор кийимларимни етти қабат кийиб оламан. Телпагим қулоқларини тушириб оламан. Иягимдан айлантириб, бойлаб оламан.
Йўқламани ана шундай шайланиб қараб ўтираман!
Ниҳоят, директоримиз келади. Йўқлама бошлайди. Оз терувчилар отини айтади.
Оз терувчилар девор қоралаб саф бўлади.
Директоримиз оз терувчилар бировини лаб-лунжидан чўзади. Бировини телпаги билан бетига уради. Бировини пешонасидан кетига итариб ташлайди.
Директоримиз мен билан бетма-бет бўлади.
— Эй! — дея иягимдан кўтаради. — Жонинг борми ўзи?! Э, ўл-е, одам бўлганинг билан-е!
Одам деган ўн килоям пахта терадими-а? Ўн кило-я?!
Мен, директоримиз мени камситаяпти, деб биламан. Мен, директоримиз бугунги муваффақиятимни кўриб-кўрмасликка оляяпти, деб биламан.
Боиси — бугун ўн бир кило терган бўламан, ўн бир кило!
Шу боис, ўзимни-ўзим оқлайман:
— Ўн бир кило... — дея минғиллайман. Директоримчз оғиз тўлдириб-оғиз тўлдириб узвулайди.
— У-у-у, ўн бир кило! — дейди. — Ўн бир кило-я, у-у-у! Бунча пахтани қандай қилиб тердинг-е? Қойил-е!
Муаллимларимиз пик-пик кулади.

— Сичқон бир кунда инига йиққан пахта ўн бир кило бўлади! — бақиради директор. — Жасадингни қара! Жасадингдан эшак ҳуркади! Ўл-е, шу кунингга-е! Менга қара, қачон нормани бажарасан?! Айт, қачон, қачон, қачон!..

Ғўзапоя елкаларим оралаб-оралаб тушади. Зарбли-зарбли тушади. Тарс-тарс тушади.

Иккита кўк кўсак елкаларимдан оёқларимга учиб тушади.

Уст-бошим етти қабатлигадан кўк кўсак таёқ ўтмайди.

Кўк кўсак таёқ энди қўлларим оралаб-қўлларим оралаб тушади.

Таёқ ўтади — ана шунда ўтади!

— Энажон, ўлдим-е, энажон-е!.. — дея зор-зор йиглайман.

— Бажараман де, бажараман де!..

— Бажараман, жон домла, бажараман! Директоримиз бир оппоқ толани боши узра кўз-кўз этади»

— Ана, кўраяпсанми, ана! — дейди. — Пахта сиртидан ана шундай оппоқ бўлади!

Директоримиз толани чигитлайди. Ичидан чигитини олади.

Директоримиз қоп-қора чигитни кўз-кўз этади.

— Пахта аслида мана бундай ичи қора бўлади! — дейди. — Пахта — ичи қора мато! Пахта одамзотни индамай боплайди! У дунё-ю, бу дунё ўнгарилмас қиласди! Бюорода ўртоқ Мавлонов ана шундай деди!

Директоримиз ёқамдан чанглайди. Ердан даст кўтариб олади. Тағин ер ташлайди.

— Пахта сен мафкураси бузукни кўзингни ўйиб олади! — дейди. — Биласанми, сен кимсан? Сен — босмачисан, босмачи!

Мен чинқириб-чинқириб йиглаб қўя бераман. Мен ер тепиб-ер тепиб йиглаб қўя бераман.

Мен жон-жаҳдим билан директоримизни тиззасига ёпишаман.

Мен директоримиз тиззасинн таталаб-таталаб ташлайман. Мен директоримиз тиззасини тишлаб-тишлаб ташлайман.

Муаллимларимиз орача этади.

— Ана, кўряпсизларми, ўртоқлар? — дейди директоримиз. — Қазисан, қартасан, ахир наслингга тортасан! Бунинг отаси Ақраб босмачи эди! Совет тузуми душмани пахта терармиди!

15

Алп-алп одимлаб бораман. «Қўлингни кўтар, босмачи!» Милтиқ ўқталиб-ўқталиб бораман. «Қимирлама, босмачи!»

Милтиқ тепкасини шарақ-шуруқлатиб бораман. «Отаман, босмачи, отаман!»

Бир қўл елкамдан ушлайда. Бетларимга шапатилайди.

— Кўзингни оч, Жамолиддинов, кўзингни оч! — дейди.

Ана шунда ўзимга келаман.

Тун қора бўлади.

Йўл чапи пахтазор бўлади, йўл ўнги ётоқ бўлади.

Мен йўл ўртасида бўламан.

Шу вақт тағин бирор келади.

— Нима гап, Ҳамзаев? — дейди.

— Манави валдирвасар бўлиб кетиб бораяпти.

— Шабкўрдир-да.

Овозларни таниб оламан — бирори Жуғрофия бўлади, бирори Адабиёт бўлади.

Жуғрофия ўнг қўлимдан олиб келади, Адабиёт чап қўлимдан олиб келади.

Ётоқда болалар пиш-пиш қотади.

16

Ғұзапоя Зиёд елкаларида тарс-тарс этади. Ғұзапоя күк күсаклари учиб-учиб тушади. Ғұзапояда битта-да күсак қолмайды.

— Сатторов! — дейди директоримиз. — Боринг, бошқа ғұзапоя олиб келинг!

Адабиёт чопқиллаб ташқарилайди. Бир ғұзапоя тарашлаб келади.

Ғұзани учлари күсаксиз бўлади.

— Мен қоқчўп билан чилик ўйнайманми?! Боринг, күсаклисидан олиб келинг!

Директоримиз шундай дея, ғұзапояни ташқари отади.

Адабиёт шода күсак ғұзапоя олиб келади.

— Энди, ошпазни айтиб келинг!

Адабиёт ўнинчи синф қизни эргаштириб келади. Директоримиз ошпаз қизга рўйхат узатади.

— Эломонова! — дейди. — Эртадан бошлаб манави текинтомоқларга гўштсиз овқат берасан! Агар ушоқдай гўшт берсанг — кунингни кўрасан!

Шу-шу — косам гўшт кўрмайди.

17

Жива қошиғимни йўқотиб кўяман,

Ошпаз қиздан қошиқ сўрайин дейман — директоримизга айтади, дея қўрқаман.

Шу боис, Нуралини косасига қўшиламан.

Зиёд билан Мелиям қўшилади — улар-да қошиқ йўқотади.

Тўртовора бир коса бўламиз.

Қошиқ Нуралидан бошлаб айланади.

Нурали икков ичади — Мелига қошиқ ташлайди. Мели икков ичади — Зиёдга қошиқ ташлайди. Зиёд икков ичади — менга қошиқ ташлайди.

Гир-гир айланмиш қошиқдан қўз айирмай тураман.

Учов ичувчи бўлса — дарров билагидан қўшқўллаб ушлайман. Қўлидан қошиқни юлиб оламан.

— Учов ичдинг, учов! — дейман.

18

Ичим бураб-бураб қолади. Ичим қабз этиб-қабз этиб қолади.

Дардим ичимда бўлади.

Кундан-кун дармондан қоламан.

Мактаб футбол майдони бадрабонамиз бўлади.

Каллаи сахарлаб футбол майдонига чопқиллайман. Майдон дуч келмиш ерида ўтира қоламан.

Теварак-бошимга уйқусираб-уйқусираб аланглайман.

Теварагимда оёқ босар ер жуда-жуда кам бўлади.

Шунда, ажаб бир нималарни кўраман. Кўзларимни уқалаб-уқалаб кўраман.

Теварак-бошим қип-қизил қон бўлади! Теварак-бошим сап-сариқ қон бўлади! Теварак-бошим тўда-тўда қон бўлади!

Кўрмайин дея, чаккамни кафтимга қўйиб оламан. Кўзларимни юмиб оламан.

Бир маҳал бирор елкамдан туртади.

Мен сесканиб кўзимни очаман — бошимда Зиёд туради.

— Ухлама, ичбуруғ! — дейди.

Мен лик этиб тураман. Кетимга қарайман. Футбол майдонда тағин бир тұда қон бино бўлади.

19

Тушлик чой қайнай бермайди. Мен офтобда чой қайнашини қараб ётаман. Шу маҳал дала йўлидан бир машина келади. Машинадан шляпали одам тушади.

— Ҳорманглар, болаларим! — дейди. Бригадир билан қўл бериб кўришади.

— Уф-ф, бир пиёла чой бер-е, барака топкур-е! — дейди.

— Чой энди қайнайди, — дейди бригадир. Шляпали одам хирмон бағрида ёнбошлайди.

Шляпасини хирмонга ташлайди.

Шу вақт тағин бир машина хирмон қоралаб келади.

Машинадан директоримиз тушади.

Директоримиз у ерда-бу ерда ётмиш болаларга бақиради:

— Бу нима ётиш?! — дейди. — Пахта фронти энангни уйими?! Мен ҳозир бюородан келдим!

Сенларни деб ўртоқ Мавлоновдан эшитмаганларимни эшитиб келдим!

— Чой қайнасин, домла, чой қайнасин, — дейди ўнинчи синф.

— Сен тирранчаларга чойни ким қўйибди?! Ана, ариқ тўла сув — ариқдан ич!

Шунда, шляпали одам хирмондан бош кўтаради.,

— Ў-ў, домла, берман ҳайданг! — дейди. Директоримиз шляпали одамга қарайди-қарайди

— таниёлмайди. Таниёлмаса-да, шляпали одам тараф юради.

Шляпали одам ёнбошлаб ётмиш кўйи қўл узатади.

— Камнамосиз, домла? — дейди. Директоримиз қўл берайинми-қўл бермайнми, зайдида қўл узатади.

— Ўзлари ким бўладилар? — дейди. Шляпали одам кафтларни очиб айтади:

— Ҳашарчи. Мана шу болалардай бир ҳашарчи, — дейди. — Чойингиз қайнамади, домла. Энди сиз буюргандай, ариқдан ичамиз-да.

Шляпали одам шундай дея, машинаси тараф йўл олади.

Директоримиз шляпали одам кетидан қараб турари-турари — бригадирга ўнгалади..

— Бу ким бўлди? — дейди.

— Танимаяпсизми? Райком-ку.

— Райком? Қандай райком?

— Қандай райком бўларди — Мавлонов бова-да.

— Ўртоқ Мавлоновми? У киши далада нима қилиб юрибди?

— Далага самолёт келаяпти. Самолётдан олдин далаларни қараб юрибди.

— Ия, — дейди директоримиз. — Олдинроқ айтсангиз бўлмасмиди, ия.

20

Шу-шу — марказ, бюро, Мавлонов дегич гаплардан қутуламан.

Кейин-кейин биламан — директоримиз марказда пивохўр бўлиб-бўлиб қайтиб келиб юргич бўлади.

21

Кетма-кет уч ётар йўқлама бўлмайди. Кўк кўсак ғўзапоя бошим узра ўйнамайди. Далада муаллимларимиз қадамимни санамайди. Муаллимларимиз бири қўйиб бири жория этади:

— Мактабимиз социалистик мусобақада ғолиб келди!

- Мактаблар аро Күчма Қизил Байроқни олди!
- Юздан зиёд ёрдамчи мактаблар орасида-я! Мен хуррам бўламан. Мен хуррам бўламан.
- Энди пахта термаймиз-а, домла? — дейман.
- Пахта термайсан? Энди пахта терасан-да!
- Қизил Байроқ бор-йўғи бир ойлик ишимиз учун берилди!
- Қизил Байроқ кучимизга куч қўшади!
- Қизил Байроқ зафарларга чорлайди!

22

Болалар билан ётоқ олдида бўйсира бўламан.

Штаб дея аталмиш хонадан оппоқ сочли кекса одам чиқиб келади.

Кекса одам кетидан директоримиз билан муаллимларимиз қаторлашиб келади.

Директоримиз ютуқ-камчиликлардан сўзлайди.

Мен ичимни ушлаб-ушлаб кучанаман. Икки кўзим футбол майдонида бўлади.

Директоримиз бизни тағин-да юксак-юксак зафарлар сари чорлайди.

— Ўртоқлар, энди сўз район халқ маорифи бўлими мудири, ҳаммамиз учун хурматли ва азиз ўртоқ Дадабоевга! — дейди.

Оппок соч одам лўнда-лўнда сўзлайди. Оппок соч одам муニис-муニис сўзлайди:

— Азиз ўқувчилар! Сизларни кутлашдан олдин ўртоқ директорларингизни алоҳида табриклаб қўймоқчи эдим. Бойсиким — мана уч йилдирким, ўртоқ директорларингиз коммунистик партия сафига ўтолмай юриб эди. Куни кеча мактабларингиз Кўчма Қизил Байроқни қўлга киритиши биланоқ тегишли мутасадди ўртоқлар директорларингизни коммунистик партия сафига қабул қилди. Устига-устакким, айни шу кунларда ўртоқ директорларингиз эгизак қизалоқ кўрди, эгизак қизалоқ! Буни қарангким — Кўчма Қизил Байроқ — коммунистик партбилет — эгизак қизалоқ! Азиз ўқувчилар! Келинглар, ўртоқ директорларингизни ана шу қўша-қўша зафарлар билан бир муборакбод этиб қўяйлик!

Оппок соч одам шундай дея чапак чалади.

Муаллимларимиз билан болалар-да қўшилиб чалади.

Мен ичимни ушлаб-ушлаб тура бераман.

— Қани, ўртоқ директор, — дейди оппоқ сочли одам. — Энди шу қора кўзларга қаратা биринки оғиз дил сўзларингизни айтасиз энди. Сизнинг коммунистик партия сафига ўтишингиз учун бу қора кўзлар озмунча тер тўқдими!

Директоримиз бир одим олдинлайди. Ўнг кўлини қўксига қўяди. Ҳаволаниб-ҳаволаниб бош иргайди.

— Ўртоқлар! — дейди. — Ҳакиқатан ҳам, ҳаммамиз учун хурматли ва азиз ўртоқ Дадабоев айтганларидай, коммунистик партия сафига қабул қилиниш шарафига эришишим осон бўлмади! Ўтган икки йил мобайнида мактабимиз ўқувчи-ёрдамчилари бирор марта ҳам Қизил Байроқ олиш шарафига мұяссар бўлолмади! Бунда, маълум маънода ўзим айбор бўлдим! Пахта йиғим-теримига масъулият билан ёндашмадим! Қаттиққўл бўлмадим! Партиявий принципиаллик кўрсатмадим! Ўртоқлар, мен ана шу йўл қўйган хато-камчиликларимдан тегишли хулоса чиқариб олдим! Мана, маълум муваффакиятларга эришдим! Мен бу муваффакиятга район халқ маорифи мудири, ҳаммамиз учун хурматли ва азиз ўртоқ Дадабоевнинг бевосита ва билвосита раҳнамолиги туфайли эришдим! Мен сиз ўқувчи-ёрдамчилар номидан, қолаверса, ўзимнинг номимдан, ана шу муваффакиятларим бош айбори, ҳаммамиз учун хурматли ва азиз ўртоқ Дадабоевга миннатдорчилик билдираман!

Қарс-қарс қарсак бўлади.

Директоримиз кўли қўксига таъзим этади.

— Ўртоқлар! — дейди. — Эгизак фарзандларим оталари шонли коммунистик партия сафига қабул этилган улуғ айём кунларда дунёга келди! Мен шу улуғ санага бағишилаб, эгизак қызларимга шонли коммунистик партия асосчиларидан Роза Люксембург билан Клара Цеткин отларини қўяман! Бир қизимни Роза қўяман, бир қизимни Клара қўяман!

Чалп-чалп чапак бўлади.

Муаллимларимиз:

— Ура-а-а, ура-а-а! — дея чапак чалади.

Директоримиз ҳаминқадар ҳаволанади.

— Ишонаманки, — дейди, — эгизак қызларим Роза Люксембург ва Клара Цеткинлардай буюк марксистлар бўлиб етишадилар!

Оппоқ соч одам тантанали вазиятда директоримизга Қизил Байроқ топширади.

Оппоқ соч одам бўйсира бўйлаб юради. Олд саф болалар билан қўл бериб кўришади.

— Қутлайман, қутлайман! — дейди.

Оппоқ соч одам болалар кийим-бошларига разм солади. Болалар юз-кўзларига разм солади.

Ниҳоят, оппоқ соч одам мен билан муқобил бўлади. Менга қўл узатади.

Мен қўш қўлимни-да чўзаман. Оппоқ соч одам қўлини қўшқўллаб ушлаб оламан.

Оппоқ соч одам бош-адофим бўйлаб қарайди. Билинар-билинмас бош чайқайди.

— Қўлларингизни қаранг, қўлларингизни, — дейди. — Бу қўл эмас — косов бўлибди.

Елкаларингизни қаранг, елкаларингизни. Бир елкангиз юкори, бир елкангиз куйи. Бу елка эмас

— қинғир-қийшиқ темир-терсак бўлибди. Қуриб кетгур пахтадан нималар келмайди-я.

Оппоқ соч одам ранги ўчади. Қизил Байроқ олдига қайтиб боради.

Оппоқ соч одам болаларга ўйчан-ўйчан боқиб қолади.

— Болаларим... — дейди.

Оппоқ соч одам лабларини чўччайтириб-чўччайтириб ўйлаб қолади.

— Болаларим... — дейди. — Мен сизларни бола дейишгаям тилим бормаяпти. Сизлар катталар ҳаётини бошдан кечираяпсиз. Сиз кўраётган кунлар болалик эмас — қарилик. Қачон боладай бўлиб кун қўрасиз — унисини пахтадан сўрайсиз.

Оппоқ соч одам директоримиздан Қизил Байроқни олади.

— Болаларим, манови Кўчма Қизил Байроқ. Ўз оти ўзи билан Кўчма, — дейди. — Кўчма Қизил Байроқ шу вақтгача бировга вафо қилмади — сизгаям вафо қилмайди. Бир кило кам терсангиз бўлди — қўлингиздан бошқа биров қўлига кўчиб ўтади-кетади. Шундай экан, Қизил Байроқка кўп сажда қила берманглар. Қизил Байроқни сақлаб қоламан деб, кўп кучана берманглар. Қўлларингиздан келганича тера беринглар.

Оппоқ соч одам Қизил Байроқни директоримизга қайтиб беради. Қўлларини қорин қовуштириб-қорин қовуштириб туради.

— Болаларим, — дейди, — бизнинг юрга Амир Темурлар керак. Бизнинг юрга Бобурлар керак. Бизнинг юрга Улуғбеклар керак. Жуда, жуда керак! Аммо сизлар Темур бўлолмайсизлар, сизлар Бобур бўлолмайсизлар, сизлар Улуғбек бўлолмайсизлар. Лекин юрга тўрт мучали бус-бутун одамлар керак. Лекин юрга соғлом-соғлом одамлар керак. Шундай экан, ўзларингизни-ўзларингиз авайлангизлар, болаларим!

Ўнинчи синф ер тепиб-ер тепиб қарсак чалади.

23

Пахтакорлар ёрдамчиларга ўлигини ташлаб олади.

Далада нима иш бўлади — бригадир директоримизга келади.

— Пахта ортишга учта бола беринг.

— Пахта туширишга иккита бола беринг.

— Дори сепишга битта бола беринг, — дейда. Бригадир айтмиш ишлар қийин ишлар бўлади. Қийин бўлса-да, болалар мен борайин-мен борайин, дея талашади. Боиси — болалар бир кун бўлса-да, пахта теришдан қутулайин, дейди.

Директоримиз бундайчикин ишлар учун оз терувчиларни жўнатади.

Эрталаб бригадир тағин сарғаяди.

— Самолётга йўл кўрсатувчи беринг, — дейди.

Бу сафар катта болалар ўзларини олиб қочади. Талашиб-тортишмайди.

— Жамолиддинов! — дейди директоримиз. — Олга! Мен бўйсирадан отилиб олдинлайман.

Директоримиз қалами учи билан мени брагадирга кўрсатади.

— Мана, манавнни олинг! — дейди. Бригадир мени бош-оёқ қараб олади.

— Домла, буниншз ғўзалар ичидаги кўринмайдио? — дейди.

Бўйсира пик-пик кулади.

— Кўринади! — дейди директоримиз. — Байроқча дастасини узунроқ қиласиз — кўринади!

Бригадир мени улкан тутқунда олдига эргаштириб боради.

Тутқундада бир одам байроқ ясад ўтиради.

— Сопини узунроқ қил, — дейди бригадир. — Манавини бўйига қараб қил.

Байроқчи одам бўй-бастимдан лаб буради.

— Жонлироги йўқмиди? — дея тўнфиллайди. Байроқчи калтароғини ташлайди. Узунроқ хода олади. Хода учига бир қулочлик чўпни қоқ белидан михлаб қоқади. Уч қаричча куйироқдан тағин бир чўпни бел қилиб михлайди. Хода бир тарафига оппоқ сурп ёйиб тикади. Тағин бир тарафига қизил сурп ёйиб тикади.

Байроқ — қовунпалак қўриқловчи мисол бўлади.

Байроқчи байроқни олдимга дўқиллатиб қўяди.

— Ана, дафтар-қалам! — дейди.

Мен байроқни кўтариб-кўтариб кўраман. Бир қўлим билан кўтаролмай, қўшқўллаб аранг кўтараман.

«Оғир бўлса-да майли, — дейман. — Ўлиб пахта тергандан кўра, шуни кўтариб юра бераман».

Байроқчи мени далама-дала эргаштиради. Юражак йўлларимни тайинлайди. Туражак жойларимни тайинлайди. Бажаражак юмушларимни бот-бот баёнлайди.

Байроқчи ажи-бужи дорилар билан булғанмиш жанда чопон беради.

— Манави танапўш, — дейди. — Жайдари танапўш. Танапўш чопон йиртиқ-йиртиқ бўлади. Танапўш чопон қўланса ис-қўланса ис бўлади.

24

Сахармардонда футбол майдон тараф чопаман. Физика билагимдан ушлаб қолади.

— Далада... ўша далада... — дейди. Ўша дала тараф чопаман.

Тутқунда остидан байроқ билан жанда чопонни оламан.

Ўқариқ бўйлаб қадамлайман-қадамлайман—дала қоқ бошида оёқ иламан.

Салқин саболар этимни увуштиради.

Шунда, элас-элас самолёт овози эшиталади.

Хиёл ўтади — самолёт ўзи келади. Самолёт дала узра бир айланиб қайтади.

Самолёт энди мени мўлжаллаб келади.

Мен апил-тапил жанда чолонни ёпинаман. Байроқни олдин елкамга оламан. Ундан бошим узра кўтараман.

Байроқ оғирлигидан далбанглаб-далбанглаб оламан.

Бор кучим билан кучанаман. Тишимни тишимга босаман. Ост лабимни тишлиб оламан.

Юзларим лов-лов ёниб тураман.

Жанда чопон тешикларидан мұралайман — самолёт мени нишонлаб келади.

Самолёт байроқта тегайин-тегайин дея учади. Самолёт тизз-тиzz дори сепиб-сепиб учади.

Мен жанда чопон йиртиқларидан учувчини күраман.

Самолёт күтарила-күтарила олислайди.

Мен жанда чопон ичидан калламни чиқараман.

Димоғим шундай бир захарда қолади, шундай захарда қолади!

Мен кучаниб-кучаниб ўқчийман. Томоғимдан бир нима ана отилиб чиқайин дейди, мана отилиб чиқайин дейди.

Ўқчий беріб-ўқчий беріб, күз олдим қора бүлади...

Охиста-охиста ўзимга келаман. Теварак-бошимга назар соламан.

Жанда чопон сап-сарық бүлади. Ўқариқ бүйлари сап-сарық бүлади. Ғүза барглари сап-сарық бүлади.

Мен байроқчи баёнини қарахт-қарахт ёдлайман: ЯК-12 самолёт дори сепса — нақд саккиз қадам санаб ташланади. АН-2 самолёт дори сепса — нақд йигирма уч қадам санаб ташланади.

Мен чап тараф узун-узун қадамлайман. Санаб-санаб қадамлайман:

— Бир, икки, уч...

Роппа-роса йигирма учинчи қадамда оёқ иламан.

Боиси — бизнинг самолёт АН-2 бүлади.

Мен йигирма учинчи қадамда байроқ күтариб тура бераман.

Самолёт бошим узра тизз-тиzz дори сепиб ўтади.

Мен охиста-охиста самолётта эл бүламан.

Мен энди қабатма-қабат далага ўтиб тураман.

Самолёт бир сидра тизиллатиб ўтади...

Қуюқ ғүзалик-қуюқ ғүзалик далаларда икки бор дори сепилади. Боиси —илк дори ғүза уст-уст баргларида қолади. Қайта дори эса ғүза ости баргларигачайин тушиб боради.

Ушбу дала ана шундай дала бүлади.

Шу боис — мен жойимда қимир этмай тура бераман.

Самолёт икки сидра дори сепиб ўтади.

Мен жанда чопонни силаб-силаб күраман — кафтларим бинойидак хүл бүлмайди. Мен ғүза баргларини ушлаб-ушлаб күраман — бармоқларим бинойидай хүл бүлмайди.

Шу боис, байроқ дастаси учидан ушлайман. Байроқни түнтариб оламан. Байроқ оқ-қизилини оёқларим олдига түнтариб тураман. Байроқдаста учини пешонамга теккизиб тураман.

Ушбу ҳолат мана бундай дейди:

«Самолёт бинойидай дори сеполмаяпти,
самолёт бинойидай дори сеполмаяпти!»

Учувчи байроқ тилини уқиб олади.

Самолёт бошим узра тағин бир сидра тизиллатиб ўтади.

Бу сафар бинойидай сепади.

Кун тутлар учини чалиб кетади. Нам салқындан файз кетади.

Ғүза оралаб-ғүза оралаб келаман — уст-бошим шудринг бүлмайди. Барг сийпалаб-барг сийпалаб келаман — кафтларим шудринг бүлмайди.

Шу боис, байроқни бошим узра айлантираман. Чапдан ўнгга айлантираман. Доира сувратида айлантираман:

«Баргларда шудринг йўқ — дори сепманг,
баргларда шудринг йўқ — дори сепманг!»

Энди байроқни бошим узра бир чапимга чайқайман, бир ўнгимга чайқайман.

«Дори сепиш тамом бўлди, дори сепиш тамом бўлди!»

Учувчи байроқ тилини уқиб олади. Учувчи самолёт қанотларини соллантириб чайқаб-соллантириб чайқаб олади:

«Англадим — дори сепиш тамом бўлди,
англадим — дори сепиш тамом бўлди!»

Учувчи ана шундай дея-дея, манзил-макони тараф равона бўлади.

Мен умримда биринчи бор самолётни ана шундай яқиндан кўраман. Мен умримда биринчи бор учувчини ана шундай яқинидан кўраман.

Мендан саодатманд бўлмайди!

25

Етарда болалар ҳавас билан ҳол сўрайди.

— Қандай? — дейди.

Мен бошмалдоғимни нарра этиб кўрсатаман.

— Мана бундай! — дейман. — Мазза!

— Учувчини-да кўрдингми?

— Кўрмай нима! — дейман. — Учувчин менга мана бундай қилиб қўл силкиди!

— Сенга-я?

— Эса-чи, менга бўлмай кимга — менга-да!

— Сен нима қилдинг?

— Нима қилар эдим — қўл силкидим-да!

— Ёрил-е, уккағар-е, ёрил-е!

Илғор теримчилар куйиб-куйиб қолади.

— Учувчи-да шабкўр экан-да, — дейди. — Келиб-келиб, ўн бир килочига қўл силкийдими?

26

Тағин каллаи сахарлаб этик кия-кия ташқарилайман. Зинаға оёқ ташлайман...

Оҳиста кўз очаман. Кўз қирим билан ёнбошларимга қарайман.

Мен муаллимларимиз ётогида ётмиш бўламан.

— Болани тезроқ турғазиши керак, — дейди директоримиз.

— Қўйинг, ётсин, — дейди муаллим. — Бечора бола зинадан ёмон учиб тушди.

— Бовужуд, ёнбоши билан тушди.

— Боши билан тушса калласи ёриларди.

— У дорини бутифос деб қўйибди.

— Бутифос ёмон-е, ёмон!

— Ўртоқ директор, энди болани дори сепилувчи далага юбориб бўлмайди.

— Онасини биласиз — кимсан Болхин теримчи.

— Болхин теримчи бўлса нима бўйти? — дейди директоримиз.

— Болхин теримчи обрў-эътиборли аёл. Болага бир нима бўлиб қолса, онасидан балога қоламиз.

— Унда, кимни юборамиз, айтинглар? — дейди директоримиз. — Фақат оз терадиганлардан бўлсин. Йўқлама дафтари ўқийман: Жалилов Хуррам?

— Бўлмайди — отаси учига чиқкан аризабоз.

— Бир гап бўлса Тошкангача ёзади.

— Ёзишни қўйинг, идорама-идора чопади.

— Оти катта бор — қабулига киради.

— Унда, бўлмайди. Қорабоев Абил?

- Абил мерганин ўғлами? Э-э; қўйинг-қўйинг.
— Нимага қўямиз?
— Абил мергани билмайсизми?
— Биламиз! — дейди директоримиз. — Мерган бўлса ким бўпти?
— Манави синф раҳбаридан сўранг, айтиб беради.
— Буёқ чин айтаяппи, ўртоқ директор. Абил мерган одам эмас. Бир сафар боласини дарсда бир-икки туртиб эдим — отасига бориб айтибди. Бир. маҳал Абил мерган уйимизга бостириб борса бўладими. Елкасида милтиқ!
— Милтиқ?
— Ҳа-да, милтиқ бўлгандаям — қўшофиз милтиқ! Дарвозадан, қани жаллод деб бақиради-да. Аёлимиз уйда йўқ, десаям кетмайди. Милтиғини уйимизга пешлайди. Тепкисини шакуршуқурлатади. Ўша жаллод буёқча бир қарасин, дейди.
— Қарадингизми?
— Қараб бўладими! Мерганга одам билан бўрини нима фарқи бор — пақиллатиб отади-кўяди-да. Шундан буён боласини чертолмай қолдим.
— Хавфли шахс, хавфли! — дея бош сараклайди директоримиз. — Чўлибоев Зиёд?
— Бир қари онаси бор.
Директоримиз шаҳодат бармоғини нишлайди.
— Ана шу бўлади! —дейди. Муаллимларимиз ташқарилайди.

27

- Мен тушларда ўзимга келаман. Ошпаз қиз турғазиб олади.
— Тур ўчоқقا ўт ёқ, — дейди. — Директор тайинлаб кетди.
Ўчоқ қошида чўқ тушиб ўт ёқаман. Қозонда билқ-билқ қайнамиш шўрва кўнглимни айнитади.
Мен ўқчиб-ўқчиб ўт ёқаман.

28

- Йўқламада Зиёд йўқ бўлади.
Директоримиз Физика билан Кимёни дориланувчи дала жўнатади.
Муаллимларимиз ҳаяллаб-ҳаяллаб қолади.
Директоримиз бизни ухлатмай олиб ўтиради.
Нихоят, муаллимларимиз қайтиб келади.
Олдин Зиёд кириб келади. Остонада кўзларини уқалаб-уқалаб туради. Мудраб-мудраб туради. Гап йўқ, сўз йўқ — ўз тўшаги тараф юради. Ўзини тап этиб тўшакка ташлайди.
Директоримиз бармоқ ликиллатиб-бармоқ ликиллатиб ўзига имлайди.
— Эй, бери кел! — дейди. — Тур, бери кел!
Зиёд директоримиз олдига боради. Теварак-бошига аланглайди-аланглайди — ўзини хиёл ўнглайди. Аланглашидан — Зиед теваракда ўтирмиш болаларни энди кўради.
Директоримиз Зиёдни лунжидан чўзади.
— Мастми дейман! — дейди. — Буни қаердан топдиларингиз-е?
— Даладан топдик, — дейди Физика. — Далада одамзот қораси йўқ, лекин шу бор экан.
— Чўлибоев, Чўлибоев, деб қичқириб эдик, ғўзалар ичидан шитир-шитир этиб чиқиб келди,
— дейди Кимё.
— Коронғида ғўза ичидан нима қилиб юрибди экан? — дейди директоримиз.
— Нима қиласи, ухлаб қолибди-да.

— Ўл-е, шу кунингга-е! — дея бақиради директоримиз. — Дориланган ғўза ичидаям ухлайсанми-а? Ухлаш учун бошқа жой қуриб қолганми-а?! Ўл-е, бор-е, ёт-е!!

Директоримиз Зиёдни кўксидан итариб юборади. Зиёд кети билан гуп этиб тушади.

29

Зиёд шу ётишида қайтиб турмайди. Эртаси-да турмайди. Индини-да турмайди. Жойидан қимир этмайди. Кўз очмайди, туз тотмайди.

Мен Зиёдни оғзига чой совутиб тутаман.

— Чой ич, Зиёд ошна, чой ич, — дейман. Зиёд лабларини олиб қочади.

Зиёд мумсик-мумсак кулимсинади.

Зиёд шундай кулимсинади, шундай кулимсинади — бешикдаги чақалоқдай кулимсинади!

— Туш. кўрдим, Дехқонкул ошна, туш кўрдим, — дея пичирлайди.

— Туш кўрдинг! Нима туш кўрдинг?

— Самолёт кўрдим, масалан.

— Эловрама, Зиёд ошна, эловрама. Сомолётни далада кўриб эдинг.

— Тушимда-да самолёт кўрдим. Дехқонкул ошна, тушимда-да самолёт кўрдим. Мен тушимда самолёт ҳайдар эмишман, масалан. Ўзимиз пахта тераётган далани айланиб-айланиб ҳайдар эмишман. Болалар менга қўл силкиб-қўл силкиб қўяр эмиш. Мен қўл силкимас эмишман, масалан. Сабаби — қўлларим рулда эмиш-да. Дехқонкул ошна, қўлларим рулда эмиш. Бор овозим билан ашула айтиб-айтиб самолёт ҳайдар эмишман. Директор кўк кўсак ғўзапоя ўйнатар эмиш... Эй, ичбуруғ, сенга самолёт ҳайдашни ким қўйибди, дер эмиш. Мен парво қилмас эмишман, масалан. Директор энди дағдаға қилас эмиш... Туш самолётдан, дер эмиш. Мен ашула айтиб-айтиб самолёт ҳайдай берар эмишман. Самолётимни айлантириб-айлантириб футбол майдонга кўндирав эмишман. Футбол майдондан чўнқайиб-чўнқайиб ўтарган бери бешинчи синфни самолётимга миндириб олар эмишман. Мен бешинчи синфни миндириб уйимизга жўнар эмишман, масалан. Директор кетимииздан ғўзапоя ўйнатиб қола берар эмиш...

— Мениям самолётингга миндирасанми, Зиёд ошна?

— Миндираман, Дехқонкул ошна, миндираман, Фақат директорни миндирмайман. Директор кўл қўтарса-да самрлётимга миндирмайман, масалан...

30

Қош қорая бериб-қош қорая бериб, даладан қайтаман.

Ичкари ҳадаҳалайман — Зиёд ошнам ҳолини сўрайин дейман.

Аммо Зиёд ошнам жойида йўқ бўлади.

Ташқариларни айланиб-айланиб қарайман — Зиёд ошнам йўқ бўлади.

Ошпаз қиз ўчоқ бошида ҳиқ-ҳиқ йиғлаб ўтиради.

— Зиёд кетди, — дейди. — Зиёд энди қайтиб келмайди...

Болалар бир бурчакда ғуж бўлиб олади. Нима қилишларини билмайди.

— Нима қилиб турибсизлар? — дейди ошпаз қиз. — Косаларингни олиб келинглар, овқат сузуб бераман.

— Зиёд қани? — дейман.

— Зиёд кетди, деяпман-ку, Зиёд кетди...

— Зиёд қаёққа кетди?

— Зиёд... норасида кетди!

Болалар дувв-дуvv йиғлайди. Болалар хўнг-хўнг йиғлайди.

Йифламаган бола қолмайди.
Мен бари айбни ўзимдан күраман.
— Ғұза ичидә ухлама, деганимда, Зиёд ошнам кетмас эди... — дея йиғлайман.

31

Бир оёғим түшакда бўлади, бир оёғим футбол майдонда бўлади.
Шунда, тимирскиланиб-тимирскиланиб юрмиш қизларга кўзим тушади.
Қизлар-да футбол майдонга қатнар бўлибди-да, дея ўйлайман.
Гап-сўзлардан билиб оламан — йўқ... ундаи эмас бўлади,
Бугун чин арафа бўлади.
Қизлар бурчак-бурчакларда тўда-тўда бўлиб соч ювади.
Қизлар саҳарда турнақатор далалайди. Қизлар бир хушрўй бўлади, бир хушрўй бўлади!
Қизлар қошида кўк-кўк ўсма бўлади. Қизлар юзида ялт-ялт мой бўлади. Қизлар либосида
бўй-бўй атири бўлади.
Айниқса, ўнинчи синф Зулайҳодан хушбўй-хушбўй атири анқийди.
Мен беихтиёр Зулайҳо кетидан эргашаман. Зулайҳони тўйиб-тўйиб исказман.
Зулайҳо эгат тушади.
Мен Зулайҳо билан иргама-ирга эгат тушаман.
Мен бурнимни Зулайҳо тарафга қаратиб-қаратиб пахта тераман. Қўлим чаноқда бўлади,
бурним Зулайҳода бўлади.
Мен Зулайҳони исказ-исказ пахта тераман!

32

Туш маҳал бир момо эшак миниб, келади.
Мен момони дарров танийман — момо Зиёдни онаси бўлади.
Кўнглим бир орзиқиб олади.
Зиёдни онаси эшагидан тушади. Теварак-бошга қарайди. Муаллимларимиз тараф юради.
Зиёдни онаси муаллимлар билан гапиришиб ўтиради.
Физика мени имлайди.
— Момони штабга олиб бор, — дейди.
Мен Зиёдни онаси оёғидан олиб юбораман.
Зиёдни онаси тўқимга жойлашиб ўтириб йўл олади.
Мен эшак қабатида бораман.
Йўлда Зиёдни онааи инқилаб-инқилаб боради. Бир оғиз-да гапирмай боради.
Мен эшак ётоқ олди толга қантараман. Зиёдни онасини ётоқ эргаштираман.
Зиёдни онаси ётоққа бир сидра қараб олади.
— Улимнинг жойи қаерда? — дейди. Мен Зиёдни жойини айтаман.
Зиёдни бўхчаси ҳалиям жойида турмиш булади.
— Манави бўхчаси, — дейман.
Зиёдни онаси бўхчани олади. Бўхча уёқ-буёғини қарайди.
— Ҳа, шу, — дейди. — Улимники...
Зиёдни онаси бўхчани қўлтиқлаб ташқарилайди.
Зиёдни оиаси тол остида бўхчани очади. Ичидан Зиёдни кийим-кечагини олади. Икки тол
ораси симга қоқиб-қоқиб ёяди.
Зиёдни онаси соялаб ўтиради. Билакларини тиззаларига қўйиб ўтиради. Зиёдни кийим-
кечагига қараб ўтиради.

Зиёдни кийим-кечаги офтобиёрда сарғайиб-сарғайиб туради.

Зиёдни онаси бетини билакларига босади. Зиёдни онаси из-з-из-з йиғлайды. Зиёдни онаси юм-м-юм-м йиғлайды.

Мен Зиёдни онасига құшилиб йиғлайман.

— Бари айб мендан бўлди, — дейман. — Гўза ичида ухлама, деганимда, Зиёд ошнам кетмас эди...

Мен кўзларимни қўлим сирти билан артиб-артиб йиғлайман. Мен Зиёдни уст-бошнга қараб-қараб йиғлайман.

Шунда, кўз олдим жимир-жимир этади. Жимир-жимирни офтоб зиё деб бўлмайди.

Мен тағин-да яқин бориб қарайман, Кўзларимни артиб-артиб қарайман.

Зиёдни уст-боши ғиж-ғиж... бит бўлади! Тикишлардан бит уради! Йиртиқлардан бит уради! Офтобиёрд¹ ғимир-ғимир этади! Мисоли нур жимириламиш бўлади!

Юзларим лов-лов ёнади — Зиёд учун-да орланаман, ўзим учун-да орланаман!

Боиси — баданимда ғимирламиш битларим Зиёдни битларидан зиёд бўлса бўлади — кам бўлмайди!

Мен юзларимни чет бураман. Мен кўзларимни олиб қочаман.

Зиёдни онаси энди овоз бериб-овоз бериб йиғлайды. Шунда, штабдан директоримиз чиқиб келади.

— Нима гап, ўртоқлар? — дейди. Директоримиз Зиёдни онасини кўриб ранги ўчади.

— Бизда нима айб, момо, — дейди директоримиз. — Бизда нима айб. Буни ўз оти ўзи билан пахта фронти деб қўйибди. Фронт қурбонсиз бўлмайди.

Директоримиз Зиёдни онаси елкасига қўлинни қўяди.

— Болани ўзи пахта ичида қолибди-да, — дейди директоримиз. — Ким билади, бирон нимага йўлиқканми. Сизлар эскичани яхши биласизлар-ку...

Мен директоримиз кўрмасин дея, Зиёдни уст-бошини симдан тортиб-тортиб оламан. Бўхчага солиб-солиб қўяман.

Директоримиз Зиёдни онасини қишлоғимизга қайтариб жўнатмоқчи бўлади.

Аммо Зиёдни онаси кўнмайди.

— Улим йўлиқкан жойни кўрсатинглар! — дейди. Директоримиз менга имо беради.

— Майли, олиб бор, — дейди. — Кейин, қишлоқ йўлига солиб юбор.

33

Мен Зиёдни онаси оёғидан олиб юбораман.

Ўзим эшак олдида бораман.

Зиёдни онаси Зиёдни йўқлайди.

— Зиёд кетишидан олдин бирон нима демаб эдими? — дейди.

— Деб эди, — дейман.

Зиёдни онаси бирдан сергакланади, Зиёдни онаси такқа нўхтани тортади.

— Нима деб эди? — дейди. — Айт, нима деб эди?

— Дехқонқул ошна, сени самолётимга миндираман, деб эди.

— Тағин нима деб эди?

— Тағин, директорни самолётимга миндирамайман, деб эди.

Зиёдни онаси зарда билан эшак ниқталайди.

Мен дорилангандан босида оёқ иламан.

Зиёдни онаси эшагидан имиллаб ерлайди. Ерда серрайиб қолади. Теварак-бош қарайди.

Зиёдни онаси тутлар орасида пайпанглаб аланглайди. Зиёдни онаси ўқариқларда пайпанглаб аланглайди. Зиёдни онаси ғўзалар остида пайпанглаб аланглайди.

— Бу жойни оти нима? — дейди.

— Пахтазор, — дейман.

— Пахтазорда пахтадан бошқа нима бўлмаса, улим нимага йўлиқади?

Зиёдни онаси кафтини пешонаси соябонлаб қарайди. Бирон-бир нима топаманми, дейди — тополмайди.

Зиёдни онаси сукут олиб қулоқ солади. Бирон-бир нима эшитаманми, дейди — эшитолмайди.

Ана шунда Зиёдни онаси пахтазор қараб-пахтазор қараб чақиради:

— Зиёд-у-у-у!

Мен Зиёдни онаси қўлидан тортиб-тортиб йиглаб қўя бераман.

— Юринг кетамиз, момо! — дейман. — Юринг кетамиз, ҳозир самолёт келади!

Зиёдни онаси гапимни корламайди. Энтикиб-энтикиб чақиради:

— Зиёд-у-у-у!

Зиёдни онаси ўпкаси тўлиб-тўлиб чақиради:

— Зиёд-у-у-у!

73

Мен бир амаллаб Зиёдни онасини эшакка миндираман. Мен бир амаллаб эшак нўхтасидан етаклаб оламан.

Зиёдни онаси пахтазорга боқиб-боқиб йиғлайди:

— Вой болам-ай, пахтага йўлиқкан болам-ай!..

Зиёдни онаси пахтазорга айтиб-айтиб йиғлайди:

— Вой болам-ай, пахта уриб кетган болам-ай!..

ТЎРТИНЧИ БОБ

1

Ер ҳайдасанг куз ҳайда, куз ҳайдамасанг юз ҳайда!

Ўйнаб қўяй! Мақолдан-да ўйнаб қўяй, шу мақолни айтмиш элдан-да ўйнаб қўяй!

Мен далаларимга темиртиш солдим. Далаларимни қирқ сантим ўйиб ҳайдадим.

Қирқ сантимдан чуқури ҳаво кўрмаган ер бўлади. Сув кўрмаган ер бўлади. Ўлик ер бўлади!

Ер чуқур ҳайдалса — ана шу ўлик ер юзалаб-юзалаб қолади.

Ўлик ерда чигит қийғос унмайди. Ўлик ерда ғўза ўз вақтида етилмайди. Ўлик ерда пахта ҳаяллайди.

Мен темиртиш билан далаларимни ёнбошлаб-ёнбошлаб ҳайдадим. Мен темиртиш билан далаларимни палахсалаб-палахсалаб ҳайдадим.

Далаларим ости устун бўлди, далаларим усти остин бўлди.

Далаларимда кўрсичқонлар ўрмалаб чопди. Далаларимда кўрсичқонлар йўргалаб чопди.

Ҳа, ўйнаб қўяй, бидир-бидир йўргалашларингдан, ўйнаб қўяй, дедим.

Кўрсичқон ер ковлай беради, ер ковлай беради — далаларимни мулойимлайди-да. Кўрсичқон бир ер ости, бир ер усти бўйлаб бидирлай беради-бидирлай беради — ер ости ҳаво йўлларини очади-да. Кўрсичқон ер остини шамоллатиб-шамоллатиб туради-да.

Шу боисдан кўрсичқон бор дала семиз-семиз келади. Кўрсичқони бор дала унумли-унумли келади.

Далаларим ғимир-ғимир чувалчанг бўлди.

Мен тағин-да хушвақт бўлдим —чувалчанг бор дала даламисан-дала бўлади. Чувалчанг бор дала далалар гултожи бўлади. Чувалчанг бор дала далалар хўрози бўлади!

Боиси —чувалчанг ерда бор бўлмиш жами нимани чиритиб-чиритиб ўғит этади. Чувалчанг ерни қайта-қайта ишлайди. Чувалчанг ерни майнин-майнин сақлайди.

Далаларимда оппоқ-оппоқ куртлар-да бўлди.

Темиртиш изидан қарғалар эргашди. Темиртиш изидан қушлар эргашди.

Қарғалар оққурт овлаб еди. Қушлар чувалчанг териб еди.

Мен қарғалар қилмишидан рози бўлдим — оққурт ҳэшаротлар онаси бўлади. Катта бўлса, қанот олиб учади.

Қош қорайди.

Мен трактор чироқларини ёндиридим.

Чироқ ёруғида тулкилар қора берди.

Тулкилар темиртиш кетидан эргашди. Тулкилар қўнғиз териб-қўнғиз териб еди.

Тулкилар қаердан келди, қачон келди —унисини ёлғиз товуқлар билди.

2

Уйимизда нимамиздир йўқдай бўлди, уйимизда нимамиздир камдай бўлди.

Бола-бақраларимни қарадим, — бари омон-эсон бўлди.

Мол-холларимни санадим — бари тугал бўлди.

Товуқларимни санадим — товуқларим-да тугал бўлди.

Унда кимим йўқ бўлди, унда нимам йўқ бўлди?

Мен ўйлаб-ўйлаб топдим — айвонимиз шипида ҳаёт қечиравчи қалдирғочларимиз йўқ бўлди.

Қалдирғочларимиз қаёққа кетмиш бўлди?

Қаёққа бўларди — Афғонистонга-да. Амударё ўнг бети Афғонистон-да. Илик юрт оти бўлади — қалдирғочлар юрти бўлади-да.

Қалдирғочлар афғон юртга сафарлабди — куз охирлабди-да.

3

Бир далам юзи оппоқ-оппоқ бўлди. Бу не бўлди? Эрта тушмиш қор бўлдими ё қиров бўлдими?

Бир вақтлар ана шу далам ғуж-ғуж қамишзор эди. Қирғовулзор эди.

Деновдан беш-олти қур келди. Қурлар ана шу қамишзорни теп-текислади. Пол-поллади. Шолипоя этди.

Қамишзорда шундаям шоли бўлмоқлик қилди, шундаям шоли бўлмоқлик қилди-е! Қурлар ўз шолисини ўзи ташиб ололмай қолди!

Шунда қурлар бизга-да бир халтадай гуруч берди.

Ана шунда қозонимиз гуруч қўргандай бўлди! Ана шунда қорнимиз палов егандай бўлди!

Аммо... катталар қурларни кўп кўрди.

— Ўзбекистон Қурия эмас! — дея дўқлади.

Шу-шу — қурлар қорасини қайтиб кўрсатмади.

Шолипоя пахтазор бўлди.

Мен мазкур даламни сувлаб эдим — ер усти сувни ер остига қараб сингди-сингди — ер ости суви билан қўшилди. Шунда, ер ости суви тупроқ қил-қил нозик йўлларидан ер бетилаб келди. Ер ости суви ер бетида буғланди-буғланди — ҳаволаб учиб-учиб йўқолди.

Ер бетида ана шу оппоқ-оппоқ тузлар қолди.

Мен ушбу даламни учта полладим. Полларни тизза бўй-тизза бўй марзаладим. Марзаларни бел юзи билан тарс-тарс уриб зичладим.

Полларни айлантириб ариқ қазидим. Ариқ энди бир кетмон энича бўлди. Ариқ чуқурлиги тизза бўйича бўлди.

Учта полни-да лаболаб-лаболаб сувладим. Кўллатиб-кўллатиб сувладим.

Кечаю кундуз пол айландим. Марзала бўйлаб-бўйлаб айландим.

Сув марзаларни уриб кета берди-уриб кета берди.

Мен сув уриб кетмиш жойларни кетмон билай бердим-битай бердим.

Сув кўллади-кўллади — далам шўрини остига босиб-босиб юбора берди. Далам шўрини ер ўлиқ қатламига чўктириб-чўктириб юбора берди.

Ер бетида қолмиш шўрни эса сўриб-сўриб ола берди. Оқова сув бўлиб оқиб-оқиб кета берди.

Шўр даламни икки бор ана шундай кўллатиб-кўллатиб сувладим.

Шўр далам шўрдан фориғ бўлди.

4

Далаларим узра мезонлар учмай қолди. Далаларим узра сокин ҳам ғамгин бир ҳолат чўқди.

Далаларим мудраб-мудраб олди.

Далаларим кўз илиб-кўз илиб олди.

Далаларим уйқуга кетди.

Мен энди далаларимга қўл уришдан тийилдим.

5

Далаларимдан қор ариди.

Узун қиши қорайиб-қорайиб ётмиш далаларим ерранг-ерранг бўлди.

Далаларимда омонат-омонат қотиб ётмиш кесаклар умалиб-умалиб тупроқ бўлди.

Далаларим кўпчиб-кўпчиб қолди.

Далаларим тўлғонди.

Далаларимдан оппоқ-оппоқ ховур ҳаволанди. Далаларимдан элас-элас овоз ҳаволанди.

Овоз далаларим остидан келдими ё олислардан келдими — билиб бўлмади.

Далаларим хўрсинди.

Овозда ранг-рўй-да бўлмади, овозда бўй-баст-да бўлмади. Овоз дейин дедим — овозга менгзамади, овоз демайин дедим—овоз шундай пешонамдан келди.

Далаларим энтикли.

Далаларим уйғонди. Далаларим кўз очди.

Далам мени имлади, далам мени чорлади.

6

Бир тонна гўнгга йигирма кило калий аралаштиридим, йигирма кило фосфор арашлатирдим.

Далаларимга сепиб-сепиб ташладим.

Ер — хамир, ўғит — хамиртуруш бўлди.

Далаларимни такрор шудгорладим. Далаларим чет-четлари чала қолмасин учун чорсилаб-чорсилаб шудгорладам.

Шудгор кетидан Дилнавоз солдим.

Дилнавоз — длина базовой гридёр нож — 4, дегич техника. У ер текислайди. Узунлиги ўн қадамни олади. Тўрт оёғи билан тўрт қулочлик кетмони бўлади.

Бундайчикин бир қулоч отни айтиш учун менда тил қани? Бундайчикин отни айтиш учун менда вақт қани? Бундайчикин отни айтаман дегунимчайин күн кеч бўлади!

Шу боисдаи мен уни Дилнавоз, дея атадим. Мен ана шу Дилнавозим билан шудгорни кўндаланглаб-кўндаланглаб ҳайдадим. Шудгорни белидан қирқиб-белидан қирқиб ҳайдадим. Дилнавозим билан шудгор ҳаворладим.

7

Қиши оладан, ёз моладан, дейдилар. Бу демак — қишида ер сувласанг ола қолдирма, кўкламда ер ҳайдасанг bemola қолдирма, демакдир.

Боиси — кўклами шудгордан кейин ер оралари ҳавол-ҳавол бўлиб қолади. Ана шу ҳаволлардан шамол киради-киради — ер нами қочиб қолади. Ер намини сақлаб қолиш учун эса шудгорни бороналаш лозим бўлади.

Мен шудгорни бороналадим.

Далаларим кафтдай-кафтдай бўлди. Далаларим можак қўйса кўринар бўлди.

Аммо бир боронани ўзи кифоя этмайди. Энди молалаш лозим бўлади. Мола ер намини ост қабатидан уст қабатига кўтариб беради. Мола ер юза кесакларни майдалаб-майдалаб беради.

Мен энди далаларимни молаладим.

Далаларим сумалакдай-сумалакдай бўлди.

Жўя олиб экилмиш ғўза ўн-ўн беш кун олдин етилади. Жўя олиб экилмиш ғўза ўн-ўн беш кун олдин очилади. Жўядга униб чиқмиш ғўза офтоб тафтини тез олади.

Шу боис, трактор билан жўя олдим.

Далаларим кокилдай-кокилдай бўлди.

8

Чин, далаларим қиши билан қор сув ичди. Чин, далаларим қиши билан ёмғир сув ичди.

Аммо сув билан сув бор-да. Масалан, ҳовуз сув ғозсиз сув бўлади. Одам ҳовуз сувдан ичса — сув ичгандай бўлмайди.

Одам оқар сувдан ичса — бадани жимир-жимир этади. Бадани яйрайди!

Оқар сувдан мия тўлади. Оқар сувдан мия равшан тортади.

Оқар сувда жон бор-да!

Шу боис, далаларимга яхоб сув бердим.

Жўялардан жилдиратиб-жилдиратиб яхоб сув оқиздим.

Далаларим бир ҳафта яхоб сувлади. Далаларим бир ҳафта захлаб сувлади.

Ана энди далаларим донадор-донадор бўлади.

Ана энди далаларим серкесак-серкесак бўлади. Донадор дала намдор дала бўлади. Сув ана шу доналар оралаб ер сингади. Ҳаво ана шу доналар оралаб ўтади.

9

Дала кўнгли нозик бўлади — вақт-бевақт оралай берса кўнглига олади.

Дала феъли инжиқ бўлади — бот-бот трактор сола берса айниб қолади.

Дала тепкиланиб қолади. Дала зичланиб қолади. Дала тош-метин бўлиб қолади.

Даладан тирик мавжудотлар қочади. Қочолмай қолмиш мавжудотлар ўлиб-ўлиб қолади.

Оқибат — ғўза эмин-эркин илдиз отмайди. Ғўза ором-ором ўсмайди.

Мен далаларимдан оёғимни тортдим.

10

Тукли чигит бўлади, туксиз чигит бўлади.
Туксиз чигит бўлали-бўлали бўлади. Туксиз чигит залворли-залворли бўлади.
Туксиз чигит бехато олади, туксиз чигит бехато кўкаради.
Далааларим учун ана шу туксиз уруғ чигит келди.
Мен омборимни шамоллатдим. Дорилаб ювдим. Оҳак билан оқладим.
Омборимга тахта тўшадим. Тахта устига чигит ёйдим.
Мен бош-адоқ танапўш кийдим. Резина этик кийдим. Қўлқоп кийдим. Кўзойнак тақдим.
Уруғ чигитни ҳовуз солдим. Формалин дегич қуруқ дори билан дориладим.
Бадбўйдан-бадбўй доридан ўқчиб-ўқчиб олдим.
Шийпон олдида бир қарич қалин ёйдим. Устидан пуркагичда сув сепдим. Ёғоч курак билан
остин-устун ағдардим. Бетиним сувладим.
Уруғ чигит сувдан тўйди.
Ивитилмиш чигитни тизза бўй тўпладим. Тағин сувладим.
Чигит томирига илдизканана киради. Томирни ейди-ейди — эгри-буғри яра этади. Чигит
корамтири-корамтири бўлиб қолади.
Бундай чигит кўкармайди.
Ана шу илдизканани даф этиш учун чигитнн гексахлоран билан дориладим.
Чигит униб қолмасин дея, шамоллатиб-шамоллатиб олдим.

11

Трактор кетига тўрт қутилик уруғсепгич тақдим.
Бир қутига ўн беш килодан чигит солдим.
Бир вақтлар чигит билан гербицид аралаштирудим. Чигит ер кўрди — айни вақтда чигит
билан гербицид-да ер кўрдн.
Хлорфенидим дегич оч кулранг гербицид бир-икки паллали бегона ўтни ўн-ўн беш кун ер
остида босиб турди. Дихлорфенидим дегич кулранг гербицид кўп паллали бегона ўтни ўн-ўн
беш кун ер остида бош кўтартирмай турди.
Гербицид ер осталда бир ярим ойча турди — аммо бегона ўтни тамоман йўқотолмади.
Ёмондан-ёмони — гербицид бегона ўт билан баробар ўн-ўн беш кун чигитни-да ундирамай
турди. Гербицид пахтани ўн-ўн беш кун ҳаяллатди.
Шу боис, мен энди гербицид баҳридан ўтдим.
Катталардан лалми-лалми дўқлар эшилдим.
Аммо гапимни қайтиб олмадим.

12

Ҳаво билан ер ҳарорати ўн даражадан остида чигит бўртади — аммо кўкармайди. Чигит
бўртик-бўртиклигича чириб тамом бўлади.
Ҳарорат ўн икки-ўн тўртда чигит экса бўлади.
Айни кунлар ана шундай кунлар бўлди!
Чин, далаларимда ҳарорат ўлчагичим бўлмади. Ҳарорат ўлчагичга куним-да қолмади.
Мен далаларим ҳароратини вужуд-вужудим билди. Мен далаларим ҳароратини тан-
жоним билан туйдим.
Мен далаларим ҳароратини ердан бир ҳовуч тупроқ олиб билдим.
Вужуд-вужудларим айтди, кафт-кафтларим айтди: ана энди эк, деди. Бугундан ҳаялласанг

— дала бети қуриб қолади, деди. Сүғин, чигит кеч униб чиқади, деди. Ундан сүғин, күкартириш учун чигит сув бериш лозим бўлади, деди. Унда-да сүғин, чигит сув далани қотириб ташлайди, деди. Оқибат —чигит ёппа барака униб чиқмайди, деди. Ёмондан-ёмони — кеч экилмиш чигит камҳосил бўлади, деди.

Мен тракторни дала ўнгардим.

Уч сантимдан саёз чигит экиб бўлмайди. Далабет дарров нам олдиради. Чигит намсиз бетда қолади. Ҳадеганда кўкара бермайди, Кўкарса-да — ёппа барака кўкармайди. Битта-битта кўкаради. Оқибат — гўза сийрак-сийрак бўлиб қолади.

Беш сантимдан чуқур-да экиб бўлмайди. Беш сантим чуқурга ҳарорат етмайди. Беш сантим чуқур охиста-охиста қизийди. Оқибат чигит-да охиста-охиста унади.

Беш сантим чуқурни ёриб чиқиш чигит учун ит азоб бўлади!

Шу боис, мен тўрт сантим чуқурликда чигит экдим.

Бир қадам пуштага йигирма-йигирма бештадан чигит тушди.

Чигит нима учун билониҳоя-билониҳоя тушди?

Масалан, йил серёмғир келди. Дала сернам келди.

Бир-иккита чигит сернам даладан бўртиб чиқолмайди. Бир-иккита чигит сернам даладан ёриб чиқолмайди. Чигит куввати етмайди.

Ер оғир-да, ер оғир.

Масалан, зил-замбилин бир-иккита одам кўтароладими? Кўтаролмайди. Кўпчилик бўлса — даст кўтаради.

Чигит-да шундай-да! Чигит билониҳоя бўлса — ерни даст кўтаради. Чигит билониҳоя бўлса — ерни кувват билан ёриб чиқади.

Далаларимни чигит дори иси босди.

Мен ўқчиб-ўқчагб чигит экдим.

13

Дарвозамиздан ичкарилаб эдим — Ойсулув қизимиз пешвоз чопиб келди.

— Ота, суюнчи беринг, қалдирғочларимиз келди! — деди.

Даҳлизимиз шипига назар солдим — чини билан инда бир қалдирғоч бўлди. Тағин иккита қалдирғоч шиплар аро учиб юрди.

Кўзим қувонди.

— Ўйнаб қўяй, ўйнаб қўяй... — дея пицирладим, Қалдирғочлар чиндан-да ўзимизни қалдирғочларми ё бегонами, дея синчиклаб-синчиклаб қарадим.

Қалдирғочларда улги-да бўлмади, тамға-да бўлмади.

Чин-да — Қалдирғочлар кийим киймайдилар. Қалдирғочлар сўйламайдилар. Қалдирғочлар кулмайдилар.

Шундай бўлса-да, мен ич-ичимдан туйдим: уйимизни топиб келибди — ўзимизни қалдирғочлар бўлади-да.

Қалдирғочларимиз бошимиз узра учди. Чарх-чарх учди. Гир-гир учди.

Қалдирғочларимиз инларида қатор бўлиб ўтирди. Қалдирғочларимиз бизга мўралаб-мўралаб ўтирди. Қалдирғочларимиз бизга мўлт-мўлт ўтирди.

Мен ташқарилаётib эдим — бир қалдирғочимиз бошим узра чирқ-чирқ айланди. Қалдирғоч қанотлари телпагимга тега-тега айланди.

Қалдирғочимиз мен билан салом-алик қилди-ёв!

Қалдирғоч қанотлар ҳавоси пешонамни силаб-сийпаб айланди.

Қалдирроҷимиз мен билан ўпишиб-ўпишиб кўришди-ёв!

Мен кула-кула кўзларимни чирт юмдим. Мен кула-кула бетларимни чет бурдим.

— Хуш күрдик, жониворлар, хуш күрдик! — дедим.

14

Далаларимга вакил келар бўлди.

— Элбурутдан вакилга пишириб қўйибдими, — дедим. — Ҳали чигит экиб бўлмаган бўлсак.

— Энди, хўжалигимиз гуллаб-яшнайди! — деди раисимиз. — Район вакили ўзимиздан бўлди.

— Қани, эшитайлик, қани? — дедим.

— Ўртоқ Клара Ходжаевна район партия комитети учинчи секретари бўлдилар. Айни вақтда хўжалигимизга вакила этиб тайинландилар.

— У киши ўзимизданми? — дедим.

— Ўзимиздан-да. Мактаб директори бор эди-ку, ўша директорни қизлари-да.

— Э, ҳа, бўлди! — дедим. — Раҳматлик мактаб ди-екторимизни фарзандлари-да?

— Ҳа-а, каллангиздан! Ана ўша мактаб директорини қизлари!

— Раҳматлик мактаб директоримизни қизлари кўп эди, қайси бири бўлди?

— Ўртоқ Клара Ходжаевна! Роза Ходжаевна обкомда ишлайтилар!

— Бўлди-бўлди, — дедим. — Эгизаклар-а? Эсладим-эсладим.

Раисимиз шийпон олдини саранжом-саришталади.

— Эшаклар кўздан панага олинсин! — деди. Деҳқонларимиз эшакларини Жарариққа бойлаб келди.

Самад бобо қирчанги отини етаклаётиб эди, раисимиз ўнг қўлини кўтарди.

— От турсин! От— маданий ҳайвон! — деди.

15

Шийпонимиз олдида машиналар қатор бўлди.

Олд машинадан бир аёл тушди.

Аёл келишимли-келишимли бўлди. Аёл турмаксоч-турмаксоч бўлди.

Аёл турмаксочлари қалдирғочларимиз уясидай-уясидай бўлди.

Аёл шийпонимиз теварак-бошига қараб-қараб олди.

— Нормално, нормално! — деди.

Аёл кўл узатиб қўришди-қўришди — мен билан муқобил бўлди.

Мен аёлни қизим-қизим, дейин дедим — катта одамни қизим дейиш учун тилим бўлмади.

Мен аёл отига хон ё ғул қўшиб айтайн, дедим — фарғоначи бўлмадим.

Бўлдим-бўлдим, сурхони бўлдим — байча дейин-да.

— Қани, ё, бисмилло! — дея қўшқўллаб қўришдим. — Омонгинамисиз, Кларабайча?

Вақтигинангиз хушми, Кларабайча? Ўйнаб-кулибина юрибсизми, Кларабайча?..

— Нима-нима?

— Кларабайча?

Аёл лаб бурди. Аёл қош керди.

— Байча? Какая байча? — деди. — Мен Клара Ходжаевнаман!

Мен нима дейишимни билмадим. Мен кўз остимдан раисимизга қарадим.

Раисимиз узр сўра, дея қўлини кўксига қўйиб ишора берди.

Мен дарров ўнг қўлимни кўксимга қўйдим.

— Тавба қилдим, — дедим.

Аёл ана шунда юзимга тикилиб қаради!

Аёл сергакланди. Аёл қизариб-бўзарди. Аёл... ирганди!

Аёл күзларини олиб қочди. Аёл далалар узра разм солди. Аёл оҳиста-оҳиста бош иргади.

— Ўртоқ раис? — дея мажнунтоллар тараф йўл олди.

Раисимиз лаббайгўй бўлиб-лаббайгўй бўлиб борди.

Аёл мажнунтоллар остида одимлади.

Раисимиз аёл кетроғида одимлади. Аёл оғзига қараб-қараб одимлади.

Тағин, катталар чакирса эшитмай қолмайин дея, мажнунтоллар ортидан бориб турдим.
Катталар йўталса бўлди — чопқиллаб бораман дея, қулогимни динг этиб турдим.

— Машъял бригадирингиз шуми, ўртоқ раис? — деди аёл.

— Шул-шул, — деди раисимиз. — Дехқонқул шул!

— Дехқонқул... классический от! Лекин шу...

— Чин, пича ўқимаган, чин.

— Гап ўқишида эмас, ўртоқ раис. Юқоридан партия-хукумат арбоблари ташриф буюриб, илғор пахтакорингизни кўрсатинг деса, қандай қилиб кўрсатамиз?

— Кўрсата берамиз, нима қипти?

— Институтда эстетикадан неча баҳо олгансиз? Тўғри, аввало меҳнат. Лекин меҳнат ўз йўлига; Илғор пахтакор учун ташқи кўриниш ҳам керак. Илғор пахтакор партия-совет арбоблари билан қўл олиб-қўл беради. Илғор пахтакор мажлисларда, матбуотда чиқишлиар қиласи.

— Бет-боши туппа-тузук-ку, Клара Ходжаевна?

— Илғор пахтакорингиз бетидан бузилган пес-ку? Кўнглимни айнитиб юборди-я!..
Раисимиз... бет-бошимни оқлади.

16

Ўзбекистон ўз оти ўзи билан жануб бўлди.

Бизнинг Сурхон жанубни жануби бўлди.

Сурхон жазирамаси жазирамани жазирамаси бўлди.

Сурхон саратони саратонни саратони бўлди.

Тошкент радиосида ҳарорат ўттиз бўлди, бизнинг Сурхонда кирқ бўлди.

Тошкент ойнаижаҳонида ҳарорат қирқ бўлди, бизнинг Сурхонда эллик беш бўлди.

Сурхон саратони кўз очирмади. Сурхон саратони киприк қоқтирумади.

Кўз очмаса, тағин бўлмади — ғўза қараб турмади!

Ғўза кун санади! Ғўза учун ҳар бир кун ғанимат бўлди.

Мен кўзларимни қисиб-қисиб кетмон чопдим. Мен кўзларимни қисиб-қисиб ғўза ўтоқладим.

Мен кўзларимни қисиб-қисиб пахта тердим.

Жазирама жингиртоб-жингиртоб қафсига олди.

Мен бор ҳол-қувватим билан кўз қисдим. Мен бор дикқат-эътиборим билан кўз қисдим. Мен бор ақл-фаросатим билан кўз қисдим.

Шунда, пешонамда чукур-чукур ажинлар чизик тортди. Шунда, ёноқларимда узун-узун ажинлар чизик тортди. Шунда, лабларимда майдада ажинлар чизик тортди.

Бутун бет-бошим биж-биж ажин бўлди. Бутун бет-бошим ғуж-ғуж ажин бўлди.

Бет-бошим бет-бош бўлмади — дарз-дарз ер бўлди. Бет-бошим бет-бош бўлмади — қақроқ-қақроқ ер бўлди. Бет-бошим бет-бош бўлмади — шўр-шўр ер бўлди!

Мен кирқ даражадан ана шу ажинларим остида кун кўрдим. Мен эллик даражадан жазирамадан ана шу ажинларим остида жон омонладим.

Мен чилла дея аталмиш дўзахдан ана шу ажинларим остида жон ховучладим.

Саратон куйдира берди-куйдира берди — ўлмаган ана шу ажинларим бўлди.

Мен соя-салқинда бет-бошимни бўш-бўш қўйдам. Мен соя-салқинда кўзларимни эмин-эмисин

очдим.

Ана шунда қоп-қора ажинларим ёйилди. Ана шунда қоп-қора ажинларим остида тилем-тилим йўллар кўриниш берди. Ана шунда қоп-қора ажинларим остида тарам-тарам йўллар кўриниш берди. Ана шунда қоп-қора ажинларим остида ҳалқа-ҳалқа йўллар кўриниш берди. Тилем-тилим йўллар қизғиши-қизғиши бўлди. Тарам-тарам йўллар оқиши-оқиши бўлди. Ҳалқа-ҳалқа йўллар оқимтили-оқимтили бўлди.

Илк бор кўрмиш одам бетидан бузилибди, дея ўйлади...

17

Аёл билан раисимиз олдин-кетин қайтиб келди.

— Молодец, машъал бригадир! — деди аёл. — Партия-хукуматимизга ана шундай қуёшда тобланган пахтакорлар керак!

— Қуллук, — дедим.

— Бизга қандай хизматлар бор?

— Хизмат йўқ. Бари нима тўкин-сочин.

— Ишларингизга муваффақият тилайман!

— Тағин бир қуллук.

Аёл далаларимни қаради. Оқтупроқ далам экувсиз эканини билиб қолди.

— Нега ҳозиргача чигит экилмаган? — деди. Раисимиз қириниб йўталди. Баён этиш учун шайланди. Яна-тағин менга қаради — ўзинг айт, деган бўлди.

Мен нима дейин?

Раҳматлик мактаб директоримизни қизгинаси, чин, оқтупроқ далам экувсиз ётибди, боиси

— қуриб-қақшаб ётибди, оппоқ чангид ётибди, дейинми? Оқтупроқ далам мироб марҳаматини қараб ётибди, дейинми?

Мен миқ этмайин қараб тура бердим.

— Маза йўқ-ку, машъал бригадир? — деди аёл. Энди нима дейин?

Ўйнаб қўяй, раҳматлик мактаб директоримизни қизгинаси, ўйнаб қўяй, оқтупроқ даламга айни шу ҳолида чигит экайин — чигитим унмайди, дейинми? Чигитим унса-да, уч-тўрт кўсакликкина нимжон фўза бўлади, ҳосили бир теримдан ортмайди, дейинми?

— Бу даламиз оқтупроқ дала... — дедим. Ўйнаб қўяй, қалдирғоч уя турмаккинангиздан ўйнаб қўяй, мироб олдин сув берсин, мен олдин оқтупроқ даламни сувлайнин, кейин тоблайнин — ана ундан кейин экайин, дейинми?

— О, тем более, оқтупроқ! — деди аёл.

— Шундай, шундай, — дедим.

— Оқтупроқ ерга биринчи бўлиб экиш керак! Экканда ҳам тифиз экиш керак! Тўғрими, ўртоқлар?

— Доно фикр! — деди раисимиз. — Ҳикматли гап!

Мен нима дейишимни билмадим - тилем айланмай қолди.

Аёл ўнг қўл оппоқ қўлқопини суғурди. Ерга қўл узатди.

— Қани, кўрайлик-чи, — дедим.

Аёл бир сиқим тупроқ олди. Юзлари олдига олиб келди. Синчиклаб тикилди.

— О, машъал бригадир! — деди. — Бу ер эмас асал, асал! Шундай асал ерни куттириб ўтирибсиз-а. Яхши эмас, машъал бригадир, яхши эмас.

— Экамиз, экамиз, — дедим.

— Экинг, кечиктирмай экинг! Анави турган трактор чигит экадими? Ўшани тез буёқча олиб келинг!

Мен энди нима дейин?

Үйнаб қўяй, қалдирғочуя турмаккинангиздан үйнаб қўяй, аnavи оппоққина кафтиңгиздаги ер эмас, у бир чанг, ғўза чангда кўкармайди, ғўза ерда кўкаради, дейинми?

Мени ҳамиша далаларим қўллади, Мени ҳамиша далаларим қувватлайди. Мени ҳамиша далаларим ёқлади.

Бу сафар-да далаларим қўллади: аёл оқтупроқни ташлаб эди — оқтупроқ деярли ерга тушмади! Оқтупроқ чангби-чангби учди!

Аёл бет бурди. Аёл бет ўгириди.

— Фу-у - дея кафти билан чанг қувди. Раисимиз тирсагимдан чет тортди.

— Чопинг, тракторни олиб келинг, — дея шивирлади.

Мен кетимга қараб-қараб йўл олдим. Мен умидланиб-умидланиб йўл олдим.

Аёл, майли, қўя беринг, дейдимикин, дея умидландим.

Трактордан садо чиқди — аёлдан садо чиқмади.

Оқтупроқ даламга трактор солдим

Аёл трактор кетидан мамнун-мамнун бош ирғаб қаради.

18

Намозшомда раисимиз дарвозасини олиб турдим.

Раисимиз келди. Раисимиз билан ароқ ҳиди-да келди.

— Шефни жўкандим, — деди раисимиз. — Клара Ходжаевнани жўнатдим. Қани, бундайчикин турибсиз?

— Оқтупроқ далани нима қиласиз, раис бова? — дедим.

— Нима қиласардингиз — экинг, Шеф айтди — экинг!

— Эккан билан...

— Биламан! Лекин райком секретари оғзидан чиқсан гап — қонун-да!

— Меҳнат қиласи кираси эмас-да?

— Биламан! Лекин райком секретари буйруқ берди-да! Экмай кўринг — эрта-индин райкомга устимиздан юмалоқ хат тушади!

Мени-да аёл зоти бино этди. Болхин теримчи онамиз айбимдан ўтсин — аёл аралашмиш иш расвои радди бало бўлади.

Мени-да аёлим бор — у бир этак фарзанд туғиб берди. Бир этак фарзандларим онаси бўлмиш аёлимиз, мен учун қўли косов аёлимиз, мен учун сочи супурги аёлимиз айбимдан ўтсин — аёл аралашмиш иш очиқ мозор бўлади.

Мени-да қизларим бор, қизларим гуноҳимдан ўтсинлар — аёл аралашмиш сиёсат юрт шўри бўлади, аёл аралашмиш сиёсат эл шўри бўлади.

19

Саккиз кун қарадим, тўққиз кун қарадим, ўн кун қарадим — қани энди, оқтупроқ даламда чигит бўртса, қани энди оқтупроқ даламда чигит уч берса.

Оқтупроқ далам кал калладай ялтираб тура берди.

Охири тоқатим тоқ бўлди — оқтупроқ даламни буздим.

Оқтупроқ даламни сувладим. Оқтупроқ даламни тобладим.

Қайта экдим.

20

Шу-шу — вакила аёл бир оёғи далаларимда бўлди.

— Ўзи, шу пошикастани касби нима? — дедим.

— Идеология! — деди раисимиз.

Шундан буён раҳматлик мактаб директоримизни қизини Идеология дегич бўлдим.

21

Тоғ чўққилари узра кўмир-кўмир булут тошди.

Далаларим бошида кўмир булут тугул оппоқ булут-да бўлмади.

Мен кўнглимни тўқлаб уйга келдим.

Кечаси бир маҳал момақалдироқ гулдуради.

Мен ташқарилаб қарадим.

Қиблахда сим-сим: яшин ёнди. Кўндаланг ёнди. Тикка ёнди.

Шаррос-шаррос ёмғир ёғди.

Мен кўлимга хитойи фонаримни олдим. Елкамга кетмонимни олдим. Жаариқ йўл олдим.

Жаариқ тўлиб сел оқди. Тошиб-тошиб оқди.

Мен дала бошини қарадим. Этларим бир увишиб олди.

Сел Жаариқдан тошди. Сел дала ариққа ўтди. Сел ариқ қулоғини олди. Сел далаларим оралаб оқди.

Мен этикларимни сугурдим. Чолворимни липпа урдим. Сел ораладим.

Шу теваракда кесак бўлдими, тош бўлдими — қулоққа олиб келиб босдим. Трактор темирларини олиб келиб босдим.

Сел барини ювиб-ювиб оқди.

Мен кетмон билан чим ўйиб-чим ўйиб босдим — сел чимларни-да ювиб оқди.

Тан-жоним тер бўлди. Ўнгири姆 билан бет артдим. Энтикиб нафас олдим,

— Бор-е! — дея кетмонимни отиб юбордим. Селга қараб ўтиридим. Сел остида қолажак далаларим кўз олдимга келди.

Мен иштончан бўлдим. Кўзимни чирт юмиб селга оёқ солдим.

Сел яхдай-яхдай бўлди.

Мен қулоқда тикка туриб сел балогардон бўлдим.

Сел белимга урди. Сел кўкрагимга урди.

Мен қулоч ёйиб-ёйиб сел балогардон бўлдим.

Сел дала ариққа деярли ўтмай қолди.

Сел ёғоч оқизиб келди — ёғоч кўкрагимга тегиб-тегмай ўтди. Сел шохча оқизиб келди — шохча кўкрагимга тегиб-тегиб ўтди.

Тан-жоним яхлади. Суякларим қақшади. Тишларим тик-тик этди.

Бир маҳал тиззаларимга зилдай бир нима келиб урилди. Зил нима тиззаларимдан оёқларим юзига тушди. Оёқларим юзида оқмай қолди.

Оёқларим бир оғриди, бир оғриди!

Бақирайин дея оғиз очдим — овозим чиқмади.

Оёқларим бирорвони қўйиб бирорвони тортдим — зил нима остидан тортиб ололмадим.

Оёқ панжаларим танам учун бегона бўлиб туюлди. Панжаларимни қимирлатдим — панжаларим-да қимирламади.

Бошим айланди. Кўнглим озди. Кўзим тинди...

22

Кўзларимни очдим — бошимда оппоқ кийимлик қизгина ўтирди.

— Эб-ей, қаерга келиб қолдим, эб-ей! — дедим. Адоғимда онамиз ўтирди.

— Очиқ мозорга келиб қолдинг! — деди онамиз. — Очиқ лаҳадга келиб қолдинг!
Идеология билан раисимиз кириб келди.
— Нима бўпти, Болхин момо? — деди раисимиз.
— Нима бўлгич эди, ана, кўргилигини кўриб ётиби! — деди онамиз. — Эл-халқ аzonда
Жарариқ адогидан топиб олибди. Мундай қарасалар, балчиқда бир мурда ётган эмиш.
— Ана қаҳрамон, мана қаҳрамон! — деди раисимиз.
— Матросов! — дея хитобланди Идеология. — Замонамиз Матросови! Бундай қаҳрамонлар
билан коммунизм қурса бўлади!
Онамиз енги учи билан оғзини ушлаб йигламсиради.
— Селда-да ақл йўқ экан-да, — деди онамиз. — Биратўла очик мозорга олиб бориб
ташламабди-да!
— Ундай деманг-е, Болхин момо! — деди раисимиз. — Дехқонкул ака табиий офат билан
қаҳрамонларча олишган!
— Э, қирилиб қирғинни олдидан кетсин, бундайчикин қаҳрамон!
— Ўртоқ Жамолиддинов табиий офатни кўкси билан тўсиб, Матросов жасоратини
такрорлаган! — деди Идеология.
— Э, кафанини бичайин, бундайчикин Матросовни, кафандигинасини бичайин!
— Бакирманг-е, эна... — дедим.
— Бакираман! — шангиллади онамиз. — Ўлиб кетсанг, бола-бакрангни ким боқади?!

— Уф-ф, эна...
— Ҳа, фотигангга борайин сендейчикин Матросовни, фотиҳагинангга борайин!
— Ҳа энди, пахта учун-да, Болхин момо, пахта учун — деди раисимиз.
— Ҳа, пахталаринг қиёмат кетсин-а, пахталаринг қиёматгина кетсин-а! Мен пахта деб нима
бўлдим? Бир беланги бўлдим! Улапам ўттиз сўм пенсия бўлди.
— Сиз сиёсий хато қилмоқдасиз, момай! — деди Идеология. — Социалистик
системамизнинг энг буюк афзаллиги шундаки, у меҳнаткашларни ўз тақдирининг хўжайини
қилиб қўйиш билан, инсоният тарихида биринчи марта оддий инсонни мисли қўрилмаган
юксакликка кўтарди, капиталистик қуллик системаси эзиб келган миллион-миллион кишиларни
актив ижодий фаолиятга жалб этди!..

— Эътибор берманг, Клара Ходжаевна, — деди раисимиз. — Момолар ўқимаган-да.
— Сиз момайлар гапига қулоқ солманг, ўртоқ Жамолиддинов! — деди Идеология. —
Меҳнатни ижтимоий иш деб, давлат аҳамиятига эга бўлган иш деб, шарафли иш деб билиш,
меҳнат унумдорлигини тинмай ошириш, социалистик мулкни авайлаб-асраш, совет кишисининг
онглилигини, унилг олижаноб маънавий қиёфасини, унинг коммунизм ишига содиқлигини
кўрсатувчи энг асосий фазилатdir, меҳнатни менсимаслик, паразитизм жамиятга зид
ходисадир, одамнинг одам томонидан эксплуатация қилиниши тамомила йўқотилган ва меҳнат
ўзи учун қилинадиган, ўз баҳти учун, ҳамманинг баҳт-саодати учун, социалистик жамият
фойдасига қилинадиган меҳнат бўлиб колган социализм шароитида эса бу ҳол ҳалққа бутунлай
зид ҳолдир, Бизнинг жамиятимизда текинхўрлар ва дангасаларга ўрин бўлмаслиги керак!..

Даволандим-даволандим — бинойидай туриб кетдим.

Мўлт-мўлт дала қарадим.
Жўялар сарғиш-сарғиш сел бўлди. Жўялар сақич-сақич сел бўлди.
Далаларимни юмшатайин дедим — жўялар ҳали лойқа бўлди. Дадаларимни юмшатмайин
дедим — лойқа қотиб қолар бўлди.
Лойқа қотса ёмон қотади. Дала қатқалоқ бўлади. Дала тош-метин бўлади.

Ичимни ит тирнади. Даламдан күз узмадим.
Далаларим дарз-дарз ёрилди. Далаларим сарғайди.
Мен далаларимга трактор солдим.
Далаларим кафтдай-кафтдай күчди. Далаларим муштдай-муштдай күчди. Далаларим тошдай-тошдай күчди.
Шунда, пушталар бўртиб-бўртиб қолди. Шунда майсалар уч бериб-уч бериб қолди.

24

Кунботар тарафдан элас-элас гулдурос келди.
Кунботарда қоп-қора булат сузди. Кун булатда қолди. Беш тийинлик сариқ танга мисол қолди.
Булат қўпириб тошди. Булат қўпириб қорайди. Булат тоғни қоплади.
Азим-азим тоғдан ёнгоқдай чўққи-да қолмади.
Булат ичра айқаш-айқаш нур ялт этди. Булат бағрини ёруғ-ёруғ йўллар тилди — тоғда ёмғир ёғди.
Булат тоғдан энди. Булат қоялади. Булат қирлади. Булат адирлади. Булат далалаб келди.
Дим-дим сукунат бўлди.
Дараҳтлар тош қотди. Чумчуқлар ичиға бўйин тортди.
Тоғ тарафдан фавқулодда шамол турди. Шамол мўрт дараҳтлар баргини дув тўқди. Шамол тол шохчаларни қирс-қирс синдириди.
Дона-дона ёмғир томчилади.
Далаларим чўтири-чўтирир бўлди. Кийимларим нуқта-нуқта бўлди.
Булат шарр-шарр ёғди.
Далаларим чангби-чангби қолди. Далаларимдан ёппа барака чанг ўрлади.
Ҳаводан ер хиди келди.
Булат энди жала ёғди.
Қиялаб-қиялаб жала ёғди. Нўхатдай-нўхатдай жала ёғди. Муздай-муздай жала ёғди.
Эндинга ниш урмиш ғўзани нимаси бўлади? Бировгина ёлғиз барги бўлади!
Жала ана шу ёлғиз баргни уриб кетди.
Норасида ғўзани нимаси бўлади? Игнадай танаси бўлади!
Жала ана шу игна танани уриб кетди.
Норасида болани ўзидан олдин қулоғи кўринади. Шу норасидани қулоқ-чаккасига тарсиллатиб уриб бўладими? Кўкрагида Имони бор одам норасидани урадими?
Норасида ғўза-да мисоли норасида — ўзидан олдин қулоқ-барги кўринади.
Ҳаво нима учун ая шу норасида ғўзаларимни ертепкилайди? Ҳаво нима учун ана шу норасидаларимни ерпоймоплайди?
Шундай вақтда яратганни ўзига-да ха, демайман.
Ўйнаб қўяй, нотанти-нотанти қилиқларингдан ўйнаб қўяй, дейман.

25

Далаларим селгиди,
Баллоноёқ трактор селги далани қотириб-қотириб ташлайди.
Занжироёқ трактор селги далани қотирмайди. Занжироёқ трактор занжирини тушаб-тўшаб юради-да.
Мен занжироёқ тракторга кетма-кет учта «Зиг-заг» сихмола уладим.
Далаларимга «Зигзаг» сихмола солдим. Далаларимни энлатиб-энлатиб сихмола солдим.

Далаларимни бўйлатиб-бўйлатиб сихмола солдим.

Сихмола кесакларни майдалади. Сихмола ғадир-будурларни текислади.

Далаларим тобга келди.

Далаларимга судрама арава солдим.

Олти фўлалик судрама арава эзилмайман дегич кесакларни-да эзди. Бармоқдай-бармоқдай ўнта тишлик судрама арава кетмайман дегич қатқалоқларни-да кетказди. Бир қулочлик йўғон-йўғон судрама арава далалар бетини равон-равонлади.

Далаларим қиёмга келди.

Сихмола тегмай қолмиш чет-четларни кетмон билан ҳаворладим.

Судрама арава тегмай қолмиш бурчак-бурчакларни хаскаш билан равонладим.

Далаларим қуйруқдай-қуйруқдай бўлди.

Иккинчи бор чигит экдим.

26

Ай, бир аёлимиз бор-да, ай, бир аёлимиз бор-да!

Бир вақтлар суксурдай-суксурдай қиз эди! Бир вақтлар чиккабел-чиккабел қиз эди!

Мен кўнглим кетиб-кўнглим кетиб совчи қўйиб эдим.

Минг қилса-да, холамизни қизи-да — дарров ха, дея қолиб эди.

Мен мана бундай тўйнома тарқатиб-тарқатиб тўй қилиб эдим:

Атиргул ҳидлари оламга кетди,
Кувноқ ёшлигимиз вояга етди.
Хатто тенгдир бўйимиз бўйга,
Сизларни таклиф этамиз тўйга!

Тўйимиздан буён аёлимиз уни олиб бер-буниолиб бер, демайди. Деса-да, бирорни олдида демайди.

Тўшакда айтади! Қўйнимга кириб айтади!

Олдин, силаб-сийпалайди. Сўғин, суйиб-эркалайди.

— Ў-ўй, жуҳуди атлас олиб берсин, — дейди.

— Жуҳуди атлас отлиқقا йўғ-у.

— Бор экан. Чори мудир Душанбадан олиб келибди. Уйида яшириб сотаётган эмиш.

— Бир жўраси қанчадан экан?

— Бир жўра атлас икки юз сўм экан.

— Уҳ-ў-ў...

— Кўп энтикмасин, атлас қўлда ўзи шунча туради. Раис аёлига олиб берибди.

— Раис ўз оти ўзи билан раис-да. Мен бир дехқон бўлсам.

— Бу киши кимдан кам? Бригадир дегич оти бор. Бир жўра атласни кучай олмаса, бригадир бўп нима қилиб юрибди?

— Ўйнаб қўяй, бригадир дегич отдан, ўйнаб қўяй. Бригадир бир дехқон-да.

— Шу, раисни аёли жуҳуди атлас киядиган аёлми? Бети қоп-қора — оташкуракдай! Шугина жуҳуди атлас кийганда, менга нима қилибди?

— Бўлди, кўп ғингшима, болалар уйғониб кетади.

— Олиб бермаса, олиб бермасин!..

Аёлимиз шундай дея, чаппа бурилиб олди. Бундай вақтда йўқ деб бўладими?..

27

Эртаси идора бордим.
— Икки юз сүм...
Кассир бетимга қайрилиб-да боқмади. Кассир чүтдан күз олмади.
— Пул йўқ! — дея шик-шиқ чүт қоқди.
— Жуда зарил эди.
— Шу, ўқимаганлигингга борасан-да, Дехқонкул. Пул йўқ деяпман-ку, Мана, ишонмасанг пўлат сандиққа қара. Пўлат сандиқда пул бўлмагандан кейин, қаердан бераман?
— Бутун бир бошли колхозда-я.
— Бутун бошли колхозда пул заводи йўқ, Дехқонкул, пулни давлат беради. Давлат эса пул бермаяпти. Чеканка вақтида берамиз, деяпти.
— Чеканка? Чеканкани пулга нима дахли бор?
— Ўқимагансан-да, Дехқонкул, ўқимагансан. Ҳозир далада иш қўқиган вақт. Давлат ҳозир пул берса, колхозчи кам-кўстимни тузатайин деб, бозорма-бозор чопади. Далада иш қолиб кетади. Чеканка вақтида эса чеканкадан бошқа иш бўлмайди. Тушундингми? Давлат анойи эмас.
— Рўзғорчилик — йўқчилик-да.
— Шу гапингга ким ишонади, Дехқонкул? Азза-мазза бригадир! Уял-е, шундай дегани!
— Йўқчилик ёмон-да.
— Унда, ана, катталарнинг бирортасидан қарз сўра.
Даҳлизда ўйланиб қолдим. Кимдан сўрашимни билмадим.
Ўйладим-ўйладим — раисдан сўрайин, дедим. Ҳамсоя деган отимиз бор, дедим.
Келим-кетимни кети узилиши билан оҳиста кириб бордим.
— Иш вақти идорада нима қилиб юрибсиз, Дехқонкул ака? — деди раисимиз.
— Зарил иш билан келиб эдим, раис бова.
— Зарил бўлса, кеча майлисда айтсангиз бўларди.
— Рўзғор иши, раис бова.
— Рўзғор иши бўлса, ана, ҳамсоямиз, девордан бўйлаб айтсангиз ҳам бўларди. Хўш, нима иш экан, айтинг қани, ҳамсоя.
— Шу... раис бова, бизга бир... икки юз сўмча зарил бўлиб қолди. Рўзғорчилик — йўқчилик-да.
— Садқаи суханингиз, ана, кассирга айтинг, беради.
— Айтдим, йўқ, деди. Сандинин очиб кўрсатди, йўқ экан.
— Бўлмаса нима қиласиз, йўқ бўлса йўқ-да.
— Шу... шу, қарз бериб турсангиз дегандим, раис бова, пул тушганда узардим.
— Э-э, Дехқонкул ака, Дехқонкул ака. Менда иул нима қилади? У ойлигим бу ойлигимга аранг етади. Ўнта жонмиз. Тошкентда ўқийдиган Барот ўғлимиз келган, кўзингиз тушгандир. Шу ўғлимиз эрта-индин кетади. Ҳали, шунга поезд пулини ўйлаб ўтирибман.
— Ҳай, майли.
— Шу гап, Дехқонкул ака. Ҳафа бўлмайсиз. Пулим бўлса жоним билан берардим. Сиз ўзимизникисиз, ҳамсоямизсиз.

Уйда аёлимизга бор гапни айтиб бердим.

Аёлимиз олдин ишонмади.

Мен энди қасам ичиб айтдим.

Аёлимиз ана шунда ишонди. Ишонди-да — бир бошқа бўлди-қолди.

Аёлимиз эшик-орада донламиш товуқларни қарғаб-қарғаб ҳайдади. Аёлимиз сатилни ер

даранг-дурунглатиб ташлади. Аёлимиз чойнакни дастурхон дўқ-дўқиллатиб қўйди.

Аёлимиз аёллар ашуласини бошлади:

— Дунёга келиб нима кўрдим... Киядиган кийимим йўқ...

Мен иссиқ-иссиқ чой ичдим. Мен оғзим куйиб-куйиб чой ичдим.

Мен ич-ичимдан хоксорландим. Мен ич-ичимдан хўрландим.

Падарига лаънат бундай дунёни, дедим.

Эътибор бериб қулоқ солдим — аёлимиз овози ўчиб қолди.

Худо инсоф берди-е, дея ташқариладим.

Аёлимиз қайрағоч остида бешик суюниб-бешик суюниб йиглади. Аёлимиз бурун тортиб-бурун тортиб йиглади. Аёлимиз пиқ-пиқ йиглади.

Оғилда ётмиш қўй мени кўриб талпинди. Емиш умидвор бўлди. Тумшуқ чўзиб пих-пих этди.

Мен қўйга қараб қаҳримни сочдим:

— Пиқиллама-е-е, энағар! Нима, мен еб, сен қуруқ қолдингми? Рўзгорчилик — йўқчиликда!

Аёлимиз пиқилламай қолди.

БЕШИНЧИ БОБ

1

Мен қозикдан саратон телпагимни олдим.

Телпагимни тиззамга уриб-уриб қоқдим.

Саратон телпагимдан оппоқ-оппоқ чанг қўқиди. Телпагимдан майда-майда жонивор тушди.

Жониворлар ғимир-ғимир ўрмалади. Жониворлар гилас остилаб-гилас остилаб паналади.

Саратон телпагим олачалпак жун-олачалпак жун бўлди — жунларини саратон тўкиб-тўкиб ташлади.

Саратон телпагим ғозсиз-ғозсиз бўлди — ғозларини саратон куйдириб-куйдириб ташлади.

Оқибат — саратон телпагим яғир-яғир бўлиб қолди.

Мен ана шу саратон телпагимни босиб-босиб кийиб олдим.

2

Ҳаво мўътадил-мўътадил келди.

Далаларим бети таранг-таранг бўлди.

Далаларим ости билинар-билинмас ғимир-ғимир этди.

Далаларим остида кўрсичқон қимирламишдай бўлди. Далаларим остида чувалчанг ўрмаламишдай бўлди.

Далаларим бети сочдай-сочдай ёрилди.

Далаларим... болалади! Тўққиз кун-у, тўққиз соатда болалади!

Пушталарда тўп-тўп майсалар ниш берди. Пушталарда кўк-кўк майсалар ниш берди.

Далаларим бағри тўлди. Далаларим бағри бутун бўлди.

Мени бағрим далаларимдан-да бутун бўлди.

3

Майсаларим ўн беш кунлик бўлди. Ушбу кунда майсаларим чинбарг ёйди. Чинбаргдан

тобинан майсаларимни чин оти билан атар бўлдим.

Ғўза!

4

Ўзингникидан қиз олма, демишлари ҳаққост чин бўлди.

Аёлимизга қаттиқ-қуруқ гапириб бўлмади. Гапирайин дедим — тилим бормади. Холамизни қизи-да — бўламиз-да!

Гапирмайин дедим — эркак эркак-да, тағин бўлмади. Бир оғиз гапирдим — аёлимиз онамизни пинжига тиқилиб ўтириб олди. Онамиздан бери келмади.

Имо этсам-да келмади, ишора этсам-да келмади. Овозимни баландлатдим — онамиздан гап эшигдим:

— Кекирдагингни кўп чўза берма, ошингни ейин! Ўзиники-да, минг қилса-да ўзиники-да — опасини қизи-да!

Онамиздан паналатиб-паналатиб аёлимизга кўр-мушт дўлайтиридим. Ҳали кўрасан, деган бўлдим.

Муомала отангни қулими, дейди. Муомала этдим — аёлимизни айланиб-ўргилдим. Далага олиб бориб айланиб-ўргилдим, даладан олиб келиб айланиб-ўргилдим.

Аёлимиз боришда-да мазам йўқ, деди, келишда-да мазам йўқ, деди.

Инчунин, аёлимиздан ранг кетди. Бет-боши заҳилдан-заҳил бўлди.

Кўзлари сузилиб қолди. Дармондан қолди.

Кўнглим ҳадик олди. Эшагимни миндим-да, Расул дўхтирга бордим.

Расул дўхтири қутисини ковлади. Олдимга бир-иккита дори ташлади.

— Мана шуларни бир кунда уч мартадан ичирасиз, — деди, — уч кун ичса, ўзидан-ўзи яхши бўп кетади.

— Олдин ўзини бориб кўринг-да, дўхтири.

— Кўриш шарт эмас, кўрмасдаи биламан.

— Нимани биласиз?

— Дардини биламан. Ҳозир кун қизияпти. Витамин етишмаётганда, витамин.

— Витамин бор, дўхтири, витамин бор.

— Витамин етишмайди, витамин! Шундай кун тифида паҳтада ишлашни ўзи бўлмайди. Ит азоб, ит азоб! Бари дард ана шундан.

— Ўйнаб қўяй, дўхтири, ўйнаб қўяй, витаминларингиздан. Ўзларимиз паҳта ичидаги ўсдик. Худога шукур, мана, отдаймиз. Витамин тугул, ҳамма нарсамиз бор! Юзимизга қаранг, ким айтади, бизда витамин йўқ деб?

— Энди, сиз эркак одамсиз.

— Ўлманг, бир рўзғорда бир одамда витамин бўлса бўлди-да. Рўзғорбошида витамин бўлса бўлди-да. Юринг-е, дўхтири-е, аёлимиз кўп ёмон бўп қолди-е!

— Хўп, бораман, қандай бориб келаман?

— Мана, эшагимда ғир этиб олиб бориб, ғир этиб олиб келиб қўяман.

— Хўп, унда, юринг.

Расул дўхтири мингаштириб келдим.

Шийпонда аёлимизни овоз бериб чақирдим.

Далада тизилишиб кетмон чопмиш аёллар қад ростлади. Қўлларини қошлирига соябонлаб қаради.

Мен қўлимни пешлаб, аёлимизни кўрсатдим. Аёлимизни айтиб юборинглар, деган бўлдим.

Кун кетди.

Осмон зигир гулдай-зигир гулдай бўлди.

Қиблатохда уч кунлик ой бўй-бўйлади. Ой ўроқдай бел-бел бўйлади.

Аёлимиз даладан келди. Шийпон кетида ияк-чаккасини рўмоли билан ўраб турди. Менга қараб ияк силтади — нима дейсиз, деган бўлди.

— Берман кел, — дедим. — Мана, дўхтири бовани олиб келдим, сени бир кўрсатайин, дедим.

Аёлимиз рўмолини бўйнидан ошириб ўради, ерга қаради. Калиши учи билан ер чизди.

— Берман кел, дейман! — дедим.

Аёлимиз бош силтади — бормайман, деган бўлди.

— Ай, сенга айтаяпман! — дедим. — Дўхтири сени одам деб келди! Дўхтирини сендан бошқада ишлари мўл!

Аёлимиз ердан кўз олмайин зайди шийпон ичкарилади.

Расул дўхтиридан ийманаяпти, дея ўйладим. Кетидан кириб бордим.

— Ай, нимадан уяласан, дўхтири ўзимизни Расулбой-ку, юр, — дедим.

Аёлимиз шаҳодат бармоғини чаккасига нуқиб-нуқиб кўрсатди.

— Ҳа, калланг оғрияптими? — дедим.

— Ў-ўй, бу кишида калла борми ўзи? — деди аёлимиз.

— Бор, нима эди, бор?

— Калласи бўлса, дўхтири чақирадими?

— Дардга дўхтири чақирмай, кимни чақиради? Аёлимиз тағин чаккасига бармоқ нуқиб кўрсатди.

— Бўлмаса, дардингни менга айт, — дедим. — Мен Расул дўхтирига бориб айтаман. Дўхтири, шундай-шундай экан, дейман.

Аёлимиз бош чайқаб кулди. Аёлимиз ерга қараб кулди. Аёлимиз оғиз ушлаб кулди.

Аёлимиз деразадан уч кунлик ойга ишора берди...

5

Ғўзаларим йигирма кунлик бўлди.

Мен ғўзаларимни яганалар бўлдим.

Жўя чўнқайиб ўтиридим. Силжиб-силжиб ғўза яганаладим.

Мен суғуриб-суғуриб ғўза яганаламадим — суғурилмиш ғўза қабатида қолажак ғўза томирлари жойидан кўчиб-кўчиб қолади.

Мен чимдиг-чимдиг ғўза яганаладим. Мен қўшқуллаб-қўшқуллаб ғўза яганаладим.

Бир қадамда йигирма-йигирма бештадан ғўза бўлди.

Бир ғўзам танаси оқимтил бўлди — ғўзам томиридан зил кетди. Демак, ғўзам энди одам бўлмайди.

Мен ана шу ғўзамни чимдиг ташладим.

Бир ғўзамни бир барги бор бўлди, бир барги йўқ бўлди. Яккабарг бўлди. Яккабарг ғўза — чала ғўза!

Мен яккабарг ғўзамни чимдиг ташладим.

Бир ғўзам барглари илма-тешик бўлди. Донача-донача бўлди. Демак, ғўзам элбурутдан дардманд бўлди.

Мен дардманд ғўзамни чимдиг ташладим — соғлом ғўзаларимга дарди юқмасин, дедим.

Бир ғўзам пушта ёнбошида бўлди. Бир ғўзам жўя ичиди бўлди. Иккови-да соғлом-соғлом ғўза бўлди. Аммо зиёди ғўзалар бўлди. Боиси — ўз жойида кўкармаган ғўзалар бўлди.

Мен икковини-да чимдиг-чимдиг ташладим.

Нимжон-нимжон ғўзаларни чимдиг-чимдиг ташладим. Майиб-майиб ғўзаларни чимдиг-чимдиг ташладим.

Кесаклар орасида қолмиш ғўзаларимни силаб-сийпаб ростладим. Кесакларни кафтларимда

уматиб-уматиб сочдим.

Бармокларимни ер ботириб-ер ботириб ғұзаларим ост-устини мулойимладим.
Бир қадамда түкқиз-үн тупдан соғлом-соғлом ғұза қолдирдим.
Бир ҳафтадан кейин иккинчи бор яганаладим.
Бу сафар елти-етти тупдан ғұза қолдирдим.

6

Оқшом вақти қизимиз илиқ сув қүйди.

Мен құлларимни олқиндилаб-олқиндилаб ювдим. Бот-бот ювдим.
Кафтларимда ғұза күки билан иси ўтириб қолди.
Тирнокларим ораси қоп-қора бўлиб қолди.
Мен тирнокларим орасини тирноқ тиқиб ковладим.
Мен тирнокларим орасини гугуртчўп тиқиб ковладим.
Мен тирнокларим орасини жуволдиз тиқиб ковладим.
Тирноқ учларим қоп-қоралигича қолди.
Тирноқ учларим кир-кирлигича қолди.

7

Үйқумда бирор йиғлади. Мен олдин тушим, дея ўйладим. Йиғи ҳаминқадар зўрайди.

Шунда, уйқум қочди. Нимкала кўз очдим. Уйқули қарадим.

Бешикдаги чақалоғимиз йиғлади. Мен аёлимизни узала туртдим. Аёлимиз инг-инг эта жимиб қолди. Мен энди аёлимиз биқинидан нуқиладим.

— Ай, тур, боланг йиғляяпти, — дедим. Аёлимиз тўлғонди. Аёлимиз уйқусиради.

— У-у-у... — деди.

Ётмиш зайли бешикка қўл узатди. Бешик тебратиб-тебратиб ухлади.

Чақалоғимиз узмади. Чақалоғимиз мижжа қоқтирмади. Чақалоғимиз қулоқ-мияни еди!

Мен зада-зада туриб ўтирдим. Аёлимизни тебратдим.

— Ай, жонинг борми? Анави йиғляяпти деяпман! — дедим.

Аёлимиз даст туриб ўтирди.

Бешик пардани очди. Бешик тебратгичда осилмиш ўйинчоқларни шалдиратди.

— Ҳа, жоним?! — деди. — Нима дейсан, жоним?! Ўчир, бўлди, ўчир!

Чақалоғимиз шунда-да ўчирмади. Биф-биф йиғлай берди.

Аёлимиз ёмон қилиқ қилди-ёв — чақалоғимиз энди чирр-чирр йиғлади.

Аёлимиз чимчилаб олди-ёв!

Мен хит-хит бўлдим — аёлимиз елкасидан итариб ташладим:

Аёлимиз бир мункиб олди.

— Ҳа?! — деди. — Нимага уради?!

— Нимага болани урасан?

— Ким ураяпти?!

— Сен ураяпсан.

— Урмадим!

— Урдинг. Бўлмаса, бола бундайин чинқириб йиғламайди.

— Урмадим деяпман-ку!

— Урмаган бўлсанг, чимчиладинг.

— Бўлмаса, нима қил, дейди?!

— Болани чимчилама, йиғлоқи бўп ўсади. Эркалат, суй!

— Майли, бўлдими, майлими?! Аёлимиз бешик тебратди.
— Ўчир дейман, ўчир! — деди аёлимиз. — Сенлардан қачон қутуламан-а, қачон қутуламан!
Тағин чақалоғимизга бўлишдим. Тағин чақалоғимиз тарафини олдим.
— Болани жеркма, — дедим.
— Нима қилайн, ҳадеб бўкира берса?!

— Эмчак бер.
— Оғзига эмчак тутсам, олмаса нима қишайин?! Бўлмаса, ўзи келиб эмчак берсин?!

— Бир эмчак бериш қўлингдан келмаса, аёл бўп нима қилиб юрибсан?
— Уф-ф, ўчир! Ма, эм! Ўчир, эм! Уф-ф, сенлардан ўлсам қутуламанми-а, ўлсам қутуламанми!..

Аёлимиз заҳар билан-заҳар билан бешик тебратди.
Бешик йўрға гурс-гурс бориб келди. Бешик йўрға дўй-дўй бориб келди.
Сағал ўтди — чақалоғимиз тинди.
Кўзим кетди.
Тушимда нимадир... нимадпр бир нима йўқ бўлди.
Ялт этиб уйғондим. Дасть туриб ўтиредим.
Чин, қабатимда аёлимиз йўқ бўлди.
Аёлимиз бешик осилиб ухлади. Аёлимиз пиш-пиш ухлади.
Бир кўнглим—уйғот, деди. Бир кўнглим — қўй, ухласин, ҳадемай тонг отади, деди.
Ётдим-ётдим — аёлимизга раҳмим келди. Тағин, уйқусида ағнаб тушмасин дея, соchlаридан оҳиста тордим.
— Ай, тур, жойингга ёт, тур, — дедим. Аёлимиз бир сесканиб тушди.
Аёлимиз чақалоғим йиғлаяпти дея, гурс-гурс бешик тебратди. Аёлимиз чақалоғим йиғлаяпти дея, айтиб-айтиб бешик тебратди:
— Уф-ф, сенлардан ўлсам қутуламанми-а, ўлсам қутуламанми!..

8

Тулки қизига тўй берди.
Кун қиялаб-қиялаб нур тўқди. Кун сариқ-сариқ нур тўқди.
Кун бетини кўриб бўлмади. Кун нурига қараб бўлмади.
Оlam илиқ-илиқ бўлди. Olam сариқ-сариқ бўлди.
Ҳавода оппоқ-оппоқ бир нималар учди. Ҳавола-ҳавола учди. Айланана-айланана учди. Бурала-бурала учди.

Осмон мисоли ун элакламиш-ун элакламиш бўлди.
Оппоқ булатлар орасидан кун нурлари тўкилиб-тўкилиб турди.
Қор лайлаклаб-лайлаклаб ёғди. Қор ерга тушиб-тушмас ёғди.
Лайлаккор таққа тинди.
Ерда қор тугул, нам-да бўлмади. Қор ҳавоси-да бўлмади.
Ўйнаб қўяй, бундайин ҳавони оти нима бўлди?
Қор ёғмади, дейин дедим— ҳавода лайлаклаб қор ўйнади.
Лайлаклаб қор ёғди, дейин дедим — ерда қордан нишона бўлмади.
Деҳқон бундай ҳавони:
— Тулки қизига тўй берди, — дейди.
Кечаси йиғилишда раисимиз кунлик яганани сўради. Йўл-йўриклар берди.
Шунда, раисимиз олдида турмиш телефон жиринглади.
Раисимиз телефонда салом-алик бўлди,
Гап-сўзидан билдим — раисимиз Идеология билан гапиришди. Об-ҳавои гапиришди.

Чайнаб-чайнаб гапиришди.

Раисимиз шарақлатиб телефон даста ташлади. Деразага қараб лаб бурди.

— Тавба, — деди. — Ажаб вакиламиз бор-да. Колхозларингизда қор ёққан эмиш, ғўза нима бўлди, дейди. Қор ёққан йўқ, тулки қизига тўй берди, десам, тулкиям тўй қиладими, дейди...

9

Далаларимга хонқизи дегич ҳашарот айланди.

Биз сурхонилар хонқизини гуллигич деймиз.

Гуллигич сариқ қўнғиздай келади. Тумшуғи қора бўлади. Танасида қора-қора доначалари-да бў-лади, оқ-оқ доначаларида бўлади. Учса, қанотлари катта-катта ёйилиб учади.

Болалар гуллигич ушлаб ўйнади, Болалар гуллигич ҳайдаб ўйнади,

Болалар:

Хол-хол,
Отанг ўлди,
Онанг ўлди,
Бориб хабар олмайсанми? —

дея, дирр-дирр қўйиб чопди.

Гуллигич болалар кафтида юрди. Гуллигич болалар қўл-юзида юрди, гуллигич болалар енгигида юрди.

Гуллигич ўрмалаб юришдан қолмади — болалар дир-дирр қўйиб ашула айтишдан қолмади:

Хол-хол,
Отанг дарёга оқди
Онанг дарёга оқди
Кетмон олиб чоп-чоп,
Кетмон олиб чоп-чоп!

Гуллигич сурбет бўлди. Гуллигич кетмади. Гуллигич кетмаса тагин бўлмади — гуллигич ҳашаротлар бош бобоси бўлди. Гуллигич минг-минглаб болалар бўлди.

Мен далаларимни гуллигичнофат билан дориладим — «Б-58» дегич заҳар дори сепдим.

Заҳардан бир хафта дала йўлай олмадим.

10

Ўқариқ олдим.

Нима учун ўқариқ деймиз?

Бундай қаралса —ер равон-равон кўринади. Бундай қаралса — ер текис-текис кўринади.

Шундай-шундай ариқ олса бўлди — сув бир зайлда оқа берадигандай бўлади.

Аслида ундей бўлмайди.

Ерни ўз тоби бўлади. Ерни ўз ўнг-чапи бўлади. Ерни ўз тош-тарозиси бўлди.

Ана шу тобни туймагич дехқон ўқариқ олиб юр-масин. У олмиш ўқариқ кўча-кўйги жайдари ариқ бўлади. У олмиш ўқариқда сув равон-равон оқмайди.

Ана шу ўнг-чапни илғолмагич дехқон ўқариқ олиб юрмасин. У олмиш ўқариқда сув кўллаб-кўллаб қолади. У олмиш ўқариқда сув уриб-уриб оқади.

Ана шу тош-тарозини билмагич дехқон ўқариқ олиб юрмасин. Сув у олмиш ўқариқ охиригачайин оқиб-оқиб бормайди.

Дехқони кўз тарози бўлади, дехқони кўнгил қози бўлади!

Үқариқни ана шу дәхқон олсин!
Ана шу дәхқон олмиш үқариқ үқдай бўлади.
Сув ана шу үқариқдан үқдай оқади.

11

Деразага ранг кирди. Аёлимизни уйқули туртдим.
— Ай, тонг отди, — дедим.
— Э-э-э...
Аёлимиз ингиллади. Қўлимни суриб ташлади. Тағин бир маромда пишиллади.
Бор-е, менга нима, дедим-да, чаппа бурилиб ётиб олдим.
Дераза тарафдан хўроз қичқирди. Хўроз чўзиб-чўзиб қичқирди.
Кўз очмаганларимга-да қўймади.
Дераза оқарди. Оппоқ пардадай бўлди.
Мен энди аёлимиз сочидан тортқиладим.
— Ай, тонг отди, деяпман.
— Э-э-э...
Аёлимиз туриб ўтири. Юз-кўзини уқалади. Деразага қаради. Болишига қаради. Тағин тўшакка ташлади.
Бу сафар билагидан чимчилаб олдим.
Аёлимиз сапчиб турди. Қўлимга тарсиллатиб бир урди.
— Ўлсам қутуламанми шундан, ўлсам қутуламанми?! — деди.
Рўмолини бошига ила-ила ташқарилади.
Мен хиёлдан кейин турдим. Рўйи ҳушим бўлмади. Тандир четида чўнқайиб ўтирдим.
Кўзларимни уқаладим. Керишиб эснадим.
Онамиз том кетилаб обтова қўтариб ўтди.
Аёлимиз қўлювгичда юз-қўл ювган бўлди. Наридан-бери артинган бўлди.
Бузоғини етаклаб келиб молини эмизди. Нўхта тортиб-нўхта тортиб эмизди.
Бузоқни тағин қозиқ қантарди.
Ошхонадан кади олиб келди, сигир остида чўнқайди. Тиззалари орасига кади олди.
Аёлимиз сигир соғди.
Сигир аёлимизни думи билан уриб-уриб турди.
Тағин бузоқни қўйберди. Бузоқ онаси елининга ёпишди.
Аёлимиз ошхонада докадан сут ўтказди. Ўчоқقا сут осди.
Бир қучоқ йўнғичка ўриб келиб молга ташлади.
Итялоққа ёвғон сарқит солди.
Товуқларга дон сочди.
Қозонда кўпирис тошмиш сутни лўкиллаб бориб олди.
Мол остини қаради.
Эшик-орага сув сепди. Супуриб-сидирди.
Ичкарида бирин-кетин болалар чиқиб келди: Бирори юз-қўлини ювди, бирори юз-қўлини ювмади.
Аёлимиз юз-қўл ювмагичларни қўлювгич остига етаклаб борди.
Болалар сувдан сесканди. Болалар сувдан бет бурди. Болалар вой-войлади.
Аёлимиз қулоқ солмади. Барини юз-қўлини ювди. Иштон киймагичларига иштон кийгизди.
Ташқи сўрига гилам тўшади. Кўрпача солди. Даастурхон ёйди. Чой дамлади.
Ичкаридан шиптирдан-шиптир кўрпачалар олиб келди. Симга ёйиб-ёйиб осди.
Ўчоқдан кул олиб келди. Шиптирларга ҳовучлаб-ҳовучлаб сепди.

Чақалоғимиз тувагини түкиб келди.
Мактаб боргич бошаларини кийинтирди. Күлига китоб-дафтар берди. Елкасига сумка осди.
Қизлари сочига қизиш таома тақди.
Үйиллари оёқ лиbosларини кийидирди. Пайдарпай-пайдарпай киймишларини ўнг-ўнг кийидирди. Ипларини бойлади.

Барини күчалатиб хайдаб борди. Барини мактаб хайдаб солди.
Қодир ўғлинин дастёрликка олиб қолди.
Онамиз мункиллаб-мункиллаб сўри келди.
Мен чойимни ичиб бўлдим. Кафтларимни юзимга сурта-сурта сўридан тушдим.
Аёлимиз қатик уотди: сутга бир қошиқ томизғи қатик солди. Кадини жанда чопон ўраб-ўраб қўйди.

Молни бўшатди. Қодир ўғли олдига солиб берди.
— Подага қўш-да, шундан шуёқса мактабга жўна! — деди.
Сўри теварак-гирдини айланди. Болалар ташламиш ушоқларни териб-териб олди.
— Эна, невараларингиз ўқищдан келса, кўз айирманг, тағин кўчага чиқиб кетмасин, — деди.
— Ҳа, эр-хотин етимларингни топдиларинг! — тўнғиллади онамиз.
— Ундей деманг, эна, ундей деманг, бари ўзингизни болаларингиз.
— Бола, бола! Умрим бола боқиб ўтди! Отасини боққаним камдай, энди боласиниям бокаман!
— Боламни тўйгунимча бокаман, неварамни ўлгунимча бокаман, деганлари шу-да, эна, — деди аёлимиз. — Кўкрагимдагини ташлаб кетмаганимга шукур қилинг.
— Ҳа, энди кўкрагингдагиниям ташлаб кет, ҳа! Бир камим невара эмизиш қолиб эди!
Оёғимни узатиб, эмин-эркин ўлганиям қўйманглар!
— Ҳали эрта, эна...
— Ҳали эрта, эрта! Бу дунёни ишидан мозорга кириб қутулмасам, қутулмайман!
Мен эшагимга тушлик солинмиш хуржунимни ташладим. Аёлимизга тайинладим:
— Далага эртароқ бор, — дедим.

12

Техника ой билан бўйлашса-да, кетмонсиз дала — дала бўлмайди.
Мен трактор кетига тўрт қатор тиш уладим. Ҳар қатор орасида иккитадан пичоқ қўйдим.
Ҳар қатор орасида биттадан ўқсимоя панжа қўйдим.

Ғўзаларим остини ҳайдадим. Ғўзатомир қирқилмасин ё лат емасин дея, олти-етти сантим чуқурлик-да ҳайдадим.

Тиш ғўза бўғзига тегмай-тегмай юрди.
Тиш эгат тупроғини ғўза бўғзига уюб-уюб юрди.
Оқибат — ғўза бўғиз кўмилиб қолди. Ғўза бўғиз қотиб қолди. Ғўза бўғиз нафас ололмай қолди.
Бу боис, далаларимга кетмон солдим.
Ботириб кетмон солайин, дедим — ғўзатомир қирқилажак бўлди.
Саёз кетмон солайин, дедим — ғўзатомир остда қолажак бўлди.
Мен кетмонимга эрк бермайин-эрк бермайин кетмон солдим.

13

Ғўзаларим бир ойлик бўлди.
Ана шунда бир шамол турди, бир шамол турди.

Афғон шамоли дейин дедим — шамол Ҳисор тарафдан эсди.

Шамол ғўзаларимни бир чапга қайирди, бир ўнгга қайирди.

Ғўзаларим айқаш-уйқаш бўлиб қолди. Ғўзаларим буқчайиб-буқчайиб қолди. Ғўзаларим ётиб-ётиб қолди.

Пушталарда тизилмиш кўклар ғўза бўлдими ё бошқа бир майса бўлдими — билиб бўлмай қолди.

Мен наҳор-наҳорлаб далаларим бошида чўк тушдим.

Ётиб-ётиб қолмиш ғўзаларимни қўшқўллаб-қўшқўллаб ростладим.

Айқаш-уйқаш ғўзаларимни кафтлаб-кафтлаб тарадим.

Ғўзаларим тағин бўй-бўйлади.

14

Мажлис қариди.

— Сиз билан биз ҳали-ҳамон дотацияда яшаймиз, ўртоқлар! — дея яқунлади раисимиз. — Дотациядан қутулиш учун қўлни қўлга бериб меҳнат қиласак бўлмайди! Дотациядан қутурайлик, ана ундан кейин одамдай яшасак бўлади!

Қабатимда ўтириш бригадир қулоғига шивирладим:

— Қаерда яшаймиз, дейди? — дедим.

— Дотацияда, —дейди.

— У қаерда?

Бригадир товони билан ер тегиб кўрсатди.

— Шу ерда, — деди. — Мана, мана шу ерда. Шуниям билмайсанми, хе, кўрсавод.

Гапимизга тағин бир бригадир қўшилди.

— Дотацияда яшаймиз дегани, муттаҳамларча яшаймиз, дегани-да?

— Унчалик эмас-е, хе, гапинг қурсин.

— Бўлмаса, нима дегани? Ё, текинхўрларча яшаймиз, деганими?

— Ундей ҳам эмас. Нима десам экан, дотация дегани... давлат қарамоғида яшаймиз, дегани.

Йўқ, буям ундей тўғри бўлмайди. Дотация дегани... карз бўлиб яшаймиз, дегани.

— Шунча ишлаб-а? — дедим. — Йил ўн икки ой тонгдан шомгача ишлаб-а?

— Тонгдан шомгача ишласанг, ишлаб ёта берасан-да. Пахтанг арпага увоқ ҳам бўлмайди.

Мажлисдан кейин эшагимни қичаб-қичаб ҳайдадим. Ўйлаб-ўйлаб ҳайдадим.

Аёлимиз бирдай бригадирлигимни гапиради, мажлисимизни гапиради. Худони берган кечаси нимани мажлис қиласизлар, дейди. Аёлимиз одамни ё майна этади, ё қитигимга тегмакчи бўлади.

— Ана, мажлисда нимани гапирамиз! Дотация, дотация!

Аёлимизни ана энди боплайман! Дотация, дегич катталарбоп гаплардан гапираман. Аёлимизни лол-лол қолдираман.

Аёлимиз оғзи очилиб-очилиб қолади. Бригадирлигим билан мажлисимизни майна этмагич бўлади.

Чин-да — бригадир ўз оти ўзи билан бригадир-да. Катта, катта! Бригадир мажлисларда иштирок этади. Бригадир раислар билан гап олиб, гап беради, Дотация, дегич гаплардан гапиришади!

Йўл-йўлакай дотация-дотация... дея пи chir-пи chir этиб келдим. Эсимдан чиқиб кетмасин, дедим-да.

Эшагим бир ўнқир-чўнқирдан хурқди. Чаппа бурилиб тувлади.

Мени ерга шундай олиб урди, шундай олиб урди! Ҳушим бошимдан учди. Ҳушим билан кўшилиб дотация, дегич гап-да учди. Дотация эсимдан чиқди-кетди!

Уйда бот-бот ўйладим — аммо эслай олмадим. Бор-е, дедим-да, ётиб олдим.
Азонда ўйлаб-ўйлаб топдим. Тағин эсимдан чиқмасин дея, ичимда дотация-дотация... дея ўтиридим.

Бир аёлимизга қарадим, бир болаларимизга қарадим, бир онамизга қарадим. Гап очайин дея, баҳона қидирдим.

Бирови-да дастурхондан бош күттармади. Худди чўлдан келмишдайин ҳур-хур чой ичди.

Бирови-да дотация билан иши бўлмади!

Шу тобда аёлдан-да хафа бўлдим, болалардан-да хафа бўлдим.

Ичимда дотация-дотация... дея ўтира бердим.

Баҳона қидирдим — буёғимга қарадим, баҳона қидирдим — уёғимга қарадим. Охири топдим!

Ойсулув қизимиз чойга иккита-учталаб қанд солди.

Мен насиҳатомуз гап очдим.

— Қандни битта-битталаб енглар, дотацияда яшаймиз, — дедим.

— У нима дегани? — деди аёлимиз. Ана шунда жоним кирди!

Кафтларимни тиззаларим тирадим, кўкрагимни кўтардим. Бошимни ғоз тутдим.

— Ҳали, дотацияни билмайсанми? — дедим. — Дотацияни-я? Ай, кўрсавод-е, ай, кўрсавод-е!

Қириниб-қириниб томоқ қирдим. Доңишманд-доңишманд сўзладим:

— Мактабни неча билан битириб эдинг? Ай, кўрсавод-е! Дотация, бу... хў-ўш... муттаҳамларча яшаш... йўқ, давлат қарамоғида яшаш... йўқ, қарз бўлиб яшаш демақдир, ха!

— Қирилиб адо бўлгур, бизни раисимиз-да шундай деяр эди, — деди онамиз.

— Йўғ-е! — дедим.

— Эса-чи. Мен ҳам бор... оти нима эди?

— Дотация.

— Ана шундай гап-да бор!

Ўйнаб қўяй, ота-боболаримиз-да дотацияда яшабди-да?

Отангга сўйилган кал улоқ — сенга-да бўлади шул улоқ, бўлибди-да?

15

Ғўзаларим томири гирдида аччиғ зах бино бўлди.

Аччиғ зах ғўзага эл бўлмайди. Аччиғ зах ғўза томирини чиритиб-чиритиб ташлайди.

Мен дарҳол ғўзаларимга сув бердим.

Аччиғ захни сув билан қувиб-қувиб хайдадим.

Ғўзаларим томири озод-озод нафас олди. Гузаларим томири ёйилиб-ёйилиб роҳат олди.

16

Қош қорайди.

Ғўза билан ёввойи ўт фарқига бориб бўлмай қолди.

Ана шунда аёлларга жавоб бердим. Аёллар бирин-кетин қишлоқ йўл олди.

— Эртага кун чиқмай келинглар, салқинда иш унади! — дедим.

— Эртага бозор-ку! — деди бирор.

— Ўйнаб қўяй, пахта бозорни биладими!

— Бу дунёдан дам нималигини билмай ўтамизми энди.

— Дам оласан, пенсияга чиқ, пенсияни жарақ-жарақ олиб, еб ётасан! — дедим.

Аёлимиз шийпондан боласини олиб келиб узатди.

— Ў-ўй, манавини олдига ўнгариб кетсин, оёғимда оёқ қолмади, — деди.

— Бор-е, мен ҳозир идорага кетаман, — дедим. Аёлимиз боласини қайтиб олди. Жеркий-жеркий бағир босди.

Аёлимиз боши узра гумбаз тугун қўндириди. Аёлимиз бағри аро қўшқўллаб бола қучди.

Аёлимиз қишлоқ йўл олди.

Қўл-химосиз гумбаз хавода сузиб юрмиш шар мисол қишлоқлади. Қўл-химосиз гумбаз тугун охиста тебрана қишлоқлади.

Аёлимиз қўшқўллаб-қўшқўллаб бола қуча-қуча қишлоқлади.

Аёлимиз аёллар ашуласини айта-айта қашлоқлади:

— Кўрган куним қурсин.

17

Идорадан бир маҳалда қайтдим.

Эшагимни қантардим. Тўқимини олмадим.

Пичадан сўғин тонг отади — ишни қўпайтириб ўтирайинми, дедим.

Ичкарида ойнаижаҳон кўрсатмай қолибди.

Болалар бурабди-бурабди—ойнаижаҳон бурагичини синдириб ташлабди.

Мен омбордан билақдай-омбир топиб келдим.

Омбир билан ойнаижаҳон бурадим. Ўнглай-ўнглай бурадим. Чаппалай-чаппалай бурадим.

Кирр-қирр бурадим.

Ойнаижаҳон пир-пир этди, ойнаижаҳои бижир-бижир этди — аммо кўрсатмади.

Мен болаларни уришиб-уришиб ташладим. Бирини қўйиб бирини сўқиб ташладим.

— Отангни илигига!.. — дедим. — Дуппа-дуруст ойнаижаҳонни бузган отангни илигага!..

Болалар бир-бирига солди:

— Мен эмас, Қодир бузди.

— Биринчи Ойсулов буради.

— Э, баринг бир гўр! — дедим.

Мен девор соат қарадим — соат ўн иккидан ошибди. Ойнаижаҳон кўрсатувлари тамом бўлибди.

Шундай бўлса-да, болалар олдида сир бой бермадим.

— Боринглар, ётииглар, — дедим. — Яхши ўқисаларииг, эртага тузатиб бераман.

Мен ана қарадим-мана қарадим — таомдан дарак бўлмади.

— Ай, вақт бемаҳал бўлди! — дея овоз бердим.

— Бемаҳал бўлса нима қилайн? — деди аёлимиз.

— Бирон ниманг борми?

— Бор, энди пишади.

— Ҳалиям пишмадими-е?

— Шу вақтгача ўйнаб ўтирганим йўқ. Қозондан бошқаям тирикчилигим кўп. Хамир қордим...

Сағал ўтди — аёлимиз бир корсон пиёва олиб келди.

— Гўшти йўқ, гўшт тамом бўлди, — деди.

— Бизга бўла беради, — дедим. — Қозон ўзимизники, қорин ўзимизники. Қорин тўйса бўлди-да.

— Энди, гўшти қайтади?

— Жума бозор куни Норин қассоб мол сўяди дейишаётди, шундан оламиз-да.

Пиёвадан сўғин чой ичдим.

Енбошлиб ётдим-ётдим — кўзим илинди. Қанча ётдим — билмадим.

Бир маҳал күзимни очдим — ҳовлида ловв-ловв олов ўрлади.
— Ай! — дея сапчиб турдим. Аёлимиз зардоб-зардоб овоз берди:
— Жоним, жоним?!
— Ай, нима қиласпсан?
— Тандир қизитаяпман, нима эди?
Шундагина нима гаплигини билдим. Нима дейишимни билмадим.
— Ётар вақтиям нон ёпадими? — дедим.
— Ётарда нон ёпмаса, гүрда ёпадими?!

18

Курук беда егич мол гүнги аъло-аъло гүнг бўлади!
Курук беда егич мол пешоби серазот-серазот бўлади!
Мен улкан ўрага ана шундай гүнг тўдаладим. Ўра бет-бошини синчлаб-синчлаб тупроқладим.

Ўрада қолмиш жониворлар ғимир-ғимир болалади. Бир жонивор бир соатда ўн беш-йигирма болалади. Бир жонивор бир кунда миллион-миллион болалади.

Ана шу жониворлар ғимир-ғимиридан гүнг ич-ичлари аро ҳаво кириб-чикиб турди. Ана шу жониворлар ғимир-ғимиридан гүнг чириб-чириб турди. Ўрадан шиптирик анқиб-шиптирик анқиб қолди.

Мен ана шунда хазинамни очдим!
Шиптирик гүнг билан тупроқ аралаштиридим. Пешма-пеш дала ташидим.
Дадаларимни шиптирик гүнгладим.
Димофимда шиптирик ис ўтириб-ўтириб қолди.
Бир қадамда бир тупуриб кун кўрдим.

19

Шоберди баҳши чўзиб-чўзиб достон айтди.
Ё радиода айтаяпти, ё ойнаижажонда айтаяпти, дея ўйладим. Қулоғимни дингладим.
— Ҳа, жо-он, жуфт бўлсин! — деди одамлар.
Билдим — Шоберди шу теваракда айтаяпти. Оҳиста аёлимиздан сўрадим.
— Раисни қизига совчи келди, — деди аёлимиз.
— Ўйнаб қўяй, қизчи бўйи етдими-е?
— Эса-чи, қиз бола шайтон бўлади.
— Ўйнаб қўяй, ўйнаб қўяй, қаердан совчи келди-е?
— Дехқонбоддаги уруғларидан келди.
— Раис бова мени айтмадими-е?
— Сўратди, улидан сўратди.
— Дали-ғули раисимиз бор-да!

Шундай деб ичкариладим. Сандиқдан охорли кийимларимни қоқиб-қоқиб кийиб олдим.
Тахлоқлик оладўпимни ёйиб-ёйиб кийиб олдим.

Ана энди кечаси билан Шоберди эшитасан, Дехқонхул, Шоберди эшитасан, дедим.
Ташқарилаб, соқолимни уқаладим.
— Ай, соқолим ўсган йўқми? — дедим.
— Кечасига бўла беради, — деди аёлимиз. Қорним тўйиб қолмасин дея, оз-оздан чой ичдим.
— Раис бовани қизи бўйи етдими-а? — дедим. — Қиз бола шайтон дегани чин-да-а? Ўзи, қизи қандай қиз бўлди?

- Пича шаллақироқ.
— Э-э-э, ундей дема-е, уккағарни аёли, ундей дема! Раисни қизиниям шундай дейдими?
Раисни қизини-я!
— Раис бўлса бўпти-да. Билганимни айтаман-да.
— Билсанг-да айтма! Ён қўшнинг — жон қўшнинг!
— Унда, нимага сўрайди?
— Ҳали, гап очилса айтаман-да. Оғзимга толқон солиб ўтирмайман-да.
— Ҳа-а, мақтаб қўя берсин-да.
— Нима деб мақтайин, сен айт-да? Эркак одам умри далада ўтади, нимани билади.
— Тавба-е, аёл одамни умриям уйда ўтаётган йўқ!
— Ишқилиб, аёл аёл-да, қиз болани яхши билади.
— Нима деб мақтарди, қизимиз унча-мунча қизлардан эмас, дейди-да. Камгап, пазанда, чевар дейди-да.
— Бизни қизимиз дейин-а?
— Дейди-да, ўзини қизлари билан билла ўйнаб катта бўлгандан кейин, дейди-да.
— Чин, катта бўлибди, билмай қолибман, чин.
— Ўзини қизидай гапда.
— Чин, ўзимни қизимдай гап, чин.
— Ишқилиб, мақтайди-да.
— Мақтайман-да, қизимизни мақтайман-да. Ё, пирам, мен энди борайин, айтган жойдан қолма, дедилар.
- Сўридан кўча йўл олдим.
Раиси дарвоза олдида майда машина мўл бўлди — демак, раисимиз даврани катта олди.
Мен раиси дарвозаи жонли-жонли тақиллатдим.
Дарвозани раисимизни ўғли очди.
Мен чақирибсизлар дея, ичкари кириб кета берайин дедим — бетим бўлмади.
— Раис бова борми? — дедим.
— Бор-бор, айтиб келайин. Раисимиз чайқала-чайқала келди.
— Э-э, Дехқонқул ака, тинчликми? — деди.
— Тинчлик, раис бова, тинчлик, — дедим. — Ҳорманг, раис бова?
— Саломат, саломат...
Шоберди бахши эшиб-эшиб дўмбира чалди.
— Ҳа, нима гап?
— Ҳеч гап йўқ, раис бова.
— Тракторларинг бузилиб қолибди, деб эшитдим?
— Созладик, раис бова, созладик.
— Файрат қилинг, тракторни тўхтатманг! Шоберди бахши эзиб-эзиб достон айтди.
— Ҳа-а, раис бова... қизимизга... одам келибди..
— Қизингизга одам келибди? Йўғ-е, қизингиз ҳали гўдак шекилли?
— Йўқ... қизимиз... қизингизга деймаи.
— Ҳа-а, менинг қизимни айтаяпсизми? Келди келди, ҳали-ҳозирча эскичасига нон синдириб кўйдик.
— Нон синдириларингизми?
— Ҳа-да, ўйлаб ўтирамизми. Синдиридик-кўйдик.
— Бинойи бўпти, хўп бинойи бўпти, — дедим. — Ҳа-а, чақирган экансиз, раис бова?
— Чақирибман? Қачон? Э, ҳа-а, бугун Дехқонободи қуда бўлмишлар иккита фотиҳа қўй ташлаб кетиб эди. Шу қўйни бирорини сўйиб, район катталарини чақирайин, дедим. Чой ичиб кетинг, этайин, дедим. Уёққа бола юбордим, буёққа бола юбордим, Қўй сўйгич одам

тополмадим.

— Ўзимга айтинг эди, даладан вактлироқ келиб сўйиб берар эдим.

— Бўлди-бўлди, Клара Ходжаевнани шопирига сўйидирдим. Ўзимиз сўйиб, ўзимиз еб ётибмиз.

— Қандай... Этли-сулли қўй эканми?

— Ҳа энди, Дехқонободи қўй бўлгандан кейин, этли-сулли қўй бўлади-да.

Шоберди баҳши бўғилиб-бўғилиб достон айтди.

— Бўпти, Дехқонқул ака, — деди раисимиз, — тракторингиз тағин бузилса, дарров хабар беринг. Ана, ичкарида район техника бошқармаси пири ўтирибди, Бир оғиз айтамиз, исталган эҳтиёт қисмларни етказиб беради.

Кетимга қайрилдим.

Дарвозамиздан ичкариладим.

Сўри бошида серрайиб-серрайиб қолдим.

Аёлимиз ажабланмиш бўлди.

— Ҳа, вақтли қайтибди? — деди.

— Кўп ўтирмадим, — дедим. — Катталар маст-аласт. Ит эгасини танимайди...

20

Мен бегона ўт учун гўнг солиб эдимми? Мен бегона ўт учун сув бериб эдимми? Далаларимни шундай ўт босди, шундай ўт босди! Ғўзаларим бегона ўт остида қолди. Ғўзаларим бегона ўт чангалида қолди.

Далаларимда етмиш хилдан зиёд бегона ўт ўсади!

Далаларим паҳтапайкал бўлмади — далаларим ўтпайкал бўлди.

Ғўзаларим нозик даврида бўлди. Ғўзаларим сертомирламади. Ғўзаларим ботин ерламади.

Бундай вақтда далага трактор солиб бўлмайди. Трактор ерни парча-парча кўчириб ташлайди.

Ғўзаларим ерпарчалар билан кўчиб-кўчиб қолади. Ғўзаларим қуриб-қуриб қолади.

Айни вақтда ғўзаларимга кетмон солиб-да бўлмайди. Ғўзаларимга кетмон-да зиён беради.

Бирдан-бир йўлум — бегона ўтларни битта-битталаб юлиб ташлаш бўлди.

Айни вақтда униб чиқмиш бегона ўтларни юлиб ташлаш мушкул бўлмади. Булар бир йиллик бегона ўтлар бўлди. Бир йиллик бегона ўт томири ер осталаб кетмайди. Шундай ер юзасида бўлади.

Боиси — бир йиллик бегона ўт дондан болалайди.

Дастлаб қўлим тегмиш ўт такасоқол бўлди.

Такасоқол ингичка барг ўт бўлди. Узун-узун ўт бўлди. Оппоқ танли ўт бўлди.

Оёқларим уюшиб-уюшиб қолди. Тиззаларим шол-шол бўлиб қолди.

Кун қоқ миямдан уриб турди.

Мен тизза суяниб қад ростладим.

Тиззамдан пастим қақшаб-қақшаб олди...

Чўнқайиб ўтиришдан оёқларим безиллаб қолди. Энди ерга икки букилдим — тўрт оёқ бўлдим.

Белим баландда бўлди. Икки оёғим эгатда бўлди. Икки қўлим пуштада бўлди.

Бир нозик танали бегона ўтни ушладим.

Бу печак ўт бўлди. Оппоқ гуллик. Нўхатсимон донлик. Донлари бир юз қирқ мингтacha болалагич ўт.

Мен печак ўтни томири билан суғуриб ташладим.

Мен энди бориб турмиш зааркунанда ажриқقا дуч келдим.

Ажриқ ғұза қўкариб чиқмасдан олдин кўкаради. Боиси — ажриқ томирдан кўкаради.

Үзга бегона ўтлар ғұза билан иши бўлмайди. Боши етганичайин ўз ҳавосида ўсиб ёта беради.

Ажриқ ғұза бўғзидан олади. Ажриқ ғұза белидан олади.

Ажриқ ғўзани томир оттирмайин ўраб-чирмаб босади.

Ажриқни йўқотиб бўлмайди!

Эмишки, лайлак юксакдан-юксак бир қояда уя қўйибди. Лайлак уясига хасчўп ташибди. Хасчўплар орасида бир қовжироқдан-қовжироқ ажриқ хас-да бўлибди.

Куз ўтибди, қиш ўтибди, баҳор ўтибди, саратон ўтибди.

Бир йилдан кейин шамол ана шу ажриқ хасни уядан ерга учириб туширибди.

Лайлак уясидан тушмиш хасни кўриб қолибди. Лайлак ўз маконига содик қуш-да — макони бир ғиши бўлмиш хасни олиб жойига қўйиш учун қуи шўнгибди.

Лайлак хасни тумшуғи билан тортқилайди — бўлмабди. Лайлак хасни тумшуғи билан юлқилабди — бўлмабди.

Боиси — ажриқ хас ерда аллақачон томир отиб қолибди!

Мен бармоқларимни ер ботириб-ер ботириб ажриқ томир ковладим.

Кўз олдим қоронғи бўлди. Кўшқўллаб ер суюндим: Қаддимни кўтарайин дедим — кўтаролмадим. Белим қотиб қолди.

Бир қўлимни белимга тираб қаддимни кўтардим.

— Ай, белим-е, белим! — дедим.

Дардимни кимга айтдим — ўзим-да билмадим.

Қабатимда ўтоқ қилмиш дехқонлар ўз дарди ўзи билан бўлди.

Тағин икки букилдим.

Бир қўлим билан ғұза ушлаб турдим. Бир қўлим билан бегона ўт юлдим.

Шундай қилмасам бўлмайди — ғўзаларим бегона ўт билан қўшилиб юлиниб қолади. Ғўзаларим ости кўчиб-кўчиб қолади.

Далаларим адогигачайин ана шундай икки букилиб бора бердим. Далаларим адогигачайин ана шундай қад кўтармай бора бердим.

Қаддимни кўтарсам бўлмайди — тағин букилолмай қоламан.

21

Қоронғи намозшомда иссиқ сувлаб-иссиқ сувлаб қўл ювдим.

Олқиндилақ-олқиндилақ қўл ювдим.

Бегона ўт кўклари кетмади. Кафтларим кўкмак-кўкмак бўлиб қолди. Кафтларим қора-қора чизик бўлиб қолди.

22

Аёлимиз кенжадан тўнғичимизни остоңага қўйди.

— Бор отага, бор! — деди.

Кенжадан тўнғичимиз мийик қулиб қаради. Кенжадан тўнғичимиз бармоқ сўриб қаради.

— Ҳа? — дедим. — Кел, қани, кел!

Мен кенжадан тўнғичимизни бармоқларим билан ўзимга имладим.

Кенжадан тўнғичимиз қулоч очди. Бидирлаб-бидирлаб келди. Бўйнимдан қучоқлаб олди.

Мен кенжадан тўнғичимизни бағримга олдим. Ўзимни кетим билан болиш ташладим.

Кенжадан тўнғичимиз кўксимда миниб ўтирди.

Мен кенжадан тўнғичимиз... булбулини ўйнадим.

— Ўйнаб қўяй, чулдирингдан, ўйнаб қўяй! — дедим. — Чулдирингдан-да, чулдирингдан-да!.. Чулдир катта бўлса, бир аёл олиб берамиз-да!..

Кенжадан тўнғичимиз бет-бошимда бармоқ юритди. Кенжадан тўнғичимиз ажинларимни санади.

— Бир, икки, уч...

Кенжадан тўнғичимиздан тўнғич-тўнғичимизгачайин ажинларимни санаб-санаб катта бўлди.

Бирори олтмиш-етмиш санади.

Тағин бирори ... юздан ошириб санади!

Эмиш-эмиш — бир ажин бир қайғуни билдирар эмиш.

Эмиш-эмиш — бир ажин бир дардни билдирар эмиш.

Эмиш-эмиш — бир ажин бир армонни билдирар эмиш.

ОЛТИНЧИ БОБ

1

— Барча уй-уйига, капа-куйига! — дея мажлис тарқатди раисимиз. — Дехқонқул ака, сиз бир майдон оёқ илинг!

Нима гап демишдай раисимиз юзига тикилдим. Бирон аломат англамадим. Жойимга қайтиб ўтиридим. Фаоллар кетиб бўлди. Раисимиз идорани маҳкам ёпиб келди.

— Айтган-бойлаганларингизни чиқара беринг, — деди раисимиз. — Мукофотга мотоцикл олиб бераман.

Мен ҳазил дея ўйладим. Калла иргаб-калла иргаб кулдим.

— Ўйнаб қўяй, мотоциклларидан, ўйнаб қўяй, — дедим.

— Нимага каллапойчага ўхшаб ишшаяпсиз? Мен сизга ўнақай гапни айтаяпман!..

Раисимизни гапи қорнидан қўпол бўлди, қорни гапидан қўпол бўлди.

Мен гап чинлигини билдим: Сергак бўлдим. Бармоқларимни қирс-қирс этдим.

— Ҳали-ҳозир бирорвга билдирмай туриңг, — деди раисимиз. — Мукофот ўз оти ўзи билан мукофот-да.

Идорадан теримга сифмайин қайтдим.

Мотоцикл мукофот олайн-у, ичимда ютайинми? Мотоциклдай учқур техникани ичда ютиб бўладими? Майдароқ бир нима бўлса экан!

Айтмайман-а, айтмайман!

Бола-бақрамни қатор ўтиргизиб мақтандим!

— Мехнат — меҳнатни таги роҳат, ўртоқлар! — дедим. — Мана энди мотоцикл минамиз, ха! Яхши ўқисаларинг, мактабга мотоциклда олиб бориб, мотоциклда олиб келаман. Йўқ, олиб келолмас эканман, ўзларинг пиёда келар экансизлар. Мен кечқурун мотоциклда майлисга борар эканман.

Аёлимиз дастурхондан кўз узмади.

— Мотоциклни пулга беради-да, — дея минғиллади.

— Йўқ, мукофотга оляяпман. Раис ўз тили билан ўзи айтди, мукофотга бераман, деди.

Ҳужраси тарафдан онамиз кела берди.

— Ҳа-а, келин? — деди онамиз. — Анави ошингни ейин Матросов нима деяпти?

Аёлимиз пиқ-пиқ кулди.

— Мотоцикл олаётган эмиш, — деди.

— Эб-эй, қайси битига олар эмиш?

- Мукофотга олар эмиш.
- Ҳа-а, давлат тентак бўпти-да, текиндан-текин мотоцикл бериб!
- Давлатни ундин деманг, эна, — дедим. — Идеология келса, айтиб бермайин, тағин?
- Айта бер! — деди онамиз. — Айта бер, Идеология суюнчисига иштонини ечиб беради! Онамиз икки бармоғини энлаб-энлаб кўрсатди.
- Идеология суюнчисига манавиндай иштонини ечиб беради! — деди.
- Аёлимиз оғиз ушлаб-оғиз ушлаб кулди.

2

Қари билгични пари билмайди, дегичлари чин бўлди.

Раисимиз хужжат кўрди.

— Энди, пулини чўзинг, — дедим.

— Қандай пул? — дедим.

— Қандай пул бўлардан, мотоциклни пулини-да.

— Ўзингиз... мукофотга бераман, дедингиз-ку раис бова?

Раисимиз кет чалқайиб-кет чалқайиб кулди. Раисимиз қорин билқиллатиб-қорин билқиллатиб кулди.

Кула-кула, масалани баён этди.

Мен ўйлаб ўйимга етолмадим: буни нимаси мукофот? Ҳеч курса, ярим пулига берсалар-да майли эди. Мукофот дейишга тил борар эди. Кўнгил таскин олар эди.

Мен бунча пулни қаердан оламан? Бозорда бир кило гўшт тўққиз сўм. Ўн кун бўлди — қозонимиз гўшт кўрмади.

— Раис бова, — дедим. — Худога шукур, эшагим бор, bemalol этиб-ортиб туриди.

— Оласиз, мотоцикл оласиз.

— Колхозда нима кўп, аризабоз кўп. Мотоцикл мукофоти берсангиз, аризабозлар ёзади. Оч қорним, тинч қулоғим, раис бова.

— Сиз сара деҳқонимизсиз. Сиз мотоцикл мукофот олсангиз, аризабозлар... қолади!

Мен тиззамга шартиллатиб бир урдим. Бўлар гапни айтдим.

— Хуллас қалом... пул йўқ! Ана бўлмаса! — дедим.

Раисимиз пинагини-да бузмади.

— Биламан, сиз айтмасангиз ҳам биламан, — деди. — Деҳқонда пул... ейдими! Деҳқон — бағри қон, дейди! Мотоцикл пулини колхоз тўлайди. Кейин, йиллик даромадингиздан ушлаб қолади.

3

Мен тумандан мотоцикл миниб келдим.

Мотоциклини ҳовли нақд киндингида тикка тирадим. Олд оёгини қибла қаратиб кўтардим.

Мен мотоциклини гир айланиб-гир айланиб томоша этдим.

Мотоцикли қибла тараф ана учайин-мана учайин, дегич... ракета мисол туюлди.

Мен ошхонада ивирсимиш аёлимизга овоз бердим.

— Ай, аканг қарағайни мотоциклини кўриб қўй! — дедим. — Бу мотоцикл эмас, ракета, ракета!

— Бу киши қачон одам бўлади, — деди аёлимиз.

— Эб-эй, бизга нима қилибди? — дедим. — Ракетани қара, ракетани!

Аёлимиз деразадан кўринмиш ойнаижажонга ишора берди.

— Бу киши-да анави одамлардай бўп, бундайгина, шляпа кийиб юрса бўлмайдими, — деди.

— Қайси, ойнаи жаҳондагиларми? Энди, улар катта одамлар. Биз ҳали у даражага етганимиз йўқ.

— Нимаси катта, улар-да шу кишидай одам.

— Йўқ, сен билмайсан, улар катта одам. Катта одам бўлмаса, ойнаи жаҳонга чиқармиди.

— Катта бўлган балан уларни мотоциклли йўқ, бу кишиники бор.

— Бу гапинг чин! Лекин, қўй, одам уялади, шляпа кийсам, бирор-ярим, раис келаяпти, деб ўйлади.

— Амирбойни аёли бу киши мотоцикл олаётганини эшишиб, мотоцикл олгандан қўра, калласига бир нима олиб кийса бўларди, калласидаги телпаги типратиконни ўлигига ўхшайди, дебди.

— Типратиконни ўлиги? Манави телпагим-а? Ҳай, энағарни аёли-я! Шу аёл қизлигига-да, мендан кир қидиради! Фаним — фаним экан-да. Эртага тонг отсин, шляпа кийганим бўлсин. Фанимлар куйиб кул бўлсин.

4

Ўзбаки — зўраки, дейди.

Эртаси эрталаб дала ишларимни бир ёқли этдим.

Мотоциклимини миниб Денов йўл олдим.

Шляпа ололмайман-а, шляпа ололмайман, мотоцикл олмиш жооним, шляпани ололмайманми, дея йўл олдим.

Мотоциклимини йўл гирдида қолдирдим.

Кўш қават дўконлаб кўтарилидим. Шляпа сотгич жойни топдим. Шляпаларга назар солдим.

Оқ шляпа, кўк шляпа, сариқ шляпа... бари тешик-тешик шляпа!

Бурчакда иккита қиз ойна кўриб-ойна кўриб ўтиреди. Ҳиринг-хиринг кулишиб ўтиреди.

Мен қизларга қараб турдим-турдим — қизлар отинг нима демади!

— Ў-ў, қизларим-ов! — дея овоз бердим. Қизлар ияк силтади.

— Ҳа, нима? — деди.

Мен кафтим билан бери келинглар, ишорасини бердим.

Қизлар бир-бировига қараб олди. Бирови юзини ушлаб кулди. Бирови бошини кетига ташлаб кулди.

Бирови мен тараф юрди. Олдимга келар-келмас тағин ияк силтади.

— Ҳа, нима керак? — деди.

Қиз қошимда тойчоқдай лик-лик этди. Қиз пештахта чертиб-чертиб ўйнади.

Қиз уст-бошимга қаради. Қиз бетимга қаради... қиз афт бурди. Қиз бурчак қаради.

— Бўлинг, давай, бўлинг! — деди.

Мен нимадан гап бошлишимни билмадим. Бир шляпа бер, дейин дедим — эп бўлмади. Тилим бормади!

Тағин, турган-туришинг шу, сенга шляпани ким қўйибди, дейдими дея ўйладим.

Қиз бурчак тикилиб ликиллашидан — бизга ўхшагичларга шляпа бергич қиз бўлмади.

Бир кўнглим — обрўйимни борида қайтиб кета берайин, дедим.

Бир кўнглим — элан-қаран келдим, энди сўрайин, дедим.

Оғзимни шунча жуфтладим шляпа деёлмадим!

— Анавиндан бер, — дедим.

— Шляпа? Размер, размер?

— Размер деб ўтирасанми, бировини бер-да қўй-да.

Қиз олдимга бир даста шляпа ташлади. Мен ойна олдида битта-биттадан шляпа кийиб кўрдим..

Үйнаб қүйай-үйнаб қүйай, жигитни қаранглар-ай, жигитни-е, дедим.
Мен үзимни үзим танимадим. Мен үзимга үзим беш кетдим!
Қиз бурчакдан күз олмади.
Қиз ер остидан калламга күз қир ташлади.
Қиз бурун жийирди. Қиз пешона тириштириди.
Охир-оқибат — бир шляпа калламга чиппа ёпишди.
— Шуни нархини айт, — дедим. Қиз юзимга қайрилиб-да қарамади.
— Беш сүм! — деди.
— Үзи тешик-тешик бўлса, яна-тағин, офтобдан сақламаса, буни нимаси беш сўм? — дедим.
Қиз жавоб бермади. Бурчак қараб тура берди.
Мен беш сўм узатдим.
Қиз бурчак қарамиш зайди пул олди. Бийқиллатиб ғаладон очди. Пулни ғаладон ташлади.
Тағин ғийқиллатиб ғаладон ёпди.
Шунда, пештахтада тахлоқлик баҳмалга қўзим тушди. Гулдор баҳмал қўзимни ўйнатди.
Олмасам-да, сўраб-суриштиргим келди.
— Баҳмал қанчадан бўлди? — дедим.
— Олмасангиз нима қиласиз, — деди қиз.
— Ўйнаб қүйай, баҳмалларингдан, ўинааб қүйай, оламан десам, оламан.
— Беш сўмлик шляпани кўриб юрагингиз ёрилиб кетди-ю.
— Ёрилган йўқ, қизим, ёрилган йўқ, ундей дема.
— Сўзана қиммат, эллик сўм, — деди қиз.
— Юз сўм турса-да, бер қани, бир кўрайинқани.
Қиз баҳмални зарда билан олдимга ташлади. Үзи бир бурчидан ушлаб турди.
Мен гўё олар одамдай баҳмални силкиб-силкиб ёйдим.
Шунда, баҳмал бурчи қиз қўлидан чиқиб кетди.
Қиз қўлинини белига тиради, Қиз уччосини чиқарди. Қиз кафти билан бетига шамол этди.
— Уф-ф-ф... кўриб бўлдингизми? — деди.
Мен бир қизга қарадим, бир баҳмалга қарадим, бир ёнимга қарадим.
Ёнимда пул бўлди. Аёлимиз ун оласиз, дея бермиш пул бўлди. Пул бир ҳафтадан буён ёнимда юрди.
Мен ёнимни ковладим. Ана шу пулни олдим.
Мен бармоқ тупуклаб-бармоқ тупуклаб пул санадим. Мен қиз қулоғига қуйиб-қуйиб пул санадим:
— Бир сўм, икки сўм, уч сўм... Эллик сўм! Ана, эллик сўм! Энди, шу баҳмалингни берман бер!
Қишиш пештахтадан пулни олди. Санаб-санаб ғаладон солди.
Қиз баҳмал ўраб бошлади.
— Ўрама, шундай бер! — дедим. Қиз баҳмални олдимга сурди.
Мен баҳмални олиб бурчак бордим. Ер жойлашиб ўтирдим. Этикларимни бирин-кетин суғурдим.
Баҳмални тирр-тирр икки бўлдим.
Бир бўлагини бу оёғим ўрадим, бир бўлагини у оёғим ўрадим.
Этикларимни тортиб-тортиб кийиб олдим. Этикларимни ер тепиб-ер тепиб кийиб олдим.
Дўконда юрмишлар ажаблана-ажаблана қараб-қараб ўтди.
Қиз... кўрдим демади! Қиз... мижжа қоқмади!
Қиз ойна қараб қош силади. Қиз ойна қараб зулф тоблади.
— Баҳмал сўзана... — дея минг-минг этди.
— Далага бўла беради, — дедим. — Бизни далага баҳмал сўзанаям бўла беради!

Қиз... эшитдим демади! Қиз... қулоқ қоқмади! Мен телпагимни қўлтиғимга боса-боса эшик равона бўлдим.

— Бозорим бароридан келди, — дедим. — Шляпа билан пайтава қидириб келиб эдим, икковини-да топдим!

— Гуля, — дея, ҳамкасабаси тараф юрди қиз. — Гуличка, уйдан голландский сир олиб келганман, обед қилмаймизми?

5

Остимда мотоцикл, бошимда шляпа — гармселдай-гармселдай елдим.

Шляпамни ойна солиб-ойна солиб елдим.

Ёрил-е, Дехқонқул-е, ёрил-е, дедим.

Бир-икки чақирим елдим — шляпамни ойна солдим. Тағин бир-икки чақирим елдим — тағин шляпамни ойна солдим.

Раис бўлиб кет-е. Дехқонқул-е, раис бўлиб кет-е, дедим.

Шунда хиёл ўйлаб қолдим. Ўзимни ер урмишдай бўлдим. Паст кетмишдай бўлдим.

Чин-да, раис ким бўпти? Шляпси бўлган билан... мотоцикли йўқ! Давлатни машинасига куни қолган.

Унда... райком бўлиб кет-е, дедим. Шунда, ўзимни ўзим билмишдай бўлдим.

Раис билан райком ўртаси бўлиб кет-е, дедим.

6

Уйда шляпа кийиб ойнаижажон кўрдим.

Ойнаижажонда АҚШ президенти шляпасини ер олиб қўйди.

Сиз-да, шляпангизни олинг. Дехқонқулбой, дедим.

Мен шляпамни олиб қўйдим.

АҚШ президенти шляпасини кийди.

Шляпангизни кийинг. Дехқонқулбой, дедим.

Мен-да шляпамни кийдим.

АҚШ президенти шляпасини мен тараф силкитди.

Мен-да шляпамни ойнаижажон тараф силкидим.

АҚШ президенти шляпасини бошига қўндириди. Самолётга кириб кетди.

Мен-да шляпамни бошимга қўндиридим. Болиш ёнбошладим.

Хуриллатиб-хуриллатиб чой ичдим.

Ай, шляпангизни қиркувидан-да, Дехқонқулбой, шляпангизни қиркувидан-да, дедим.

Аммо....бош кийим кўрдим — шляпадай бекилигини кўрмадим!

Калламни қашилайин дея қўл узатдим — қўлим ўз-ўзидан шляпа қиркувига тегиб кетди.

Шляпа ер тегиб-тегмай юмалаб-юмалаб жўнади. Уй бурчагига бориб тўхтади.

Мен ўрмалаб бориб шляпамни олиб келдим.

Тағин шляпа кийиб чой ичдим. Қўлим тағин шляпа қиркувига тегиб кетди.

Шляпа юмалаб-юмалаб жўнади.

Ўйнаб қўяй, сендайчикин бош кийимдан, ўйнаб қўяй, дедим.

Бош кийим бўлса — киройи телпакдай бўлса-да. Телпак вазмин-вазмин, событ-событ бош кийим.

Телпак тап этиб ер тушдими, бўлди — жойида қимир этмай тура беради. Шляпадайин юмалаб, одамни ўрмалатиб юрмайди.

Шляпам ер тушиб, бурчак юмалашини қўймади — мен ушлаб келиб, калламга

күндиришимни күймадим.

Мен теваракка ками билан раисона-раисона, күпи билан райкомона-райкомона қарадим.

7

Аёлимиз даладан келиши билан ҳаволаниб-ҳаволаниб пешвоз бордим.

— Қандай? — дедим.

Аёлимиз шляпамни айланиб қаради. Аёлимиз шляпамни хушвақтланиб қаради.

— Бинойидай. Қуллуқ бўлсин, — деди.

— Жигит-да, жигит! — дедим. Аёлимизга қараб турдим-турдим:

— Эллик сўм... оллоҳу акбар! — дедим. Аёлимиз бўзраиб-бўзрайиб қолди. Аёлимиз ёмон-ёмон қараб қолди.

Билдим — эллик сўм ўн пулни ё йўлда йўқотиб келди, ё ҳавойидан-ҳавои сарфлаб келди, дея ўйлади.

— Энди, унни қайтаман? — деди. — Энди, тандирга елкамни ёпаманми?..

Аёлимиз овози қалт-қалт этди. Аёлимиз лаблари пир-пир этди. Аёлимиз... йиғламоқдан бери бўлди.

Мен кечмишимни оқизмай-томизмай баён этиб бердим.

Аёлимиз шляпамга тикилиб хаёлланди.

— Мудир аёл эдими? - деди.

— Аёл эди-да, аёл!

Аёлимиз юзига ранг оралади, Аёлимиз рангига кулгич оралади.

— Ўхшатиби! Ўхшатса-да, улай-булай ўхшатмабди! — деди. — Ўхшатса-да, кўнглимдагидай ўхшатиби!

8

Ғўзаларим қирқ кунлик бўлди.

Ғўзаларим қирқида сувсади.

Ғўзаларим сувсаганини қандай билдим?

Бир қарич ер остидан бир сиқим тупроқ олдим. Тупроқни маҳкам-маҳкам сиқимладим.

Тупроқ бир-бири билан қовушмади. Тупроқ чочилиб-чочилиб турди.

Демак—ғўзаларим сувсади.

Чиртиллатиб бир барг узиб олдим. Баргни кўш-кўллаб бир буқладим.

Барг қок ўртасидан ўтмиш йўғон томир қирс этиб синмади.

Демак—ғўзаларим сувсади.

Мен ғўзаларимни сувладим.

9

Далаларимда ассаломалайкум билан чирмовиқ тошди.

Мен йигирма кило пентахлор-фенол билан беш юз кило сув аралаштиридим.

Бир гектар даламга йигирма килолаб сепдим.

Бўлмади — ассаломалайкум билан чирмовиқка бас келмади.

Бир дахлорпропинат дегич дори бор. Мен уни далапон дори дейман.

Саккиз кило ана шу далапон дори билан беш юз кило сув аралаштиридим.

Далаларимни уч бора далапон дориладим.

Ассаломалайкум билан чирмовиқни уйи куйди!

10

Үйнаб қүйай, янги техникаларидан үйнаб қүйай!

Ким қанча йилдирким, хўжалигимизда КХУ-4 дегич янги техника бор отангта бўлади, бор онангта бўлади.

Боридан йўғи яхши бўлади!

Боиси — ғўза остини ишлагич мазкур техника кети бир рамалик. У баланд шатакка тақилади. Натижада трактордан хийла кейинда туради. Шу боис, ердан рисоладагидай кўтарилимайди.

Оқибат — тўрт-беш қадам дала бош-адоқ ғўзани қирқиб-қирқиб бурилади. Оқибат — тўрт-беш қадам дала бош-адоқ оппоқ пахтани нобудлаб-нобудлаб бурилади.

Мен ё тўрт-беш қадам дала бош-адоқ ғўзамни экмаслигим лозим бўлди, ё эксам-да, тўрт-беш қадам ғўзамни ўриб-ўриб ташлашим лозим бўлди, ё... ана шу янги техникадан кечишим лозим бўлди.

Мен янги техника баҳридан ўтдим.

Чин-да, янги техника дея аталмиш гўрсўхтани нима қиласман? Чин-да, дала бош-адоқ ғўзаларимни кунпаякун этиб нима қиласман?

Эскиси трактор бортовойига тақилади. Трактор баллонлари оралигига тақилади. Шу боисдан-да эскисини ердан кўтариб олиш ғоят ўнғай бўлади. Эскисини буриб олиш ғоят кулай бўлади.

Эскиси битта-да ғўзамни қирқмайди. Эскиси битта-да ғўзамга зиён бермайди.

Мен ҳар йил ана шу эски техника туфайли далаларим бош-адоғидан йигирма тонна оппоқ пахтамни омон олиб қоламан.

Йигирма тонна олпоқ-оппоқ пахта!

Айтишга осон — оғиз бир четидан чиқади-кетади.

Аслида — йигирма тонна оппоқ пахта эл-юрт учун оламжаҳон-оламжаҳон наф бўлади.

Мен катталардан нордон-нордон гаплар эшитдим.

Аммо далаларимга эскисини солдим. Ғўзаларим остини ҳайдадим.

Трактор тишлари тегмайин ўтмиш ғўза уя оралари кўп-кўп қолди.

Ғўза уя оралари ана шундайин қола берса — ҳосил чўғсиз-чўғсиз бўлади.

Мен ғўза уя ораларини кетмоним билан юмшатиб-юмшатиб олдим.

Пушта тупроқни эгатлаб туширдим. Эгат тупроқни пушталаб олдим.

Оқибат — пуштада тўпланиб-тўпланиб ётмиш озиқ моддалар ғўзаларим остига тушди.

Ғўзаларим авж-авж ўсади.

11

Оғилимизни бирёғи қийшайиб қолди.

Мен қараб-қараб қўйдим. Бу йил қишини ўтказар, дея ўйладим. Аммо мен ўйламишдай бўлмади.

Қийшаймиш девор белидан ағнаб тушди.

Табиатим тирриқ бўлди.

Оғил олдилаб сим чироқ судраб бордим. Тут айрисига чироқ илдим.

Оғилхона ёп-ёруғ бўлди.

Ағнамиш деворни кетмон билан майдаладим — лойхона этдим.

Ётар вакти-ётар вакти ариқ ёқалаб бордим.

Сув бошида қулоқчи йўқ бўлди.

Пахтага бормиш сувдан ўғирлаб келдим.

Сув мен билан баравар лойхоналаб келди.

Чолворимни тиззалаң липпа урдим. Кафтларимни тупуклаб хўлладим. Кетмон олиб лой кирдим.

Девор кесакларни тепиб-тепиб лой этдим. Кетмон билан уриб-уриб лой этдим. Тепкилаб-тепкилаб пишишдим. Устидан сув сепдим.

Сахарда вактлироқ туриб девор ураман, дея ниятландим.

Аммо сахарда ухлаб қолдим.

Эснаб-эснаб лойхона келдим. Лой қарадим-лой қарадим — нима қилишимни билмадим. Девор урайин дедим — дала қолиб кетар бўлди, дала борайин дедим — лой қотиб қолар бўлди.

Ўйладим-ўйладим — тағин ариқ ёқалаб сув боши бордим.

Бу сафар қулоқчи бўлди.

Ундей дедим, бундай дедим — қулоқчи кўнмади.

— Йўқ, беролмайман, сув пахтага бораяпти, — деди.

Ёпишиб олдим, куйиниб олдим.

— Молхонамизни ярми йўқ! — дедим.

— Йўқ бўлса нима қилайн? Мол зарилми, пахта зарилми?

— Пахта зарил!

— Отангизга балли, пахтани олдида мол нима деган гап!

Нима дейишимни билмадим. Келгич изимдан қайтиб келабердим.

Уйдан катта бидон олиб келдим.

Бидон билан елкамда сув ташидим. Беш-олти марта қатнадим.

Лой сувладим. Лой юзи килкиллаб-килкиллаб қолди.

Мотоциклимни миниб дала йўл олдим.

Кун бўйи лойдан алағда бўлдим.

Кун ботиши билан аёлимизга жавоб бердим.

— Бор-да, лойга сув сепиб тур, қотиб қолмасин, — дедим.

Оқшом тунар-оқшом тунарда уйимизлаб келдим. Тут айрисида чироқ ёниб-ёниб турди. Лозимини тиззалаң тиззалаң туриб-туриб олмиш аёлимиз... лой тепди.

Аёлимиз сочлари лой тегмасин учун соч турмаклаб-соч турмаклаб лой тепди. Аёлимиз рўмоли билан бел бойлаб-бел боилаб лой тепди. Аёлимиз кўйлак этаклари лой ботмасин учун қўшқўллаб этак кўтариб-кўшқўллаб этак кўтариб лой тепди.

Аёлимиз ҳарсиллади!

Аёлимиз лойдан илла-илла оёқ кўтариб олди.

— Бекор лой кирибсан-да, — дедим. — Мен сенга сув сепиб тур, деб эдим-ку?

— Сув сепдим, қотиб қопти.

— Болаларни лой солсанг бўларди.

— Болалар зарра бошидан қорасон бўлсинми энди.

Болалар майдо-майдо сатилларда сув ташиди.

— Бўлди, лойдан чиқ, — дедим. — Бор, мол-ҳолингга қара, қозон-тобоғингга қара.

Аёлимиз лойдан чиқаман деди — чиқолмади, чиқаман деди — чиқолмади. Оёғини лойдан тортиб ололмади!

Мен аёлимизни қўлтиқларидан олиб, лойдан чиқариб қўйдим.

Болалар ҳиринг-ҳиринг кулди.

Мен кетмон билан қўзғаб-қўзғаб лой тепдим. Мен сувлаб-сувлаб лой тепдим.

Лой пишиди. Лой тобга келди.

Мен оғилхона деворини миниб аёлимизни чақирдим.

Аёлимиз қозонини онамизга қолдириб келди.

Лой уриш осон, лой олиб бериш қийин.
Аммо аёл зоти девор уролмайды-да.
Шу боис — аёлимиз лой олиб берди, мен девор урдим.
Аёлимиз белдаста сұяна дам олиб-белдаста сұяна дам олиб лой олиб берди.
Аёлимиз лой соб бўлгуничайин лой олиб берди.

12

Ётар вақти аёлимиз ўнг оёғи бошмалдоғини ушлаб-ушлабвой-войлади.
Аёлимиз бошмалдоғини онамизга тутди. Онамиз ёруққа солиб қаради.
— Эб-э-й! — деди. — Тирноқ күчибди, бошмалдоғингни тирноғи күчибди. Тирноғингни олиб юрсанг ўласанми, қирилиб кетгур!
— Тирноққа қарайдиган вақтми, — деди аёлимиз. Мен ишонмайин қарадим.
Чин, тирноқ четлар қонталаш-қонталаш бўлибди. Чин, тирноқ учлар кўтарилиб-кўтарилиб турибди.
— Дехқонқул, бор, қайчини олиб кел, — деди онамиз.
Мен қайчини олиб келдим.
Онамиз кўчган тирноқни қирт-қиртиллатиб олиб ташлади.
Аёлимиз инграб юборди
— У-у-ух!.. — деди.
Онамиз қайчини аёлимизга узатди.
— Ма, тирноқларингни ол, — деди. Аёлимиз қайчини қўли билан қайирди.
— Дардим тирноқми, — деди. — Ўзи, уйқум келиб, ўлиб бораяпман.
— Кел, унда ўзим олиб қўяйин.
Онамиз аёлимиз оёқларини тиззасига олди. Тирноқларига қайчи солди.
Аёлимизни оёқлари... турли-туман бўлди!
Бебилчагидан юқориси осма қовундайин тўр-тўр қора бўлди.
Калишдан ташқари юргич жойи ана шундай тўрлама-тўрлама бўлди.
Бебилчагидан пасти қуйруқдайин оппоқ-оппоқ бўлди.
Калиш ичидаги юргич жойи ана шундай қуйруқ-қуйруқ бўлди.
Аёлимиз товоnlари... қоп-қора бўлди!
Аёлимиз товоnlари... тилим-тилим ёриқ бўлди! Қақроқ ердай-қақроқ ердай тарам-тарам ёриқ бўлди!
Субҳи содикқачайин зим-зиё уйимизни оҳ олди.
— О-о-оҳ, оёғим!.. — дея уйқусиради аёлимиз. — О-о-оҳ, оёққинам-а!.. — дея оҳ урди аёлимиз.

13

Тағин далаларимни бегона ўт босди.
Қадамимда семизўт ёйилиб ётди.
Семизўт ўз оти ўзи билан йўғон-йўғон ўт бўлди. Бармоқдай танаси тўла сув ўт бўлди.
Семизўт ерда бор бўлмиш намни сўриб-сўриб олди. Семизўт ерда бор бўлмиш гумусни шимиб-шишиб олди.
Гумайларни таг-томири билан қўпориб тўдаладим. Жаариққа олиб бориб қўмиб ташладим.
Филқулоқ баргли итқулоқ юлдим.
Икки-уч баргли шаллангқулоқ юлдим.
Шўраёт тортқилай бериб қўлларим сасиб-сасиб қолди. Шўраёт тортқилай бериб

димоғларим аксириб-аксириб қолди.

Бир хүшрүй баргли ўт билан рўпарў бўлдим.

Ўт бир барги нопармон бўлди, ўт бир барги қип-қизил бўлди. Ўт учида попуги-да бўлди. Попугида ғуж-ғуж доналари-да бўлди.

Бегона ўт кўзимни олди. Бегона ўт қўнглимни олди. Бегона ўт завқ-шавқимни олди.

Ёввойи тожихўroz ана шундай ўт бўлди!

Тожихўroz дони шамолда учса — беш минггачайин болалайди. Тожихўroz дони сувда оқса — беш юз минггачайин болалайди.

Эркак қамиш ичида оппоқ похолдайин пўпаги бўлади. Шу пўпагидан ичи мўрт бўлади. Бир қайириб синдирса бўлади.

Урғочи қамиш юлиш ит азоб бўлди! Урғочи қамишни тортдим — юлинмади. Урғочи қамишни қайирдим — синмади.

Шу чайирлиги учун-да урғочи қамишдан бўйра қиласилар!

Урғочи қамиш барги кафтларимни тилди. Урғочи қамиш барги бармоқларимни тилди. Мисоли олмос билан кесмишдай тилди!

Тиликларимдан қип-қизил қон кўпирди,

Мен тиликларимни лабларим билан сўрдим. Мен тиликларимни тупугим билан намладим. Мен тиликларимни қуруқ тупроқ босиб дориладим.

Қоним қолди. Аммо тиликларим ачишиб-ачишиб оғрий берди.

Мен қоп-қора нўхат ҳосилли итузум юлдим.

Мен ҳандалак ҳидли зарпечак юлдим.

Қирқбўғин ғўзаларимни ёпиб-ёпиб ўсади. Қирқбўғин ғўзаларимни ўраб-ўраб ўсади. Қирқбўғин ғўзаларимни бўғиб-бўғиб ўсади.

Далаларимда кўк чирмовик-да сероб бўлди, сариқ чирмовик-да сероб бўлди.

Чирмовиклар ғўзаларим танини ўраб-ўраб олди. Чирмовиклар ғўзаларим жонини сиқиб-сиқиб олди.

Мен қирқбўғинларни чанглаб-чанглаб юлиб ташладим.

Мен чирмовикларни тирноқлаб-тирноқлаб юлиб ташладим.

14

Ётардан олдин қўлларимни олқиндилаб-олқиндилаб ювдим.

Кафтларимни қайроқтош билан қирдим. Бармоқларимни қайроқтош билан ишқаладим.

Кафтларим ави-бужи кир бўлиб қолди. Бармоқларим чизик-чизик қора бўлиб қолди.

15

Идоралаб бориб эдим, раисимиз остоңада олдимни олди. Ичкаридан қоғоз ўроғлик бир нима олиб келди.

— Манавини бизнига олиб бориб беринг, Дехқонқул ака, — деди.

— Бу нима? — дедим.

— Кўй гўшт. Аёлга айтинг, катталарбоп овқат қилсин. Юқоридан одам бор. Тағин, бера солиб қочманг, гўштни майдалаб беринг.

— Майлис нима бўлади, раис бова?

— Ўша ўзингиз билган майлис-да, боринг.

— Тағин қайтиб келайинми?

— Келиб юрманг, аёлга қарашинг, боринг. Мотоциклимни раисимиз дарвозаси олдида тўхтатдим.

Үзимизни уйга кирмадим — болалар қўлимдаги гўштни кўрса томоғи тушади, дея ўйладим.
Раисимиз аёлига гўштни бердим. Бор гапни айтдим.

— Нима кўп, ёмон қовунни уруғи кўп, нима кўп, катта кўп... — дея минғиллади раисимиз аёли.

— Ундаи деманг-е, ҳамсоя, — дедим.

— Нимага демайман, дейман! Умрим катталарга қозон қайнатиб ўтди! Яна-тағин, қирилгурлар ундаи-бундай таомни емайди! Бола-бақрага бошқа қозон, катталарга бошқа қозон қайнатаман. Билмайман, катталар осмондан тушганми!

— Ҳа энди, катта бўлгандан кейин, нозиктаб бўлади-да.

— Ҳа, куйдирги чиқсин, нозик таъбига, куйдиргигина чиқсин! Яна-тағин, майлис пойлаб қозон қайнатаман. Майлиси ўлгур бўлса, ярим кечаси тамом бўлади!

Мен раиси сўрида жойлашиб ўтиридим. Пичоқни қайроқтош чархлаб олдим. Гўшт майдалаб бошладим.

Мен ойнаижаҳон қараб-қараб гўшт майдаладим.

Ойнаижаҳон бор — раисимизда бор-да! Раисбоп ойнаижаҳон! Рангли-рангли ойнаижаҳон!
Қизилини қизил, кўкини кўк кўрсатгич ойнаижаҳон!

Московдан гўзаллар мусобақаси бўлдими ё гўзаллар намойиши бўлдими, ишқилиб — ажаб бир синоат бўлди.

Ўнг ёқдан бир гўзал келди, чап ёқдан бир гўзал келди — ойнаижаҳон гўзалга тўлди!

Сарвқад гўзаллар, чиккабел гўзаллар, садафтиш гўзаллар бўлди!

Гўзаллар керила-керила қадамлади. Гўзаллар иргала-иргала қадамлади. Гўзаллар соллана-соллана қадамлади. Гўзаллар нозлана-нозлана қадамлади.

Ай, бир қизлар бўлди, ай, бир қизлар бўлди! Паҳтадай оппоқ қизлар бўлди. Қош-киприги қоп-қора қизлар бўлди. Лаблари паҳта гулидай қип-қизил қизлар бўлди. Айби... яланғоч қизлар бўлди!

Мен маҳлиё бўлиб ўтиридим-ўтиридим... ўз-ўзимдан уялдим. Юзларим қизиди. Йўқ, ловв-ловв ёнди. Кўзларим пир-пир этди.

Мен ойнаижаҳондан кўзларимни олдим. Бошимни қирт-қирт қашидим. Раисимизни аёли қараётган бўлса-я, дея кўз қирим билан ошхона тараф қарадим.

Раисимизни аёли қозони билан ҳаманкара бўлди. Дуюм-дуюм ойнаижаҳон-да қараб-қараб кўйди.

Раисимизни аёли мана мундай демишдай бўлди:

«Мунча кўзингни лўқ этиб қарайсан? Нима, умрингда яланғоч аёл кўрганинг йўқми?»

Юзларим ҳаминқадар лов-ловуллади..

Бошимни тағин-да қуий эгдим. Дастурхон эгдим, Дастурхон буқдим.

Мен мана мундай демиш бўлдим:

«Мен яланғоч аёлларга қараётганим йўқ. Мана, дастурхон қараб ўтирибман».

Эси дардим эса... гўзалларда бўлди! Кўз остимдан қараб-қараб олдим...

Турк гўзали босайинми-босмайинми, дея одимлади. Оқтерак бел-оқтерак бел оппоқ сонларини иргаб-иргаб одимлади...

Мен ич-ичимдан мириқдим. Мен қилт-қилт ютиндим...

Тағин ошхона тараф кўз қиримни ташладим

Раисимизни аёли қозондан юзини олди. Ойнаижаҳон қаради. Бир кўзи қозонда бўлди, бир кўзи ойнаижаҳонда бўлди.

Раисимизни аёли мана шундай демишдай бўлди!

«Эркак бўлмай ўл-а. Яланғоч аёлга қарамай кўзинг ўйилсин-а».

Мен бир-икки йўталиб-йўталиб олдим. Бошим узра шифил-шифил пишиб ётмиш ҳусайнини узумларга бош кўтариб қарадим.

Бет-бошим узумларда бўлди, кўз қиrim гўзалларда бўлди.
— Манави хусайни-я, ҳамсоя? — дедим.
— Ҳусайни, нима эди?
— Мен жовузмикин, дебман... Мен мана мундай демиш бўлдим:
«Мен яланғоч аёлларга қараётганим йўқ. Мана, хусайни узумларга қараб ўтирибман».
Аслида... бет-бошим узумларда бўлди, кўз қиrim гўзалларда бўлди.
Баданларим варажга-варажга этди.
Оғзимдан сувим оқди.

16

Катталар бир маҳалда келди.
Қўлювгичда қўл чайди. Бирин-кетин ичкарилади.
Мен остонаян егуликлар узатиб турдим.
Раисимиз қўшқўллаб олиб дастурхон қўйиб турди.
Мен остонаяда турдим
— Энди нима қилайнин, раис бова? — дедим. Раисимиз эшик балдоғидан ушлади.
— Бўпти, энди қайта қолинг, —деди. —Эрта дала боргич одамсиз.
— Эса-чи, — дедим. — Дала бормай, қаер бораман.
Раисимиз эшикни ичидан ёпди.

17

Мотоциклини ошхонамиз девори суждим.
Оҳиста-оҳиста ичкариладим.
Тимирскиланиб тўшак толдим. Уст-бошимни ён-бош қўйдим. Оёқларимни узатиб керишдим. Кўзларимни юмиб-юмиб ётдим.
Аммо уйқум келмади. Бояги гўзаллар кўз олдимдан кетмади...
Аёлимиз тараф оҳиста қўл узатдим. Тўшак силадим. Тўшак бош-адоғини пайпасладим.
Аёлимиз жойида бўлмади.
Аёлимизда болаларни нарёғига ўтиб ётиб олиш одати бор эди. Ё, шундай этдимикин, дедим.
— Ай... —дедим оҳиста. Овоз бўлмади.
Мен оҳиста турдим. Кафтларимни гилам тираб тўрт оёқ бўлдим. Болаларни боши тарафдан ўрмалаб бордим. Юзимни болалар юзига тутиб қарадим. Бирин-бирин қарадим.
Аёлимиз бўлмади.
Тўшакни энг чеккасини — аёлимиз мендан безор бўлиб бориб ётиб олгич чеккасини қарадим.
Аёлимиз у ерда-да бўлмади.
— Ай, қаердасан? — дедим.
Шунда, чиндан-да аёлимиз уйда йўқлигини билдим.
Оёғимда тик турдим. Серрайиб қолдим. Бир-бир босиб даҳлиз чиқдим. Ундан меҳмонхона ўтдим. Чироқни ёқдим.
Аёлимиз меҳмонхона тўрида ётди.
Ўртада дастурхон ёйқлик бўлди. Даствурхонда бир корсон таом бўлди. Таом усти нон билан ёпиғлик бўлди.
Чироқ ёниши билан аёлимиз болищдан бош олди.
Тирсак суюниб ўтирди. Кафтини пешонасила боябон этди.
— Қаёқда юрибди?.. — дея мииғиллади.

— Юкоридан катталар келди, — дедим. — Катталар билан ўтириб қолдим.

— Унда, қорни түқдир-да?

— Кўча-кўйда қачон қорин тўйиб эди-да, энди тўяди. Болаларни овлоқ қолдириб, сен буёқда нима қилиб ётибсан?

— Бу кишини хўрагини қўриб ётиб-ётиб, ухлаб қолибман. Ана, анави хўрагини есин.

Аёлимиз шундай дея, тағин ёстиққа бош ташлади.

Мен кўрпача жойлашиб ўтиридим. Қошиқ билан таом қўзгадим.

Таомда тағин гўшт йўқ бўлди!

Мен аёлимизга бир заҳримни сочайнин, дедим-дедим — тағин индамадим. Чин-да, гўшт бўлмаса аёлимизда нима айб?

Мен таомга нон тўғрадим. Корсон нон билан тўлди. Гўшт ўрнини нон босди.

Кўнглим тортиб-тортмай кавшандим. Теварак аланглаб-аланглаб кавшандим.

Узала ётмиш аёлимизга тикилдим.

Аёлимиз пиш-пиш ухлади. Аёлимиз ҳур-хур ухлади. Аёлимиз ўнг қўлини белидан бошига олиб қўйиб ухлади.

Шунда, аёлимиз ўнг қўлтиғи остига кўзим тушди.

Оғзимдаги оғзимда қолди, бўғзимдаги бўғзимда қолди. Бир нафас кавшанмай қолдим. Аёлимиз қўлтиғига тикилиб қолдим.

Аёлимиз кўйлаги қизил бўлди, қўлтиқ ости... ола-чалпак оқ бўлди.

Кўзим адашаяптимикин дея, тикилиб-тикилиб қарадим. Аёлимиз билиб-билмай қизил кўйлагини оқ билан ямаб олдимикин дея, бор эътиборим билан қарадим.

Йўқ, оқариб турмиш олачалпак ямоқ бўлмади. Олачалпак... тер бўлди, қотиб қолмиш тер бўлди. Чанг аралаш, кир аралаш, жун аралаш тер бўлди...

Аёлимиз олачалпак қўлтиғи... шўр даламиз бетидай-шўр даламиз бетидай бўлди.

Кўнглим айниди. Таомни таъбим тортмади.

Қошиқни таом ташладим. Юзимни чет олдим. Теварак-бош алангладим.

Бўлмади — қорним очлигидан таом ичдим, ўлмайинни кунидан таом ичдим.

Таом ича-ича аёлимизга разм солдим.

Бечора далада-да бир кўйлакда юради, уйда-да бир кўйлакда юради.

Бечора кунда-да бир кўйлак кияди, тунда-да бир кўйлак кияди.

Бечора ҳафталаб бир кўйлак кияди, ойлаб бир кўйлак кияди.

Кўйлак алмаштирайин демайди. Кўйлак тугул, қўлтиқ тугул — ойна қарамайди.

Ойна қарашиб учун вақт тополмайди — қўлтиқ қарайдими, қўлтиқ эслайдими...

Оғзим таомда бўлди, кўзим аёлимизда бўлди. Тикилиб-тикилиб таом едим.

Шунда... шунда... гўзаллар хаёлимдан бир-бир ўтди. Хаёлимда —гўзаллар бўлди, кўз олдимда аёлимиз бўлди.

Мен ўйлаб-ўйлаб қолдим...

Бу зот... бу зот... гўзаллар намойишида иштирок этса... неchanчи ўринни... неchanчи совринни олар бўлди?

18

Мен болиш ёнбошладим.

Болишимни аёлимиз болишига қўшдим.

Кўлимни аёлимиз бўйни остидан оширедим. Бошини билагимга олдим. Пешонамни пешонасига теккиздим. Кўзларимни юмиб ётдим.

Шунда... аёлимиз соchlаридан... аёлимиз соchlаридан... бутифос... бутифос ҳиди келди!

Кўзларим ялт этиб очилди.

«Ё, пири-е, ҳали далага бутифос сепмадик, бутифос хиди қаердан бино бўлди? — дея ўйлай-ўйлай топдим. — Аёлимиз Жараариқдан молга ўт олиб келади. Ўтни бошида кўтариб келади. Бу хид ўтган йили сепилиб, ҳалиям ўтларда ётмиш бутифос хиди бўлди».

Мен кўзларимни чирт юмдим. Мен бутифос хидини билиб-билмасликка олдим. Мен бутифос хидини кўриб-кўрмасликка олдим.

Аёлимиз елкаларини силаб-сийпадим.

Аёлимиз силаб-сийповларимни ўзича ўйлади... Аёлимиз силаб-сийповларимни ўзича йўйди...

— Сидирға ётсин, — деди. — Сув совук...

Қўлимни елкасидан олиб ташлади.

Кўнглим увишди. Кўнглим эзилди. Кўнглим ўйилди!

Мен болишимни аёлимиз болишидан холисроқ олдим.

«Энди... бу зот-да... аёл-да? — дея кўнглим куйди. — Аёлдир-да, ана, ноз этаяпти-ку? Аёлдир-да, ана, нозланаяпти-ку?»

Мен юзларимни болиш босдим.

«Ким бўлса-да... болаларимни онаси, — дея кўнглим ийди. — Ким бўлса-да... пушти камаримдаи бўлмиш болагиналаримни онагинаси», — дея кўнглим ийди.

Шунда, яғринларим аёлимиз тафти нафасини туйди.

— Ў-ўй? — деди аёлимиз. — Ў-ўй?.. Аёлимиз қапишиб-қапишиб келди. Мен ўзимни ухламиш олдим.

— Бирдай шундай этади, — дея ёрилди аёлимиз. — Дардимнн айтайн дейман, чаппа бурилиб ётиб олади...

— Нима дардинг бор, айта бер.

— Ў-ўй, аёллар Хўжай Обигармга томошага бораяпти экан.

— Ҳа-а.

— Бари эркаги билан бораяпти экан.

— Ҳа-а.

— Хўжанов муаллим аёли билан бош бўляпти экан.

— Ҳа-а.

— Бир ҳафта ётиб келар экан.

— Бир ҳафта? Пахта нима бўлади?

Аёлимиз айтиб-айтиб йиглади:

— Шундай дейишини билиб эдим. Мен бечора ишни остида чириб кетаман...

— Энди, сен ўзингни Хўжановни аёлига teng этма-да. Хўжанов муаллим, аёли магазин мудир. Уларда бирёғи пул катта, бирёғи дам олиш куни деган гаплари бор. Сен билан бизда нима бор? На пул бор, на дам олиш кун бор, ўз отимиз ўзимиз билан колхозмиз.

— Мен бечора ишни остида ўлаб кетаман...

19

Чилла ловуллади!

Кун бук бўлди.

Кун дим бўлди.

Қилт этмиш шабада эсмади.

Ғўзабоп-ғўзабоп ҳаво бўлди.

20

Дала юзасида күз билан күриб бўлмас зах бўлади.
Дала юзасида қўл билан ушлаб бўлмас нам бўлади.
Ана шу зах ғўзани ушлаб-ушлаб туради.
Ана шу нам ғўзани тортиб-тортиб туради.

21

Чилла ана шу юза захни ер остилатиб-ер остилатиб чўктириди.
Чилла ана шу юза намни ер остилатиб-ер остилатиб эндириди.
Чилла ер ғўза остидан кўтарди.
Чилла қуёш ғўза учидан тортди.
Ғўза гур-гур ўсди.

22

Ер ҳансиради.
Ғўзаларим барги оч-оч яшил туслана берди.
Ғўзаларим барги қўнғир-қўнғир доғ бўла берди.
Ғўзаларим барги буришиб-буришиб қола берди.
Ғўзаларим очқади!
Мен рўзаларимга босиб-босиб азот бердим.
Мен ғўзаларимга босиб-босиб фосфор бердим.
Мен ғўзаларимга боеиб-босиб калий бердим.

23

Кун ғўзаларим учida илашиб-илашиб қолди.
Мен омборхонадан бир орқа дорихалта орқалаб келдим.
Дорихалталарни варр-парр йиртдим. Бўлак-бўлак этдим. Кафтдай-кафтдай этдим.
Ўқариқ билан эгат қулоққа дорикоғоз қўйдим. Шаршарасимон-шаршарасимон этиб қўйдим.
Қулоққа босиб-босиб қўйдим.
Бош-адоқ ўқариқни ана шу мақомда дорикоғозладим.
Миробдан сув ҳайдаб келдим.
Сув ўқариқлаб-ўқариқлаб оқди.
Малла чумчук сув пишиниб-сув пишиниб ўйнади. Қулранг чумчук қанот тараб-қанот тараб ўйнади.
Кун сўлиди-сўлиди—оқ билан қорани фарқлаб бўлмайин қолди.
Мен бир қўйин дорикоғоз олиб олдим.
Фонус ёқиб ўқариқ ёқаладим.
Ўқариқ оҳиста-оҳиста тўлди.
Сув дорикоғоз шаршаралаб келди. Сув дорикоғоз шаршарарадан тошди. Сув ширр-ширр эгат тушди.
Мен ўқариқ ёқалаб қадамладим. Дорикоғозларга фонус тутиб-фонус тутиб қадамладам.
Дорикоғоз тушиб кетмиш қулоқлар бўлди.
Мен эгатда тушиб ётмиш дорикоғозни олиб қулоққа қўйдим. Қулоқ теварагини лойлаб-loyлаб шиббаладим.
Дорикоғоз оқиб кетмиш қулоқлар-да бўлди.
Мен бундайин қулоқларга қўйнимдан бошқа дорикоғоз олиб қўйдим.

Дориқоғоз қийшайиб-қийшайиб қолмиш қулоқлар бўлди.
Мен ана шу дориқоғозларни созлаб-созлаб қадамладим.
Чилла тунлар оппоқ юзли-оппоқ юзли бўлди.
Чилла юлдузлар болалади.
Чипирткалар чирр-чирр этди.
Фонусимни турли-туман ҳашаротлар ўраб-ўраб айланди. Фонусимни ҳашаротлар гир-гир айланди. Фонусимни ҳашаротлар чирт-чирт чертиб айланди.
Ҳашаротлар бирин-кетин ўлиб-ўлиб айланди!
Ўқариқда сув уриб кетмиш жойлар бўлди.
Мен сув уриб кетмиш жойларни қўлим билан битаб-битаб қадамладим.
Ўқариқ бир жойини ёмон-ёмон сув урди. Сув эгатлар оша шилдир-шилдир тошди. Сув эгатлар оша варак-варак тошди.
Мен билакларимни турдим. Сув уриб кетмиш ёриқقا қўл тиқдим. Ёриқقا кесак тиқдим.
Ёриқни нуқилаб-нуқилаб муштладим.
Сув ҳамон булоқ бўлиб тоша берди.
Мен ўқариқ остидан лой олиб тиқайин, дея қўл узатдим. Бир чанглалой тортиб ола-ола —
кўксим билан сувга тушиб кетдим.
Мен шилта бўлмиш уст-бошимни ташладим. Иштончан бўлдим. Яланг оёқ бўлдим.
Мен иштончан бўлиб сув битадим. Мен ялангоёқ бўлиб сув битадим.
Бир кўнглим иштончан бўлиб сув тарай берайнин, дедим. Яна-тағин, пашшадан қўрқдим.
Шилтадан-шилта уст-бошимни сиқиб-сиқиб кийиб олдим.
Мен ўқариқ бош-адоқлаб бориб кела бердим.
Ғўзаларим жилдир-жилдир сув ичди.
Ғўзаларим мириқиб-мириқиб сув ича берди. Ғўзаларим тиниқиб-тиниқиб сув ича берди.
Ғўзаларим қониб-қониб сув ича берди.
Чилла сув — тилла сув бўлди!
Тун қайтди. Ой оғди.
Оёқ-қўлим бўشاшиб-бўшашиб қолди. Кўзларим кетиб-кетиб қолди.
Ўқариқ бошида оёқ илдим. Фонусимни қабатимлатиб қўйдим.
Ўқариқ бўйида майдароқ калладай бир кесак бўлди.
Мен ана шу кесакка ёнбошладим. Ёнбошдан чалқанча ётдим.
Кесак бошимга ботиб-ботиб ётдим.
Осмон кўриб-осмон кўриб ётдим.
Чилла юлдузлар сўлғин-сўлғин бўлди.
Кўзим илинди.

24

Момик-момик оқлиқдан кўзларимни очдим.
Тонг тўркади.
Дунё таги оқариб-оқариб кела берди.

25

Ғўзаларим шонага ўтирди.
Ғўзаларим битта-биттадан шоналади. Азоншомда бир шона тугди.
Намозшомда бир шона тугди.
Шунда, оқтупроқ далам сувсади.

Оқтупроқ ғұзаларим салқында тирилди, офтобда сүлиди.

Ич-ичимдан қиринди ўтди. Дардим ичимда бўлди. Тишим тишимда бўлди. Шона вақти дала сувсаса ёмон — ҳаминқадар ёмон!

Сув таралса — ғўза гуриллаб-гуриллаб ўсади. Ғўза ғовлаб-ғовлаб ўсади.

Сув тараф бўлмайди — шонага ўтирмиш ғўза шоналамай қўяди. Ғўза шонадан қолади.

Мен энди сув тараф тугул дала ораламадим.

Ғўзага ўнгир тегса бўлди — энди таг олмиш шона лип этиб учиб тушади. Ғўза бир силкинса бўлди — энди уч бермиш шона жалб этиб учиб тушади.

Бир туп ғўзадан иккита шона тўкилса — бир гектар даладан икки юз кило ҳосил камаяди!

26

Мен далаларимни айланиб-айланиб қарадим. Мен шоналарини кўзим билан санаб-санаб қарадим.

Ғўзаларим етти-саккизтадан шона тугди.

Ана шунда далаларимга бир сув жилдириб-бир сув жилдириб олдим.

Шона вақти ботин сувлаб бўлмайди — шонага зиён беради.

27

Ғўзаларим шигил-шиғил шоналади.

Ана шунда ғўзаларим азотга ерик бўлди! Ғўзаларим азотхўр бўлди!

Мен бир гектар ғўзамга йигирма беш килодан азот бердим.

Ғўзаларим тағин-да юз очди. Ғўзаларим тағин-да ранг олди.

28

Ғўзаларим ўттиз-қирқтадан шоналади. Мен тағин бир сув жилдириб олдим.

29

Ғўзаларим саксон-тўқсонтадан шоналади...

Қани эди — шу шоналар гул бўлиб кўсак тугса эди! Қани эди — шу кўсаклар пахта бўлиб очилса эди!

Афсус, ғўза билонихоя шонани қучай олмайди, афсус!

Шоналар ўз-ўзидан қуриб-қовжиради. Шоналар ўз-ўзидан тўкилиб-очилди.

Бир туп ғўзада ўттиз-қирқтадан шона қолди.

30

Мен энди ғўзаларимни сувдан омонладим — кўп сув шона тўқади.

Мен энди ғўзаларим умрини чилладан тиладим — ўткир жазирама шона тўқади.

31

Ғўзаларим гуногун-гуногун гуллади.

Ғўзаларим ост-остидан гулга кирди.

Илк ҳосилшоҳ айрилиш бўғинидан илк гулинини очди.

Мен ғұзаларимга бир сув ичириб олдим.
Иккинчи қават ҳосилшох айрилиш бүгенидан гуллади.
Мен ғұзаларимга икки сув ичириб олдим.
Учинчи қават ҳосилшох гул берди.
Мен учинчи бор сув ичирдим.
Ғұзаларим гуллай берди-гуллай берди — мен сув ичнриб гул салом эта бердим-сув ичириб
гул салом эта бердим!

32

Ғұзаларим нопармон-нопармон гуллади. Мен ғұзаларим гулини исқаб-исқаб күрдим.
Ғұзаларим гулидан... қорақошгүл иси келди. Мен ғұзаларим гулини тағин бир бор исқаб
күрдим.

Ғұзаларим гулидан... ис келмади. Ғұзагүл иссиз-иссиз гул бўлди!

33

Ғұзаларим қирмиз-қирмиз гуллади.
Қирмиз-қирмиз гулларимга капалак дориди.
Капалак қорамтири-сариқ бўлди. Узун-узун қанот бўлди. Қанотлари учиди ёйма тўқ тасма
бўлди. Қанотлари ўртасида иккита қўнғир доғ бўлди. Бир доғ буйраксимон бўлди, бир доғ
ойсимон бўлди.

Капалак кундуз кунда бир жойда биқиниб ётди.
Капалак қора тунда бўйдор-бўйдор ғұзалар аро учди. Гулларга мояк қўйиб-қўйиб учди.
Капалак мояги гумбазсимон бўлди. Йигирма олти-йигирма саккиз қобирғали бўлди.
Сарғиши-оқ рангли бўлди.
Мояк уч-тўрт кунда очди. Ичидан чорак энлик қурт ёриб чиқди. Қурт қорамтири-яшил бўлди.
Қурт устлари ҳамда ёнларида қўнғир-қўнғир йўллари бўлди. Йўллар тўлқинсимон-тўлқинсимон
бўлди. Йўлларда сийрак туклар бўлди, тўқранг холлар бўлди.

Кўсакқурт ана шу бўлди!
Кўсакқурт олдин уст куртакларни кемирди. Уст гулларни кемирди.
Кўсакқурт тўлишди-тўлишди — ғўза ост шохларига эниб тушди. Ҳосилдор гуллар ичига
кириб олди.

Кўсакқурт гул ич-ичидан қуригуничайин гул еди.
Кўсакқурт гул чириб-чириб тўкилгунчайин гул еди.
Кўсакқурт тишлари ўтмасланиб қолгунчайин гул еди.
Индамайин — капалак қирқ кун умр суради. Қирқ кунда уч-тўрт минггачайин мояк қўяди.
Индамайин — кўсакқурт йигирма дона ҳосилгүл ейди.
Йигирма дона ҳосилгүл демак — ўн икки-ўн беш фоиз пахтам кўсакқуртда кетди, демакдир.

34

Мен бир гектар ғўзамни ўн беш кило калций арсенат билан чангладим.
Беш кундан кейин эфирсуфонатли хлорофос билан пуркадим.
Ғұзаларим сариқ-сариқ гуллади.
Гулён баргларда мояксимон-мояксимон ўргимчакканы инлади. Гулён баргларда бўғиноёқ-
бўғиноёқ ўргимчакканы маконлади.
Ўргимчакканы барглар кетини ингичка-ингичка ўргимчакип билан ўраб-ўраб олди.

Үргимчаккана барглар кетини қулранг-кулранг үргимчакип билан қоплаб-қоплаб олди.

Үргимчаккана гулён барг ялади! Барг ялаб-барг ялаб кета берди!

Оқибат—барглар илма-тешик бўлди. Барглар усти хол-хол қизил бўлди. Бора-бора қора-кора тус олди. Охири қовжираб-қовжираб тўкилди.

Мен барини кўриб-билиб турдим. Аммо не иложим бўлди?

Үргимчаккана бино бўлгуничайин дала дорилаб бўлмайди. Үргимчаккана бино бўлгач-да дала дорилаб бўлмайди.

Үргимчаккана жами барг беш фоизини еганидан кейин дала дориланади. Ана шунда дори самарали бўлади.

Үргимчаккана билан бир вақтда... қандала бино бўлди. Қўнғиз бино бўлди. Олтинқўз бино бўлди.

Қандала... үргимчаккана териб еди. Қўнғиз... үргимчаккана босиб еди. Олтинқўз... үргимчаккана билан тириклий этди.

Мен үргимчаккана қачон беш фоиз барг еб бўлади, дея куним ўтди — қандала билан олтинқўз үргимчаккана териб еб куни ўтди.

Бу дунё тескари дунё, демишлари чин бўлди.

36

Ниҳоят — далаларимга эфирсулфонатли хлорофос сепдим.

37

Гўзаларим оқ-оқ гуллади. Оқ гул ёмон, оқ гул ёмон! Танасида сув камчилик тўза оқ гуллайди. Тагида ўғит тахчил тўза оқ гуллайди. Дардчил-дардчил тўза оқ гуллайди. Оқ гул кўсак тутмайди. Тугса-да — майда-майда кўсак тугади.

38

Бечиринди гўнг—бесамар гўнг. Бечиринди гўнг — беоқибат гўнг.

Бечиринди гўнг бегона ўт уйи бўлади. Бечиринди гўнг турли-туман дард ини бўлади.

Мен фермадан бермиш бечиринди гўнгни олмадим.

Кўча-кўйдан бўлса-да, чиринди гўнг топиб келдим.

Пилла қўювчилар уйидан ипакғумбак олиб келдим.

Товуқ фермадан паррандатезак олиб келдим.

Барини ўқариқ боши ҳовуз солдим. Устидан сув тўлдирдим.

Ҳовузни кураклаб-кураклаб ковладим. Азонда бир ковладим. Тушда бир ковладим. Шомда бир ковладим.

Икки кун ана шундай ҳовуз ковладим.

Учинчи кун ҳовуз бошидан бир ариқ олдим, ҳовуз адогидан бир ариқ олдим.

Ҳовузбоши ариқдан сув ҳайдаб келдим.

Ҳовуз сув билан лаболаб-лаболаб тўлди.

Сув ҳовузда шарбат бўлиб адок ариқлади.

Сув ариқда шарбат бўлиб ўқариқлади.

Сув ўқариқда шарбат бўлиб далалади.

Далаларимда шира-шарбат сув оқди.

Шира-шарбат сув тўзаларимни гул ташлашдан омон-омонлади.

Шарбат сув — шакар сув бўлди!

39

Күсакларим бўзболадай-бўзболадай тўлиша берди.
Мен бот-бот сув кўя бердим.
Сув канда бўлса — кўсак ўз кунидан олдин очилади.
Сув ариса — ҳосил тош бегоз бўлади. Ҳосил бефазилат бўлади.
Чала бино бўлмиш чақалоқ қандай бўлади? Кўсак-да шундай-да!

40

Ғўзаларимга кўсакқурт тушди.
Кўсакқурт содда-муғамбир бўлади!
Кўсакқурт кундуз кун нам тупроқ орасини макон этади. Ғўзатана остини макон этади.
Шонабарг орасини макон этади.
Кўсакқурт кушандаси чумчук бўлади!
Чумчук тунда учмайди. Чумчук тунда толшоҳда ухлайди.
Чумчук кундузда учади. Чумчук кундузда кўсак-қурт териб ейди.
Кўсакқурт ана шуни билади!
Шу боис, кўсакқурт маконидан тунда ташқарилайди.
Кўсакқурт болдан-бол таом бўлса-да, қайрилиб боқмайди. Фақат кўсак излаб ўрмалайди.
Фақат кўсак топиб ўрмалайди.
Кўсакқурт кўсак тешади. Кўсакқурт кўсак ғовак этади.
Кўсакқурт ана шу ғовакдан ичкари кириб олади. Ичкарида сув-сув чигит кемиради.
Ичкарида мулойим-мулойим чигит кемиради.
Бир кўсакқурт йигирмата кўсак нобудлайди. Йигирмата кўсак ўн икки-ўн беш фоиз ҳосил, демакдир.
Муғамбирдан-муғамбир кўсакқурт ундей-бундай доридан ўлмайди.
Шу боис, далаларимга метилмеркаптофос дори бердим.
Мен билгич дорилар орасида сассиқдан-сассиғи ана шу метилмеркаптофос бўлди!
Далаларимни қўланса-қўланса ис олди.
Мен икки кун туз тотайин дедим — тотолмадим.
Томоғимдан туз тугул, сув ўтмади.
Қайтанга — ичимда бори-да томоғимга қайтиб-қайтиб кела берди.

41

Чилла куйди!
Оlam тандир тафт-тандир тафт бўлди. Сонсиз ажинларим-да дош беролмади. Саратон телпагим-да дош беролмади. Мен лабларим ёрилиб-лабларим ёрилиб далаладим.
Мен бурним қонаб-бурним қонаб далаладим. Мен каллам қайнаб-каллам қайнаб далаладим.

42

Ғўзаларим бўй-бўй ўсди.
Ғўза бўйлаб ўсса ғўза бўлмайди — дароз-дароз бўлиб қолади. Ғовлаб-ғовлаб қолади.
Ғўза ёнлаб-ёнлаб ўсса ғўза бўлади. Ғўза энлаб-энлаб ўсса ғўза бўлади.
Шу боис, ғўзаларимни чилпир бўлдим.

Бўйнимга этак осиб олдим. Дала бошидан ораладим.

Дароз-дароз ғўзаларим учини бармоқларим билан чирт-чирт чимдиб олдим. Пешма-пеш этак солдим.

Рисолада ўсмиш ғўзаларим учини чилпимадим.

Инсоф билан ўсмиш ғўзаларим учини-да чимдимадим. Майли, униб-ўссин, дедим.

Энлаб-энлаб ўсмиш ғўзаларимни билакларим билан қўзгаб-қўзгаб қўйдим. Кафтларим билан силаб-силаб қўйдим.

Этагим ғўзауч билан тўлди.

Ғўзаучлар бодроқ-бодроқ бўлди. Ғўзаучлар таом кўкат-таом кўкатдай бўлди.

Ғўзаучлар аzzанча бодроқ бўлсин — ғўзаучларни эгатга ташлаб бўлмайди. Ҳашаротлар ана шу ғўзаучларда болалайди!

Масалан, кўсакқурт ана шу ғўзаучларда мояк қўяди. Мояк ғўзаучда бола очади. Қурт бўлиб ўрмалайди.

Ғўзаучлар мулоийм бўлади-да, ғўзаучлар офтобиёр бўлади-да!

Ғўзаучлар аzzанча кўкатсимон бўлсин — ғўзаучларни мол-холга-да бериб бўлмайди.

Ғўзаучлар дорихалта бўлади! Ғўзага сепилмиш жами дори ана шу ғўзаучларда жамланмиш бўлади!

Мен бари ғўзаучларни Жарариққа олиб бориб кўмдим. Тепкилаб-тепкилаб кўмдим.

43

Бир ҳафтадан сўгин тағин бир бор чилпидим. Ғўзаларим бўйдан қолди. Ғўзаларим энди кўсакка зўр берди.

44

Ўн кўсакли ғўзам гектаридан йигирма центнердан ҳосил беради!

Йигирма кўсакли ғўзам гектаридан қирқ центнердан ҳосил беради!

Йигирма беш-ўттиз кўсакли ғўзам гектаридан қирқ беш-эллик центнердан ҳосил беради!

ЕТТИНЧИ БОБ

1

Оқ тупроқ далам кўсаклари уч-учидан ёрилди. Оқтупроқ далам кўсаклари уч-учидан очилди. Оқтупроқ даламга оқ оралади.

Бемаврид оқ оралади!

Оқтупроқ нозик-нозик ер бўлади. Оқтупроқ ориқ-ориқ ер бўлади.

Шу боис, оқтупроқ ер булайга силласи қуриб қолади. Оқтупроқ ер булайга дармонсиз бўлиб қолади.

Оқибат — оқтупроқ ғўза элдан бурун пишади.

Оқтупроқ ғўза элбурутдан очилади.

Оппок-оппоқ раққоса қизлар бўлади. Ялт-юлт раққоса қизлар бўлади.

Раққоса қизлар қўзни олади. Раққоса қизлар эс-хушни олади.

Аммо... раққоса қизлар пахта теролмайди. Раққоса қизлар хамир қоролмайди. Раққоса қизлар қозон қайнатолмайди. Оқтупроқ ана шу раққоса қизлардай бўлади!

Оқтупроқ син-синбат бўлади, оқтупроқда кут-баракот бўлмайди!

2

Ғұзаларим бошидан кун урди, остидан нам урди.

Оқибат — ғұзаларим ора-оралари дим-дим бўлди. Ғұзаларим ора-оралари бук-бук бўлди.

Бундай вақтда трактор билан ғўза оралаб бўлмайди.

Трактор очилмиш пахталаримничувалатиб-чувалатиб ташлайди. Трактор очилажак пахталаримни тўзғитиб-тўзғитиб ташлайди. Трактор қўсакларимни эзиб-эзиб ташлайди.

Ғұзаларим орасини шамоллатмасам — тағин бўлмайди.

Кўсакларим димда понгсиб-понгсиб қолади. Кўсакларим буқда чириб-чириб қолади. Омон қолмиш қўсакларим очилмай-очилмай қолади.

Мен ана шунда бирдан-бир йўлдан бордим — бор дехқонларим билан сочилиб-сочилиб ғўза ораладим.

Ғұзаларимни қимиirlатиб-қимиirlатиб ораладим. Ғұзаларимни туртиб-туртиб ораладим.

Ғұзаларим шамоллади — қўсакларим ҳаво олди.

3

— Сизни Тошканга уч қунлик кўрикка жўннатаман, Дехқонқул ака, —деди раисимиз. — Бир кўнгилни черини ёйиб келасиз.

— Қандай кўрик? — дедим.

— Пахта тергич машиналар кўриги бўлар эмиш.

— Далада иш қўқиб ётган бир вақтда-я?

— Энди, сиёsat-да, Дехқонқул ака, сиёsat.

— Унда, ўзингиз бориб кела қолинг, раис бова?

— Қани эди, бир сайрлаб келар эдим. Катталар механизатор-бригадир боради, деяпти-да.

— Бир одамни икки бўладиган кунда-я?

— Бари колхоздан бирордан илғор бораяпти.

— Мен боролмайман, раис бова, боролмайман.

— Дўппингизни осмонга отсангиз-чи, Дехқонқул ака! Тошканни айланиб келасиз! Йўл харажатларингизни колхоз тўлайди!

Ана шунда жоним кирди!

— Майлингиз, раис бова, — дедим. — Кўп кўймадингиз, майлингиз.

— Хў-ўш, қайта-қайта чўмилинг... Яхшилаб кийининг. Тошкан ўз оти ўзи билан Тошкан. Уст-бош бордир?

— Бор, йўқ эмас, бор. Лекин барини оҳори тўкилиб ётибди. Шу теваракда кийса бўлади.

— Унда, бўлмайди. Сиз республика анжуманига бораяпсиз. Шу, парткомда фасон-фасон кийимлар кўп. Бир сидрасини олиб бераман. Уч кунга ейилиб кетмайди.

Мен эрталаб партком уйилаб бордим. Дардимни айтдим.

— Хабарим бор, раис айтиб эди, — деди партком. — Фақат, гард юқтирмай қайтариб келасиз!

Партком шундай дея, ичкаридан бир камзул-чолвор билан бир кўйлак олиб келди.

— Манавиларни кийинг, қани, — деди.

Мен барини бир бошидан кийиб олдим. Ўзимни тошойна солдим.

Ўйнаб қўяй, партком бўл-е, дедим, ўйнабгина қўяй, парткомгина бўл-е, дедим.

Партком бўйнимга гулдор-гулдор бўйинбоф тақиб бошлади.

Мен партком қўлини шунча ушладим — бўлмади.

— Тек ўтиринг! — деди партком. — Сиз пойтахтга томошага бораётганингиз йўқ, сиз

республика күригига бораяпсиз! Күрикда кагга одамлар бўлади. Сизни қўриб кулади. Галстуғи йўқ — қолоқ экан дейди, маданиятсиз экан, дейди.

Бўйинбоғ бўйнимни бўғди.

Мен оҳиста-оҳиста их-их, дедим. Нафасим ҳир-ҳир этди. Нафасим бўйинбоғ тугунида тўхтаб қолмишдай бўлди.

Мен тоқат этолмадим. Бўйинбоғ, учини қўшқўллаб-қўшқўллаб тортдим. Узиб олиб отайин, дедим.

— Нимага мунча типирчилайсиз? — деди партком.

— Манави... бўлмайди, партком бова.

— Нимаси бўлмайди, михдай-ку?

— Иштонбоқقا ўхшаб шалвираяпти.

— Э, ундей деманг! Маданиятли гапиринг!

— Қўйни нўхтасига ўхшаяпта, партком бова.

— Э, бир иштонбоғ дейсиз, бир нўхта дейсиз! Бу галстук, югославский галстук! Отликқа топилмайди!

— Буюрсин, партком бова, буюрсин. Лекин шуни бўйнимдан олинг.

— Кўп гапирманг, мана бўлмаса!

Партком шундай дея, бўйинбоғни тортиб-тортиб қўйди.

Шунда, бўйним пича озод бўлди. Эмин нафас олдим.

Жўна-жўна куни бўйинбоғни ташлаб кетаман дея, ниятландим.

Бўлмади — раисимиз уришиб-уришиб тақиб қўйди.

Раисимиз мен Тошкентда ўзимни қандай тутишимни бот-бот тушунтирди. Мени машинада Денов жўнатди.

Туман қишлоқ хўжалик бошқармаси бошлиғи ўтоғамиз бўлди.

Ўтоға бизни бош-адоқ қараб кўрди. Бир-бир қараб кўрди.

— Бўлади! — дея бош иргади.

Ўтоға бўйинбоғимга гумонсираб-гумонсираб қаради. Бир қўзларимга қаради, бир бўйинбоғимга қаради.

Мен илкис-илкис ҳолда қолдим.

Ўтоға, ана энди бўйинбоғимни сўрайди, дедим. Ўтоға, ана энди сен бундай бўйинбоғни қаердан топдинг, дейди, дедим.

Мен апил-тапил олдини олдим.

— Бу меники эмас! — дея, бўйинбоғимни тортқилаб-тортқилаб кўрсатдим. — Йўқ, меники эмас! Бу парткомимизники!

Ўтоға тотли-тотли кулимсиди. Кулимсиб-кулимсиб бош иргади.

— Биламан, Жамолиддинов, биламан, — деди. — Буни парткомларингиз таваллуд кунида мен ҳадя этиб эдим. Кўзимга иссиқ кўринганидан қааяпман.

4

Мен Тошкентда ўтоға билан ўртоқ Ленин ҳайкали пойига гулчамбар қўйдим.

Кўрик бўлгич идора бордим.

Келим-кетим мўл бўлди, ўтинг-ўтинг ундан-да мўл бўлди.

Мен бир бурчакни олиб ўтиредим. Қўл қовуштириб ўтиредим. Тўрга қараб ўтиредим.

Тўрдагилар чапак чалса, мен-да чалдим. Тўрдагилар оёққа турса, мен-да турдим.

Мен тўрдан кўз узмай ўтиредим.

Шунда, тўримда ўтириш бир катта қўзларини бет-бошим лўқ этди.

Мен юзларимни девор буриб ўтиредим.

Сағалдан сүғин күз қиримда қарадим.

Катта ҳамон бетимдан күз олмади.

Мен ёмон ҳолда қолдим. Бошимни тиззам эгдим. Оёқларим учига боқдим.

Мен шу күйи тағин охиста күз остимлаб-күз остимлаб қарадим.

Катта, күзи ўлган күйини күзидай-ўлган күйини күзидай бокди.

Мен, жойимдан туриб кетайин, дедим. Тағин, күй, дедим. Катталар олдида қоқилиб кетиб шарманда бўлма, дедим.

Катталар бири қўйиб, бири сўзлади.

Бир катта бир нима ўқиб-ўқиб берди.

Бир катта қўл пешлаб-қўл пешлаб эътиroz билдириди.

Бир катта ёмон бўлиб қолди — кўксини чанглаб-чанглаб ташқарилади.

Бир катта араз уриб-араз уриб жўнаб қолди.

Ўликкўз катта ҳамон бет-бошимдан күз айирмади.

Ўйнаб қўяй, кўзларингдан ўйнаб қўяй, мен Сурхондай олисдан келдим, кўй, пича одамдай ўтирайин, дедим.

Қани эди, катта лўқ кўзларини бет-бошимдан олса, қани эди!

Мен музтар бўлиб-музтар бўлиб анжуман қаритдим.

5

Жойнишинда:

— Нималар бўляяпти-а, катта? — дедим. Ўтогамиз қўл силтади.

— Бари Даққионусдан қолган гаплар, — деди. — Мен ҳам бор, шу гаплар ҳам бор. Булар ўзи беш-олти гурӯҳ. Беш-олтовиям олғир гурӯҳ. Бир-бирини ейман дейди. Аслида, биринчи сўзлаганларни гапи жуфт гап. Ўшаларни машинасини далага чиқарса бўлади. Аммо иккинчи гурӯҳ йўл бермайди. Чунки иккинчи гурӯҳни илмий раҳбари мартабаси баланд одам, ўзим бўлсан дейди. Бошқаларни бўлишини хоҳламайди. Нимаики янгилик бор, кашфиёт бор — шунға шерик бўлгиси келади. Аслида, қўлинни совуқ сувгаям урмайди. Аммо ҳамма ишда, ҳамма рўйхатда номим бўлса, дейди. Тайёр ошга эгалик қилгиси келади. Шу сабаб, тишириноғи билан қаршилик қиласди. Илмда нима кўп — камчилик кўп, бўлмаса—топади! Кейин, гапида туриб олади. Бирида илм зўр, бирида мартаба зўр, бирида орқа зўр. Булар дунёдан ана шундай бир-бирини еб ўтиб кетади. Ўртада ўлган-ўлган — дехқон ўлган!

6

Эрталаб меҳмонхона олдида узун бир автобус бел бўлди.

Автобус бизни шаҳардан олис тажриба даласи олиб борди.

Анжуманда сўзламиш катталар-да келди.

Мен ўликкўз катта назари тушмасин дея, ўзимни чет-чет олдим.

Бир катта дала бошида турмиш пахта териш машинаси олдида гап очди.

— Кўриқдан мақсад, — деди катта, — келажаги бор машиналарни аниқлаш, сўнгра уларни оммавий ишлаб чиқаришга тавсия этишдир. Бу жуда мураккаб масала, етти ўлчаб бир кесадиган масаладир. Бунда асосан қуидаги уч нарсага эътибор берилади. Биринчи — толани чаноқда қолдирмай териш, иккинчи — кўрак фоизи, учинчи—толани мосламалар орқали пахтаидишига бориб тушишидир. Факат мана шу талабларга жавоб бера олган техникагина агротехника талабларига биноан оммавий равишда ишлаб чиқарилади. Аввало тарихдан бир саҳифа. Маълумки, биринчи пахта териш машинаси 1947 йилда яратилган. Шундан буён тўқсондан зиёд пахта териш машинаси яратилиб, синаб кўрилди. Аммо биронтасиям ҳамон талабга жавоб

бермайды. Шундан буён изланаяпмиз, илмий ишлар қиласа күраяпмиз, синааб күраяпмиз. Аммо бирон-бир ижобий натижага эриша олмаяпмиз. Интилганга толе ёр, дейди халқимиз. Шундай экан, илмий изланишда, синовда давом этамиз. Сизларни ишонтириб айтамизки, биз олимлар сизларга ижобий натижалар берадиган пахта териш машиналари яратиб беришга вайда берамиз! Мана, бугун навбатдаги янги ишлаб чиқарылған машиналарни синааб күрамиз, улар жами ўн еттика. Лекин биз сиз азиз деңқонларнинг вақтларингизни олмаймиз. Шунинг учун шу ўн еттика машинанинг түрттасини синааб күрамиз.

Синовчи механизатор биринчи турмиш машинани эгат солди.

Янги машина тозалаб терди. Фұзаны шипшийдамлаб терди. Чаноғида қолдирмай терди.

Аммо хом күсакларни чайнаб-чайнаб ташлади. Юлиб-юлиб ташлади. Фұзапояларни ғажиб-ғажиб ташлади. Толани күк барглар билан булғаб-булғаб ташлади.

Катта чайнаб ташланмиш күсакларни олди.

— Янги машинани ана шу иши агротехника қоидаларигз мос келмайды, — деди катта. — Олимларни әндиги вазифаси буни ўйлаб күриб, бартараф этишдир. Олимлар мазкур машина устида ишлеётгандарига мана, йигирма йил бўлмоқда. Бу олимларни иши шундан иборатки, улар шу вақтгача ишлатилиб келинаётган пахта териш машиналаридаги урчуқ барабанларидан воз кечиш йўлидаги уринишлардир. Бу лойихани афзаллиги шундаки, унда тик тайёқчалар ўрнатилган бўлиб, таёқчаларга қатор лаппаклар жойлаштирилгандир. Худди ана шулар фўза теварагида айланиб, толани тортиб олади. Та-ак, энди навбатдаги янги машинани синовдан ўтказамиз. Бу машина ижодкори машинада ўтирган олимдир. У киши ҳозир ўз машинасида ўзи механизаторлик қилади. Бу машинага ҳам худди ҳалигидай лаппаклар ўрнатилган бўлиб, аммо буниси бир оз фарқ қилади. Бу машина жуда нозик, аникроғи, жуда бўш. Яъни, пахтани бирчаноқ қилиб териб кетади. Толалар чаноқдачувалиб, дала оппок бўлиб қолади. Аникроғи, бу машина чала теради. Аммо бу машинанинг ҳам афзал томонлари бор. Масалан, уни ишлатиш осон, қулай. Бошқа машиналардек, унинг урчуқларини ҳадеб юавермайсиз. Мазкур машина лаппакларини алмаштириб, кўрак теришда ҳам фойдаланса бўлади.

Ҳавокуч ёрдамида пахта тергич машина синааб кўрилди.

Ҳавоютгич мосламада пахта тергич машина синови бўлди.

— Кўриб турибсизки, — деди катта, — янги машиналарни биронтаси ҳам шу кунларда далада пахта тераётган машиналарға тенглаша олмайды. Ўша машиналардан қолманлар!

Катталар давра олиб талашиб-тортишди. Гўё, кимўзар ўйнади.

Билсам — қирқинчи йилларни ўрталарида Розенблум дегич ихтирочи машинага урчуқ кўйиб, пахта теришни ўйлаб топибди. Шундан буён урчуқ билан пахта териш жорий бўлибди. Шундан буён пахтани шу урчуқлар терар экан. Шу вақт мобайнида урчуқлардан бир неча марта воз кечмоқчи бўлибди. Аммо урчуқ ўрнини боса оладиган техника топа олмабди. Юздан зиёд... пахта териш машинаси ҳақида юздан знёд диссертация яратилибди! Тўқсон киши фан номзоди бўлиб, тўққиз киши фан доктори бўлибди! Иккита академик сайланибди. Аммо машина ҳамон ўша-ўша — қирқинчи йилларда Розенблум яратган машина эмиш! Яна-тағин — бари диссертациялар айни ана шу урчуқлар ҳақида эмиш! Катталар уялмай-нетмай айтиб ўтирибди:

— Урчуқ эскириб қолди.

— Аммо бошқа техника йўқ-да.

— Қўяверинг, америкаликлар ҳам урчуқлар билан пахта термоқда.

— Тўғри, аммо улар пахта териш машиналарини йил сайин такомиллаштириб бормоқда. Масалан, Американинг «Жон Дир» фирмасида ишлаб чиқилаётган пахта териш машиналари кейинги йигирма йил мобайнида ўзининг пахтани кўп ва тез териш хусусияти билан бизни машиналардан бир ярим баравар ўзиб кетди.

— Бизда эса пахта ҳамон қўлда терилмоқда. Пахта тергич машина яратгич катталар нима фикрга келдилар?

— Биз яратган машиналар ёмон ишлаётгани учун энг аввало нав яратувчилар айбдор! — деди бир катта. — Нав яратувчилар бизнинг машиналарбоп пахта нави яратиб бермаяптилар. Янги машина керакми? Демак, янги пахта нави ҳам керак. Янги пахта нави қандай бўлмоғи керак? Янги пахта ўрта бўйли, хипчадан келган бўлмоғи керак!

7

Автобусда меҳмонхона келгунимчайин ўйладим.
Одамзот Гагарин бўлиб Ой учди. Одамзот Ойдан тош олиб келди.
Аммо... дехқон оғирини енгил қиласа пахта териш машинаси яратилмади!
Одамзот юраги жойига ўзга юрак жойлаштирилди. Одамзот юраги алмаштирилди!
Аммо... урчук алмашмади! Шугина урчук ўрни учун бир техника ўйлаб топиб бўлмади!
Дехқон кўнглидагидай бир пахта тергич машина яратилмади!

8

Автобус бизни катта йўл четида ташлаб кетди. Мен ўнгимга аланг-жаланг лўкилладим. Мен чапимга аланг-жаланг лўкилладим.

— Маданият уйи қаерда-қаерда?.. — дедим.
— Шатта-шатта! — деди бир йўловчи чол.
Чол кўрсатмиш иморатни кўзлаб бордим. Иморат чиндан-да маданият уйи бўлди.
Мен тағин лўкилладим. Охир маданият уйини топдим. Ичим илиди.
— Худога шукур-е, ҳақиқат бор экан-е! — дедим. Йўл-йўлакай қайишмни ечиб-ечиб ичкарилладим. Шундай ичкарилашимни биламан — бир қий-чув бўлди, бир қий-чув бўлди-е!
Мисоли ердан чиқмишдай беш-олтига аёл бўй берди! Бари аёл қўзиқорин мисол оппоқ-оппоқ бўлди!

— Что за баран?! — дея бақирди.
Мен бир қўлим билан қайишмни ушладим, бир қўлим билан бетимни ушладим.
— Ай, ўлдим-ай! — дея шаҳд бурилдим. Кетимдан бир малласоч аёл қувиб келди.
Халтачаси билан елкам оралатиб урди.
— Ух, ты баран! — дея урди.
Бир тарафдан эркаклар чиқиб келди. Эркаклар орасида бир мелиса-да бўлди.
— Кўз борми, ока? — деди мелиса.
— Бор-бор! — дедим.
— Кўз бўлса шундай қиласизми? Ана — «М», «Ж», деб ёзиб қўйибди-ю? Ё, хат-савод йўқми? Ана энди эллик сўм жарима тўлайсиз!

Билдим — иш чатоқ бўлди. Бир бефаросат қадамим туфайли эллик сўм кетар бўлди.
Эллик сўм-а, эллик сўм!
Бир меҳнат куни уч сўм ўттиз етти тийин туради. Эллик сўм топишим учун ўн беш меҳнат куни бажаришим лозим бўлади.

Энди, бола-бақрани насибасини омон олиб борайин. Эллик сўмга ким қанча қозон қайнайди?

— Хат-савод бор! — дедим. — Ана шу «М», «Ж»ларни ўқиб кўриб кирдим! Мана шундай келиб ўқидим: «М» — маржаларники бўлди. «Ж» — жигитларники бўлди. Худога шукур, жигитман! Жигитларнига кириб кета бердим!

— Ёпирай, ёпирай! — дея ёқа ушлади мелиса.
— Ёпирайи бўптими! — дедим. — Шаҳарда бор хат-савод, қишлоқда-да бор!
Мен бетимни қалини — жонимни ҳузури, дея сур бўлиб-сур бўлиб тура бердим.

Мелиса ё, олачипор бетимни күриб раҳми келди, ё, шу кўрсавод билан айтишиб ўтирамани, деди.

— Э, боринг-е! — дея жеркиб ташлади. — Қаттан келган бўлсайиз, ўшатга гумдон бўлинг-е!

— Гумдон бўламиз! — дея кўкрак кўтардим. — Биз шаҳрингизга мусофириз! Гумдон бўл, десангиз — бўла берамиз!

Малласоч аёл сувдан куруқ чиқишимни билиб қолди. Тағин халтачаси билан уриб қолди.

Мен лик этиб мелисани кетига ўтиб олдим. Мелисани елкаси оша қарадим.

— Ў-ў, маржа! — дедим. — Советни бадрабхонасини кўп қизгана берма! Советни бадрабхонаси сенга-да етади, менга-да етади!

Аёллар олдида мен ҳақ-мен ҳақ, мақомда қадамладим. Зафарона-зафарона қадамладим.

Аёллардан пана бўлишим билан юлдуз учмишдай-юлдуз учмишдай чопиб-чопиб қўя бердим!

9

— Оtingни сот, молингни сот, машъал бўл-да! — деди раисимиз.

— Ўйнаб қўяй, ўйнаб қўяй! — дедим мен. — Тағин ким келаяпти?

Раисимиз шаҳодат бармоғини юксак кўтарди.

— Шоирлар! — дея хитобланди. — Ана энди репортаж бўласиз, очерк бўласиз!

— Ўйнаб қўяй, меҳмондан, ўйнаб қўяй!

— Кассирдан пул олиб бозорланг. Бир қўй, уч-тўртта ароқ...

Шоирлар чошгоҳда келди.

Шоирлар ўқариқ ёқалаб оҳиста-оҳиста одимлади. Шоирлар далалар узра назар ташлаб-назар ташлаб одимлади. Шоирлар далалар узра қўл шоп қилиб-қўл шоп қилиб одимлади.

— Пахтазор — чаққон қўлларга интизор! — дея хитоблниб одимлади.

— Пахтазор — пахта фронтининг механизациялашган қўшинларига интизор! — дея хитобланиб одимлади.

Идеология билан раисимиз шоирлар кетидан эргашиб юрди. Шоирлар ўқариқ адогида оёқ илди. Шоирлар оёқлибос қоқди. Шоирлар чоловор қоқди. Шоирлар кўйлак пуфлади. Шоирлар бизникига йўл олди. Каиф-сафо авж олди. Шоирлар ўзларини ўзлари мақтаб ичди. Шоирлар ўзларини ўзлари улуғлаб ичди.

Косагул шоир пиёла тўла ароқни бир кўтаришда ютди. Газагига ана шу пиёлани чертиб-чертиб хиргойи этди:

Юртим шундай бир диёрки
Нурхонаю — нурхона
Дурхонаю — дурхона
Гулхонаю — гулхона...

— Ўртоқ Дехқоний! — деб қолди бир маҳал. Мен сергак бўлдим. Мен аланг-жаланг бўлдим.

Мен ўз-ўзимдан уялдим.

— Ундей деманг-е, домла, ундей деманг-е, — дедим.

— Ия, нега демайман? Дехқонни Дехқоний дейди-да!

— Мен шоир бўлсам экан — шундайчикин десангиз. Мен бир дехқон одам бўлсам. Шундай экан, Дехқонкул дея беринг.

— Кул? Шўро замонида кул йўқ! Бўлиши ҳам мумкин эмас! Улуғ Октябрь социалистик революцияси барча қулликларга барҳам берган!

— Ха! — дея кесак олиб берди Идеология. — Улуғ Октябрь социалистик революцияси

планетализмнинг социал-сиёсий қиёфасини тубдан ўзгартириб юборди, кишининг киши томонидан эзилишига ва эксплуатация қилинишига асосланган бутун жаҳон системасига 1917 йил октябрида қақшатқич зарба берилди, жаҳонда биринчи социалистик давлатнинг ташкил топиши жаҳон тарихининг янги даврини бошлаб берди, чор Россиясида ахолининг тўртдан-уч қисми қишлоқ хўжалигида банд эди, эндиликда меҳнатга қобилиятли ахолининг учдан бир қисмидан камроғи қишлоқ хўжалигида меҳнат қилмоқда, ўтмишда саводсиз бўлган, помешчик томонидан хўрланиб келган дехқон эндиликда ўз хўжалигининг озод эгаси бўлиб олди, абадий фойдаланиш учун колхозларга бериб қўйилган ерларда меҳнат қилмоқда, кооперативнинг бошқа аъзолари билан биргаликда коллектив меҳнат самараларини таҳсимлаб олмоқда, унинг оила аъзолари социалистик тузум берган барча маданият неъматларидан баҳраманд бўлмоқда, Совет ҳокимияти йиллари мобайнида дехқонларнинг реал даромадлари ошмоқда...

— Энди, домла, ота-энамиз шундайин от қўйиб эди-да.

— Домла? Қанақа домла? — деди косагул шоир. — Домла мачит-мадрасаларда бўлади! Биз социалистик ҳалқ шоирларимиз!

— Тавба қилдим! — дея қўлимни кўксимга қўйдим. — Майли, билганингиздай дея беринг.

— Ҳа, ана, бу бошқа гап! — деди косагул шоир. — Ана шундай кетсангиз, шубҳасиз, ўсасиз! Хў-ўш, ўртоқ Дехқоний, мана бу ёнимдаги зотни танияпсизми?

— Йўқ, —дея бош чайқадим.

— Бу зотни танимабсиз—дунёни танимабсиз! Бу зот замонамизнинг буюк адиби бўладилар. «Бўри изидан» деган романни ўқигандирсиз?

— «Бўри изидан», «Бўри изидан»...

Мен шундай дея, чапимга қараб кўз пирпиратдим. Мен шундай дея, ўнгимга қараб кўз пирпиратдим. Мен шундай дея, осмонга қараб кўз пирпиратдим.

Мен ўқидим, дейин дедим — ёлғон бўлди. Мен ўқимадим, дейин дедим — Идеология кўз қисди.

Идеология ўқидим, деб айт-ўқидим, деб айт, дея кўз қиса берди.

— «Бўри изидан», «Бўри изидан»... — дея тағин минғ-минғ этдим. — Э, ха, ов ҳақида эди-а? Ана шунда буюк адибни ўзлари гап берди.

— Да, ов ҳақида! — деди ҳокимона. — Қашқир ови ҳақида!

— Эсладим-эсладим! — дея бош иргадим. — Энди эсладим. Пича хаёлимдан қўтарилибди. Овга қизиқмагандан кейин шу-да.

— Ну, овга қизиқмайдиган одам ҳам бўладими?

— Қизиққаним билан, даламида бўри йўқ-да, ов қилайн десам.

— Ну-ну, бўри йўқ!.. Бир вақтлар бу далалар бўрилар макони эди, бўрилар макони!

— Бўрилар макони? — дея анграйдим.

— Да, бу далалар бўрилар макони эди!

Мен далаларимда илон кўрдим, чаён кўрдим, тулки кўрдим. Аммо бўри кўрмадим.

— Мана шу далалар-а? — дедим.

— Да, бу далалар бўрилар уяси эди, бўрилар уяси!

— Шундай-я? — дедим.

— Да-да, бу далаларда бўри галалари тўда-тўда бўлиб изғиб юрар эди!

— Йўғ-е? — дедим.

— Да-да, бу далаларда йиртқич бўрилар увиллаб-увиллаб дайдиб юрар эди!

Мен нима дейишими билмадим.

— Бўри ўз уясидан олислаб кетмайди, дейишади, — дедим. — Унда гала-гала бўри қаёқка кетади?

— Шўро ҳукумати қириб ташлади! Мана бундай пақ-пақ отиб қириб ташлади! Шўро ҳукумати икки миллионтacha йиртқич бўрини ана шундай қирий ташлади! О-о-о, Шўро

хукумати бўлмаса, бу далаларда дехқончилик қилиш қаёқда эди? О-о-о, Шўро хукумати бўлмаса, бу далаларда дехқон қаёқда эди?

— Ҳа! — дея яна кесак олиб берди Идеология. — Совет Иттифоқида социализмнинг ғалаба қилиши натижасида эксплуататор синфлар тугатилди ва кишининг киши томонидан эксплуатация қилинишига барҳам берилди, ишсизлик ва қашшоқлик йўқ қилинди, меҳнаткашларнинг моддий ва маданий фаровонлиги йил сайнин ўсиб борди, миллий зулмни келтириб чиқарган ва халқлар орасида бир-бирига ишонмасликни кучайтириб келган эксплуататор синфларнинг тугатилиши, Совет ҳокимияти томонидан СССРдаги барча халқлар ўртасида ҳақиқий тенгликни юзага чиқаришга қаратилган ленинча миллий сиёсатнинг амалга оширилаётганлиги, айрим миллатларнинг хўжалик, сиёсий ва маданий жиҳатдан ўтмишдан мерос бўлиб қолган қолоқлигини йўқ қилишда рус халқининг системали суратда ёрдам бериб келаётганлиги натижасида совет қишлоғи ҳаётида жуда катта ўзгаришлар юз берди, социалистик қишлоқ хўжалигининг экономикасини мустаҳкамлаш негизида колхозчи дехқонларнинг моддий фаровонлиги ошди, қишлоқ ҳаёти шаҳар ҳаёти билан тенглашди, шаҳар билан қишлоқ ўртасидаги тафовут йўқолди...

— Мана бу ёнимда ўтирган зот барча даврлар ва барча халқлар адидидир, — деди косагул шоир. — «Самарқанд осмонида юлдузлар» романни муаллифи бўлади.

— «Самарқанд осмонида юлдузлар»...

Буюк адид гапимни илиб олди.

— «Самарқанд осмонида юлдузлар» романнида ҳам йиртқич қашқирлар ҳаёти қаламга олинади, — деди. — Фақат унда қадим-қадимги қашқирлар тасвирланади. Фарқимиз — у киши нуқул тарихий қашқирлар... нуқул тарихий қашқирлар ҳаётига мурожаат қиласи, холос...

Шоирлар жўна-жўна бўлди.

— Сиз идорагача юринг, иш бор, — деди раисимиз. Шоирлар машина кет ўриндиғида жойлашди. Мен раисимиз имоси билан ҳайдовчи қабатидан жой олдим.

Машина Сайрак қишлоғи ёналаб юрди-юрди — Ақраб шаҳид қоралаб келди.

Ҳайдовчи машинани оҳисталатди. Чап қўлида машина бошқарди. Ўнг қўлини юзлари аро кўтарди. Ақраб шаҳидга қараб пичир-пичир фотиҳа ўқиди. Ўнг кафтини юзларига суртди.

Мен ҳайдовчига қўшилиб фотиҳа ўқидим.

— Танҳо мозорда ётган зот ким бўлди? — деди буюк адид.

Мен: отамиз, дейиш учун оғиз жуфтлаб эдим — раисимиз оғзимдан гапимни илиб олди.

— У зот уруш қаҳрамони! — деди раисимиз.

— Уруш қаҳрамони? Қанақа уруш? — деди барча халқлар адиди.

— Улуғ Ватан уруши қаҳрамони! — деди раисимиз.

— О-о-о, Улуғ Ватан уруши қаҳрамони! — дея хитобланди буюк адид. — Очерк ёзиб, номини абадийлаштириш керак эди!

— Ҳали ҳам кеч эмас, — деди барча халқлар адиди. — Адҳам Раҳматга айтамиз, келиб ёзиб кетади.

— Адҳам Раҳмат бўлиши шарт эмас, — деди раисимиз. — Тошканда қаҳрамонни ёзувчи жияни бор. Шу жияни ёзса-да бўлди.

— Ёзувчи? Ким дейди? — деди косагул шоир.

— Тогай Мурод, дейди.

— Тогай Мурод? Тогай Муродни биламиш! — деди косагул шоир. — О-о, Тогай Мурод худони балоси у, худогинани балоси у!

— Жиян тогага тортади-да! — деди раисимиз. Идеология керма қош бўлди. Идеология лаб бурди.

— Улуғ Ватан уруши қаҳрамони... Улуғ Ватан уруши қаҳрамони... — дея ўйланди Идеология. — Шундай одам вафот этади, нега мен билмайман, ўртоқ раис? Бу воқеа қачон

бўлиб ўтди?

— Ўтган беш йилликларда бўлиб ўтиб кетди, — деди раисимиз.

— А-а, вот как! — деди Идеология. — Мен унда Москвада ўқишда эдим!

10

Бир ҳафтадан кейин супрадай бир рўзномада мана бундай мақола ўқидим:

ЁЗУВЧИЛАР ПАХТА ДАЛАЛАРИДА ОППОҚ ТОНГ ЮЛДУЗЛАРИ

Тонг киприк қоқмоқда. Боботоғ чўққиларида осмон оқариб кўринмоқда. Она қуёш дастлаб қалдиргоч қанотига ўхшаб кўринади-да, зум ўтмай төгнинг ясси чўққисида қит-қизил мис товоқдай товланиб, воҳага ажисб бир зар тўқади. Хур, баҳтиёр кун бошлиданади.

Шу лаҳзада Хурсандой билан Норгулои сўқмоқ ёқалаб боришмоқда. Улар бугун Жарариқ анҳор бўйида «оқ олтин» теришишади. Сўлим, сулув Жарариқ анҳори! Анҳор бўйида «оқ олтин» териши нақадар гаштли! Яна-тагин ўн кунликнинг охири. Бир юз қирқ уч килограммдан пахта теришиса, жами беш тоннага етади. Дугоналар кеча оқшом маслаҳатлашиб олишган. Хурсандой биринчи эгатга тушади. Норгулои уни ёнлаб тушади.

Пахта юзини шудринг босган, қўл тегса, ёмғир ёққандай дув этиб тўқилади, қўл жиққа ҳўл бўлади.

— Хурсандой, шудрингнинг ялтирашини қара, худди ёмғир ёққандай-а, — деди Норгулои.

— Баҳор, мисоли сўлим баҳор!

Хурсандой шундай деб, Норгулоига бир нима узатди.

— Дугонаажон, манави атиран сепиб олинг, чивин чақмайди.

— Вой, бу нима?

— Француз атири.

— Раҳмат, дугонаажон, раҳмат, далага француз атириям бўлаверади.

Бригадир Декёнкул ака бизнинг илтимосимизга биноан иккита дала юлдузини, иккита тонг юлдузини бир-икки дақиқага олиб қолди. Биз дала юлдузлари билан суҳбатда бўлдик.

— Ҳорманг энди, она қизларим!

— Саломат бўлинг, — жавоб берди дала юлдузлари лабларида табассум ўйнаб.

— О, яхши, яхши! Турмуши шароитларингиз қалай, қийналмаяпсизларми ўзи?

— Қийналиши қаёқда, ҳамма нарса етарли. Ўйларимизда газ, радио, телевизор бор. Ҳар куни кечқурун колхоз клубида кино кўриб турамиз. Биз пахтакорлар учун ҳамма нарса муҳайё! — деди қизлар баҳтиёрларча.

— Пахта териши қийин эмасми?

Қизлар юзларида баҳт ва шодлик ўйнаб, ўзларининг дил сўзларини изҳор этди:

— Пахта теришининг нимаси қийин? Пахта териши гул теришидай гап! «Оқ олтин»лар лўппи-лўппи бўлиб, бизга табассум билан термулиб туради. Биз авайлабгина олиб, этагимизга соламиз!

— О, поэзия, поэзия!

— Пахта териши гул теришидан осон! Гулнинг тикани бор, авайламаса бўлмайди. Пахтанинг эса тикани йўқ, шундайгина кафтишимизга олиб, этакка соламиз-қўямиз, вассалом. Қайтанга кафтишимизга момиққина тегиб, жонимизга ҳузур багишлайди, роҳат багишлайди.

— Кафтишимизга момиққина тегиб... Ана ўҳшатиш! Шоир бўлиб кетинг-е!

— Биз пахтани яйраб, ҳавас билан, завқ-шавқ билан терамиз! Чунки пахта ифтихоримиз!

— Офарин, қизим, офарин! Ана фалсафа-ю, мана фалсафани сиз қўли гул дала

юлдузларидан ўрганишишимиз керак! Хүп, она қизларим, ишларингизга муваффақиятлар тилаймиз! Вақтларингизни олганимиз учун кечирим сўраймиз!

Дала юлдузлари дала сари елиб кетди. Ҳа, юлдузлар шошилмоқда, ҳа, оппоқ далага талпинмоқда.

Дала юлдузлари тушигача юз килодан ошириб «оқ олтин» териб хирмонга тўкиб, толзор оғушидаги дала шийтонига келди. Юлдузлар тушилик қилиб, маданий ҳордиқ чиқарди.

— Далада юрганлар тушилик қилмайдими? — сўрадик биз бригадирдан.

— Улар мана бу маданий ҳордиқ чиқараётган илгорлар билан социалистик мусобақа ўйнаган, — деди бригадир ғурур билан. — Илгорларга етиб олайлик деб, туши вақтидаям пахта теради, илгорларнинг дам олиб ўтирганидан фойдаланади. Таабиркор, сергурур қизлар-да! Рўмолларининг учida нони бор, шуни йўл-йўлакай тишлаб еб, пахта тераверади.

— О, ана буни чинакам меҳнатсеварлик деса бўлади!

— Дала меҳри!

— Пахта шиқу!

— Ватанга фидокорлик!

Шу пайт колхоз агитмашинаси шийтон олдига келиб тўхтади. Радиокарнайдан колхоз агитатори Жавлонбой аканинг жарангдор овози янгради:

— Терим илгорларига шон-шарафлар! Азиз теримчилар, ярим кунда юз килограммдан «оқ олтин» териб, эл хирмонига тўккан Хурсандой билан Норгулойга тенглашингиз! Ҳозир эшиштириладиган «Бахт ялласи» ана шу икки илгор дугонанинг бугунги ютуғига бизнинг олқишишимиз бўлади! Диққат, «Бахт ялласи»!

Бахтиёрлар ўлкаси бу — яйрашинг, ўйнанг, кулинг,
Булбулигёё бўлиб, хўп сайрашинг, қувнанг, кулинг,
Тер тўкиб сизлар шу юртда бунданам баҳтли бўлинг...

Бахт ялласидан ҳорғин кўзлар тиниқлашиди, белларга, қўлларга қувват кирди, оёқларга дармон кирди.

Дала юлдузлари баҳт ялласи қанотида яна далалар сари елиб кетди.

Биз улкан тўйхонани эслатувчи пахтазор қўйнидан олам-олам завқ ила, қувонч ила қайтар эканмиз, қулоқларимиз остида ҳамон «Бахт ялласи» жаранглаб турди:

Бахтиёрлар ўлкаси бу...

Уфқда порлоқ келажакдан дарак бериб, қуёш қизариб ботмоқда...

Сергей БОРОДИН,
Михаил ШЕВЕРДИН,
Комил ЯШИН.

11

Умрда шундай кун бўлади: одам бирдан айниб қолади!

Кўнгилга қил сиғмайди. Кўнгил бир хижил бўлади, бир ланж бўлади.

Кўнгилни нимадир бир нима бармоқ ботириб-бармоқ ботириб тирнайди.

Кўнгилни бир ҳадик босиб келади. Кўнгил туб-туби нимадир бир нима бўлади, дейди.

Ҳадик юзларга ўтади. Ҳадик қобоқларга ўтади.

Чап қобоқ пир-пир учади.

Қафт чап қобоқ силамиш кафтни чўлп-чўлп ўпади.

Лаблар қобоқ силамиш кафтни чўлп-чўлп ўпади.

— Кет, бор, кет!..

Одам ўзича ана шундай ҳадик қувмиш бўлади.

12

Кўзимга дала-да кўринмади. Кўзимга пахта-да кўринмади.
Мотоциклим билан қишлоқ учдим.
Дарвозамидан елиб ичкариладим.
Шунда, димоғимга қўланса бир ис келди.
Ховли юзида сатиллар думалаб ётди. Бидонлар юмалаб ётди.
Майда-майда кўлмак сувлар йилт-йилт этди.
Қоп-қора куялар сочила-сочила ўйнади.
Қўланса ис ҳаминқадар анқиди.
Бир ерда латта куяяпти, дея ўйладим.
— Ай!.. — дедим.
Ичкаридан Ойсулув қизимиз чиқиб келди.
— Сен эмас, энанг қани? — дедим.
Қизимиз хўнгиллаб йиглади. Юмалаб ётмиш бидон ўтириб йиглади. Юзларини кафтлари билан яшириб йиглади..
Ҳадаҳалаб қизимиз олдига бордим. Юзини ўзимга қаратдим.
— Нима қилди, айт? — дедим. — Энанг қани? Қизимиз гапирмади, қўли билан туман тарафни кўрсатди.
Аччиқ билан қизимизни елкаларидан даст кўтариб олдим.
— Сенга айтаяпман, тилинг борми?! Энанг қани деяпман?!
Қизимиз ўпкасини босолмайин айтди:
— Энам ўзига ўт қўйиб юборди.
— Нима-нима?! Қаерда-қаерда?!
— Туман олиб кетди.
— Момонг қани?!
— Момом энам билан кетди.

13

Мен мотоциклимни йўл-йўлакай ўт олдириб учдим. Тезликни охиригача босдим.
Мен қандай етиб келдим — худо билмаса, мен билмадим.
Мотоциклимни касалхона дарвозаси олдида қолдирдим. Ичкарилаб чопдим.
Қабулхонада одам мўл бўлди. Бирор касалхона кийимида бўлди. Бирор кўча-кўй кийимида бўлди.
Мен дардимни туйнукдан айтдим.
Оқ ҳалатли йигит бош иргади.
— Биламан, олиб келди, биламан, — деди.
— Ичкари кираман, — дедим.
— Йўқ, мумкин эмас.
— Мен... мен хўжайини бўламан.
— Қатъий назар, беморга хозир тез ёрдам кўрсатилмоқда.
У дедим, бўлмади, бу дедим, бўлмади.
— Бўлмаса, момони чақириб беринг? — дедим.
— У ким?
— Бизни энамиз.

- Ҳа-ҳа, ёнида бир кампир бор эди, ўша-да? Бу мумкин!
Қабулхонада бари-бари менга қаради. Бирор ачиниб қаради. Бирор қайғуриб қаради. Бирор бош чайқади. Бирор бош ирғади. Қабулхонада пичир-пичир бошланди.
- Эркаги экан, шүрпешонани эркаги экан.
— Ҳай, бечора-е, бечора.
— Э, тавба-е, туманда бир ойда тўртта шундай кўргилик бўлди-а?
— Тўртов бўлдими-а?
— Эса-чи. Жобида бирор, Мўминқулда бирор, Сайракда бирор, буниси билан тўртов.
— Қандай замон бўлди-а?
— Олдинлариям кўп бўлиб эди, билдиришмади. Энди билдиришаяпти.
— Кўрасиз, ҳали шуниям босди-босди этадилар.
— У-ку, чин. Олдинги тўртасиниям босди-босди этадилар.
— Ойдай-кундай кўриниб турган куйикни қайтиб босди-босди этадилар?
— Эб-е, жўқчи деса, жўқчи дегуликсан-да, эб-е. Катталарни олдида оқни қора дейиш нима деган гап...
Оқ ҳалатли йигит телефонда бирор билан гапиришди.
— Бир четга? Бўпти, бир четга, бўпти, — деди.
Йигит билагимдан ушлаб ҳовли етаклади. Қўли билан бир четни — қуюқ дараҳтлар остини кўрсатди.
— Ана ўша ўтиргичга бориб ўтириб туринг, кампирни ҳозир юбораман, — деди. — Шовқин-сурон қилмай, тинчгана ўтиринглар.
— Ким шовқин қиласяпти?
— Сиз эмас, кампир шундай экан. Кампир келганда шундай бақириб-чақирди, шундай шовқин-сурон қилди, касалхонани бошига кўтарди! Шунга, бош врачимиз шовқин қилмасин, четроқда гаплашсин, деяпти. Энди сиз эркак одамсиз, кампирга айтиб қўясиз-да.
Мен йигит айтмиш хилват бориб ўтирдим. Оёқ узатиб ўтирдим.

14

- Сағал ўтди — онамиз пайпанглай-пайпанглай келди.
Онамиз рангидан ранг бўлмади. Онамиз кўзлари шиш-шиш бўлди. Онамиз бурунлари оқиб-оқиб ётди.
Онамиз қабатимдан жой олди. Дока рўмоли билан оғзини ушлаб... сел-себор йиғлади.
— Кўргилигинг кўп бўлсин, сендайчикин эркакни! — деди.
— Эб-е, мен сизга нима қилдим?
— Қичқирганимдан чопа келсанг, ўлармидинг!
— Қачон? Эшитганим йўқ, худо урсин агар, эшитганим йўқ!
— Қанча қичқирдим, том-тошни бошимга кўтардим, ҳовлини бошимга кўтардим.
Дехқонкул-а, кела бер-чи кела бер, деб қичқирдим.
— Эшитганим йўқ, ит бўлайин агар, эшитганим йўқ!
— Эл-халқим, кела бер-чи кела бер, деб бақирдим. Қани, бироргина жонзот овоз берса, отинг нима деса!
— Бари менга ўхшаб далада юрган-да?
— Ҳа, даланг билан қўшилиб чалпак бўлгин, чалпаккина бўлгин! Ҳа, даланг билан қўшилиб қўшмозор бўлгин, қўшмозоргина бўлгин! Шу аёлга бир нима бўлсин қани, мен сени нима қиласаман экан!
— Ўзи, нима бўлди, айтинг қаникайин?
— Очиқ мозор бўлди, очиқ лаҳад бўлди!

— Күп бақирманг-е, эна, теварак-бошдан-да уятдир.
— Ичкарида жондайгина келиним куйиб ётади-да, мен бақирмай ким бақиради?!

— Хўп, нима бўлди ўзи? Бир бошидан айтинг қаникайин?

— Бир қарадим: келин ичкарида бешикка бағрини бериб ўтирди. Боласига эмчак берди. Пешонасини бешик тебратгич қўйиб ухлади. Ай, келин, бўл, дедим. Майли, хозир, деди. Сўғин ҳужрамга кириб кетдим. Келиндан ҳадеганда дарак бўла бермади. Икки қарадим: ай, келин, бўл, дедим. Майли, манавини эмизиб бўлайин, майли, деди. Бир оғиз қаттиқ-куруқ гапирган бўлсам, ўлайин агар, ўлибгина кетайин, агар! Қарадим-қарадим: келин қимириламади. Бор-е, дедим, бу дунёмдан у дунём яқин бўлса, менга нима, дедим. Ҳужрамга кириб ётиб олдим. Ётиб-ётиб, кўзим кетди. Бир маҳал, ойнадан бирор қаради. Мен кўзимни билинار-билинмас очиб турдим. Келин ойнадан мўралади. Кафтларини ойна тутиб мўралади. Мен ўзимни ухламишга олиб ётдим. Келин ойнадан мўралади-мўралади... кетди. Энди далага ҳаяллаб-ҳаяллаб боради, эридан кўр бўлиб гап эшитади, дедим. Келин шу кетишида ошхонага борибди. Гап йўқ, сўз йўқ, бурчакда турган ермойини олибди-да, елкасидан қуйибди.

— Елкасидан қуйибди? Ермойини-я?

— Ермойини-да, елкасидан-да! Сўғин, кўйлаги этагидан гугурт чақибди.

— Ўзи чақибдими?

— Бўлмаса ким чақади, ўзи-да.

— Чопиб бормадингизми?

— Эб-е, туш билибманми, ўт қўйишини!

— Ё, тавба, ё, тавбангдан...

— Бир маҳал, чириллаган овоз эшитдим. Аввал-аввал, нима эмиш, дедим. Шу яқинда бирор-яримни эри ураяпти-ёв, дедим. Ҳадаҳалаб жойимдан турдим. Ойнадан ташқари қарадим. Қарасам: ҳовлида бир ўт ёнаяпти. Ўт бўлиб ўт эмас, кун бўлиб кун эмас! Ўт, дейин дедим — шу вақтда ўт нима қилади, дедим. Келин тандир қизитаяпти, дейин дедим — кеча тандир қизитиб, нон ёпиб олиб эди-ку, дедим, Бир маҳал ўт чинқириб қўя берди! Тавба дедим, ўт ҳам чинқирадими, дедим. Умрим ўтиб, чинқириб ёнгич ўт кўрмаб эдим-ку, дедим. Бир маҳал, ўт ҳовлини айланиб чопди! Мен ташқари отилиб чиқдим, Қараб турдим: ўт ҳовлида зир-зир айланиб чопди! Ўт чинқириб-чинқириб чолди! Ўт буралиб-буралиб чопди! Ўт ўйнаб-ўйнаб чопди! Ўт эшилиб-эшилиб чопди! Мен овоз қўйиб чириқ бердим. Сени йўқлаб чириқ бердим. Эл-халқим кела бер, деб чақириқ бердим. Чириқ бера-чириқ бера — ўтни олдимга солиб қувиб қўя бердим! Ҳовлини айлантириб ўт қуваман- ўт қуваман — қани энди, етолсам! Ўтни етолмадим! Бир-икки марта етаман-етаман дедим ағнаб тушдим. Белларим зирқираб оғриди. Жойимдан туролмай қолдим, ётган еримда: эл-халқим, қаердасан, эл-халқим, кела бер, деб бақира бердим. Бир бало қилиб жойимдан тўркадим. Тағин ўт қувиб кетдим. Ўт ўзини девор олиб бориб урди! Ўт ўзини дарахт олиб бориб урди! Сўғин, ўт ўзини... бузоқни остига отди! Бузоқ қозиқ айланиб-қозиқ айланиб қочди. Маъраб-маъраб қочди. Ўт лоп этиб тўркади. Ўт энди бурчакда уюғли қумга қараб чолди. Ўт ўзини қумга урди. Ўт қумга ағнаб-ағнаб чинқирди. Ўт қумга юмалаб-юмалаб чинқирди. Ўт тағин ҳовлини гир-гир айланиб-айланиб чопди. Мен бечора ўт қуваман деб, тағин ағнаб тушдим. Мен жойимдан туролмай-туролмай чирилладим. Мен қўлларимни чўзиб-чўзиб чирилладим. Бовужуд, кўчадан ўткинчи-кеткинчилар чопиб келди.

— Улар-да ўчиролмадими-а...

— Ўчиргани шу-да, тирик қолди, ўчиргани шу-да! Бўлмаса, келинимни суюгиям қолмас эди! Кўп кўп-да — ўтни этиб олиб, қумга босиб-босиб турди. Ўтга сатиллаб-сатиллаб сув сепиб турди. Гиламни ҳўллаб-ҳўллаб, ўтга ёпиб-ёпиб турди.

Мен тиззамга тарс-тарс уриб йиғладим. Мен ўкириб-ўкириб йиғладим. Мен айтиб-айтиб йиғладим.

— Ай, дала-дала демай; мен ўлайин-а, ай, эркак бўлмай мен ўлайин-а!..
— Бебоққина келиним-а!..
— Ай, пешонам қурсин-а, дунёга келмай мен ўлайин-а!..
— Қўли косов, сочи супурги келиним-а!..
— Дарров кийимларини ечиб олмабсизлар-да, эна!..
— Кийим кимни эсига кепти, дейсан...
— Дарров кийимларини ечиб олса бўлди эди, одам ёнмас эди!
— Одам ёнмас эди? Эб-е, одам ёнмаганини кўрибсан! Одам ёнсин-да! Одам гуриллаб-гуриллаб ёнди! Ҳамсоя-қўллар кийимларини юлиб олди. Барибир одам ёнди! Одам танаси ёнди! Одам гур-гур ёнди!
— Қўйинг-е, эна, одам ҳам ёнадими! Ўзларинг бўш-баёв бўлиб ўчиrolмагансизлар!
— Эб-е, эб-е, одам ёнсин экан-да! Одам ёнар экан-да! Ҳўл кундани ёнганини кўриб эдингми? Одам ана шу кундадай ёнар экан! Одам баданлари пиш-пиш этиб ёнар экан! Одам баданларидан сув чиқиб-сув чиқиб ёнар экан! Одам баданларидан сув оқиб-сув оқиб ёнар экан! Одам бадбўйдан-бадбўй ҳид чиқариб-ҳид чиқариб ёнар экан!..

15

Касалхона дарвозасидан учта машина кириб келди.
Машина йўлак четида оёқ илди.
Машиналардан катталар тушди.
Катталар машиналари олдида гапириб-гапиришиб турди.
Раисимиз биз тарафлади.
Раисимиз бизни қошимизда бош эгиб турди. Бош чайқаб турди.
— Ҳай-ҳай, фалокат-да, —деди. —Фалокат. Қалай ўзи, тилга келдими?
— Гўрда тилга келадими! — деди онамиз. — Кўзини очолмайди, гўрда тилга келадими!
— Фалокат оёқ остида дегани шу-да. Сиз энди, момо, олдига боринг-да, кўз-кулоқ бўлиб туринг, боринг.
Онамиз ичкарилаб жўнади.
Раисимиз менга қаради. Зим-зимдан қаради. Бир нима дейиш учун оғиз жуфтлади. Тағин, индамади.
Раисимиз ер сингалаб-ер сингалаб катталар тараф кетди.

16

Каллам... каллам елкамдан босиб-босиб келди. Каллам катталик қилди. Каллам оғирлик қилди.
Ўтиргич киррасига тирсакладим. Калламга қўлимни тирадим. Калламни кафтимга олдим.

17

Куйди-куйди — аёлимни тани куйди.
Куйди-куйди — мени бағрим куйди.
Куйди-куйди — болаларимни шўри куйди.

18

Куйди-куйди — катталарни нимаси куйди?

Катталарни... оёғи күйди!

Катталар питирлаб қолди. Катталар зириллаб қолди. Катталар вос-вос бўп қолди!

Катталарга бир бўлак кун туғди.

Катталар тўда-тўда бўлиб гапиришди. Катталар қўлларини бигиз этиб гапиришди. Катталар қўлларини шоп этиб гапиришди. Катталар қўлларини мушт этиб гапиришди: Катталар ер тупуриб-ер тупуриб гапиришди.

Катталар қатор бўлишиб келди.

Мен жойимдан қўзголдим.

Идеология қайфудошлиқ ҳам меҳрибонлик билан елкамга қўлини қўйди.

— Ўтиинг, қимирламанг, ўтиинг, — деди. Мен тағин жойимга чўқдим.

Иккита катта ўнгим ўтирди. Иккита катта чапим ўтирди. Тағин икиита катта пешонамда тик турди.

Идеология қўл қовуштириди. Идеология бош иргади. Идеология хўрсинди.

— Фалокат, фалокат, — деди. — Ўртоқ бригадир, Дехқонкулова... касал эдими?

— Йўқ, соғлом эди, — дедим. — Аёлимиз умри меҳнат билан ўтди.

— Балки... ёшлигига касал-пасал бўлгандир?

— Аёлини ёшлигини бу қаердан билади, — деди бир катта.

— Нимага билмайман, йиламан. Холамизни қизини билмайманми, биламан.

— Дехқонкулова уйида қаттиқ йиқилган жойи бор эдими? — деди Идеология.

— Йўқ?

— Мабодо... бошини тасодифан девор-певорга уриб олиб эдими?

— Йўқ?

— Балки далада пахта ичида ухлаб қолгандир? Яхшилаб эсланг?

— Йўқ, ундай бўлган йўқ.

— Ёнгоқни остида ҳам ухлар эдими?

— Йўқ, уйимизда ёнгоқ йўқ.

— Гапирганди, гап-сўзларидан адашар эдими?

— Йўқ, гаплари туппа-тузук эди.

— Авлодида эси... эси эмас, нима десак экан... авлодида эси бундайроқлари бор эдими?

— Йўқ, аёлимиз етти пуштигачайин палаги тоза аёл!

Идеология теварак-бош қараб-қараб олди. Идеология овозини бир парда кўтарди.

— Унда... нимага ўзига ўзи ўт қўяди? — деди. Мен бармоқларимга йиғлаб-йиғлаб қўя бердим.

— Энди... кўргилик-да, катта, кўргилик! — дедим. Бармоқларим орасидан дардларим дув-дув тўкилди.

Раисимиз дув-дув дардларимни илиб-илиб олди:

— Дехқонқул ака чин айтади, Клара Ходжаевна, — деди. — Бу кўпга келган кўргилик.

Ўзбекистон республикамиз бўйича шу охирги икки йилда етти юз эллик уч хотин-қиз ўзига ўзи ўт кўйибди!

— Бу абсурд!

— Етти юз эллик уч хотин-қиз ўзини ўзи ёқибди-я!

— Абсурд, абсурд!

— Худо урсин агар, Клара Ходжаевна, худо урсин агар! Бу ҳақда матбуотда неча марталаб айтди. Қайси бир шоир ғазал ҳам битди.

Идеология пешонамда тик турмиш йигитдан сўради:

— Ким экан у шоир, ўртоқ Мелиев?

— Михаил Дудин, — деди Мелиев.

— Дудин? Оти айтиб турибди — буржуа мафкурачиси!

— Буржуа мафкурачиси эмас, — деди Мелиев.

— Буржуа мафкурачиси бўлмаса, тирноқ орасидан кир излайдими? Шеър ёзаман деса, ана, қанчадан-қанча активистка хотин-қизларимиз бор! Хотин-қизларимиз орасидан иккита космонавт етишиб чиқди. Даже, АҚШда ҳам иккита космонавт хотин-қиз йўқ!

— Йўқ, Дудин ленинградлик шоир, — деди Мелиев.

— Ленинградлик шоир? Ленинградлик шоир Ўзбекистонда хотин-қизлар ёнаётгани билан нима иши бор? Биламиз, совет адабиётида ҳали ҳам ана шундай диссидентлар учраб туради! Диссидент Солженицин каби бадарға этсак, биларди!..

— Дудин катта шоир, Клара Ходжаевна, — деди Мелиев. — Социалистик Мехнат Қаҳрамони...

— Социалистик Мехнат Қаҳрамони? Нима деб ёзибди? Эсингизда борми?

Мелиев ён чўнтағидан бир даста рўзнома олди. Бир супрадай-супрадайини ёйиб ўқиди:

Аёллар ёнмоқда Ўзбекистонда
Бу ҳақда ёзилмас бизлар томонда,
У қандай оғриқдир, шўрлик гулларни
Оловга йўллаган, ёккан гулхани?
Уларга аёндир мен билмаган сир:
Не сабаб оловга бўлдилар асир?
Бу ҳақда ёзилмас, айтилмас сўзлар
Кул устида қанот қоқмас қақнуслар
Тутун-ла қовушиб ўрлайди ҳарён
Мангуга тарқ этар танадаги жон
Исёндир бу, сохта ҳаёт қаърида
Чимилдик кўрмаган келин бағрида
Оналар ёшидан чақнаган ўтдир
...Дунё-чи, бепарво кўз юмиб ўтди...
Оламни босмоқда шомнинг шарпаси
Қолмади жаҳонда шодлик нафаси
Дам сайин туғилар менда ҳам шуки
Бу ёруғ оловда покланиш эрки
Бу ҳақда ёзилмас бизлар томонда
Аёллар ёнмоқда Ўзбекистонда!
Бор дунё соқовдир, сўз демас худо
Инсон келажаги ёнар даҳр аро!

— Иносказательства! — деди Идеология. — Бу иносказательства! Социалистик реализм методига ёт асар! Социалистик маданиятни барпо этиш ва меҳнаткашларни коммунистик рухда тарбиялаш — реакцион буржуа идеологиясига, шунингдек, ўнг ва сўл оппортунизм идеолопиясига қарши, буржуазиянинг реакцион маданияти ва капиталистик турмуш тарзи олдида тиз чўкаб сажда қилувчиларга қарши, совет идеологиясига душман бўлган миллатчилик ва космополитлик руҳидаги бузғунчиликларга қарши адабиётда, санъатда ва илм-фанда сиёsatдан қочиш ва ғоясизликка қарши хужум қилиш, демакдир!

— Ким билади, Клара Ходжаевна, — дея минғиллади Мелиев.

— Бу асар районимиз хотин-қизларига тегишли эмас! — деди Идеология. — Районимиз хотин-қизлари морально-устойчивая!

— Районимизда...

— Район номидан гапирманг, ўртоқ раис! Сиз бор-йўғи раиссиз, ўзинпизни билинг! Район номидан биз раҳбарлар гапирамиз!

— Ўзбекистон бўйича етти юз эллик уч хотин-қиз, район бўйича ..

— Яна район, яна район! Районимиз хотин-қизлари морально-устойчивая!

Идеология шаҳодат бармоқни пешонаси нуқиди. Идеология сўзни қалин-қалин айтди:

— Хуллас, Деконкулова... манавиндей!

Идеология аёл одам. Эркак бўлса — ўзим билар эдим!

Шундай бўлса-да — айтгичимни айтдим.

— Катта, — дедим. — Эш борми-йўқми, ишқилиб, кўз очиб дунё кўргандан буён далада ҳалол меҳнат қилди. Этак-этак фарзанд кўрди. Эси бордир-да.

Идеология гапимни корламади.

— Эси бўлса... ўзига ўзи ўт қўядими? — деди. — Шундай баҳт-саодатли замонда-я?

— Катта...

— Шундай ҳур замонда-я? Тўқликка шўхлик бу!

— Катта...

— Тўқликка шўхлик бу! Хотин-қизлар эркаклар билан тенг ҳуқуқли бўлса! Эркаклар билан тенгма-тенг меҳнат қилса! Билмайман, хотин-қизларга нима етишмаяпти!

— Катта...

— Капиталистик жамиятдагина одамлар ўз жонига ўзи қасд қилади! Бу бизнинг жамиятимиз учун иллат! Мафкурамиз учун ёт!

— Катта, у бечора ажал билан олишиб ётибди. Ҳали, одам бўладими-йўқми, билмайман. Шундай экан, нима қиласиз, бир бечорани ёмон отлик қилиб... Идеология гапимни корламади.

— Эси бўлса... ўзига ўзи ўт қўядими? — дея тўти бўлди.

— Эси бордирки, ўзига ўзи ўт қўйибди! Эси йўқ одам ўз жонига ўзи қасд қиладими? Қилмайди, катта, қилмайди! Боиси— шунга ақли етмайди!

— Ия, ўртоқ Мелиев, бу қандай фалсафа бўлди?:

— Гапни у жигитдан сўраманг, мендан сўранг, катта! Гапни мен гапирдим! Мен фалсафа айтмадим. Мен жигити гап айтдим, жигити! Чин-да, эси кам одамни дунё билан нима иши бор? Эси кам одамни ўз жони билан ўзини нима иши бор? Эси кам одам оғзини очиб юра беради-да, дунё ўзи шундай бўлар экан, деб!

— Хуллас, Деконкулова... шизофреничка! Гап тамом!

— Ким-ким? — дедим.

— Шизофреничка! Ўртоқ Мелиев, шизофреничка дехқончасига қандай бўлади?

— Псих!

— Йўқ, далачаси-далачаси?

— Телба!..

Тан-жоним қизиди. Қўлларим қалт-қалт этди. Лабларим пир-пир учди.

Жоним ҳалқумимга келди!

Бисотимда бор ёмон сўзларим билан катталарни тутиб сўкайин, дедим.

— Кет, баринг кет! — дея бақирдим.

Катталар қотиб қолди. Катталар бир-бирига қаради.

— Ия! — деди Идеология. — Эрида ҳам борми дейман, ўртоқ Мелиев?

— Ҳа, менда-да бор! Аёлимиз билан лойимиз бир ердан олинган! Бўлдими? Кўнглинг жойига тушдими? Энди, кет!

— Мени сенсираманг, ўртоқ бригадир, мени сенсираманг!

— Кетмайсанми, кетмайсанми?

Теварагим алангладим — бирон нима изладим. Қўлимга маккажўхори пояси илашди. Катталар жойидан туриб кетди. Раисимиз қўлимдаги маккапояга ёпишди.

— Деконкул ака, ай, Деконкул ака! — деди. — Тентак бўлманг!

— Шулардай катта бўлгандан кўра, тентак бўлганим яхши!

— Деконкул ака, эсингизни йифинг!

— Ушламанг қўлимни, ушламанг дейман!..

Раисимиз қўлларимни кетимга қайирди. Мени ўтиргичга босиб турди.

Катталар кетига қарай-қарай ичкари кириб кетди.

Раисимиз шундан кейингина мени қўйберди. Кўлимдан маккапояни тортиб олди. Холисга отиб юборди.

Раисимиз-да катталар кетидан ичкарилади.

19

Мен пешонамни тиззам қўйдим. Энтикиб нафас олдим.

Қахримдан қайтдим. Ҳовуrimдан тушдим.

20

Ичкаридан катта дўхтир ташқарилаб келди.

Мен бир вақтлар яхшилик қўрдим — шу одамдан қўрдим. Яхши гап эшитдим—шу одамдан эшитдим.

Шу боис — лик этиб жойимдан турдим. Кўлларимни қовуштириб турдим.

Катта дўхтир елкамга кафт қўйди. Мени жойимга ўтиргизди.

Ўзи-да — қабатим ўтиреди. Қўлини қўлим қўйди.

Дўхтир — дўхтиридай дилтанг-дилтанг бўлиб ўтиреди.

Ўтиреди-ўтиреди — қайғудош ҳамроз бўлди:

— Дехқонқул, —деди. —Тағин, мендан ўпка-гинадор бўлма. Мен бир фақир дўхтиран.

Энди... касалингни олиб кетадиган бўлдинг.

— Аёлимизними? Қаёққа олиб кетаман?

— Билмасам, қаёққа олиб кетасан.

— Ё, тузалиб қолдими?

— Қаёқда тузалади, энди келди-ю...

— Унда, қаёққа олиб бораман?

— Ўзинг биласан. Биз биринчи ёрдамни қўрсатиб бўлдик. Энди, касални даволаш керак. Биз даволай олмаймиз. Бизнинг касалхонамиз куйганларни даволамайди.

— Куйганларни қаерда даволайди?

— Куйганлар учун алоҳида касалхоналар бор.

Тошкентда бор. Москвада бор, яқин йўл десанг, Душанбадаям бор. Касалингни олиб кет, биз бошка сақлаб туролмаймиз. Фақат, тезроқ олиб кет, бўлмаса, кеч бўлади...

— Эб-е, у нима деганингиз? Қаёққа олиб кетаман? Қандай олиб кетаман?

— Билмадим, Дехқонқул, билмадим.

— Буёғи ура-ура пахта вақти бўлса. Пахта нима бўлади? Ўзи, бу кимдан чиқкан аҳмоқлик?

— Уёгини катталардан сўрайсан. Мен бир дўхтиран.

— Қани ўша... катталар?

Забт билан ичкари жўнадим.

Катта дўхтир қўрқиб қолди. Кўзлари катта-катта бўлди. Белимдан қўшқўллаб қучоқлаб олди.

— Ҳай, Дехқонқул, ҳай! — деди. — Эсингни йиғ! Барака топ, ўтири!

Катта дўхтир мени жойимга қайтариб ўтиргизди. Ҳарсиллаб-ҳарсиллаб нафас олди.

— Ёмон экансан, Дехқонқул, ёмон экансан, — деди.

— Ўзингиз айтдингиз-ку, катталардан сўрайсан, деб!

— Айтдим-қўйдим-да! Катталарни олдида нима қиласан?..

— Каллапойча қиласан!

Катта дўхтир сесканиб тушди.

— Нима қиласан? — деди.
— Катталарни каллапойча қиласан! Этини бир-ёқлик қиласан, сүягини бирёқлик қиласан!..
Дүхтир күзлари катта-катта бўлди. Қорачиги камайди — оқи кўпайди!
— Ўйлаб гапирайсанми, ука? — деди. — Эсингни йиф, ука, эсингни йиф!
— Эсимни йигсам-йигмасам!..
— Камбағал катталарда нима айб? Дунёда туждан катта филлар бор.
— Бўлмаса, нимага бундай қиласди? Ўзига ўт қўйгич бизни аёлимиз бўлса — катталарга нима?
— Сен сиёсатни тушунмайсан, Дехқонқул, сиёсатни тушунмайсан. Қандай даврда яшаяпмиз билмайсан...
— Худо берган даврда яшаяпмиз-да, қандай даврда яшардик!
— Ана, айтдим-ку, Дехқонқул. Ўз отинг ўзинг билан дехқонсан, дехқон. Сен шундай дейсан. Катталар эса ундай демайди. Ўз жонига қасд қилиш — исён! Ўз жонига қасд қилиш — давран норозилик! Ана, катталар нима дейди!
— Бир бегуноҳ бечорани псих, деди, индамадим. Тентак, деди, индамадим. Энди, касалхонадан чиқариб юбораман, деяптими?!
— Ҳа-да, чиқариб юбор, деяпти-да? Шизофреничка, деб диагноз қўйиб чиқариб юбор, деяпти-да? Мен айтдим, инсоф қилинглар, ахир, дедим. Мен бу аёлни гўдаклигидан биламан, дедим.
— Ўзига ўт қўйгич аёлимиз бўлса, катталар нимадан қўрқади?
— Катталарга амал керак, Дехқонқул! Сенинг аёлинг керак эмас! Катталарга мансаб керак! Сенинг аёлинг катталарни газагига дори эмас! Аёллар ўз жонига қасд қила берса, катталарни тинч қўймайди! Ишдан олади, партиядан ўчиради! Сенинг аёлингни деб, катталар мансабидан айриладими? Айрилмайди, ўлсаям айрилмайди. Йўлини қиласди... Тентакка чиқар, деб буюради. Касалхонага қабул қиласа, деб буюради. Бажармайин, мени ишдан хайдайди, партиядан ўчиради. Катталар дастидан кун қўролмайман. Мен нима, мен бир дўхтир-да. Чин, қасам ичиб эдим. Лекин туманга катталар хўжайн. Катталар гапи билан иш қиласам... аёлинг-ку, аёлинг... бола-бакраларинг ҳам руҳий касалга чиқиб кетади. Онасида бор эди, дейди.. Авлоддан аждодга ўтади, дейди. Шизофрения деган тамға ёмон тамға, Дехқонқул. Шунинг учун, кел, сенга бир акалиқ қиласин. Бир йўли бор. Бундай қиласиз: аёлинг ўзига ўт қўйганини фалокатга йўямиз. Айтайлик, аёлинг газни ёқмоқчи бўлади. Газ бирдан лоп этиб, аёлингни енгига ёпишади.
— Газ? Бизда газ нима қиласди?
— Газимиз бор, ана, Обшир қишлоғи адoғидан қувурда ўтиб ётиби.
— Қувурда ўтиб ётса, қайси бир мамлакатга ўтиб кетаяпти-да.
— Ишқилиб, газинг борми, бор-да. Шу газ бизники-да. Қайси бир мамлакатга кетса-да, ишқилиб, бизнинг газимиз-да. Ҳеч бўлмаса, баллон газинг бордир?
— Ўтин бор, таппи бор.
— Хўп, ўёгини қўя бер. Газинг бор, деб фараз қиласиз. Кейин... аёл киши эмасми, енгини ўчириш ўрнига, қўрқиб қолади. Эсини йифиб олгунича ўт ёқасига қараб ўрлайди. Дод деб бақиради. Додини ҳеч ким эшитмайди. Сабаби, ҳамма далада бўлади-да... Бўлди, шу билан катталар тинчиди-қолади. Катталар тинч — олам тинч!
— Майли, нима десангиз майли. Менга аёлимизни тузатиб берсангиз бўлди.
— Мана, мен борман! — дея кўкрак урди дўхтир. — Ўзим даволайман! Аёлинг бор-йўғи олтмиш фоиз куйибди, олтмиш фоизгина! Яхши бўп кетади!
Болаларим кўз ўнгимга келди. Кўнглим бузилди.
— Ишқилиб, болаларимни пешонасига яхши бўп кетса бўлди... — дедим.
Мен кафтларимга йиғладим.
Дардларим кафтларимдан селоба-селоба бўлиб оқди.

— Отдай бўлиб кетади! — деди дўхтири. — Олтмиш фоиз куйик ундаи қалтис эмас...
Дўхтири елкам қока-қока кетди. Мен ўнгирларимга йиғладим.

21

Аёлимиз... одам бўлмади...

22

Субҳи содикда аёлимиз бошига бордим. Мозор пойида тизза бўлдим.

Мозорни оҳиста-оҳиста туртдим — аёлимизни уйғотдим...

— Ай, мен келдим? — дедим.

Бир сиқим мозор олдим — аёлимиз соchlарини ушладим...

— Ай, сенга айтаман? — дедим. Томонгим тўлиб-тўлиб келди...

23

Уй бурчида турмиш бешикбеллик кўзимга ёмон-ёмон кўринди.

Мен энди бешикни нима қилайн? Мен энди бешикка ўзимни белайнми?

Мен бешик қараб турдим-турдим.

Шунда бешик... шунда бешик аёлимиз тобути бўлиб кўринди!

Ичида... аёлимиз ётмишдай бўлди! Баданлари олтмиш фоиз куйиб-куйиб ётмишдай бўлди!

Аёлимиз пичир-пичир мени йўқламишдай бўлди!

— Ҳа, нима дейсан? — дедим. Бешикдан жавоб бўлмади.

— Айт, айтгичингни? — дедим.

Бешик — тобут деса тобут дегудай сукут этди.

Мен оҳиста-оҳиста бешик олдилаб бордим. Энкайиб қўлларимни тиззаларим тирадим. Ўнг кулоғимни бешик тутдим.

Бешикдан овоз бўлмади.

Бешикёғиҷ бурчидан оҳиста ушладим. Хиёл-хиёл қўтардим. Бешик ичи мўраладим.

Бешикда жон зоти бўлмади.

Бешик кўзимга ёмондан-ёмон кўринди.

Бешикни кўрмайин-да, куймайин-да, дедим,

Бешикни даст кўтариб ташқариладим.

Нарвондан бешик қўлтиқлаб томладим. Бешикни ғўзапоя уюми усти ташладим.

Бешик ғўзапоя ботиб-ғўзапоя ботиб қолди.

Шунда, бешикёғиҷ шамолда ҳилп-ҳилп эта-эта бешик кетилаб учиб тушди.

Бешикёғиҷ бир учи бешикқушда илашиб-бешикқушда илашиб қолди.

Бовужуд, бешикқуш борлик бўлди — бешикёғиҷ ер учиб тушарман-ер учиб тушарман бўлди.

Мен бешикдан қовузни олдим. Оқўрагични олдим. Тагпўшни олдим.

Сумакни олдим. Тувакни олдим.

Барини бешикёғиҷ солдим.

Шунда, димоғим гуп-гуп шиптири иси туйди.

Мен бешиктебратгичда осилиб турмиш кўзтумор билан тўққизкўз мунчоқни узиб-узиб олдим.

Кўзтумор билан тўққизкўз мунчоқни-да бешикёғиҷ солдим.

Бешикёпгични ўраб-ўраб бешик жойладим.
Бешик кунда очилиб-очилиб қолди.
Шунда, бешикдаги сонсиз жимжималарга кўзим тушди.
Кўзларим кунда қамашди.
Бешик гуллари бўлса бордир, дея ўйладим.
Тикилиброк-тикилиброк қарадим.
Бешикдаги жимжималар бир араби хуснихат бўлиб кўринди, бир жимжимадор гуллар бўлиб кўринди.

Бешикда бундайчикин оҳангжамолар йўқ эди — қаердан бино бўлди?
Шу вақт онамиз хужрасидан ташқарилади. Кафтини пешонаси соябонлади. Кун қаради. Кун вақтини билмоқ бўлди.

Шунда, мени кўрди.
— Бешикни нимага томга олиб чиқдинг, ерчилим бўлгур? — деди.
Мен миқ этмадим.
Онамиз кафтини пешонаси соябонлаб қарашини қўймади.
Мен айтмасам бўлмади:
— Энди бешик нима керак... — дедим.
— Нимага бешик керак эмас?
— Энди... бўлди, — дедим. Бешик бўлди...
— Шу гапингга номаъқулни нонини ебсан! Олиб туш пастга!
— Энди... бешикни ким тебратади?
— Болаларимни майда энаси кетган бўлса, мана, катта энаси бор! Мана мен — момоси бор!
Олиб туш — ўзим бешик тебратаман! Аллалаб-аллалаб бешик тебратаман!
— Майли, олиб тушаман, бора беринг, олиб тушаман.
Мен бешиктебратгичдаги жимжималар тикилдим. Жимжималар нима билан битилмиш бўлди, дедим.
Шаҳодат бармоғим учини ҳўллаб-ҳўллаб артиб кўрдим.
Бир жимжима кўкара-кўкара ёйилди. Билдим — жимжималар кўкқалам билан битилмиш бўлди.
Қош-кўз бўягич кўкқалам бўлса бордир?

24

Аёлимиз бешикка бағир берди. Боласига кўкрак берди.
Боласи чўлп-чўлп эмди.
Аёлимиз боласи бошидан майдагина ойна олди, тўмтоққина қалам олди.
Ойнани бешик узра тутди. Лаби билан қалам учини ҳўллади.
Аёлимиз қошига қалам суртди. Бир у қошига суртди, бир бу қошига суртди.
Бешикдаги боласи миқ-миқ эмди. Аёлимиз турайин деди — бешикдаги боласи кўкрагини кўйбермади.
Аёлимиз бешик михланиб-бешик михланиб қолди. Аёлимиз пешонаси билаклари қўйди.
Аёлимиз билакларини, бешиктебратгич кўйди.
Аёлимиз бешиктебратгич битди:
«Ў-ўй, ичим куяяпти, ичим ёнаяпти».
«Ичимда бир нима қимирляяпти».
«Ў-ўй, бошим айланаяпти».
«Дунё қўзимга қирмиз-қирмиз бўлиб кўринаяпти».
«Қирмиз-қирмиз... думалоқ-думалоқ»...

«Үй-үй, эртага даладан жавоб берса бўлмайдими?».

«Бошимни ювиб олсам деб эдим».

Аёлимиз иккиқат бўлди.

Бешиқдаги боласи сутдан қолмайин иккиқат бўлди!

Аёлимиз ипакдайнин майин бўлди. Аёлимиз ипакдайнин сузик бўлди.

Кечалари бир ўнг ёғига ўнгарилди, бир чап ёғига ўнгарилди.

Аёлимиз кун санади. Аёлимиз тун санади. Санай-санай тонглар оқлади.

25

Кун ёнгандан-ёнди.

Дала кундан-да ёнди.

Кун калла қайнатди, кун товон куйдирди.

Аёлимиз даладан бош олиб кетайин, деди — кетолмади.

Бола азиз бўлди, ғўза боладан-да азиз бўлди!

Аёлимиз шийпон деворига елка бериб ўтириди. Юзларини осмон тутди. Кўзларини юмди.

Оғзини каппа-каппа очди.

Мен елкасидан оҳиста туртдим.

«Ай, нима бўлди?» — дедим.

Аёлимиз қўзларини очди. Тиззаларини ёпди.

«Бошим айланаяпти, — деди. — Қоним кам».

«Унда, сув ич».

Аёлимиз далалар узра жимир-жимир этмиш ҳилга термулди.

«Қирмиз-қирмиз... Думалоқ-думалоқ»... — деди.

Мен қўлимда ўйнаб юрмиш ғўза гулини аёлимизга узатдим.

«Мана! — дедим. — Қирмиз-қирмиз... думалоқ-думалоқ... гул!»

Аёлимиз қўлимни қайтариб ташлади.

«Бундайчикин эмас», — деди.

«Бўлмаса, қандайчикин? Шу гул яхши-да. Идора олдидаги атиргуллар бўлмайди! Ҳиди бўлган билан — маҳсулоти йўқ! Ғўзагул маҳсулдор гул — ҳосил беради!

«Одамни кўп майна этмасин».

«Майна этаётганим йўқ. Ойнаижаҳон билан киноларда-да аёлига гул беради-ку?»

«Ойнаижаҳон билан кинолардаги одамлар қорни тўқ одамлар. Гул қорни тўқларни эрмаги.

Гулни еб бўлмайди»...

«Бўлмаса, қирмизи думалоғинг ниманг?»

Мен жўрттака шундай дедим.

Билдим — аёлимиз қирмизи олма, деди. Билдим — аёлимиз қирмизи олмага ерик бўлди!

Далада қирмизи олма нима қиласди? Қирмизи олма Денов бозорида бўлади! Денов бозори эса қирқ чақиримча келади! Қачон бораман, қачон келаман?

26

Бешикбелликдаги битиклар салмоқли-салмоқли бўлди.

Боиси — беллик текис ҳам энлик бўлди.

«Уй-үй, Ҳолиқов иқтисодчи аёлинин Тошкан олиб бориб келибди».

«Метро дегич автобусга минибди».

«Метро дегич автобус узун-узун эмиш».

«Ер остидан юрар эмиш».

«Ичи доим салқин эмиш».
Беллик пастламиш сайин битиклар қінғир-қийшиқ бўлиб борди.
«Ў-ўй, Темиров агрономни аёллари Самарқандга бориб келибди».
«Хай бир мадрасалар, ҳай бир мачитлар бор эмиш».
«Мадрасалар баланд-баланд эмиш, қараб бўлмас эмиш».
«Қарайин, дегичларни рўмоли бошидан тушиб кетар эмиш».
«Рўмолим бошимдан тушиб кетсин дегичлар мадраса баландига қарасин эмиш».
«Темиров агрономни аёли қарайин деса, рўмоли бошидан тушиб кетибди».
«Рўмоли сувга учиб бориб тушибди».
«Шунда-да билмабди».
«Бир одам, ай хола, рўмолингиз сувга тушиб кетди, дебди».
Шундагина бошида рўмоли йўқлигини билибди».
«Вой, дебди-да, бошини қўллари билан яширибди».
«Мениям рўмолим сувга тушиб кетса экан...»
«Мадраса пойида рўмолим бироргина... бироргина бошимдан учиб тушса экан»...
Тагтахтадаги битиклар майда-майда бўлди. Чумоли из-чумоли из бўлди.
«Ў-ўй, болаларни нафақасини йўқлаб келса бўлмайдими?»
«Қодир — 4 сўм туради. Ҳанифа — 6 сўм туради. Ҳалима — 7 сўм 50 тийин туради».
«Аёл бошим билан икки марта бордим».
«Бир сўрадим — пул йўқ деди, икки сўрадим — пул йўқ, деди».
«Сўғин — бормадим ҳам, сўрамадим ҳам».
«Одамга бет ҳам керак-да».
«Бу киши бўлса, нафақани сен сўра — сен энасисан», дейди».
«Шу 4 сўмни сўрагани бетим чидамайди, дейди».
«Эркак бўп туриб, бу кишини бети чидамаганда, аёл бошим билан мени бетим чидайдими?»
«Аёлга-да бет керак».
«Бу киши айтади — ўнинчи болага 12 сўм 50 тийин нафақа беради, дейди».
«Бу киши айтади — ўнинчи боладан кейин бораман, дейди».
«Бу киши айтади — 12 сўм нафақа бер, дейишга тил боради дейди, бет чидайди, дейди».
«Мен ўнинчи болани қаердан оламан?».
«Бола беш ёш бўлса — шуниям бермайди, эмиш».
«Унда... бола беш ёшдан кейин нима ейди?»
Тагтахта адогидаги беш-олтита битикни ўқиб бўлмади.
Аёлимиз адок битикларни битаётуб кўзи кетдимикин? Ё, кенжамиз аёлимиз кўқрагини ёмон-ёмон тортдимикин?...
Таг-тамал битикларни ўқиб бўлди:
«Дунёга келиб нима кўрдим?»
«Бешик кўрдим».
«Дунё кўриб нени кўрдим?» «Ғўза кўрдим, пахта кўрдим». «Кун кўрдим — ғўза кўрдим».
«Тун кўрдим — бешик кўрдим». «Бешик мозорим бўлди, дала мозористоним бўлди».

САККИЗИНЧИ БОБ

1

Ғўзаларим ост-остларидан очилди.

Ғўза нима учун ердан чиқмиш бўғзи олдидан очилади?

Ғўза ер озиқ-кувватини ғўзаучлаб-ғўзаучлаб тортади. Ғўза ер қувваи кудратини қуёшлаб-

куёшлаб күтаради.

Оқибат — ғұза ост-ост шохлари озиқсиз қолади. Ғұза ост-ост шохлари қувватсиз қолади.

Охир-оқибат — ғұза айнан ана шу ост-ост шохидан очилади. Майда-майда очилади. Ғозсиз-ғозсиз очилади.

2

Ғұзаларим уч-учларидан очилди.

Ғұзауч пахталар-да остышох пахталардай бебарокат-бебарокат лахта бўлади.

Ғұзауч пахталар-да остышох пахталардай бебарор-бебарор пахта бўлади.

Боиси — қоқбел кўсаклар уч-уч кўсакларга оз-оз ер озиқ қияди. Қоқбел кўсаклар уч-уч кўсакларга кам-кам ер қувват қияди.

3

Ғұзаларим қоқ белидан-қоқ белидан очилди.

Қоқбел кўсак ерда бор озиқ-қувватни тортиб олади. Қоқбел кўсак ерда бор куч-курбни ўзида олиб қолади.

Шу боисдан қоқбел кўсак пахтамисан-пахта бўлади!

Қоқбел кўсак барорли-барорли пахта бўлади. Қоқбел кўсак тарози босажак-тарози пахта бўлади.

Дехқон кунига-да ана шу қоқбел кўсак ярайди! Шу боисдан-да, қоқбел кўсакни дехқонкўсак, дейдилар!

4

Ғұзабарг сариқ-сариқ бўлса, дори рисоладагидай барг тўкмайди.

Ғұзабарг қуруқ-қуруқ бўлса, дори бинойидай барг тўкмайди.

Шу боис, миробдан сув сўрадим.

— Оқар сув тамом бўлди, — деди мироб. — Энди, сув омбордан сув бераман-да.

Сув омборда сув йиллаб-кўллаб ётади. Йил мобайнида лойқа сув остилаб чўкиб-чўкиб қолади.

Сувни сув этгич ана шу лойқа бўлади.

Ана шу лойқасиз сув билан сугорилгич ғұза йигирма кун ҳаяллайди.

Ана шу лойқасиз сув билан сугорилгич ҳосил ўттиз-қирқ фоиз камаяди.

Ғұзаларим у даврдан ўтди — ғұзаларимга энди оти сув бўлса бўлди.

Мен далаларимни омборсув билан оқар-оқмас сувлаб олдим.

5

Дориланмиш ғұза тағин қайтиб кўсак тугмайди. Ёмондан-ёмон — дори бор кўсакларни-да қовуриб-қовуриб ташлайди.

6

Мен кўсакларим мўл-кўл очилишини қарадим. Нихоят — олтмиш фоиз кўсагим очилиб бўлди.

Тонг сахарда трактор кетига ўн түрткінчи түрт-бұрчак ускуна тақдим.
Ускунада иккита юм-юмалоқ идиш бўлди.
Мен ҳар идишга юз эллик кило-юз эллик килодан уч юз кило дори солдим.
Дорилашдан олдин сут ичиб олишим қарз ҳам фарз бўлди.
Молимиз илла бир кади сут беради — шуни-да мен ичиб олсам, болалар нимани ичади?
Мен сут ўрнида яхдай сув ичиб олдим.
Коржома кийдим. Кўзойнак тақдим. Оғиз-бурнимга заҳарниқоб тақдим. Кўлқоп кийдим.
Трактор кабинасини маҳкамлаб-маҳкамлаб ёпдим.
Тракторни биринчи тезлиқда ҳайдадим.
Мен сахармардонда далаларимга заҳар бердим.
Мен тонглай-тонглай далаларимни заҳарладим.
Пуркагич насосларни ўнглаб-ўнглаб дала заҳарладим.
Пуркагичлар бирваракай йигирма-йигирма түрт эгатга сариқ-сариқ заҳар пуркади.
Цилиндрни олтинчи рақамга қўйиб-қўйиб дала заҳарладим.
Насос босимини ошириб-ошириб дала заҳарладим.
Мен бир гектар даламга түрт кило қўлансадан-қўланса заҳар бердим. Аччиқдан-аччиқ заҳар бердим.

Тонг тўркади.
Боботоғ узра кун шафақланди. Тонг-тонг шудринглар ол-ол шафақларда кетди. Мен дала заҳарлашдан тийила қолдим — бешудринг барг заҳарни тан олмайди!

Кун олис бошим айланди.
Кун олис кўзим ёшланди.
Кун олис ичак-қорним томофимда бўлди.
Фарра-фарра кусищдан армоним қолмади.

Салқинтоб-салқинтоб оқшом кўнди. Мен тағин дала заҳарладим. Фўзаларим тузи ўчди. Фўзаларим сал-сариқ бўлди. Фўзаларим энтиқди. Фўзаларим ҳансиради.

Бутифос барг қовжиратиб-барг қовжиратиб ташлади. Бутифос барг қовуриб-барг қовуриб ташлади.

Бутифос чала-чала барг тўкиб бошлади.
Бутифосда бор-йўғи битта хосият бўлди — бутифос хом кўсакка зиён бермади.
Хом кўсак бодраб-бодраб очила берди.

Захар-зақкум бутифосдан ўзга дори қуриб қолиб эдими?
Бутифосдан ўзга-да барг түкәжак дорилар мүл-күл бўлди.

Масалан, калций цианимид дегич зиён-захматсиз дори бўлди. Магний хлорат дегич ҳидбўйсиз дори бўлди.

Магний хлорат бутифосдан самарали-самарали барг тўқади. Магний хлорат бутифосдан авто-авто барг тўқади.

Аммо магний хлорат хом кўсакка зиён беради.

Магний хлорат зиён бермиш хом кўсак учлари қизил бўлиб қизил бўлмайди, сариқ бўлиб сариқ бўлмайди.

Гулоби-гулоби ранг бўлади!

Гулоби ранглари бошидан қолсин — тўрт мисқол кўсак икки мисқол бўлиб қолади!
Серфазилат тола бефазилат бўлиб қолади!

Магний хлорат бутифосдан арzon-да тушади.

Бир тонна магний хлорат икки юз тўқсон сўм туради.

Бир тонна бутифос икки минг эллик сўм туради!

Унда, катталар нима учун захар-заккум бутифос сеп, дейди?

Бутифос хом кўсакни омонлайди, магний хлорат хом кўсакни заволлайди!

Ё, эл-юрт, ё, кирим!

Катталар бот-бот кўсак очилишни ўйлади.

Катталар қайта-қайта пахта терилишни ўйлади.

Катталар қишгачайин пахта терилишни ўйлади!

Ё, эл-юрт, ё кирим!

Катталар киримни танлади!

13

Одам тонг сахарда ароқ ичса нима бўлади?

Одам пиёниста бўлади.

Далаларим-да ана шу одам мисол пиёниста бўлиб қолди.

Одам толтушда тамаки чекса нима бўлади?

Одам банги бўлади.

Далаларим-да ана шу одам мисол банги бўлиб қолди.

Одам намозшомда наша чекса нима бўлади?

Одам нашаванд бўлади.

Далаларим-да ана шу одам мисол нашаванд бўлиб қолди.

Энди, ана шу оғулар барини бир одам танавул этса нима булади?

Одам пушти куйиб кул бўлади. Одам насл-насабсиз бўлади.

Далаларим-да ана шу одамдай бўлиб қолди!

14

Баданда жон бор — қилмиш-қидирмиш бор.

Қилмиш-қидирмиш бор — жиноий модда бор.

Одам бирон иморатга зиён берса — фалон моддага биноан жавобгарликка тортилади. Одам бирон техникага зиён берса — фалон модда бўйича қаматилади. Одам бирорни урса — фалон моддага биноан кесилади.

Нима учун одам ерни захар дорилайди — аммо жавобгарликка тортилмайди?

Нима учун одам ерни захарлаб хўрлайди—аммо жавобгарликка тортилмайди?

Дунёда қўп-кўп эмиш-эмиш эшитдим. Аммо ер заҳарлаб жавобгар бўлибди, дегич эмиш эшитмадим.

Ер қариdi. Ер пушти куйиb заҳар-зақкум бўлди. Ер қўкси куйиb кул бўлди —ер тақdir пешонасидан кўриб ёта берди.

Ер ўз дардини айтайнин деди — ерда тил бўлмади.

15

Бозорни яхши кўраман!

Ноз-неъматлар товлана-тovлана турadi. Ширин-шакарлар боллана-боллана турadi. Аччиқ-чучуклар бўйлана-бўйлана турadi.

Ноз-неъматлардан кўзим тўяди. Ширин-шакарлардан кўнглим тўяди.

Бозорда еганим олдимда бўлади, емаганим кетимда бўлади!

Мен бозорда беҳиштда юрмишдай-беҳиштда юрмишдай бўламан.

Мен олмасам-да — нарх-навони сўраб-суриштираман.

Мен емасам-да — қирмизи олмани кафтиmdа салмоқлаб-салмоқлаб кўраман. Исқаб-исқаб кўраман.

Қирмизи олмадан кафтларим роҳатланади. Қирмизи олмадан димоғларим ҳузурланади.

Мен дунёда борлигимдан шукурланаман!

16

Аммо... бозорда бир айб бўлди.

Бозор айби... нарх-навоси ёмон бўлди! Ў-ў-ў, ёмон-ёмон бўлди!

Боботоғ пистаси ўн беш сўм бўлди. Вахшивор ёнғоғи тўққиз сўм бўлди. Дашибод анори беш сўм бўлди.

Тошдан қиммат-тошдан қиммат нарх-наво бўлди!

Нима бўлса бўлди — баридан бир килодан олдим.

Икки дона анор бир кило келди.

Мен анор салмоқлаб-анор салмоқлаб ўйладим: дастурхонга иккитағина анор қўйса бўлмайди. Катта меҳмонлар нозиктаъб бўлади. Ўл-е, бор-йўғи иккита анор қўйибди-е, дейди.

Шу боис, тағин бир кило анор олдим. Жами тўртта катта-катта анор бўлди.

Дастурхонда тўрт бурч бўлади. Ана шу тўрт бурчига биттадан тўртта анор қўяман.

Дастурхоним бинойидай-бинойидай дастурхон бўлади!

Мен анор пулинни санадим. Ич-ичимдан қиринди ўтди. Бармоқларим қалт-қалт этди.

Бир пул қарадим, бир анор қарадим — тўртовгина анор учун ўн сўм тўлагим келмади.

Қўлларим қалт-қалтини билинтиrmайин дея, анор пулинни қўшқўллаб ушладим. Анорчига қўшқўллаб узатдим.

Аммо анорчи билди — мийигида кулди.

— Дашибоди анор, пулингиз ўзингиз билан кетади, — деди.

— Яхши анорликка яхши анор...

Мен бир анор бир меҳнат кунига тушаяпти-да, дегим келди — деёлмадим. Анорчини олдида паст кетгим келмади.

— Дашибоди анорлиги учун олдим-да, — дедим. Анорчи қўлини қўйди.

— Қуллуқ, ош бўлсин! — деди.

Анорга мени оғзим тегармиди? Теккан билан анор ош бўлармиди?..

Шунда, қишлоқдошимиз Қаюм қоровул келиб қолди.

— Қани, Дехқонқул, бозорлабсан-да? — деди.

— Ҳа, тирикчилик.

Қаюм қоровул бир түрхалта бозорлигимга сер солди. Хиёл күз олайтди. Бир менга қаради, бир бозорлигимга қаради.

— Тинчликми, Дехқонқул? — деди.

— Тинчлик, осойишталик.

— Мабодо кайфинг йўқми?

— Умримда оғзимга олмаганман, Қаюм ака. Нима эди?

— Бозорлигингни кўриб айтаман-да. Кайфи йўқ одам ҳам шундай бозорлик қиласадими?

— Дастурхонни ободи-да, Қаюм ака.

— Дастурхон ободи учун ол, эви билан ол-да. Бундайин бозорлик учун мендайнин дехқон бир ой терлайди!

— Ўзимдайин дехқон-да шу, Қаюм ака, ўзимиздайин дехқон-да шу.

— Манави пистами? Ўн беш сўм-а? Ё, пирам-е, ё, пирам-е! Нарх-навони Худо урмади — мен кутулмадим! Ҳали шу яқинда писта чаққанимни эслай олмайман. Шу қишидаги бир тўйда беш-олтита чақиб эдимми, билмайман.

— Сиз шу қишида чақибсиз экан, мен қачон писта чаққанимни билмайман. Энди, меҳмон атойи худо, Қаюм ака. Ўзбакчилик — ўзбакчилик.

— Ўлма! Шу гапдан қолма, Дехқонқул, кам бўлмайсан!

— Шу теваракни меҳмони бўлса гўрга эди. Московдан меҳмон келаяпти, Московдан. Бари нозик меҳмон. Раисимиз айтди.

— Меҳмон келган уйдан барака аримайди, Дехқонқул, барака аримайди. Меҳмон ризқи ўзидан олдин келади, дейди. Московчи меҳмон бўлса, унда, бундай қил: бозорга хурмо кирибди. Ҳай, анави ерда сотаяпти, ҳайла!

— Қани-қани?

— Ҳайла-ҳайла, қозоншляпа савдолашаяпти. Ана шу хурмодан бир-икки кило ол. Москов ёкларда хурмо ўсмайди. Меҳмон ош деб келмайди. Меҳмон меҳмон-да — ҳавасаки ейди-да.

Қаюм қоровул айтмиш қатор-қатор хурмолар олдила бордим.

— Хурмо қанчадан бўлди? — дедим.

— Уч сўмдан, — деди. Хурмоларни ушлаб-ушлаб кўрдим.

— Хурмо қаерники? — дедим.

— Субтропикники, — деди.

— Суптропикникидан бир кило тортинг қани. Субтропик боғ шундай олдимизда.

Даламиздан йигирма чақирим келади,

Бозор дарвоза олдидан икки чўнтақ майдаписта олдим.

17

Тўлиб-тошиб уй келдим. Бозорлигимни ошхона қўйдим. Болалар бозорлик ёпирилди. Болалар бозорлик гирдини олди.

— Олма, ота, олма!

— Ота, анор беринг!

— Узум беринг, узум!

Бирови олмага қўл узатди. Бирови анорга қўл узатди. Бирови узумга қўл узатди.

Болаларни қўлинни уриб-уриб ташладим.

— Торт қўлингни, торт! — дедим.

Болалар кетига қўл бекитди. Болалар қўлтиғига қўл тиқди. Болалар оғзига қўл солди.

Болалар мўлт-мўлт қаради. Болалар илтижо-илтижо қаради.

Мен бошим билан бозорликка имо бердим.

— Буларни еб бўлмайди, қ-ҳа! — дедим. — Ҳа, қ-ҳа, қ-ҳа!
Мен афт буриштиридим. Мен бош сарак-сарак этдим.
— Ични оғритади, қ-ҳа! Ични кеткизади, қ-ҳа! — дедим. — Қара, пух-е, сассик узум экан,
пух-е!
— Менга нима олиб келдингиз, ота?
— Сенгами, сенга бир нима олиб келдим! Қани, қўлингни бер. Ана, кўрдингми?
Бир-иккита майдаписта чақиб кўрсатдим.
— Ана шундай чақ! — дедим. — Қирсиллатиб-қирсиллатиб чақ, тишинг бақувват бўлади!
Қани, баринг қўлингни тут!
Болаларга майдаписта бўлиб бердим.
— Ана энди, бориб ўйнанглар! — дедим. — Боринглар!
Болалар тарқалди.
Фақат Қулмат ўғлимиз қолди.
Камбағалга кет, деёлмадим — қўнглим бормади.
Қамбағал Қулмат — дардман!
Дўхтир кўриб, витамин етишмайди, деди. Бир даста дори битиб берди.
Денов дорихонасидагилар битикларни кўрди-кўрди — биттасиям йўқ, лекин бўп туради,
тез-тез хабар олиб туришинг, деди.
Мен айтдим: витамин ғўза эдимики — тез-тез хабар олиб тураман, дедим.
Тағин қайтиб бормадим.
Дардманд Қулматимиз ингиллади:
— Ота, помидор беринг! — деди.
Мен ҳайронландим — тўрхалтада помидор йўқ бўлди.
— Помидор? Қани помидор? — дедим. Қулматимиз қўли билан хурмони кўрсатди. Э,
тавба-е, ўғлимиз хурмони танимади!
Э, тавбангдан-е, ўғлимиз хурмони таниёлмади! Мен палағдароқ бир хурмо олиб бердим.
— Ма, бу помидор эмас, — дедим. — Бу хурмо, ха, хурмо!
Деразадан Денов тарафни кўрсатдим.
— Ҳай, анави қуюқ дараҳтзор бор-ку, ана шу субтропик боғ, — дедим. — Субтропик боғда
хурмо ўсади, бизни далада ғўза ўсади!
Ошхона занжирлаб ташқариладим.
Оғилхона айланиб қарадим.
Ўзи, бисотимда учовгина қўйим бўлди. Иккови совлик бўлди. Бирови сўйиб сотиш учун
боқилиб ётмиш қўй бўлди.
Ана шу қўй масковчиларга насиб этажак бўлди.
Мен масковчи меҳмонларга сўйилажак қўйимни қарадим. Думбасини чанглаб-чанглаб
қарадим.
Қўйим ориқ бўлди, сўйишга арзигич гўшт қилмагич бўлди.

Оғилхона олдида кафтилни пешонам соябонлаб кун қарадим.
Шунда, ошхона деразасидан бир нима лип этиб тушди.
Ё, қофоз, ё, латта учиб тушди, дея ўйладим.
Лип этиб тушмиш нима чолиб кетди.
Мушук бўлса керак-ов дея, тикилиб-тикилиб қарадим: Нодир ўғлимиз пириллаб чопиб
бораяпти. Билдим— ошхонадан бир нима олиб қочди.
— Ў-ӯ-ӯ, қайт! — дея бақирдим.

Нодир ўғлимиз қайтмади. Қуюндей-қуюндей чопди.

Мен изидан қувиб кетдим.

Бола бола-да — дарров ҳолдан тойиб қолди.

Мен етиб олиб елкасидан ушладим.

Ўғлимиз елкасини силкиб олиб чопаман дея, бети билан йиқилиб тушди. Тупроқда юзтубан ётиб олди.

Ўғлимиз бир нимани бағрига босиб йиғлади. Оёқларини типирчилатиб йиғлади. Ер тепиниб йиғлади.

Тупроқ чангиб-чангид қолди.

Ўғлимиз йиғлай-йиғлай — охири ҳолдан тойди. Ўпкасини босолмай ҳиқ-ҳиқ нафас олди.

Ўғлимиз қалт-қалт этди. Елкалари пир-пир учди. Боши сарак-сарак бўлди.

Бола кўрқди!

Кўзини оҳиста очди.

— Тур, уйга юр, — дедим.

Ўғлимиз ингиллади. Кўзини тағин юмди. Юзини ер қўйди.

Ўғлимизни бир ёнига ағдардим. Нима экан дея, бағрига қарадим.

Ўғлимизни бағрида икки дона хурмо бўлди.

Ўғлимиз хурмоларни тағин-да бағир босди. Ер тепиб-ер тепиб йиғлади.

— Бермайман, йўқ, бермайман! — деди. Ўғлимизни даст кўтариб қўлтиқлаб олдим. Ўғлимиз қўлтиғимда тепкилаб йиғлади. Билакларимни тишлаб йиғлади.

Ёш болани тиши ёмон-да — билакларим ачишиб оғриди.

Бир амаллаб ичкари олиб кирдим. Оғзига тарс эткизиб бир урдим.

Жони ёмон-ёмон оғриди шекилли — оғзини ушлаб-ушлаб йиғлади.

Ана шунда хурмолар ер тушди. Хурмолар юмалаб-юмалаб жўнади.

Мен хурмоларни ушлаб-ушлаб келдим.

Ҳамсоя-қўлларникидан онамиз келди. Оғзини ушлаб ётмиш ўғлимизни ердан кўтариб олди.

Шунда, ўғлимизни оғзи бурнида қип-қизил қон кўрдим.

Онамиз ўғлимизни ер энкайтириди. Кафти билан оғзи бурнини артди.

— Ҳа, қўлинг синсин-а, шугина норасидани урган қўлгинанг синсин-а! — деди.

Онамиз теварак аланглади. Тандир олдида ётмиш темир косовни олиб отди.

Мен энкайиб қолдим — косов устимдан ўтиб кетди.

Онамиз ердан бир сиким тупроқ олди. Ўғлимизни оғзи бурнини артди. Дока рўмоли учидан йиритиш олди. Йиритишни юмалоқлаб ўғлимизни бурнига тиқди.

— Бола сенга нима қилди-а, норасида бола сенга нима қилди-а? — деди.

Мен қўлнимдаги хурмоларни кўрсатдим.

— Манавини қаранг, шуни олиб қочди! — дедим.

— Шугина учун норасида болани оғзи бурнини қон қиласанми, ерпарчин бўлгур?

— Ўйнаб қўяй шугинадан, шугинани килоси уч сўм туради!

— Шу икковгина хурмога-я? Ҳа, қирчинингдан қийилгин, қирчингинаңдан қийилгин!

— Икковгина бўлган билан салкам бир кило келади!

— Бир кило келса нима бўпти? Ҳа, хурмоларинг бошингдан қолсин, бошгинангдан қолсин!

— Эртага меҳмон келса, олдига нима қўяман? Бирорини буниси еса, бирорини униси еса, меҳмонлар нимани ейди?

— Нима, меҳмонлардан хурмо қарзинг борми, ер-чилим бўлгур?

— Қарзим йўқ, эна, қарзим йўқ. Лекин меҳмон атойи Худо-да. Меҳмон отадан улуг-да.

Меҳмонлар олдида ким деган одам бўламиш?

— Унда, мўлроқ ол эди...

— Хурмони пулга беради. Энам айтди деган билан бермайди.

— Бола бола-да, күнгли кетади...

— Катта меҳмонлар инсофли бўлади, эна. Назари тўқ одамлар бўлади. Барини еб қўймайди! Даастурхонда қолдиради! Меҳмонлардан қолса — болалар ейди-да!

Гапим маъқул бўлди шекилли — онамиз ўғлимизни ичкари етаклаб кетди.

Мен хурмоларни енгим билан артиб-артиб олдим. Жойига олиб бориб қўйдим.

Жовуз доналарига қараб ўтириб-ўтириб... оғзимни суви қочди! Беихтиёр қўл узатдим.

Узумдан беш-олти дона олсам — узумбош лош-лош бўлиб қолади. Узумбош чумчук чўқилаб ташламишдай-чумчуқ чўқилаб ташламишдай бўлиб қолади.

Оқибат — меҳмонлар олдига қўяр ҳоли қолмайди.

Мен узумдан қўл тортдим.

Ошхонани ташқаридан қулфладим.

Очиқ деразадан ичкари мўраладим.

Ўғлимиз уйқуда бўлди. Бурунлари тиқиғлиқ оппоқ дока қип-қизил бўлди.

Ўғлимиз оғзини каппа-каппа очиб энтиқди. Бир чапи ўнгарилди, бир ўнги ўнгарилди. Кўрпасини тепкилаб-тепкилаб туширди.

— Хурмо, ота, хурмо!.. — дея уйқусиради.

19

— Шу... меҳмонлар неча киши ўзи, раис бова? — дедим.

— Ҳозир санаймиз-да. Битта режиссёр, иккита оператор, битта комментатор. Жами бир машина. Аммо одатимизни биласиз: юқоридан бир машина катта келса, пастдан икки машина катта ҳамроҳ бўлиб келади.

— Ўйнаб қўяй, меҳмондан, ўйнаб қўяй. Масаласи осон экан. Шу... бозордан қўй гўшт олсам бўлмайдими, раис бова?

— Ажаб одамсиз-да, Дехқонқул ака. Киночилар бизни олдимизга очидан ўлиб келаётгани йўқ. Меҳмон ош деб келмайди. Қўй обрўй-да. Кимсан — катта бир хўжаликни машъал бригадири! Семизликни қўй кўтаради, Дехқонқул ака.

— Чин — қўй кўтаради. Чин — мен кўтараман.

— Сиз ҳам семизликни кўтaring-да.

— Кўтараман, раис бова, кўтараман. Семизликни—қўй кўтаради. Семизликни — мен кўтараман.

— Ҳа, бали! Қўй нима деган гап?

— Чин, қўй қўй-да. Шу, болаларни қишга уст-боши йўқ эди, раис бова. Борлари-да йиртиқ-ямоқ эди. Шу қўйни боқиб-боқиб, болаларга уст-бош олиб берсам деб эдим. Қўйда ҳали сўйгулик ҳол йўқ.

— Майли, майли! Қўй сўйилди оти бор, қўй сўйилди! Болаларга уст-бошни эса... давлат пахта терим учун мана-мана пул бераман, деяпти. Ана шундан олиб берасиз.

— Майли, раис бова, майли. Қўй бўлса қўй-да.

— Ҳа, яшанг! Ким айтади сизни ўзбак деб? Ўзбак ўзи емайди, ўзи ичмайди — бор топганини меҳмони олдига қўяди!

— Майли, қўй бўлса қўй-да, майли.

— Авлод-аждодлар... урф-одатлар... ўзбакчилик... дегандай. Ўзбакни қониқиб меҳмон кутгани — подшо бўлгани!

— Хўп, раис бова, хўп.

— Кино бўласиз, кино! Тарихда қоласиз, тарихда!

— Тавба қилдим, раис бова, тавба қилдим.

— Ўзбакни қониқиб меҳмон кутгани — подшо бўлгани! Бир подшо бўлинг, Дехқонқул ака!

— Шундай бўлайин, раис бова, шундай бўлайин!

20

Норбой чавандоз отини олиб келди. Ҳовлимиз юзаси арқонлаб кетди.

Чори магазин мудир «Волга» машинасини олиб келди. Бўсағамиз қўйиб кетди.

Онамиз сув сепа ҳовли супурди.

— Энди... болаларни уст-бошини қайтасан? — деди.

— Давлат пахта терим учун ана-ана пул берарман эмиш. Шу пулни оламан-у, уст-бош учун Денов чопаман.

— Шу, каллапойча қилайин қўйни эртароқ пулла, дедим...

— Қўя беринг, эна, қўя беринг. Бу кунлар ўтади-кетади — кино бўлганимиз ёнимизга қолади!

Онамиз мол-холни кўз кўринарли ер қантарди.

— Уямас-да-буямас — тақдир-пешона! — деди.

— Эб-е, тақдир-пешонамизга нима қилибди, эб-е? Мана, кино бўлиб тарихда қолаяпмиз! Бу кунлар ўтади-кетади — тарихда қолганимиз ёнимизга қолади!

— Қарғиш урган одамни пешонаси ана шундай бўлади.

— Энани қарғиши болага урмайди. Эна, энани қарғиши болага урмайди. Оғзингизни тўлдириб қарғай беринг — барibir қарғишингиз менга ўтмайди!

Онамиз товуқлар кўз кўриниб донласин учун — сўри гирдилатиб дон сочди.

— Сени мен эмас — сени Худо қарғаган.

— Худо қарғаган? Эб-е, мен худога нима ёмонлик қилдим-е? Худо нима деб қарғаган-е?

— Худо, илойим, шу ўзбак дегични топгани азиз меҳмонига буюрсин, деб қарғаган!

21

Кун кўтарилди.

Дарвозамиз олдида узундан-узун автобус бел бўлди.

Автобусдан уч-тўртта бўзбола тушди.

Бўзболалар пахмоқсоch бўлди. Қора кўзойнакли бўлди. Соқолдор бўлди.

Бўзболалар дарвозамиз олдида аппарат жойлаштириди. Аппаратларини ҳовлимиз қаратди.

Остонада Идеология билан раисимиз қора берди.

Мен бор бисотимни кийиб пешвоз бордим.

Онамиз Сталин замонида теримчилиги учун олган кўйлагини кийиб пешвоз келди.

Мен улар билан қўл бериб кўришдим. Қучоғимни катта очиб:

— Қани, марҳамат, хуш келибсизлар! — дедим. Идеология билан раисимиз эгилиб-эгилиб кўришди. Тантанавор-тантанавор кўришди.

Аппаратлар шир-шир сурат олиб турди.

Мен меҳмонларни эргаштиридим. Бутун ҳовли юзини кўз-кўз этдим.

Сўри олдида оёқ илдим. Куллимсидим. Қўлимни кўксим қўйдим. Меҳмонларга тавозе этдим.

Микрофон судраб юрмиш жингаласоч бўзбола ўртани олиб гап бошлади:

— Ўзбек хонадони! Бу сўзда олам-олам маъно бор! Ўзбек хонадони демак —«Волга» машина демакдир! Ўзбек хонадони демак — қорабайир от демакдир! Ўзбек хонадони демак — сурув-сурув қўй-қўзи демак, мол-бузоқ, етти хазинанинг бири демакдир! Шундай эмасми, раис бобо?

— Ҳа, — деди раисимиз, — хўжалигимизда уч мингдан зиёд хонадон бор! Ҳаммаси худди мана шу кўриб турганингиздай тўқ, фаровон хонадонлар! Хонадонларимизда етти хазинадан

тортиб машинагача — ҳамма-ҳамма нарса мұхайё!

— Дәхқонқул ақа, мана, сиз шу хонадон сохиби экансиз, ноүрин саволим учун ағв этасиз: иш вақтида нима қилиб ўтирибсиз?

— Соат эндигина саккыз ярим бўлди, — дедим. — Иш бошланишига ҳали ярим соат бор.

— Демак, ишларингиз тўққизда бошланар экан-да?

— Ҳа, ишимиз роппа-роса тўққизда бошланиб, роппа-роса олтида тамом бўлади.

— Демак, ҳозир...

— Ҳозир оила аъзоларимиз билан маданий ҳордиқ чиқариб ўтирибмиз.

— Далага бораверсак ҳам бўлар, боргунимизча иш вақти ҳам бўлиб қолар?

— Иш вақтига ҳали ярим соатча бор-у, майли, бир марта эртароқ борсак борибмиз-да!

Аппаратлар дарвозадан чиққунимизга қадар сурат олди.

22

Машиналар далалаб келди.

Онамиз қалб амри билан паҳтакорларга ёрдам бергич онахон бўлиб сурат тушар бўлди.

Режиссёр онамиз билан хўп ҳам кўп машқ олди.

Онамиз кўрак тергич онахон бўлиб йўл белида турди.

Жингаласоч чучуксўз-чучуксўз бўлди:

— Субҳидам!.. Оппоқ соchlари ўзига ярашған мунис онахон йўл бўйлаб келмоқда. Бўйнига этак боғлаб олган. Энгашиб, тупроқдан бир нималарни олади, пул-пуфлаб, хас-чўплардан, чанг-губорлардан тозалайди. Сўнг, онахонларга хос бир меҳрибонлик или этагига авайлабгина солади.

— Ассалому алайкум, онахон! Йўл бўлсин, онахон?

Мунис онахон она ердан, она тупроқдан бир дам бўлса-да, кўзларини узмади. Етмишни қоралаган, аммо ҷарчаш нималигини билмаган қадди-қоматини кўтарди. Енги или юзларидаги ҳалол меҳнат терини артди. Меҳнат гаштидан теваракка завқ или боқди. Мунис кўзлари порлади.

— «Оқ олтин» тераяпман!

Мунис онахон ғурур ва фахр или шундай деди-да, яна йўлдаги трактор изларини титкилади, тупроқ ковлади.

— Онахон, исми шарифингиз, касб-корингиз? Онахон камтарлик или жавоб берди:

— Исми шарифим — Пахтахон! Пахтаой десангиз ҳам бўлади! Касб-корим — пахтакор!

— Пахтахон! Пахтакор! Мунис онахон бу гапи или ўзини жисман ҳам, исман ҳам — пахтаман, демоқчи! Нақадар доно ўхшатиш!

Пахтакор онахон жиддий бўлиб қўшиб кўйди:

— «Оқ олтин» нондек табаррукдир. Нон ушоғини ерда қолдирмаганимдек — бир тола «оқ олтин»ни ҳам ерда қолдирмайман!

23

Режиссёр ўнгён чўнтағимлаб «Правда» солди, чап-ён чўнтағимлаб «Совет Ўзбекистони» солди. Рўзнома номларини кўз кўринарли-кўз кўринарли этиб жойлади.

Режиссёр тап-тап елкам қоқди.

— Барра калла, барра калла! — деди. Елкамдан гуп-гуп чанг ўрлади. Елкамдан оппоқ-оппоқ чанг ўрлади.

Режиссёр афт бурди, режиссёр кафт билан чанг қувди.

— Фу, фу!.. — деди.

Режиссёр чанг қаердан ўрлади демишдай — бир ўнгимдан қаради, бир чапимдан қаради, бир ер қаради.

— Елкасидан чанг күтарили, елкасидан! — деди раисимиз қула-кула.

— Елка? — анграйди режиссёр.

— Ҳа, елка! — деди раисимиз. — Ер нима — дәхқон елкаси нима?

Режиссёр тағин елкам қоқди.

— Барра калла, барра калла! — деди. Режиссёр елкам қоқа-қоқа мени машина тараф жүнатди.

Мен йўл-йўлакай раисимиздан сўрадим:

— Раис бова, режиссёр нима деяпти?

— Баракалла деяпти, баракалла.

— Баракаллани шундай дейдими?

— Ҳа, энди... улар ВГИКда ўқиган-да, ВГИКда.

— Ўшанда шундай ўқитадими?

— Ҳа, энди... ВГИКни битирган-да, ВГИКни.

24

Мен дала бошида турмиш тўрт қаторли машинани эгат солдим. Режиссёрга қаратиб ҳайдадим. Аппаратлар мен тараф пешланди.

— Дўстлар! — дея пешвоз юрди Жингаласоч. — Келинг, аввало ўтмишга бир саёҳат қиласайлик!

Жингаласоч шундай дея, бир оппоқ чаноқ узиб олди. Пешонаси узра кўз-кўз этди. Чаноқ тикилиб-чаноқ тикилиб ваъз айтди:

— Пахта! Пахта мальволар оиласига мансуб бўлиб, госси пиумлар аждодидандир! Госси пиум — лотинча сўз бўлиб, пахта берувчи дараҳт демақдир! 1670 йилда подшо Алексей Михайловичнинг буйругига биноан Москва шаҳрида ҳам пахта экилди. Уни сарой боғбони Аносов экди. Москвада Измайлор маданият ва истироҳат боғи бор. Ана шу хушманзара ерда пахта даласи барпо бўлди. Измайлор даласи яхши ҳосил берди! Мамлакатимизнинг Одесса ва Херсон ўлкаларида ҳам Америка «си-айленд» пахтаси экилди. Ҳосилдор пахта бўлди. У ерликлар пахтани бир териб олди. Уч кундан кейин... тағин очилиб турди! Куз охирлагунича очилди! Охири — у ерлик маҳаллий халқ пахтадан кечишга қарор қилди. Бизга ҳосилини бир териб оладиган ўсимлик керак, дедилар. Ундан пахта эса йўқ эди! У ерликлар пахта машаққатига, пахта азобига... бардош беролмади! Аммо жафокаш ўзбек халқи, жафокаш ўзбек ери бардош берди! Ўзбек халқи, ўзбек тупроғи умрини пахтага бахшида этди. Қиши демади, ёз демади — пахта, деди. Тун демади, кун демади — пахта деди. Шундайми, Дехқонкул aka?

Жингаласоч микрофонини чўзди. Мен машинадан микрофон энкайдим.

— Ҳа, шундай, — дедим. — Бизнинг «пахтаой» пичагина нозиктаъб, бизнинг «оқ олтин» пичагина кўйдирмажон!

— Кечирасиз, ҳол-аҳвол ҳам сўрамабмиз, бу... иш қалай?

— Муваффакиятли!

— Иш шароитларингиз қалай?

— Қулай!

— Бўш вақтларингизда қандай дам олмоқдасиз?

— Кўнгилдагидай!

— Қанақа дам олмоқдасиз?

— Маданий!

— Иш жараёнида аҳён-аҳёнда учраб турадиган қийинчиликларни қандай енгмоқдасиз?

- Мардонавор!
 - Ҳали-ҳамон күзга ташланиб турадиган камчиликларни қандай бартараф этмоқдасиз?
 - Аёвсиз!
 - Бу йилги режаларингиз қандай?
 - Юксак!
 - Доно партиямиз белгилаб берган йўл-йўриқларга қандай амал қилмоқдасиз?
 - Оғишмай!
- Режиссёр чапак чалиб юборди.
- Браво, браво! — деди. — Вот, советский деҳқон!

25

Осмонда паға-паға оқ булут сузди.

Кун булут ортида қолди.

Далалар хира тортди.

Киночилар кун ангниди.

Жингаласоч Хурсандой билан Норгулойга «Пахта ишқи» дегич қўшиқ машқ эттирди.

Кун булутлар ортидан чиқиб келди.

Далалар кундай ёруғ бўлди.

Ўқариқ бўйида аёл-қизлар сафланди. Этак бойлаб терим шайланди.

Идеология аёл-қизларни бир-бир кўздан кечирди. Маъқул, дея бош ирғади.

Режиссёр беш-олти одим берида турди. Оёқ керди. Кўлларини бел тиради.

Режиссёр тишлари орасидан чирт-чирт тупурди. Тупуги ўзи билан теримчилар ўртаси бориб тушди.

Режиссёр бир ёнидан папирос олди, бир ёнидан гугурт олди. Теримчилардан кўз узмай папирос эзғилади. Чирсиллатиб гугурт чиқди. Бўйин қийшайтириб папирос тутатди. Гугуртчўпни елкаси оша отди.

Юрагим шувв этди.

Гугуртчўп тушмиш ер ҳадаҳалаб бордим. Гугурт-чўпни босиб-босиб ташладим.

«Катта, далада папирос чекмайди — пахта ўт олиб кетади», дейин-дейин дедим.

Бир Идеология қарадим, бир раисимиз қарадим.

Раис билан Идеология билиб-билимасликка олди.

Режиссёр бурқситиб-бурқситиб папирос тутатди.

Режиссёр тутунлар орасидан аёл-қизлар қаради. Папиросини лаби у бурчидан-бу бурчи суриб қаради. Лабларини дўрдайтириб-дўрдайтириб қаради.

Режиссёр мисоли кучук имламишдай — шаҳодат бармоғини ликиллата Жингаласоч чақириди.

Жингаласоч лик-лик эта келди. Режиссёр гирдида елпатак-елпатак бўлди.

Режиссёр кафтини кося этиб-этиб гапирди. Қўлини бигиз этиб-этиб гапирди, бармоғини пешонаси нуқиб-нуқиб гапирди.

Жингаласоч бош иргаб-бош иргаб эшитди. Бош иргай-иргай теримчилар олдилаб келди. Хурсандой билан Норгулойга бошдан-оёқ разм солди.

Теримчилар ийманиб ер қаради. Рўмоли учини қайирди. Рўмолини пешоналари сурди. Тер ялтирамиши бўйинлари билан ёриқ-ёриқ лабларини яшириди.

Теримчилар кўйлак этакларини тортиб-тортиб кўйди.

— Бўлмайди! — деди Жингаласоч. — Бу атлас бўлмайди!

— Яхши атлас-ку, —деди Идеология.

— Яхши, ёмон эмас, яхши! Аммо бу сариқ атлас-да. Сариқ атлас экранда сап-сариқ читга

ўхшаб кўринади. Чунки лентамиз рангли лента-да.

— Унда, қандай атлас яхши бўлади?

— Жуҳуди атлас яхши бўлади! Экранда турли рангда товланиб кўринади. Жуҳуди атлас ранг-бараг-да.

— Еврейский атласларингиз борми, Хурсандой ва Норгулой? — деди Идеология.

Теримчилар ердан кўз олмади. Калиши учи билан ер титкилади. Бош иргади — йўқ ишорасини билдириди.

— Ўзларида бўлмаса, бошқаларда бордир? — деди Жингаласоч. — Шундай катта колхозда жуҳуди атлас топилмайдими?

— Еврейский атлас топиш қийин. Бу атлас ҳам яхши-ку? — деди Идеология.

— Тўғри, яхши атлас. Аммо гап бошқа ёқда. Биласиз, фильмимиз Иттифоқча чиқади, Иттифоқча! Ундан чет элларга! Фильмимизни бутун жаҳон кўради, бутун жаҳон! Экранда сапсариқ чит кўйлакни кўрганлар нима дейди? Қаранглар, бечора ўзбек совет хотин-қизлари чит кўйлак кийиб пахта тераяпти, демайдими? Дейди! Ўзбек совет хотин-қизлари кийгани кийимга зор экан, демайдими? Дейди! Идеология афтодаҳол-афтодаҳол бўлди.

— Виноват, виноват... — деди.

— Ахир, чет элларда Боймирза Ҳайит, Вали Қаюмхон, Булоқбоши каби буржуа-мафкуравий душманларимиз қадамилизни санаб юрибди! Буржуа-мафкурачиларимиз экранда чит кўйлак кийган ўзбек совет хотин-қизларини кўрса нима дейди? Совет Ўзбекистони оч-юпун, демайдими? Дейди! Ана, ўзбек совет хотин-қизлари чит кўйлак кийиб пахта термоқда, демайдими? Дейди!

Идеология бенаво-бенаво бўлди.

— Биз... атлас... — дея ғулдур-ғулдур этди. — Биз еврейский атлас деганда — ўзбек хотин-қизларини тушунамиз, ўзбек хотин-қизлари деганда — еврейский атласни тушунамиз!..

Раисимиз Идеология жонига ора кирди.

— Мунча теримчига жуҳуди атласни қаердан топамиз? — деди раисимиз.

— Ҳаммасига эмас, — деди Жингаласоч. — Мана шу икковига бўлса бўлади. Шу иккови иирик планда кўринади! Қолганлари шунчаки — фонда кўринади!

— Ҳа-а, иккита денг, иккита топилади, — деди раисимиз. — Қани Хурсандой, Норгулой, буёққа юринглар, қани. Холиқул, машинани ўт олдир!

Раисимиз Хурсандой билан Норгулойни машинасига миндириди. Пичир-пичир тайинлади.

— Зув этиб бориб-зув этиб келинглар! — дея эшик ёпди. — Раис айтди, десаларинг, бизни аёл ҳам, Чори мудирни аёли ҳам йўқ демайди!

26

Режиссёр тишлари орасидан чирт-чирт тупурди.

Режиссёр напиросини тутатиб бўлди. Папирос қолдигини чертиб ташлади.

Шундай чертди-шундай чертди — кўзим илашмай қолди! Папирос қаерга тушди — билолмай қолдим!

Шундай бўлса-да — папирос учмиш ёқ алағда бўлиб бордим. Эгат оралаб қарадим — тололмадим.

Кафтларимни тиззаларим тираб қаради — тутун пайқамадим. Ҳали ўчмагандир дея, ҳаво исқадим — хид олмадим.

Ғўзаларни бир-бир қарадим. Шохларини қайириб қарадим. Баргларини кўтариб қарадим. Папирос бир оппоқ чаноқда илашиб турди. Билин-билинмас тутаб турди.

Мен апил-тапил ғўза учидан силкидим — папирос эгат тушди.

Папиросни товоним билан эзғилаб-эзғилаб ташладим. Ер кўмиб-ер кўмиб ташладим.

Ана шунда кўнглим жонлашди.

27

Машина келди.

Хурсандой билан Норгулой жуҳуди атлас кийиб келди.

— Ана атлас, мана атлас! — деди Идеология. — Қалай, ўртоқ режиссёр?

Режиссёр бошмалдоқ наррайтириб кўрсатди. — Браво! — деди.

— Ана, ўзбек совет хотин-қизлари! — деди Идеология. — Ана энди буржуа-мафкурачиларимизни боплаймиз. Ана энди Боймирза Ҳайит, Вали Қаюмхонлар экранда ўзбек совет хотин-қизлари образини кўриб, оғзига урган итдай бўлиб қолади!

Режиссёр лабига бармоқ юритиб-бармоқ юритиб кўрсатди.

Теримчилар тушунмади.

— Лолаб деяпти, — деди раисимиз.

— Ҳа, яшанг, раис ака! Лолаб, лолаб! — деди Жингаласоч, — помидорранг бўлса, экранда яхши кўринади!

— Колхозимиз пири бадавлат колхоз! — деди раисимиз. — Лекин шу... лолаб йўғ-а!

— Лолаб минерал ўғит эмас, раис ака! Лолаб колхозда бўлмайди! — деди Жингаласоч. — Лолаб хотин-қизларда бўлади!

— Биламан, биламан, — деди раисимиз. — Колхозимизда лолаб қўйгич хотин-қизни ўзи йўқ-да?

— Бор, — деди Хурсандой. — Битта бор. Мактабда ўрис тили муаллими лолаб қўяди.

— Ана, бор экан-ку, раис ака? — Энди... мактаб бор эдими...

Раисимиз латтачайнар бўлди. Бир кун қаради, бир ер қаради.

Энди Идеология раисимиз жонига ора кирди.

Идеология сумкасидан бармоқдай бир нимани олди. Теримчиларни машина тараф имлади.

— Келинглар! — деди. Теримчилар машина пана бўлди.

— Хайрият-е! — дея кафт ишқади Жингаласоч. — Колхоз бўйича битта замонавий аёл бор экан!

— Уям райком... — минғиллади раисимиз.

28

Хурсандой биринчи эгатдан тушди, Норгулой иккинчи эгатдан тушди.

— Бўлди! — деди Жингаласоч. — йирик планда шу иккита теримчи бўлади. Уёғида ким қандай тушса тушаверсин — уёғи шунчаки фонда кўринади!

— Ўзиям, йирик-йирик кўрингулик теримчилар-да! — деди раисимиз. — Ҳар бирови мавсум охиригача саккиз тоннадан ошириб «оқ олтин» териш мажбуриятини олган!

— Машина бўл-е! — деди Жингаласоч. — Деярли машина!

— Буларни олдида машина нима деган гап! — деди раисимиз. — Машина бузилади, отказ қилади. Булар на бузилади, на отказ қилади!

Идеология иккита лўппи чаноқ узиб олди. Пуф-пуфлади. Силаб-сийлади. Норгулой билан Хурсандойни қулоқлари устига қистириб қўйди.

Идеология Норгулой билан Хурсандойни ўрим-ўрим сочини елкасидан олиб кўксига тушириб қўйди.

Идеология бошқа теримчиларга-да кўз-кўз этди.

— Сизлар ҳам ана шундай қилинглар! — деди. Бошқа теримчилар-да қулоқларига чаноқ тақди.

Бошқа теримчилар-да ўрим соchlарини кўксилари туширди.
Идеология Хурсандой қабатини олди.
Жингаласоч Норгулой қабатини олди.
Аппаратлар шир-шир сурат олиб бошлади.

29

— Она табиатимизда неча хил ранг бўлса, барча-барчаси пахтазорда мужассамдир! — деди Жингаласоч. — Ҳа, пахтазорда камалак рангларнинг жамики жилолари жамулжам! Пахтазорда хотин-қизларнинг пиёла жарангидек шўх кулгиси янграйди! Сўнг, лапарлар, асқиялар, кўшиқлар, эшиталади!

Жингаласоч Хурсандой билан Норгулойга микрофон тутди.
Хурсандой билан Норгулой юзларида табассум ўйнади. Тишларини оқини кўрсатиб жилмайди.

«Пахта ишқи» ашуласини айтиб-айтиб пахта терди:

Тун демай, кундуз демай, бошингда мен парвонаман,
Софиниб қолдим, очил, кулсин, севинсин ҳар томон...

— Ҳа, далада ҳуркак тоғ охусидек хотин-қизлар турнақатор бўлишиб пахта термоқда! Бири кўйиб бири қўшиқ айтади, бошқалари жўр бўлади:

Кўкдаги сайёralардек — очил, оппогим, чаман,
Кеч кириб то субҳидам ишцингда минг тўлғонаман...

— Стоп!

Режиссёр шундай дея, қўл кўтарди. Эгат оралаб келди.

— Хурсандай и Наргулай! — деди режиссёр. — Сизники пахтани севади? Севади! Сизники севги билан пахта теради? Теради! Бизники кино қиласди!

Режиссёр пахта териб-териб кўрсатди.

— Вот так, вот! — дея пахта терди. — Сизники вот так муҳаббат билан пахта теради?
Теради! Бизники Москвага байроқ қиласди!

Гап Жингаласочда кетди:

— Хурсандой ва Норгулой! — деди. — Пахтани чаноқдан суғуриб олаётганингизда ғўзаларга, айниқса чаноқларга ўзгача бир меҳр-муҳаббат билан қаранг! Ахир, сиз пахтани севасиз-ку! Шундайми? Пахтага ишқингиз тушган-ку! Тўғрими? Қўшиқнинг мазмуниям шу, номиям шу — «Пахта ишқи»!

Режиссёр тишлари орасидан чирт-чирт тупурди. Режиссёр папирос тутатди.

— Хурсандой! — деди Жингаласоч. — Хўжайнингизни севиб қолганингизда қандай қилиб муҳаббат изхор қилгансиз?

Хурсандой ер боқди. Хурсандой оғиз ушлаб-оғиз ушлаб уялди.

— Ундай деманг-е... — деди.

— Ия, ундай деманг бўптими? Тасаввур қиласман: хўжайнингизни юзларига севги тўла кўзларингиз билан боқсансиз... соchlарини муҳаббат билан силагансиз... қўлларини ўзгача бир меҳр-муҳаббат билан ушлагансиз... шундайми? Айтмаяпсиз — шундай! Пахтага ҳам ана шундай муносабатда бўлинг! Қаранг, мана бундай!

Жингаласоч пахта териб-териб кўрсатди:

— Пахтани чаноқдан мана бундай қилиб муҳаб-бат билан оласиз! Кейин — кафtingизда вафо билан мана бундай қилиб ушлайсиз! Ундан кейин — садоқат билан мана бундай қилиб

этакка соласиз!

Жингаласоч термиш пахтасини Хурсандойни этагига ташлади.

— Тушундингизми? — деди. — Нигоҳларингизда муҳаббат, вафо, садоқат балқиб турсин! Боқишиларингизда пахта ишқи барқ уриб турсин!

30

Аппаратлар шир-шир сурат олди.

Дала бошида турмиш агитмашина ашула айтди.

Теримчилар «Пахта ишқи»ни айта-айта пахта терди:

Кўк рўмолинг, оқ юзинг, бизларни шайдо айламиш,
Сен билан биз зскидан севги-муҳаббатдек таниш.

— Хотин-қизлар қўшиқ айтмоқда! — деди Жингаласоч. — Қўллари эса «оқ олтин»да! Ёзага бир эгилади, бир қаддини ростлайди! Чаноқлардан мени ол-ол, деб турган оппоқ пахталарни ўзгача бир чиройли ҳара-кат билан чаққонгина олади! Чангларини авайлаб-тинга пуфлаб қоқади, кўзига суртгудек бўлади! Мехр-муҳаббат билан силаб-сийпаб, кўкракларига тутилган этакка — қалбига солади! Қалби эса «оқ олтин»га тўлиб боради.

Нуқраи гул-гул жамолинг, бир ўпай, очил, кумуш!
Сен чиқиб Зухро каби — кулсанг ҳавасга конаман...

— Сахий қуз офтоби баҳтиёр ўзбек хотин-қизларининг баҳтиёр меҳнатларини табассум ила ёритиб туради. Баҳтиёр ўзбек хотин-қизлари... мана, район партия комитети идеология котибаси, район хотин-қизлар совети рансаси Клара Ходжаевнанинг қалб сўзлари:

— Бизнинг мамлакатимизда давлатни идора қилишга хотин-қизларни жалб этиш ленинча принципи оғишмай амалга оширилмоқда! — деди Идеология. — Чор Россиясида хотин-қизлар сайлов хуқуқидан фойдаланмас эдилар, Октябрь революцияси хотин-қизларнинг хуқуқсиз ахволини йўқотиб, уларга давлат, хўжалик, ижтимоий-сиёсий ва маданий ҳаётнинг барча соҳаларида зркаклар билан тенг хуқуқ бераб қўйди, капиталистик мамлакатларда бундай ахволни мутлақо кўрмайсиз, капитализмда хотин-қизлар ҳақ-хуқуқдан маҳрумдирлар! Агитмашина «меҳнат ва зафар қўшиклари»дан айтди:

Мунча ширин экан бу — Совет даврони
Мамнун яшар ҳар инсон — йўқдир армони.

— Кечирасиз, Клара Ходжаевна, гапингизни бўламан, Клара Ходжаевна! — деди Жингаласоч. — Мана, колхоз агитатори Жавлонбой аканинг агитмашинаси ялла айтмоқда, бу қандай ялла?

— Бу — «Баҳт ялласи»!

— Сиз район хотин-қизлари сардори сифатада баҳт деганда нимани тушунасиз?

— Мен баҳт деганда ўзбек хотин-қизларини тушунаман, ўзбек хотин-қизлари деганда баҳтни тушунаман!

Мунча ширин экан бу — Совет даврони
Мамнун яшар ҳар инсон — йўқдир армони.

— Ҳа, — деди Жингаласоч. — Шоирлар «Баҳтим бор деб эсади еллар», деб куйлаганидек, оппоқ далалар узра «Баҳт ялласи» янграмоқда! Далалар — уйғоқ! Далалар — ҳур-баҳтиёр!

— Ҳа, — деди Идеология. — Бахт — ўзбек хотин-қизларининг таржимаи ҳолига айланиб қолди!

Мунча ширин экан бу — Совет даврони
Мамнун яшар ҳар инсон — йўқдир армони.

31

Мен далаларимни машина терим учун шайладим.
Ўқариқ ҳаворладим.
Кўндаланг қулоқ ҳаворладим.
Ўнқир-чўнқир ҳаворладим.
Якка-ёлғиз бегона ўтларни юлиб-юлиб ташладим.
Эгилиб-эгилиб қолмиш ғўзаларим қаддини адл-адл ростладим.

32

Йўл бўйида ўсмиш ғўза куни қурсин!
Ўнгдан бир машина келди — йўлбўй ғўзаларимга гупиллатиб чанг уриб ўтди. Чапдан бир машина келди — йўлбўй ғўзаларимга гупиллатиб чанг уриб ўтди.

Майда-чуйда техникалар чангитиб ўтди. От-улоқлар чангитиб ўтди. Пиёдалар чангитиб ўтди.

Бари чанг йўлбўй ғўзаларимга гуп-гуп ёпишди. Чанг шудринг билан қорилди-қолди — ғўзаларимда чайирдай ёпишиб-ёпишиб қолди.

Йўлбўй ғўзаларим ерранг-ерранг бўлиб қолди. Йўлбўй ғўзаларим тупрокранг-тупрокранг бўлиб қолди.

Барг қайси бўлди, кўсак қайси бўлди, тола қайси бўлди — билиб бўлмай қолди.

Ғўзаларимни қоқиб-да бўлмади — ғўзаларим қирс-қирс синади, кўсакларим дув-дув тўкилади.

Аммо... чайир чанг тўкилмайди!

Чайир чангдан қутулишни бирдан-бир йўли бўлди: авж тушда ғўза бўшашиб қолади. Авж тушда ғўза шалпайиб қолади. Авж тушда тафтида чанг илла ғўза ёпишиб туради.

Авжи туш тафтида ғўзаларни силкаб-силкиб олса — чанг тўкилади.

Мен авжи туш тафтида йўлбўй ғўзаларим ораладим. Ғўзаларим учидан ушлаб қоқиб-қоқиб олдим. Ғўзаларим учидан ушлаб силкиб-айлкиб олдим.

Саккиз эгат йўлбўй ғўзамни ана шундай қоқиб-қоқиб олдим.

Йўлбўй ғўзаларим ғўзасинбат-ғўзасинбат бўлди.

33

Далаларимни келиндай-келиндай созладим.
Раисимиз далаларимни айланиб-ўргалиб қаради.
— Далаларингиз дала бўлмабди, далаларингиз ўнг ёқдаги келин бўлибди! — деди раисимиз.
— Дехқонкул ака, мен келин кўрди учун бир қўй айтдим! Эртага биринчи теримда сўясиз!

34

Далаларим чаман-чаман бўлди.

Чаманлар құзимни олайин-олайин, деди.

Мен тонглай-тонглай ана шү чаманларни териб-териб оламан.

Ғұзаларим озорланмасин учун машина билан ғилдирак олдига тұсқич ўрнатаман.

Ғұзаларим жуф-жуфт барабанлар оралиғидан кетма-кет ўтади. Барабанлар ғұзаларимни айланып-айланып қисади. Барабанлар ғұзаларимни қамраб-қамраб қисади. Урчуқлар тескари-тескари айланади. Урчук тишилари ана шу чаман-чаман пахталаримни ўзига ўраб-ўраб териб олади.

Бириңчи терим пахтамни ана шундай териб оламан!

Бириңчи терим пахтам аъло нав-аъло нав пахта бўлади. Эшимли-эшимли пахта бўлади. Бўлали-бўлали пахта бўлади. Момик-момик пахта бўлади. Яккачиғит-яккачиғит пахта бўлади. Хиёл сарғиши товлангич пахта бўлади.

35

Далаларим лўппи-лўппи бўлди.

Лўппи-лўппи момиқлар чаноқлардан тошайин-тошайин деди.

Урчуқлар айланади-айланади — ана шу лўппи-лўппи момиқларни илиб олгич чўткали барабанларга рўпарў бўлади. Барабанлар тескари тараф айланади-айланади — пахталаримни қабул гумбазхонаси улоктиради. Қабул гумбазхонаси шамолпаррак ёрдамида пахталаримни ҳаво билан сўради-сўради — ичковакдан машина пахтаидишига олиб бориб тўқади.

Иккинчи терим пахтамни ана шундай териб оламан!

Иккинчи терим пахтам бириңчи терим пахтамдан майдароқ бўлади. Тўлиқ пишиб етилмаган бўлади. Сийрак-сийрак пахта бўлади. Кам эшим-кам эшим пахта бўлади. Кам момик-кам момик пахта бўлади. Момик ич-таши тўлқин-тўлқин пахта бўлади. Оқ-сарғиши пахта бўлади. Сариқ-сариқ доғли пахта бўлади.

36

Мен адл-адл ғұзаларим пахтасини териб олиш учун барабанлар оралиғини кенг-кенг оламан.

Мен ўртабўй-ўртабўй ҳам калтабўй-калтабўй ғұзаларим пахтасини териб олиш учун барабанлар оралиғини тор-тор оламан.

Мен урчуқли барабанлар кетига ҳавоютгич мослама ўрнатиб пахта тераман.

Ҳавоютгич мослама ғұзаларим остилаб тушмиш пахталаримни сўриб-сўриб олади.

Ҳавоютгич мослама эгатлаб тўкилмиш пахталаримни ютиб-ютиб олади.

37

Учинчи терим пахтамни қўлда тераман.

Бир ҳисса қўл терим олтмиш кило бўлади.

Бир кило пахта териш учун икки юз эллик дона чаноқ тозалайман.

Олтмиш кило пахта териш учун ўн беш минг бор чаноқ эгилиб-чаноқ эгилиб тураман. Олтмиш кило пахта териш учун ўн беш минг бор ер энкайиб-ер энкайиб тураман.

Учинчи теримда осмон айниб қолади.

Ҳаво совиб-совиб олади.

Ёмғир савалаб-савалаб олади.

Учинчи терим пахтамни чала-чала очилмиш қўсақдан териб оламан.

Учинчи терим пахтамии тиржайиб-тиржайиб қолмиш қўсақдан териб оламан.

Шу боис, учинчи терим пахтам син-синбати қўсаксинбат-қўсаксинбат бўлади,

Учинчи терим пахтам об-ҳаво мисол хира-хираңг бўлади. Айнима осмон мисол тунд-тундранг бўлади.

Учинчи терим пахтам сап-сариқ доғли бўлади. Қўнғир-қўнғир доғли бўлади.

Учинчи терим пахтам чириманда-чириманда пахта бўлади. Эшимсиз-эшимсиз пахта бўлади. Гозсиз-гозсиз пахта бўлади.

Олти мисқоллик пахтам учинчи теримда уч мисқол бўлиб қолади!

38

Мен ана шунда олибсотар бўламан-қоламан!

Олибсотар ориқдан-ориқ қўй боқади. Олибсотар тозидан-този қўй боқади.

Эрта бозорда ана шу този қўй ошиғи устидан тешади.

Олибсотар ана шу тешикка оғиз қўйиб пуфлайди. Лунж шишириб-лунж шишириб пуфлайди. Чираниб-чираниб пуфлайди.

Қўй бир ўлиб тирилади. Қўй бир ўлимдан қолади.

Қўй бир кечада семиради. Қўй пуфланмиш шар мисол таранг бўлади.

Олибсотар аzonлаб қўйни бозор солади.

Молбозорда молжаллоб дегич кимса бўлади.

Молжаллоб учун кирим бўлса бўлди — бузокни хўкиз дея сотиб беради. Молжаллоб учун кирим бўлса бўлди—эчкини қўй дея пуллаб беради.

Ана шу молжаллоб қўйни мақтаб-мақтаб пуллаб беради.

Далаларим ана шу қўй бўлиб-бўлиб қолади!

Катталар ана шу молжаллоб бўлиб-бўлиб қолади!

Мен ана шу олибсотар бўлиб-бўлиб қоламан!

39

Тўртинчи теримда қор ёғади.

Ҳаводан қиш нафаси келади.

Кечалари ҳалқоб сувлар музлайди.

Далаларим билч-билч лой бўлади.

Мен шилт-шилт лой ботиб кўсак тераман.

Мен қунишиб-қунишиб кўсак тераман.

Мен қалт-қалтираб кўсак тераман.

Мен ҳовучларимга уфлаб-уфлаб кўсак тераман.

Кўсаклар тошдай-тошдай метин бўлади.

Кўсаклар муздай-муздай совуқ бўлади.

Тош-метин кўсаклардан кўлларим тилим-тилим бўлади.

Муз-муз кўсаклардан қўлларим йиринг-йиринг бўлади.

ТЎҚҚИЗИНЧИ БОБ

1

Ит bemavrid-bemavrid хурди.

Мен уйқумда эшитиб ётдим.

Ит жон-жаҳди билан хурди. Ит қаҳр билан хурди.

Уйкум қочди. Чопонимни елкам ташлаб ташқариладим.
Тун тошдай-тошдай зим-зиё бўлди.
Тимирскиландим-тимирскиландим — ташки чироқни ёқдим.
Ит хиёл забтидан тушди.
Мен дарвоза тарафладим.
Дарвоза одоб билан тик-тик этди. Дарвоза назокат билан тик-тик этди,
«Ким бўлса-да, ўзимиздан бўлмади, — дея ўйладим. — Ўзимиздан бўлса, тарақ-турук
уради».
— Ким у? — дедим.
— Биз идорадан келдик! — деди бир овоз. — Биринчи теримда сўйиш учун қўй олиб келдик!
Мен дарвоза зулфинига қўл узатдим.
— Ўйнаб қўяй, қўйларингдан! — дедим. — Ярим кечада қўйим нимам?
— Раис юборди, раис! Оча қолинг!
— Биринчи терим эртаматан бошланади. Эрта-матан олиб келардиларингиз-да?
— Энди, раис машъал бригадиримиз эрталаб шошиб қолмасин, деди-да. Оча қолинг,
қўйингизни ола қолинг!
— Ўйнаб қўяй, раисдан-да! — дея-дея дарвоза зулфинини олдим.
Шунда, учта одам забт билан ичкари ёпирилди. Бирори кўкрагимга тўппонча тиради.
Иккови ховлига автомат ўқталди.
— Қимирлама! — дея зуғум этди тўппончалик. — Қўлингни кўтар!
— Нима гап! — дея ҳанг-манг бўлдим.
— Қўлингни кўтар, деяпман!
Мен қўлларимни кўтариб-кўтариб турдим.
— Қўйини ковланглар! — деди тўппончалик. Автоматчилар қўйнимга қўл тиқиб-қўл тиқиб
кўрди. Чўнтакларимни босиб-босиб кўрди. Уятли-утли жойларимни ушлаб-ушлаб кўрди.
Ушламаган жойлари қолмади!
— Йўқ! — дея тўнғиллади автоматчи.
— Тўппончанг қаерда? — деди тўппончалик.
— Тўппонча? Қандайчикин тўппонча? — дея ҳайронландим.
— Кўп талмовсирама, сенларда пулемёт ҳам бор!
— Кетмонимдан бўлак балом йўқ! — дедим.
— Сенларда-я? Ҳали қўрамиз! Қани, ичкари бошла!
Автоматчилар елкамдан туртиб-туртиб ичкари ҳайдади.
Тўппончалик тўппончаси билан деразамизни зир-зир урди.
Ичкари чироқ ёнди.
Онамиз уй ўртасида серрайиб турди.
Болалар уйғониб қолди.
Болалар онамиз оёқларига осилди. Болалар уйқусираб-уйқусираб йифлади. Болалар
кўзларини ним очим-ним очиб йифлади.
Онамиз бир менга олазарак боқди, бир автоматчиларга олазарак боқди.
Бир автоматчи автомати қўндоғи билан онамизни туртиб юборди.
Онамиз кетилаб тисарилди-тисарилди — бурчак суюниб қолди.
Болалар онамиз гирдида гуж-гуж бўлиб олди.
Автоматчилар автомат қўндоғи билан сандик усти бўғжомаларни ағдариб-ағдариб ташлади.
Автоматчилар сандик қулф-зулфларйни суғуриб-суғуриб ташлади.
Бир сандикда аёлимиз раҳматликдан қолмиш кийим-кечак тахлоқлик бўлди.
Автоматчилар аёлимиз раҳматликдан қолмиш кийим-кечакларни автомат учи билан
илдириб-илдириб отди.

Автоматчилар аёлимиз раҳматлиқдан қолмиш кийим-кечакларни автомат учи билан силкиб-силкиб отди.

Автоматчилар аёлимиз раҳматлиқдан қолмиш кийим-кечакларни автомат учи билан қоқиб-қоқиб отди.

Автоматчилар аёлимиз лозимини отмади — мени бағримни отди!

Бағрим бир ўпирилиб тушди!

Шунда... аёлимиз лозими улоғидан чирок илашиб қолди. Аёлимиз лозими улоғидан чирок ёпиниб қолди.

Ана шунда уй-ич нимқоронги бўлди.

Тўппончалик лозимни олиб ташламоқ бўлиб қўл узатди. Тағин, бирдан қўл тортди.

— Т-фу!.. — дея лозим тупурди.

Тўппончалик аёлимиз лозимилаб тупурмади — мени бетимлаб тупурди! Бағрим икки ўпирилиб тушди!

Тўппончалик аёлимиз лозимини тўппонча учи билан олар бўлди. Бир тўппонча қаради, бир лозим қаради.

Тўппончасини лозим теккизишдан ҳазарланди!

Тўппонча билан онамизга ишора берди.

— Манавинингни олиб ташла! — деди.

Онамиз хадаҳа лозим олди. Лозим қўлтиқлаб бурчаклади.

— Илойим, шу қилғилиғинг ўзингга урсин, ўзингга бўлмаса, болангга урсин! — дея минг-минг қаргади.

Автоматчилар сандиқларни ағдариб-ағдариб қаради. Гилам остиларини босиб-босиб қаради. Дераза токчаларини тақ-тақ уриб қаради. Деворларни чертиб-чертиб қаради.

Уй-ич итирқин-итирқин бўлди!

Автоматчилар девор бош-адог қосовсимон аппарат югуртириб-югуртириб кўрди.

Автоматчилар ошхона титди. Автоматчилар омборхона титди.

Автоматчилар молхона титди.

Уй-таш итирқин-итирқин бўлди!

— Олтинларинг қаерда? — деди тўппончалик.

— Олтин? Қандай олтин?

— Аппаратимиз ёниб кўрсатмаяпти. Яхшиликча, ўзинг айт! Бўл-бўл!

— Ўйнаб қўйай, олтин зотидан, ўйнаб қўйай. Олтин тилла дўконда бўлади-да.

— Айтмайсанми? Ҳали, айтасан! Тўппончалик шундай дея, билакларимни жуфтлади. Шиқиллатиб кишан солди. Кишан жиловини билагидан ўраб олди. Дарвоза олдида турмиш машина тараф етаклади.

Ўғлимиз кетимдан овоз берди:

— Ота-а-а!

Тўппончалик мени машина имлади.

— Йўл бўлсин? — дедим.

— Энангни уйига!

Мен машина кира бермадим.

— Йўл бўлсин? Эртаматан биринчи терим бошланади? — дедим.

Автоматчилар мени итаргилаб-итаргилаб машина босди.

Машина ойнасидан уйимиз қарадим.

Онамиз уй бўсағада серрая-серрая қолди.

Болалар онамиз теварагида ғуж бўлиб-ғуж бўлиб олди.

Ўғлимиз тағин овоз берди:

— Ота-а-а!..

2

Машина зим-зиёда юрди-юрди — бир овлоқни манзили жалол этди.
Түппончалик мени етаклаб тушди. Ҳадаҳа билан бошқа бир машина солди.
Биринчи машинада қолмиш автоматчиларга тайнлади:
— Манави чап йўлдан ҳайданглар, — деди. — Мабодо мафия қувиб қолса, бор тезлик билан ҳайданглар!
Машинамиз ўнгга бурилиб жўнади. Биқинимда тўппонча қадалиб-қадалиб турди.
— Йўлда мафиянг дафъа қилиб қолса, манави оёқ остига ётиб ол! — деди тўппончалик. — Сен бизга тириклайн кераксан!
— У ким? — ҳайронланиб сўрадим.
— Ўзингни овсарликка олма! Биз барини биламиз!
Бир кўприк пойида тонг отиб қолди.
— Ёруғ бўп кетди-я! — деди тўппончалик. — Машина кўприк остига ол!
Тонг ёригандан-ёриди. «Ҳализамат биринчи терим бошланади», дея хаёлландим.
Машина кўприк остида оёқ илди.
— Ўзи, қаёққа кетаяпмиз? — дедим. — Ҳализамат теримчилар далалаб келади.
— Ўчир-ўчир!
Тўппончалик ойнадан ташқари аланглаб-аланглаб олди.
— Сурхондарёча машина рақамларинг бор-а? — деди ҳайдовчига. — Дарров рақамларингни алмаштири! Сурхондарёча рақам қўй!

Ҳайдовчи апил-тапил машина олд-кет рақамларини алмаштириб-алмаштириб олди. Машина тагин йўл равона бўлди. Машинадан тайёра пиллапоясила бўлди. Тайёра ердан оёқ олди.
— Худога шукур-е! — дея елкадан нафас олди тўппончалик. — Мафиянгга хам чап бердик!

3

Том — тош бўлди.
Девор — тош бўлди.
Ер — тош бўлди.
Тошлар заҳдан-зах бўлди!
Мен бурчакда чўнқайиб ўтира бердим. Пешонамни тиззаларим қўйиб ўтира бердим.
Димоғим бир ис туйди.
Ис димоғим учун ҳаминқадар қўланса бўлса... ҳаминқадар қадрдон-да бўлди.
Ис — бутифос иси бўлди!

4

Иккита аскар ўртасида бордим.
Кун кундузими ё кечами — билмадим.
Қорағилоф эшиқдан ичкариладим.
Тўрда ўтирмиш бароққош катта жойидан турди. Мен билан қўл бериб кўришди. Бош эгиб-бош эгиб муловзамат этди.
Бароққош катта жой лутф этди.
— Марҳамат, Дехқонқул Ақрабович, марҳамат! — деди.
Мен бароққош катта марҳамат этмиш жой чўқдим.
Бароққош катта ўз жойини олди. Бош иргаб-бош иргаб илжайди.

Бароққош катта бетимдан күз олмади — бир чапимдан қаради, бир ўнгимдан қаради.

— Күп қараб ётманг, — дедим. — Бетим пес эмас.

Бароққош катта тағин бош иргади.

— А?.. — деди. — Бўлади, ҳаётда шундай дард бўлади... Аммо юқумли саналмайди...

— Эллик даража жазирамада кетмон чопамиз, ана шундан, — дедим.

— Ия! — дея ҳайронланди бароққош. — Унда нега юзингиз бир текис қора эмас?

— Саратон маҳали далада күз очиб бўлмайди. Кўзимизни қисиб-қисиб кетмон чопа берамиз.

— Ҳа-а? Мен бошқа хаёлга борибман...

— Бари кўргилик кун билан кетмондан.

— Бўлди-бўлди, тушундим. Хў-ўш, унда, танишиб қўяйлик: мен Иван Иванович Иванов бўламан. «Ўзбеклар иши» билан шуғулланаман.

Тўрда баҳайбат пўлатсандиқ бўлди. Сандиқ узра супрадай қизил байроқ ёйилиб турди.

Бароққош боши узра ўртоқ Ленин кулиб-кулиб қараб турди,

Ўнг тарафда Дзержинский қаҳрланиб-қаҳрланиб қараб турди.

Бароққош сўрай берди — мен айта бердим. Айтувларим хатга туша берди.

Бароққош хат қараб хаёл суриб қолди.

— Энди бўлди-а? — дедим. — Ўзиям, етти пуштимгачайин сўраб олдингиз. Энди мен кетайин.

— Каёққа кетасиз?

— Каёққа бўларди — уйимга-да. Биринчи терим бошланди. Мен бўлса, буёқларда юрибман.

Аслида теримчиларга қўй сўйиб беришим лозим эди. Оғзига етар бўлади, оғзига етмас бўлади, сўқади-да. Ўл-а, машъал бригадир бўлмай, дейди-да. Гап раисимиз қулоғига етса, ундан-да ёмон.

Бароққош лаблари бурчида кулди.

— Жамолиддинов, Жамолиддинов! — дея кулди. — Дехқонқул Ақрабович, Дехқонқул Ақрабович! Раисингиз шу ерда!

— Шу ерда?

— Ҳа-да. Сиз билан бир тайёрада келди.

— Эб-е?.. Ўйнаб қўяй-ўйнаб қўяй, қаерда-қаерда?

— Сиз билан қабатма-қабат ётибди. Хў-ўш, қалай жойлашдингиз, маъқулми?

— Сиз биласиз-да, мен не билайн?

— Ишқилиб, озодагинами?

— Озода? Бутифос иси анқиб ётибди. Чидаб бўлмайди.

— Энди, чидайсиз-да, Дехқонқул Ақрабович. Биламан, бутифос ҳиди анқиб турди, биламан. У жойлар бир вақтлар заҳарли дорилар сакланадиган омборхона эди. У жойларга кириб бўлмас эди. Иложимиз қанча, «ўзбеклар иши» учун фойдаланаар бўлдик.

— Кимлар учун?

— «Ўзбеклар иши» учун. Заҳарли дори омборда ўзбекдан бошқа халқ чидай олмайди-да. Чунки ўзбек халқи йил ўн икки ой далада заҳарли дори сепиб ишлайди-да. Йил ўн икки ой заҳарли дори хидлаб яшайди-да. Шу сабабли ўзбек халқини заҳарли дори омборига жойлаштирилди. Чиниккан халқ-да, чиниккан.

Кундузлари захда ўтириб турдим.

Кечалари тошdevор тўнтариб қулфланмиш камбардан-камбар тахтани тушириб ётдим.

Бутифос иси димогим ботмади. Даламда ётмишдайин осойишта ёта бердим.

Дарвозани даранглатиб очмиш аскар бутифосдан афт бурди. Кафт билан оғиз-бурун ёпди.

Аскар боши билан чиқ, имосини берди.

Мен узун дахлиз бўйлаб йўл олдим.

Кетимдан келмиш аскар оғзи бурнидан кафтини олди. Бурчакда турмиш сатилга энкайди. Томоғини чанглаб-чанглаб ўқчиди.

— Ух, туф, ух! — дея ўқчиди. — Энам-ай, ай, энам-ай!..

— Ўрганиб кетасиз-ўрганиб кетасиз! — дея далда бердим.

Аскар аччиқ билан елкамдан туртди.

— Юр, сендан сўраяпманми, юр! — деди. Мен бир қалқиб йўл олдим.

6

Қорағилоф эшиқдан ичкариладим.

Иван Иванович қулогидан телефондаста олди.

Шаҳодат бармоғи билан жой буюрди.

Мен буюрилмиш жой чўқдим.

Иван Иванович пўлатсандиқдан бир жузгир олди. Жузгир вараклаб-вараклаб қаради.

— Дехқонкул Ақрабович, — деди. — Сиз порахўрлар билан ош-қатиқ бўлиб келдингиз. Сиз текинхўрлар билан олди-берди қилиб келдингиз. Бор айбингиз шу. Бу эса, айб саналмайди. Шу боис, мен бир-иккита савол бераман.. Сиз эса, саволларимга лўнда-лўнда жавоб берасиз — бўлди! Қанчалик ҳаққоний жавоб берасиз — шунчалик тез озод бўласиз! Келишдикми? Серкүёш Ўзбекистонда пахта хом ашёсини «оқ олтин» дейдилар-а? Ўзбек халқи ғоят зукко халқ — топиб айтади! Ана шу серкүёш Ўзбекистонда «оқ олтин» терими бошланди! Тез-тез жавоб берасиз — ана шу «оқ олтин» қўйнига етиб борасиз!

— Сўранг-сўранг, — дея бош ирғадим.

— Хў-ўш, биринчи сўров: ўртоқ Жамолиддинов, раисингизни олтинларини қаерга кўмиб эдингиз?

Ўйладим-ўйладим — ўйлаб ўйимга етолмадим.

— Ўйнаб қўяй, сўровингиздан, — дедим. — Қандайчикин олтинни айтаяпсиз?

— Қандайчикин бўларди — Мурунтов олтини-да.

— Олтин сариқ бўлади, деб эшитиб эдим. Аммо-лекин олтинни ўзини кўрганим йўқ.

— Мумкин, кўрмаган бўлишингиз мумкин. Чунки раисингиз олтинларни очиқча бермайдида. Раисингиз... манавиларни кўмиб ташла... деб бирор нима бериб эдими? Ана шуни қаерга кўмиб эдингиз?

— Ўйнаб қўяй-ўйнаб қўяй, раис қаерда — мен қаерда? Раис одам менга бир нима берармиди?

— Беради! Ўзидан холис яшириб саклаш учун беради! Ўртоқ Жамолиддинов, сиз ана шу олтин кўммангиз қаердалигини айтсангиз бўлди — сизга жавоб бериб юбораман!

— Менда олтин кўмма нима қиласди, катта?

— Олдин айтинг: раисингиз олтинларни сандиққа солиб бериб эдими ё бидонга солиб бериб эдими?

— Ўйнаб қўяй, гапларингиздан, ўйнаб қўяй. Бидонга олтин соладиларми? Бидонга сув соладилар!

Иван Иванович олдимга бир рўзнома олиб келди. Рўзнома номини кўз-кўз этди.

— Кўрајапсизми, ўртоқ Жамолиддинов? — деди. — «Собеседник» рўзномаси. Бутун дунё ўқыйди! Энди, «Собеседник» ичини қараймиз!

Иван Иванович рўзномани ёйди.

Рўзнома кўшалоқ бетида уюм-уюм олтин тангалар суврати бўлди. Уюм-уюм олтин узуклар билан олтин сирғалар суврати бўлди. Қат-қат юз сўмлик билан қат-қат эллик сўмликлар суврати

бўлди.

— Ў-ў-ў... — дея ҳушим бошимдан учди. — Булар қаерда, катта?

— Ўзбекистонда, Дехқонқул Ақрабович, серқуёш Ўзбекистонда! Мана, остида битиклариям бор: «Бухоро шаҳар саноат моллари савдоси идораеи бош-лиғи Шоди Қудратовдан тўрт яrim миллион сўмлик олтин пул топилди, Бухоро вилояти ички ишлар бошқармаси бошлиғи Музофаровдан бир миллион бир юз ўттиз бир минг... сўм пул, икки юз кирқ олти минг... сўмлик олтин буюмлар топилди»...

— Эбо-эй, эбо-эй... мунча нимани қандай қилиб топдиларингиз?

— Топамиз-да, Дехқонқул Ақрабович, топамиз-да! Ҳали сизнинг олтин кўммаларингизният топамиз. Мана, қандай қилиб топамиз.

Иван Иванович бармоғи билан рўзномадан олтин уюмлар остини нуқиди.

Нуқилмиш ерда бир ўра бўлди.

Ўра теварагида бешта бидон бўлди. Иккита бўз-бола ўрадан тагин бир бидонни арқон билан тортиб-тортиб олар бўлди.

Иван Иванович ана шу ўра бошида қоғоз-қалам ушлаб турар бўлди. Ўрадан бидон тортиб олишни назорат этиб тураг бўлди.

— Манави сиз-да? — дея бармоғим билан нуқидим.

— Мен, ким бўларди, мен. Дехқонқул Ақрабович, ана шу бидонлар тўла олтин! Энди айтинг, сизда ана шундай бидонлардан нечтаси бор?

— Бироргина бидонимиз бор! — дея, шаҳодат бармоғимни наррайтириб қўрсатдим. — Шу бироргина бидонимиз-да даранг-дурунг бўш ётади! Саратон чилласида шугина бидонимизни тўлдирайин деймиз — сув тополмаймиз! Ичгани сув тополмаймиз — олтинни қаердан топамиз?

— Сиз тушунмаяпсиз, Дехқонқул Ақрабович, тушунмаяпсиз. Мен сизни олтинларингиз бор, демаяпман. Мана шу бидонларни сиздайин дехқонлар уйидан топдим. Аслида улар Каримов, Дўстов... дегич пораҳўрларга тегишилдир! Ана энди тушундингизми? Сиз ана шундай олтин бидонларни қаерга кўмиб эдингиз — шуни айтасиз, бўлди!

— Айтаяпман-ку: бироргина бидонимиз бор — ичиди олтини тутул, суви йўқ!

— Айтаяпман, айтаяпман... Боринг, яхшилаб ўйланг! Марҳаматимни яхшилаб мушоҳада этинг. Мен сизга энг қулай йўлни марҳамат этаяпман. Эртароқ ўйлаб бўлсангиз — ўзингизга яхши бўлади!

Иван Иванович энкайди. Елкам оша узалди. Олдимда ёйилиб турмиш рўзномани олди.

— Пуф! — деди. — Сасиб кетибсиз-а! Нима бало...

— Ундай деманг, Иван Иванович, ундай деманг. Бу ис...

— Биламан, биламан. Бутифосда ана шундай ғариб-бенаво ётгандан кўра... дарров-дарров айтиб... қайдасан, серқуёш Ўзбекистон, дея жўнаб қолсангиз бўлмайдимя?

— Бутифос ўз оти ўзи билан бутифос-да. Бошқа жой бўлса яхши бўларди-да.

— Сиз тарихий бинода ётибсиз, Дехқонқул Ақрабович, тарихий бинода! Сиз ётган бино XVII асрда қурилган черков, ха, черков! Сиз зиндонда эмас, черковда ётибсиз. Шувелян ё Владикавказ зиндонларига тушганингизда кунингазни қўрардингиз! Биласизми, Шувелян зиндони ўз вақтида нима эди? Туяхона эди! Владикавказ зиндони эса оқпошшо лашкарлари отхонаси эди! У зиндонлардаги шарт-шароитлар ҳам ўз оти ўзи билан туялар ҳамда отлар учун мўлжаллангандир. Шундай экан, шукур қилинг, Дехқонқул Ақрабович, шукур қилинг. Сиз черковда ётибсиз, черковда!

Тагин қорағилоф эшиқдан ҳатладим.

— Қалай, Дехқонқул Ақрабович? — дея кўнгил сўради Иван Иванович.

— Бахарнав-баҳарнав...
— Яхши ўтирибсизми?
— Баҳарҳол-баҳарҳол...
— Хўш, ўйлаб бўлдингизми?
— Нимани ўйлаб бўламан?
— Демак... ўйламайсиз?
— Ўзи... нимани ўйлайин?
— Демак, бир-биримизга қараб ўтира берамиз?
— Ўтири, десангиз, ўтира бераман.

Иван Иванович жойидан турди. Деразадан ташқари қаради. Қўлларини чоловори чўнтағи тиқди.

Иван Иванович Ленин билан Дзержинский орасида бориб келди.
Бориб келди-бориб келди — бирдан айниди-қолди.
— Мен сени ўйлатаман! — деди. — Шундай ўйлатаман — Ўзбекистон файласуфи бўлиб ўйлайсан!

Иван Иванович тугма босди. Жон-жаҳди билан босди.
Аскарлар кириб келди.
— Манавини...
Иван Иванович гапни охирини имо-ишоралар билан айтди.
Аскарлар мени олдига солди. Даҳлизма-даҳлиз ҳайдади-ҳайдади — бир дарвозадан ичкари тепиб юборди.

8

Мен далбанглаб-далбанглаб бордим-бордим — зиндан киндигида серрайиб қолдим.
Теварак-бошимлаб аланг-жаланг бўлдим. Зиндандан ўлакса гўшт ҳиди анқиди.
— Хуш келибсан, Жамолиддинов, хуш келибсан! — дегич гангир-гунгур овоз эштилди.
Нимқоронғи бурчакдан иккита қора келди. Қоралар шундай бурним остилади. Қоралардан кўланса тер сасиди. Кўнглим айниди. Илла чидаб турдим. Қоралар бирин-кетин қўл берди.
— «Садист», — деди.
— «Сокол», — деди. Қоралар мени гир-гир айланди.
Қоралар олчоқ-олчоқ гир-гир бўлди. Қоралар ялтоқ-ялтоқ гир-гир бўлди.
— Муборак шарифларини биламиш: Жамолиддинов! Аммо исмларини билмаймиз?
Қоралар бурним остида қарс-қарс бармоқ ўйнатди.
Қоралар кафтларини қулоқлари елпана этди.
— Лаббай? — деди. — Исмларини эшитайлик?
Мен миқ этмай тура бердим.
— Айтмасанг, айтма! Айтмасанг, биз сени рамзий от билан атаймиз: чурбан, чурбан!
Бўладими?
— Менга қара, чурбан! Тилинг борми? Бўлса гапир?
— Гапир деяпман!
— Бу чурбан гапирмайди-ёв, «Сокол», кел, қўл тўпи ўйнаймиз.
«Садист» зиндан ўнг бурчини олди. «Сокол» зиндан чап бурчини олди.
— Бошладик!
«Садист» иягим остилатиб бир солди.
Мен кетим билан «Сокол» қошилаб гандираклаб-ганндираклаб бордим.
«Сокол» елкамдан қўшқуллаб ушлади. Ўзига ўгириб олди.
«Сокол»-да иягим остилатиб солди.

Мен кетим билан далбанглаб-далбанглаб «Садист» қўлига бориб тушдим.

«Садист» тағин «Сокол»га жўнатди.

Мен «Садист» билан «Сокол» оралиғида бориб кела бердим...

Охири ҳолдан тойдим.

Аро йўлда ўтириб қолдим. Жойимдан турайин, дея талпиндим.

Бўлмади — ўзимни тошдан ололмадим.

Бўлмади — чапим билан шилқ этиб тушдим...

Чап биқиним зир-зир зарб еди.

Зарбдан хиёл ўзимни олдим. Оҳиста-оҳиста теварак-бошим назар солдим.

Бошимда тик турмиш «Садист» билан «Сокол»ни кўрдим.

«Садист» этиги учи билан тағин чап биқиним тепиб-тепиб орди.

Чап биқиним ҳаминқадар зир-зир қақшади.

— Эй, чурбан, тур!

— Сени ким айтади — Ўзбекистон далалари лочини, деб!

— Сени ким айтади — олти миллион тонна пахта теради, деб!

9

Аскарлар суяб-суяб олиб борди.

Аскарлар ҳимо бериб-ҳимо бериб ўтиргизди.

Иван Иванович мени айланиб-айланиб қаради.

— Ҳай-ҳай-ҳай! — деди. — Машъал пахтакор ёмон йиқилибди-я! Қаерда йиқилдинг?

Кўзингга қарасанг бўлмайдими?

Мен муштимни чаккамга нуқиб-нуқиб олдим.

— Мени урдилар... — дея минғилладим.

— Урдилар? Ким урди?

— Ётқизиб тепдилар...

— Ётқизиб тепдилар? Ким тепди?

Иван Иванович тугма босиб аскар чақирди.

— Жамолиддинов олдига ким кирди? — деди Иван Иванович.

— Бирор ҳам кирмади! — деди аскар.

— Ана, ҳузурингга бирор ҳам кирмабди. Нега мени алдайсан?

— Улар ичкарида ўтирибдилар, — дедим.

— Э, ҳа, ичкарида де... Ичкаридагилар ҳам сендей бир зинданбандлар-да, Жамолиддинов.

Песнинг чекига мохов тушади, дейдилар. Сен энди келдинг, улар эса неча йилдан буён силласи куриб ётибди. Ўшаларга кучинг етмадими? Ким айтади сени — олти миллион тонна пахта тера оладиган азamat дехқон, деб?

Мен индамайин қолдим.

— Хўш, энди айтарсан, Жамолиддинов?

Мен миқ этмадим.

— Ҳар бандани бекитиқча топган-тутгани бўлади.

— Бўлади, шундай, бўлади.

— Ҳа, ана! Ҳар бандани бир ёмон кунимга ярайди деб бекитиб қўйган бисот-бойлиги бўлади...

— Бор, бизда-да бор.

— Ҳа, яша! Ана шуларни айт! Қани-қани?

Мен бармоқ юмиб санаб-бармоқ юмиб санаб айтдим:

— Оқтупроқ далам — бир, шўртупроқ далам — икки, қумлоқ далам — уч...

— Йўқ-йўқ, мен мол-дунё маъносида айтаяпман?
— Катта, дехқонда даладан бўлак мол-дунё пишириб ейдими? Дехқон давлати — ер!
— Чин, чин.
— Чин бўлса, чин-да. Дехқон давлати — ер-да! Мен дераза бет буриб олдим.
Мен мум тишладим.
Иван Иванович эжакилаб-эжакилаб сўради.
Мен мумдан-мум тишладим.
Иван Иванович қаради-қаради — тоқати тоқ бўлди. Вишш-вишш этди. Бет-бошимлаб тупурди.
— Онагар, баран... — дея вишиллади, Тупурикдан ароқ хиди келди.
Иван Иванович қулочкашлаб-кулочкашлаб чуйдам урди.
Мен зарбдан ағнаб тушдим.
— Йўқол, баран, йўқол!!
«Садист» билан «Сокол» орасида копток бўлиб бориб кела бердим-бориб кела бердим.

11

Мен ҳавода бармоқ юрдириб-бармоқ юрдириб олдим.
— Қоғоз-қалам беринг, — дедим.
— Қоғоз-қалам? — дея ажабланди Иван Иванович. — Қоғоз-қаламни нима қиласан?
— Ёзаман.
— Ёзасан? Кимга ёзасан?
— Прокурорга ёзаман.
— Мана, мен прокурор!
— Йўқ, Бош прокурорга ёзаман.
— Хўп, қоғоз-қалам бераман. Ёзувингни Бош прокурорга шахсан ўзим олиб бориб бераман.
Ундан кейин айтасанми?
Мен йўқ, дея қайта-қайта бош чайқадим.
— Мен ҳам одамман... — дея минғилладим. Иван Иванович пешонаси тиришди. Иван Иванович энсаси қотди.
— Ким-ким? — деди. — Одамсан? Сен-а? Сен — газандасан! Олтинга ҳирс қўйган газандасан! Ўзбеклар — олтинга ҳирс қўйган газандалар! Ана, ўзбеклар кимлар! Олтин — аввало илонларни ўзига ром қиласди. Илондан кейин, илонсифат халқни ўзига тортади. Илондай очкўз халқни ўзига ром қиласди. Илондай маккор халқни ўзига ром қиласди. Сен ўзбеклар ана шундай халқсан!

Иван Иванович олдида қалашиб-қалашиб ётмиш қоғозларни титди.
— Даволаримни далиллаб берайми? — деди. — Далиллайман, далиллайман! Мана, Каримов иши. Шу иш юзасидан бир гуруҳ терговчиларим билан Бухорони босдим. Қаерда илон бўлса — ўша ерга эътибор беринглар, дедим. Олдин, сендай бир баранни топдим. Баран отини Саид дер экан. Ана шу Саид баран бизни улкан бир қайрағоч олдига олиб борди. Саид баран ана шу қайрағоч остини ковламоқчи бўлди. Шунда, кум узра сени башарангдай бир ола-пес илон бўй берди! Илон вишиллади! Илон бўйини бўқоқ қиласди! Илон қоп-қора бошларини адл қиласди! Илон қонун посбонларини ўз домига тортиш учун шайланди! Аммо қонун посбонлари-да қараб турмади, ха, қараб турмади! Мен дарҳол билагимдай бир темир олдим. Илон бошларига боплаб бир солдим. Домтортар илон бошлари мажақ-мажақ бўлди! Ана шундан кейин Саид баран қайрағоч остини ковлади. Қайрағоч остидан олам-жаҳон олтин зеб-зийнатлар топилди! Ана — ўзбеклар кимлар! Ўзбеклар қонун посбонларига ана шу илон мисол қрп-қора бошларини кўтаради. Ўзбеклар ана шу илон кўзлари билан бокади! Ўзбеклар ана шу илон мисол виш-виш

этади! Ўзбеклар қонун посбонларини чақиб-чақиб олайин, дейди! Ўзбеклар қонун посбонларини домига тортиб-тортиб юборайин, дейди! Аммо биз — ўзбеклар бошини янчамиз! Ўзбеклар бошини ана шу илон бошларидај янчиб-янчиб ташлаймиз! Ўзбеклар бошини ана шу илон бошларидај мажақлаб-мажақлаб ташлаймиз!

Иван-Иванович юриб-юриб чекди.

Иван Иванович дераза олдиде туриб-туриб чекди.

Иван Иванович деразадан ташқари қараб-қараб чекди.

— Бўпти! — деди. — Мен сени одамбашара бўлармикинсан, деб эдим, бўлмадинг, Барандан ҳам ўтдинг! Эшакми, тўнғизми — шундай бир маҳлук бўлдинг!

— Гектаридан қирқ беш центнердан пахта бердим... — дея манқаландим.

— О-о, жавр бўпти-ку-а, жавр!

— Мени оҳимни-да эшитажаклар бордир... — дея манқаландим.

12

Оҳимни эшитажак одам тополмадим. Дардимни ютиб ётдим-ётдим — бир нимани пайқаб қолдим.

«Садист» эшик тешигидан оҳиста-оҳиста овоз берди:

— «Юла», «Юла»... — деди.

Бирор эшик ортидан келди. Тешикдан мўралади.

— Нима, нима? — деди.

— «Юла», қофоз-қалам олиб кел, — деди «Садист».

«Садист» «Юла»дан қофоз-қалам олди. «Садист» мактуб битди. Мактуб буклади. Мактуб хатжилдлади.

«Садист» хатжилдни «Юла»дан жўнатди. Мен-да тавалло этдим.

— Кимга ёзасан? — деди «Садист».

— Бола-бақраларимга-да?

— Болаларга бўлса, майли. Лекин мактуб пул билан бўлади, чурбан. «Юла» ҳар бир мактуб учун озодликдаги хеш-акраболаримиздан пул олади. Бўлмаса, «Юла» бир қадам ҳам босмайди. Москвада таниш-билишлардан борми? Айтмоқчи, сен чурбанда таниш нима қиласди. Майли, бир хайрия қиласман. Лекин бир шарт билан қиласман. Шартимни кейин айтаман. Келишдикми?

Мен майли-майли, дея бош иргадим.

«Садист», «Юла»дан қофоз-қалам олиб берди.

Мен кимга нома битишни ўйладим.

Бола-бақрага арз-дод этиб бўлмайди. Арз-дод этганим билан — бола-бақра қўлидан нима келади?

Зиндонбандни бор этгич-да прокурор бўлади, йўқ этгич-да прокурор бўлади. Аммо — прокурорга нома битиб бўлмайди.

Иван Иванович прокурор ўзимман... деди.

Шароф Рашидовни йўқлаб нома йўллайн дедим — Рашидов бобо оламда йўқ бўлди. У киши бор бўлсалар эди — Шароф ота, бандангни қутқар, дея нома битар эдим...

Ўртоқ Брежневга арз-дод этайин дедим — Брежнев-да йўқ бўлди.

Унда, дардимни кимга айтар бўлдим?

Ўйладим-ўйладим — ана шундай зотни топдим.

Тилим чиқмишдан буён исми шарифини ёдлаб-ёдлаб юрмиш зотни топдим.

Тилим чиқмишдан буён исми шарифини тилимдан-да, дилимдан-да қўймайин юрмиш зотни топдим.

Қўлларим қалт-қалт эта-эта битдим:

«Масковга. Кремлга. Ленин мавзолейига!

Үртоқ Ленин! Сиз бизнинг яккаю ягона панохимизсиз, халоскоримизсиз!

Үртоқ Ленин! Отамиз-да сиз, энамиз-да сиз, эмчакдошимиз-да сиз»...

Уйдан чиқмиш кечамдан ушбу кечамгачайин бўлмиш кечмишимни оқизмайин-томизмайин битдим.

Хатжилди тилим билан хўллаб-хўллаб ёпдим.

Номамни «Юла»дан узатдим.

«Бўлди! — дея хаёлландим. — Олдин озод бўлмасам-да, ана энди озод бўламан!»

13

— Сурхондарёдан хат-хабар келдими, ҳамشاҳар чурбан? — деди «Сокол».

Мен ҳайронландим. Ажаб-ажаб қарадим.

— Кўп оғзингни очма. Биз ҳам ўша ёқдан, — деди «Садист».

— Қаердан? — дедим.

— Мозори Шарифдан.

— Мозори Шарифдан? — дея ажабландим. — Мозори Шариф Афғонистонда эмасми, «Садист»бой?

— Нима фарки бор, чурбан. Амударё ўнг соҳили Сурхондарё, чап соҳили Афғонистон-да.

— Ҳайратондан ўтасан — афғон бўласан. Ҳайратондан қайтасан — ўзбек бўласан!

— Шундай, «Сокол»бой, шундай. Ҳайратон дегич кўприк бор.

— Бўпти-да, чурбан, бўпти-да. Биз Афғонистондан қайтишимизда ана шу Ҳайратондан ўтиб келдик.

— Афғонистонда нима қилиб юрибсизлар, «Садист»бой?

— Биз Афғонистонга байналминал бурчимизни адо этиш учун бориб эднк, чурбан.

— Брежнев бовамиз юбориб эди, дейсиз-да, «Сокол»бой?

— Афғонистонни босиб олиш Брежнев айби эмас, чурбан, Брежнев айби эмас. Брежнев ўлди-кетди. Энди бари Брежневни айблаяпти. Йўқ, Брежнев айбдор эмас. Тангрикут Пётр Биринчи! Тангрикут Пётр Биринчи бутун Осиёни Ўрустия вассали этиб олмоқчи эди. Шимол баҳримуҳити — Ҳинди баҳримуҳити — Тинч баҳримуҳити... Ана шу уч баҳримуҳит хилқати Ўрустия деб аталиши керак бўлади. Ўрустия салтанати ана шу уч баҳримуҳит хилқати аро ҳукмрон бўлиши керак бўлади. Шу мақсадда Пётр Биринчи 1716 йилда ғарандуқ Бекович-Черкасский сорбонлигига Хивага лашкар тортади. Аммо ғарандуқ лашкари Хива хони Шерғозихондан мағлуб бўлади. Ғарандуқ Бекович-Черкасский қатл этилади. Шу вақтда тангрикут Пётр Биринчи Ўрустия-Швеция урушида баён бўлади. Ғарандуқ тақдири билан иши бўлмайди. Аммо тангрикут Пётр Биринчи умри якунида иккита армон билан оламдан кўз юмади. Бир армони — Ўрустия-Пруссия урушида мағлуб бўлганлиги учун Туркиядан ўч ололмай армонда ўлади. Тағин бир армони — ғарандуқ Бекович-Черкасский қатли учун Хивадан ўч ололмай армонда ўлади. Ана шундан буён тангрикут Пётр Биринчи армони — Ўрустия салтанати армони бўлиб келади. Ана шундан буён тангрикут Пётр Биринчи армони — Улуг Ўрис армони бўлиб келади. Ана шундан буён Ўрустия пошшолари Пётр Биринчи тангрикут боболари дастуриламалини амалга ошириш пайида бўлади.

— Эҳ-е-е, Афғонистонда йиллаб қон кечдик, чурбан, йиллаб!

— Ўлим бизга писанд эмас эди, чурбан.

— Мана мен ўз қўлим билан «душман» жонини суғуриб олдим. Бир сув сотувчи «душман» бор эди, эсингдами, «Сокол»? Кўчада сув сотиб юрарди-ю? Ўшанга сувингдан бер, десам бермади. Ўзича, бир нималар, деди. Билдим — Шўроларни сўқди. Шўроларни сўқма, дедим-да, автомат қўндоғи билан бошига бир солдим. Бошидан тирқираб қон отилди. Қонлари юзларимга

сачради .«Душман» қонини лабларим билан ялаб-ялаб олдим. Бай-бай-бай, жануб қони шундай қайноқ бўлади, шундай қайноқ бўлади!..

Танамда қалтироқ қўзғалди. Бор эс-хушим жунбишга келди. Тилим қаловланиб-қаловланиб қолди.

— Мен... мен «душман» эмасман, — дедим. — Кўша-кўша орден-нишонларимиз бор. Уктабр ордени, Мехнат Қизил Байроқ ордени...

— Демак, лайча экансан-да, чурбан? Зиндонда орден-нишондорларни лайча, дейди.

— Лайчалардан зиндонбандлар жирканади, чурбан. Асло орден-нишондорман, дема — таёқ еб ўласан!

— Тавба қилдим, менда орден-нишон йўқ, тавба қилдим! — дея талвасада қолдим. — Орден-нишон теримчи энамизда бор.

— Барибир! Орден-нишон отини айта кўрма — ўлиб кетасан!

— Мана, мен — Шўро Иттифоқи Қаҳрамониман, ха, Шўро Иттифоқи Қаҳрамони! Ишонмаяпсанми? Ана, «Садист»дан сўра.

— Чин, «Сокол» Шўро Иттифоқи Қаҳрамони. Қандаҳорни биласан-а? «Сокол» ана шу Қандаҳорни кунпаякун этишда қатнашди. Қандаҳорни мисоли иккинчи Сталинград этди! Қандаҳорни кунпаякун этишда кўрсатган жасорати учун Шўро Иттифоқи Қаҳрамони бўлди.

— Ана, эшигдингми, чурбан? Мени Афғонда «Сокол» дейишар эди —«Сокол!»

— Куллук, «Сокол»бой, қуллук.

— Мен умримда чеккан эмас эдим, мен умримда ичган эмас эдим. Ана шу Афғонда ўрганиб келдим. Иттифоқка келсам — бариёқ қуп-қуруқ! Нимага бундай, дедим. Ичкиликка қарши кураш бошланди, деди. Бу аҳмоқчилик кимдан чиқди, дедим. Марказий Қўмита котиби Лигачёвдан, деди. Қаерда ўша Лигачёв — ҳозир бўғиб ўлдираман, дедим. Лигачёвга қўлинг етмайди — Лигачёв Кремлда, деди. Унда ароқдан бер — мен Афғонда қон кечиб келдим, дедим. Ароқ йўқ, деди. Бир шишагина ароқ қидириб шаҳар кездим! Барида шу гап бўлди! Мен ким, дайди ит ким — билиб бўлмади! Охири бир дўкончи ёқасидан олдим. Мен номи улуг, супраси куруқ Шўро Иттифоқи учун жон олиб, жон бердим — бир шишагина ароқ бер, дедим. Дўкончи мелиса чақирди. Иккита мишиқи мелиса келиб, қўлларимни қайирди. Таёқчаси билан калламга урди. Урма мени, дедим-да — бирорини ариққа отиб юбордим. Кейин билсам — ўлиб қолибди.

14

— Шу кўргиликларни кўришимни билсам эдим — Афғондан қайтиб келмас эдим. Афғон қириб юра берар эдим.

— Бўлмади — Горбачёв қайтариб келди. Горбачёв бўлмаса эди — «душман»ларни битта куймай қириб ташлар эдим.

— Кейин, Афғонистон ҳам ўзимизники бўлиб қолар эди.

— Ҳалиям ўзимизники. Ана, 1973 йилда Муҳаммад Довуд қўли билан Зоҳир Шоҳни таҳтдан кулатиб, икки юз йиллик Афғонистон шоҳлигига барҳам бердик. Муҳаммад Довуд гапимизга кирмай бериб эди — 1978 йилда бир кечада йўқ қилдик. Таҳтн Нурмуҳаммад Тараққийга олиб бердик!

— Ҳафизулла Амин гапимизга кирмай бериб эди — 1979 йилда ўлдириб юбордик! Таҳтга Бабрак Кармални олиб келиб қўйдик.

— Бабрак Кармал Масков ўтири деса ўтириди, тур деса — турмади. Аммо Кармални аядик. 1986 йилда Иттифоққа олиб келдик. Бир кулбага назарбанди этдик. Кармал худо бехабар назарбанди бўлиб ёта берди.

— Таҳтга Нажибуллони қўйдик, де.

— Нажибулло Масковга содиқ ишляяпти. Нажибулло вафодор лайча экан.

- Ўзи, Афғонистон ўн олтинчи жумхуриятимиз бўлиши керак эди.
- Бир ҳисобга ўн олтинчи жумхуриятимиз бўлмаганим яхши бўлди. Мана, манави чурбанларни Шўро ҳукумати шунча йил боқди — бари бир туземецлигича қолди!
- Чин, шу чурбанларни одам қиласиз деб — қанчадан-қанча мол-дунёмиз кетди!
- Айтгилиги йўқ.
- Яна-тағин, бу чурбанлар борига қаноат қилмай, Шўро ҳукуматини талон-торож этибди.
- Тўқликка шўхлик деб шуни айтадилар-да.
- Олдинроқ билсам эди, Ҳайратондан ўтибоқ — бари чурбанни Термизда қириб-қириб ташлар эдим!

15

- Бошқасини қўй, чурбан, бари ўтди-кетди. Эсингдами, номанг учун шарт қўйиб эдим? Ана шу шартимни энди айтаман: уйингдан тарёк олдириб келтиртарасанми-йўқми?
- Тарёк? Уйимизда тарёк нима қиласи, «Садист»бой?
- Опкелтир!
- Умрим бино бўлиб тарёк нималигини билмайман, «Садист»бой. Лекин қишлоғимизда чаён чақса, бовалар тарёк суркаб даволайди.
- Ана шундан опкелтир!
- Қанча десанг — пулини берамиз!
- Ўзинг ҳам тарёк ейишни ўрганиб ол.
- Бу жойни Шўро зиндони, дейдилар.
- Шўро зиндонида тарёк еб турмасанг — ажалингдан олдин ўласан!
- Ундей деманг-е, «Садист»бой, ундей деманг-е.
- Ана, «Сокол»дан сўра. Масалан, сил кимга ёпишади? Соғлом танага ёпишади. Соғлом тана ким? Папирос чекмайдиган, тарёк емайдиган одам-да. Сен ана шундай одамсан.
- Шўро зиндонини ўз қонун-қоидалари бор, чурбан. Риоя этмасанг — ажалингдан олдин ўласан!
- Мана, айт, чурбан: сени кана чақаяптими-йўқми?
- Ўйнаб қўяй-ўйнаб қўяй, еб қўйди-я, «Садист»бой, еб қўйди!
- Биламан, кечаси билан қирт-қирт этиб чиқасан, биламан. Бизни бўлса чақмайди!
- Чунки бутун танамиз заҳар-закқум!
- Шўро канаси очидан ўлсаям бизни чақмайди!
- Бизни чақиб, заҳарланиб ўлишни хоҳламайди!
- Шўро канаси кўп ақлли кана, кўп доно кана!
- Шўро канаси ҳамиша тозаликка риоя этади!
- Шўро канаси коммунистик руҳда тарбияланган, коммунистик руҳда!
- Сени эса чиқади. Чунки сенинг тананг — коммунистик тана!
- Қўйинг-е, «Садист»бой, қўйинг-е. Умрим ўтди, лекин шу номаъкул нимани емадим — энди емайин.
- Унда, бизга опкелтириб бер!
- Майли, уйдан дарак бўла берсин, қани.

16

- Мен учун Осиё демак — тарёк демак, чурбан! — деди «Сокол». — Осиё деса, қўз олдимда тарёк намоён бўлади. Шу боисдан мен Осиёни ҳурмат қиласман! Тарёк есам — ғамдан фориғ бўламан! Ўша афғон кунларим эсимдан чиқади! Почамир хаёл бўламан, почамир! Дунё

күзимга аёл бўлиб кўринади, аёл! Тарёк — муҳаббат, чурбан, тарёк — муҳаббат! Мана, Шўро Иттифоқи учун «душман»ларни чумчукдай қирдим, чумчукдай! Эвазига нима кўрдим? Мана оқибати, чурбан, мана! Энди... энди одам ўлдирсам дейман, чурбан, одам ўлдирсам дейман! Консирайман, чурбан, консирайман! Одам ўлдиришдан завқ оламан, чурбан, одам ўлдиришдан завқ оламан! Аёллар билан ётишдан кўра — одам ўлдиришдан роҳат оламан, чурбан, одам ўлдиришдан роҳат оламан! Одам ўлдиришни соғинаман, чурбан, одам ўлдиришни соғинаман! Одам суюкли аёlinи қандай соғинади — мен одам ўлдиришни ана шундай соғинаман! Тўшакдаги қип-ялангоч аёлни кўриб қандай роҳатлансан — ўз қурбонимни кўриб ана шундай роҳатланаман, чурбан!..

«Сокол» билан «Садист» уст-бошларини суғуриб-суғуриб отди.

«Сокол» билан «Садист»ни тарёк хумори тутди! Мен бир сесканиб олдим. Кўзларимни бот-бот юмиб очдим.

«Садист» елкаларида игна билан битилмиш капитан унвонли погон бўлди. Кўкракларида Ўроқ ва Болға битиги бўлди.

«Сокол» кўкракларида бармоқдай-бармоқдай ҳарфли «КПСС» битиги бўлди.

— Кўраяпсанми, чурбан? — деди «Сокол». — Биз мана шу тўрт ҳарфдан иборат «КПСС» учун кўкрагимизни қалқон этиб эдик. Кўкракларимиз ана шу «КПСС» қурбони бўлди!..

17

Ойлаб йўқламадилар-йўқламадилар — тағин ҳайдаб бордилар.

— Серқуёш Барабистондан саломлар бўлсин! — деди Иван Иванович. — Қаршига бориб келдим. Сенларни терговчиларинг ҳам баран-е! Маҳаллий баранларни ишимизга аралаштиrmайлик-аралаштиrmайлик, дедим. Йўқ, миллий урф-одатларни билади, дедилар, ўзбекчиликни билади, дедилар. Хулласи калом, орамизга Бахтиёр Абдурахимов деган бир барап терговчини тиқдилар. Қашқадарё вилояти биринчи котиби Ғоиповни қўлга олмоқчи бўлдим. Қўлга олар одам пешонасига шартта тўппонча тирайди — қўлга олади-қўяди-да! Абдурахимов бўлса — нуқул қўлини кўксига қўяди, нуқул теварак-бошга салом беради! Майли, ўзбекчилик... барапчилик бўлса — барапчилик-да, дедим. Индамай эргашиб бора бердим. Ичкари кирсам — Ғоипов тўрда наҳор нонуштаси еб-ичиб ўтирибди. Дастурхонини нонушта дастурхониям деб бўлмайди. Мундайроқ тўй дастурхони деса бўлади. Ғоипов бизниям чойга чақирди. Майли, барапчилик бўлса — барапчилик-да, дедим-да, бир пиёла чой ичдим. Кейин, Ғоиповни прокуратурага марҳамат этдим. «Бир-иккита саволларим бор», дедим. «Шу ерда сўраса бўлмайдими», деди Ғоипов. «Йўқ, идора яхши», дедим. Ғоипов «хўп-хўп», дея ичкарилади. Аёлига кийимларини олиб келишни буюрди. Аёли Ғоиповнинг Социалистик Мехнат Қаҳрамони Юлдузлик камзулинини олиб кирди. Шунда, ичкаридан йиги эшитилди. Ҳадаҳалаб бордим. Қарасам — Ғоиповнинг томогидан шариллаб-шариллаб қон отилаяпти! Оппоқ кўйлаклари қип-қизил қон! Ғоипов қўлини қорнига узатади — етмайди, тағин узатади — етмайди! Нимага узатаяпти десам — Ғоипов шу кунларда кўричагини олдирибди экан. Ғоипов ана шу тикиғли кўричагига қўлини ти-қиб — йиртиб ташламоқчи бўлибди! Ғоипов бизга қараб шундай бақирди-шундай бақирди! Оғриқ зўридан бақирмади — нафрат билан бақирди, нафрат билан! «Мустамлакачилар! Сенлардан қачон халос бўламиш!» — деди. Абдурахимовга-ку, қутуриб бақирди. «йўқол, ўзбекнинг хоини, йўқол!» деди. Шу билан... ўлиб қолди! Кимдан пул олди, кимдан олтин олди — билиб бўлмади! Барibir билиб оламан! Ғоиповнинг саккизта болаб-бақраси билан уруғ-аймоғини олиб келиб қамадим! Ана шу саккизтадан бири бўлмаса, бири айтиб беради! Ана, ўзбекчиликка риоя этиш оқибати! Ўзбекчилик — барапчилик! Бўлди — энди Сталин, Вишнинскийлар йўли билан ушлайман! Сени ушлаб келдилар-у — ана шундай ушлайман!

— Ушланг, армонда қолманг, ушланг, — дедим. — Аммо-лекин бола-бақрада нима айб? Саккизта бегунох жон-а, саккизта жон-а?

Иван Иванович тутақди.

— Нима-нима? — деди. — Саккизта бегунох жон? Саккизтаям гапми — бари ўзбек муттаҳам, бари ўзбек! Сен ўзбеклар Шўро ҳукуматининг тўрт ярим миллиард сўм пулини еб кетгансанлар! Тўрт ярим миллиард сўм! Йўқ пахтани бор деб — тўрт ярим миллиард сўмни манави ҳаром томоқларингдан ўтказиб юборгансанлар! Еб-еб — энди бўрилар галасига ўхшаб кутулиб кетаман, деяпсанларми? Кечириб қўясанлар, кечириб! Мен — Иван Иванович Иванов, тўрт ярим миллиардни жигилдонларингдан суғуриб оламан! Тийинма-тийин суғуриб оламан!

— Ўйнаб қўяй, ишласа — халқ ишлабди, еса — халқ ебди-да.

— Халқ ишлабди? Сен ўзбеклар ўроқда йўқ, машоқда йўқ — хирмонда ҳозир халқсан! Сен ўзбеклар боқиманда барансан! Сен ўзбеклар Москов ҳисобига кун қўрасан! Московдан катталар борса — зар чопон кийгизасан, чўнтағига пора тиқасан. Ана, генерал Чурбанов Барапистонда бир бўлишида тўққиз юз сўмлик зар чопон кийиб келди, ўттиз минг сўм пул олиб келди!

— Ўйнаб қўяй, Чурбанов чўз, дебдики — ўзбак чўзибди.

— Московдан катта борса бўлди — олдига олма-анор қўясан, қўй сўйиб қўясан.

— Ўзбак меҳмондўст эл, катта.

— Лаганбардор эл! Эвазига Шўро ҳукумати кўзини бўяйди! Сен баранлар Барапистонни ўзида қаноатланиб қолмайсанлар. Кўчага чиксанг биласан — дўконларда минглаб оладўппи баранлар изғиб юрибди. Оладўппи баранлар дўконда кўзига нима қўринса бўлди — ола солиб халтасига тиқади-да, Барапистонга орқалаб кетади.

Шу вақт телефон жиринг-жиринг этди.

Иван Иванович телефонда олис гапиришиб олди.

— Ана, баран, — деди. — Раисингни ишини талаб этишаяпти. Бўл-бўл, дейишаяпти. Сен бўлса — ўжар эшак бўлиб ўтирибсан!

Мен номамдан умидвор бўлдим. Ўзимни орқага ташладим:

— Ўйляяпман, — дедим. — Айтаман, ўзим айтаман.

— Бўпти, тағин бир ўйла.

18

— ...Қайтариб айтаман, баран: бу ерда Худо ҳам мен, пайғамбар ҳам мен!

— Гектаридан эллик центнердан пахта берган йилларим-да бўлди...

— Эшакни хизмати ҳалол — ўзи ҳаром!

— Мени-да арз-додимни эшитар одам бордир...

— Зах зинданда додингни ким эшитади, ким?

— Нома битиб эдим. Ҳализамат йўқлайди...

— Нома? Қачон-қачон?

— Уч-тўрт ой бўлиб қолди.

— Уч-тўрт ой, уч-тўрт ой...

Иван Иванович ўзича шундай дея-дея, пўлатсандиқ очди.

Сандиқдан бир даста хатжилд олди. Олдимлатиб ташлади.

— Ана! — деди, — шулар ичидан ўз номангни топ қани!

Мен битта-битталаб хатжилд қарадим. Ниҳоят — ўз номамни топиб олдим. Юрагим шувв этди! Номам термулиб-термулиб қолдим...

— Топдингми? Қани, бер қани, очиб ўқийлик қани, — деди Иван Иванович. — Хў-ўш... «Московга. Кремлга. Ленин мавзолейига! Ўртоқ Ленин! Сиз бизнинг яккаю ягона паноҳимизсиз, халоскоримизсиз, ўртоқ Ленин! Отамиз-да сиз, энамиз-да сиз, эмчақдошимиз-да

сиз»...

Иван Иванович кет чалқайиб-кет чалқайиб кулди.

Иван Иванович қорин ушлаб-қорин ушлаб кулди.

Иван Иванович кўз ёшлаб-кўз ёшлаб кулди.

— Чехов бўл-е, Чехов! — деда кўз артди. — Чехов қаҳрамонлари бобом қишлоғига, деб нома битади-ю? Сен ҳам Ленин бобом мавзолейига, деб битибсан-да? «Осиё устида бўрон» деган бир киноларинг бор эди, эсингдами? Ўшандада сендей бир баран Ленинга нома битади. Ўша, баран оти нима эди...

— Шукур Бурхонов.

— Йў-ўқ, сен ўша баранни ўйнаган ижрочини айтаяпсан. Оти... оти Юсуф Ялангтўш! Юсуф Ялангтўш эртаю кеч Лениндан жавобнома қарайди... қарайди! Ленин бўлса, Кремлда ўтириб... Туркистонни забт этиш йўлларини ўйлади! Юсуф Ялангтўшдай босмачи баранларни қириб ташлаш йўлларини ўйлади! Ўшандада йигирманчи йиллар эди. Қара, шунча йил ўтибди — сен ўзбеклар ҳалиям барандан одамга айланмабсанлар!

— Сабр таги олтин, дейдилар. Мени-да бошимга офтоб тегиб қолар.

— Офтоб? Қандай офтоб? Э, ҳа, офтоб бўлса офтоб-да!

Пван Иванович номамни бошим узра ошириб отди.

— Ана, бошингга офтоб тегди, ана! — деди. — Ура-а-а, баранлар бошига офтоб тегди, ура-а-а!

Иван Иванович папирос эзғилади. Лабларига папирос қистирди. Чирсиллатиб гугурт чақди.

Иван Иванович бурқситиб-бурқситиб папирос тортиди.

— Қулоқ сол, баран, — деди. — Сен Ленинга нома битиб аҳмоқ бўлма. Яхшилаб эшитиб ол. Чин, бу жойлар Шўро зиндони, деб аталади. Аслида эса ундан эмас. Бу жойларни «Қизил зона», дейдилар. «Қизил зона»нинг ўз қонун-қоидалари бўлади. Зиндон ана шу «Қизил зона» қонун-қоидаларига бўйсунади. «Қизил зона»да Ленин йўқ! «Қизил зона»да Шўрр ҳукумати йўқ! «Қизил зона»да адолат йўқ! «Қизил зона»да инсон ор-номуси, инсон шон-шуҳра-ти, инсон қадр-қиммати... йўқ, йўқ! Тағин йўқ! «Қизил зона» ўз номи ўзи билан — қизил, қизил! Қизил ранг — қон ранг! Қон ранг билан ўйнашма, баран, қон ранг билан ўйнашма! Акс ҳолда — қизил қонингга бўяласан! Акс ҳолда — қизил қурбонлик бўласан, қизил қурбонлик!..

19

— Майли, айтма. Сен айтмасанг ҳам ўзим топиб оламан, — деди Иван Иванович. — Топиб олайпман, бундан кейин ҳам топиб оламан. Ана шунда ўша олтинлар билан пешонангга бир ураман-да, манави олтин бўлмай... дейман!

— Шундай қилинг, катта, шундай қилинг!

— Қиласман, қиласман! Мен сени манавиндай ириб-чириб ётмагин, дейман-да.

Иван Иванович қалам учи билан қўлим юзи ярамни босди. Босиб-босиб турди!

Ярамдан билқ-билқ йиринг тошди!

Ярам лўқ-лўқ оғриди! Ярам зирқ-зирқ оғриди!

Мен апил-тапил ярамни тортиб олдим.

— Ана, баран, ана! — деди Иван Иванович. — Ана шундай ириб-чириб ўлиб кета берасами? Майли, олтинларни айтма. Кел, яхшиси — мен сенга бор-йўғи бир савол берайин — сен икки оғиз гап билан жавоб бер-да, қутул. Келишдикими?

— Олдин айтинг, қани? Эшитайлик, қани?

— Хў-ўш, раисингга қанча пора бергансан?

— Пора? Қандайчикин пора?

— Қачон бергансан, нимага ўраб бергансан, неча сўмлик эди?

— Умримда биревга-да пора бермадим, биревдан-да пора олмадим.
— Биламан, сенга пора берадиган ахмоқ йўқ, биламан, Лекин сен пора бергансан!
— Биревга-да пора бермаганман, деяпман-ку.
— Бергансан!
— Ўлла ўлайин агар-а, пора берган бўлсам-а!
— Бергансан! Сен — раисингга узатасан, раисинг — туманингга узатади, туманинг — вилоятингга узатади, вилоятинг — Марказкомга узатади!
— Ўлла ўлайин, биревга пора берган бўлсам-а!
— Қатталарга бир нима узатмасанг... қандай қилиб бригадир бўлдинг?
— Мен меҳнат қила бердим-меҳнат қила бердим — раисимиз кўтара берди-кўтара берди.
— Кечириб қўясан, баран, кечириб қўясан! Ўзбекистон катталари олдин бир нима олади — ана ундан кейин бардор-бардор этади!
— Ўлла ўлайин, агар-а...
— Унда, қандай қилиб пахта топширишни узлуксиз бажариб келдинг? Узлуксиз-а, узлуксиз!
— Мен ерга тер тўка бердим-тер тўка бердим — ер менга ҳосил бера берди-ҳосил бера берди.
— Кечириб қўясан, баран, кечириб қўясан! Сен ўзбеклар ерга тер тўкмайсан! Йўқ-йўқ, сен ўзбеклар ерга тер тўкмайсан! Сен ўзбеклар... ергаям пора берасан! Ҳа, сен ўзбеклар ергаям пора берасан! Пахталарингни деярли ярим фоизи қўшиб ёзилган! Ҳа-ҳа, қўшиб ёзилган! Қўшиб ёзиш учун эса — таҳи бузилмаган «Ленин»дан узатиш лозим бўлади!

Энди айт, раисингга нечта «Ленин» узатдинг?
— Ўйнаб қўйай, «Ленин»дан, ўйнаб қўйай! Йўқ «Ленин»ни қаердан оламан?
Иван Иванович ҳўппаклаб-ҳўппаклаб қулоқ-чаккам солди.
Мен ўтиргичдан жалпиллаб-жалпиллаб учиб тушдим.
Ўнг қулоқ-чаккам қизиб-қизиб оғриди. Ўнг қулоқ-чаккам шанг-шанг оғриди.
Шу кундан эътиборан ўнг қулогим чиппа-чиппа битди-қолди.

20

— Усмонхўжаевни биласан-а? — деди Иван Иванович.
— Эса-чи. У киши пошшомиз бўладилар! — дедим.
— Ана шу пошшонг Ўзбекистон булбули бўлиб сайради! Навоий, Бобур... дегич баран шоирлар ғазалларида булбуллар хониш этади-ю? Пошшонг ана шундай булбул бўлиб хониш этди!
— Эб-е, у киши-да зинданбандми, эб-е?
— Ҳа-да, зинданбанд-да! Лекин Усмонхўжаевнинг аёли Элнурини гапга киритиб бўлмади. Элнури ойлаб банди бўлиб ётди. «Эринг Усмонхўжаев тамом бўлди — энди эрингдан кеч», дедим. Қани кечса! Бошига ит кунини солдим! Охири масалани кўндаланг қўйдим: «ё, эрингдан кечасан, ё, жонингдан кечасан», дедим. «Майли, жонимдан кечаман, лекин эримдан кечмайман», деди Элнури. Ана аёл — мана аёл! Айтганда ҳам — юзимга тупуриб-юзимга тупуриб айтди! Юзимга тупурса ҳам майли — барибир Элнурига қойил бўлдим! Ана шундан кейин бутун ўзбек аёллариға қойил бўлдим!

Иван Иванович пўлатсандиқдан семиздан-семиз бир жилдаҳлам олиб келиб очди.
— Хў-ўш, пошшо ҳазратингни Баш Прокуроримиз ўрнибосари ўртоқ Васильев сўроқ қилдилар. Мана, сўроқ варақаси. Қулоқ сол, ана шу сўроқдан пича ўқиб бераман:

ВАСИЛЬЕВ: Сиз бир неча бор СССР Баш Прокурори номига арзномалар билан мурожсаат этибсиз. Сиз бу арзномаларда қандай йўллар билан пора олиб-пора берганлигинизни баён этибсиз.

УСМОНХҮЖАЕВ: Мени ушбу йил ўн түккизинчи ўктабрида зиндонбанд этдилар. Мен илк кунданоқ ҳалол йўлдан бордим. Оқни оқ, дедим, қорани қора, дедим! Барча жавобгарликни бўйнимга олиб айтдим. Тағин айтаман: ҳа, пора олиб-пора берииш — Ўзбекистондан Масковгача кундалик воқеа эди!

ВАСИЛЬЕВ: Кимларга пора бериб эдингиз?

УСМОНХҮЖАЕВ: Мен бирорга тухмат қилмасдан айтиб бераман! Мен нима бўлди — ана шуни айтиб бераман!..

Мен КПСС Марказий Кўмитаси ташкилий-фирқавий ишлар мудири **СМИРНОВга** эллик минг сўм бердим. Боиси — Смирнов очиқ-ойдин пул талаб қилди-да! «Ёрдам бер-чи, ёрдам бер!» деди-да!

Мен КПСС Марказий Кўмитаси котиби **РОМАНОВга** бир дипломат олиб келиб бердим. Дипломатда турли-туман миллий совга-саломлар ҳамда йигирма беш минг сўм пул бор эди.

Мен КПСС Марказий Кўмитаси котиби **КАПИТОНОВга** икки маротаба эллик мингдан юз минг сўм пул бердим. Берганда-да — ўртоқ Капитоновни фирқавий ишхонасида бердим!

Мен КПСС Марказий Кўмитаси ҳузуридаги фирмә назорати қўмитаси раиси **СОЛОМЕНЦЕВга** юз минг сўм пул бердим. Соломенцевга ҳам ўз фирмавий ишхонасида бердим!

Мен СССР Бош Прокурори **РЕКУНКОВга** Юрмала шаҳрида эллик минг сўм пул бердим. Бош Прокурор қўлимдан пулни олди-олди-да, миннатдорчилик билдириди. «Қўллаб-қувватлайман», деб ваъдалар берди.

Тошкентда **РЕКУНКОВга** тагин эллик минг сўм пул бердим. СССР Бош Прокурори тагин миннатдорчилик билдира-билдира — қўлимдан пулни олди.

Мен СССР Олий суди раиси **ТЕРЕБИЛОВга** қирқ минг сўм пул бердим. Икки минг саккиз юз сўмлик гилам бердим. Гиламни Ўзбекистон Марказий Кўмитаси ишлар бошқармаси ходимлари тайёрага аранг-аранг юкладилар.

Мен КПСС Марказий Кўмитаси котиби ўртоқ **ЛИГАЧЕВга** олтмиши минг сўм пул бердим!..»

Иван Иванович жилдтахламни ёпди. Ипларини бойлади.

— Ана, эшитдингми? — деди, — Пошшои аъзаминг-а, пошшои аъзаминг!

21

Мен... илойим, қулогим карлиги чин бўлсин, дедим.

Мен... илойим, бари айни карлигимдан кўрайин, дедим.

Мен... илойим, умрбод кар бўлсам бўлайин — аммо-лекин... ана шу гапларни эшитмаган бўлайин, дедим.

Шу боис — дераза боқиб ўтира бердим.

— Ҳа, намунча безрайиб қолдинг?

Шунда-да Иван Иванович қайрилиб боқмадим.

— Ана сиз, ана Масков... — дея минғилладим.

— У нима деганинг?

— Ана, пошшомиз оппа-ойдин айтиб бераятилар-ку? Масковга ўз-ўзидан чойчақа узатиб... Ўзбекистонни калласи шамолда қоптими? Масков қўл чўзадики — Ўзбекистон садақа беради!

— Масковга тил теккизма, баран, Масковга тил теккизма!

— Масков бўлмаса — масковчи катталар! Ана, пошшомиз масковчи катталарни оппа-ойдин айтаятилар! Яна-тағин... номма-ном айтаятилар, номма-ном! Ана, масковчи катталарни банди этиб гапириша беринг-да!

— Йўқ, баран, йўқ! Менинг масковчи катталар билан ишим йўқ! Московчи катталар — ўзимизникилар! Ўзимизникилар — Улуғ Ўрис! Улуғ Ўрис билан ишим йўқ! Улуғ Ўрис нима қилиқ қиласди — бари ярашади! Мен — сен баранлар билан ишим бор!

— Ё, пирим-е, ё, пирим-е, бизда мима айб?

— Московга пора бергансан!

— Ҳолвани ҳоким ейди — калтакни етим ейди, дейдилар...

Иван Иванович бошимлаб келди. Иван Иванович ҳалқумимдан ғинппа бўғиб кўтарди.

— Киноларда Африка ола-була эшагини кўрганмисан? — деди. — Манави юзларингдай ола-пес эшак? Сен ана шу Африка ола эшагига келбат берасан! Манави ола-чипор юзларинг ҳам айтиб турибди. Африка ола эшаги Африкада нима ўжарлик этса этади. Боиси, Африка — ўз оти ўзи билан Африка. Бу ер эса — Москов! Сенинг Африка ола эшагидай ўжарлигинг Московда кетмайди!

Иван Иванович мени силкилаб-силкилаб ташлади.

Мен гуп этиб тушдим.

Иван Иванович олдимга қоғоз-қалам қўйди.

— Ма, ёз! Раисимизга ўн минг сўм берганман, деб ёз! — деди. — Тағин Африка ола эшагидай қайсарлик эта берсанг — манави миянгга тўққиз мисқол қўрошин қуйиб қўяман! Қани, ёз!

— Мен ҳали умримда қўлимга ўн минг сўм пул ушлаган эмасман, катта.

— Биламан, Африка ола эшаги! Биламан, Африка қайсар эшаги! Сен раисимизга ўн минг сўм бердим, деб ёз — бўлди!

Мен қоғоз музтар бўлиб-қоғоз музтар бўлиб ўтира бердим.

Қаламни қўлимга-да олмадим!

— Соат тўрт бўляяпти, хадемай тонг отади! Бўл, баран, бўл!

Мен кўзим кетиб-кўзим кетиб ўтира бердим. Иван Иванович бетимга шама сепиб ташлади. Мен сесканана-сесканана кўз очдим.

— Раисимизга ўн минг сўм бердим деб, қоғоз қоралаб бер — бўлди!

Мен йўқ дея-йўқ дея, бош чайқадим.

— Ух, Африка ола эшаги! Ух, Африка қайсар эшаги!

Иван Иванович ўнг биқиним оралатиб-оралатиб тепди.

Иван Иванович чап биқиним оралатиб-оралатиб тепди.

Иван Иванович чатаноқларим оралатиб-оралатиб тепди.

22

Иван Иванович назорат этиб турди. Дўхтир аёл мадда-мадда яраларимни мой дорилади.

Дўхтир аёл қон-қон яраларимни кўк дорилади. Дўхтир аёл моматалоқ-моматалоқ яраларимни йод дорилади.

Дўхтир аёл... баданларимни қаради-қаради... пиқ-пиқ йиғлади...

— Нега йиғлаяпсиз? — деди Иван Иванович. — Нима бўлди, Нина Сергеевна?

Дўхтир аёл оғиз бекитиб-оғиз бекитиб йиғлади.

— Мен... мен Ўзбекистонда беш-олти йил ишлаб эдим, — дея йиғлади. — Бечора халқ-а, бечорагина халқ-а...

— Шу баранларни нимасига куюсиз? Бари ҳаромтомоқ, бари боқиманда!

— Ўзбекистон ундей эмас... Ўзбеклар ундей эмас...

23

— Даилингиз бордир-да: раисимизни қулф-калит этиб ўтирибсиз?
— Бўлади, далил бўлади!
— Унда, мени беёзиқдан-беёзиқ банди этманг-да? Мен бола-бақрам олдига борайин-да?
— Йўқ! Мен Иван Ивановичман! Ўзларингни ўз қўлларинг билан йўқ қиласман! Бировингни кўзингни бировингта ўйдирман! Бировингни каллангни бировингта едирман! Бировингни жонингни биройингга олдирман! Ўзим эса — пок-покиза бўлиб қоласман! Бу йўл — Иван Иванович Ивановлар йўли!
— Худо хайрингизни берсин, беёзиқдан-беёзиқ...

— Эшак семирса охурини булғайди, дейдилар! Сен баранлар мазахўрак бўлиб қолдинг, мазахўрак! Сен баранлар қорнинг тўйиб қолди! Шундай кета берсаларинг — қанжиқ итдай болалаб бора берасанлар! Ана, кўз очиб юмгунча йигирма миллиён бўлдиларинг! Йигирма миллиён халқ-а! Сен боқимандаларга нонни қаердан топамиз! Йўқ, биз йигирма миллиён боқимандани боқмаймиз! Балиқ бошидан сасиди, бошидан! Йигирма миллиённи бошбошлиқларингдан бошлаб камайтирамиз! Бош-бошларингдан бошлаб камайтирамиз!

Ўз-ўзидан кўнглим озди. Юрагим беҳол бўлди. Кўзларим тинди.

Сув, дейин дедим — ҳолим келмади.

Олдимда турмиш пиёла узалдим. Чойқолдиқни оғзим олдим.

Иван Иванович қўлимдан пиёлани юлқилаб-юлқилаб олди.

— Буёққа ол! — деди. — Сенга ким кўйибди чой ичишни!

Оғзимдаги оғзимда қолди, бўғзимдаги бўғзимда қолди. Мен мўл-мўлт қолдим.

Иван Иванович бошмалдоғини лунжларимга нуқиб-нуқиб олди.

Оғзимда турмиш чой пирқ-пирқ отилди.

Томоғимда турмиш чой тиқилиб-тиқилиб қолди.

Мен қир-қир йўталдим.

Мен кўзларим ёшланиб-ёшланиб йўталдим.

Мен Иван Ивановичга мўлт-мўлт боқиб йўталдим.

— Ўл, шу кунингга! — деди Иван Иванович. — Иван Иванович Ивановлар пиёласидан чой ичишни сен баранларга ким кўйибди?! Ана шундай йўталиб-йўталиб — Бобумурод Омоновдай ўласан-қоласан! Намунча анграясан? Ҳа, Бобумурод Омонов ўлди! Термиз кетган терговчиларим телефонда айтиб берди. Омонов ўз ажали билан ўлди, деб ўйлайсанми? Ана шуда, барансан-да, баран! Омонов ҳам сендан оёқ тираб туриб олиб эди. Нимани сўраса — «Усмонхўжаевга жавоб бераман, Усмонхўжаевга жавоб бераман», деб туриб олиб эди. Охири... олгичини олди! Ўлимичи этиб урдилар! Тепиб-тепиб — музхонага олиб кириб ташладилар! Етмиш яшар чол музхонага бардош берармиди? Ана, ўлди-кетди! Бобумурод Омонов — Социалистик Мехнат Қаҳрамони эди, Улуғ Ватан уруши иштирокчиси эди, халқ депутати эди! Сен кимсан?! Итдай ўласан-кетасан! Йўқол, йигирма миллиён баран, йўқол!

24

Юзтубан бўлиб ёта бердим. Шунда, елкамдан тепки едим. Мен бошимни кўтариб қарадим. Бошимда «Садист» билан «Сокол» турди.

— Ҳа, чурбан? — деди «Садист», — ўлиб-пўлиб қолмадингми?

— Ўлма, қўй, ўлма, — деди «Сокол». — Сен ҳали бизга кераксан.

— Нимага миқ этмайсан, гапир.

Мен дармоним йўқ, дея бош чайқадим. Ҳовучимни оғзим олиб бордим — сув, ишорасини бердим.

— Масала равшан, — деди «Садист». — Бечора чурбан оч.

— Ярим кечада қаердан тўқ бўлади, — деди «Сокол».

— Энди биратўла тамадди этади-да.
— Олдин ҳожат олиб бориб келайлик.
— Қани, қўлтиғидан ол.
«Садист» билан «Сокол» ҳидоят қўлларини узатди.
Мени оҳиста-оҳиста тувак олиб борди.
Кўнглим «Садист» билан «Сокол» ҳидоятидан таскин олди.
«Урсалар-да майли. Шулар бўлмаса, ҳолим не кечар эди?» — дея хаёлландим.
Бурчакда турмиш тувак олдида тик бўлдим.
— Тескари қараб туринглар, — дедим.
— Уяласанми? Йўғ-е?
— Уялади-да! — деди «Садист», — Ўзбеклар бирор олдида ёзилиш уёқда турсин... Ўзбеклар тикка туриб чоптирамайди!
— Ор-номусли ўзбек халқининг садагаси кетсанг-да! — деди «Сокол».
«Садист» билан «Сокол» шундай дея-дея, тескари бўлиб турди.

25

...Мен чоловоримни тортиб-тортиб тутмаладим. Мен тувакдан бир қадам олдин босиб турдим.

— Бўлди! Ана энди қарай беринглар! — дедим. «Садист» билан «Сокол» тағин қўлтиқларимдан кирди. Тиззаларимдан олиб тош ўтиргизди.

Ажабдан бир «Садист» қарадим, бир «Сокол» қарадим.

— Нима қиласяпсизлар? Мен ўтириб бўлдим! — дедим.

— Энди... тамадди этамиз!

— Қани, палов егич қўлингни бер, қани. «Садист» ўнг қўлимни олди. Тувак олиб борди. Кафтимни... тезагим босди.

— Ай, нима қиласяпсизлар, ай!..

— Сени тамадди эттирамиз.

— Бечорагина, ҳолдан тойиб қолдинг.

— Бари томоқдан-да, томоқдан.

— Қани, ошамлаб-ошамлаб ол, қани.

— Ай, у тезак, у тезак!.. — дея, типир-типир этдим.

— Нима фарқи бор? — деди «Садист». — Атала олдин қозонда эди. Қозондан косага ўтди. Косадан қорнингга ўтди. Қорнингдан тувакка ўтди. Мана энди... тағин қорнингга ўтади! Ўша-ўша атала!

— Чин, у тешикдан киради — бу тешикдан чиқади! — деди «Сокол».

— Ҳа-да, фарқи йўқ! Фарқи — бир тешик юқорида, бир тешик қуйида!.. — деди «Садист».

— Қани, катта-катта ол, қани!

Мен бармоқларимни юммадим. Мен бармоқларимни тик тутдим.

— Ўлдир! — дедим. — Майли, ўлдир!..

— Йўқ, биз сени ўлдирмаймиз.

— Биз сени тамадди эттирамиз, тамадди. Жойимдан турайн, дея талпиндим. Тувак оёқ тираб кучандим.

Мен «Садист» билан «Сокол»га куч бермадим.

Шунда, «Сокол» чуйдамдан босди.

Мен шунда-да куч бермадим!

Энди, «Садист» бўйнимни чатаноқлари ораси олиб-олиб бўғди. Кекирдагимга бошмалдоқ босиб-босиб бўғди...

Мен оғзимни каппа-каппа очдим. Ҳир-ҳир этдим.

«Сокол» қўлрўмол билан тезак олди. Мисоли палов ошатмишдайин-палов ошатмишдайин оғзим солди.

Мен ютинмадим— тезагимн оғзимда ушлаб турдим.

«Садист» бошимни чайқаб-чайқаб олди. «Садист» бошимни силтаб-силтаб олди.

Мен шунда-да ютинмадим!

«Сокол» ичимга созлаб-созлаб кўрмушт урди!

Ичим шилқ этди!

Ичим тортди—тезагимни тортиб олди...

— Ош бўлсин! — деди «Садист».

— Ош бўлсин! — деди «Сокол».

— Ўқчияпти... туйилиб қолди-ёв!

— Туйилиб қолса... тўқсон беш чой ичарамиз-да! «Садист» тувакдан бир ҳовуч сийдик олди. Оғзимдан сийдик кўйди...

— Ош бўлсин!

26

— Бир йилдан ошди! — деди Иван Иванович. — Африка ола эшагидай оёқ тираб ётишингга ҳам бир йилдан ошди! Ёта бер, қайсар эшак бўлиб ёта бер! Ана шундай ўласан-кетасан!

— Бирорвга ўлим тиламанг. Ажали етган ўлади.

— Ўласан! Бекордан-бекор ўласан! Хўш, ўлсанг — сен баранни ким йўқлайди! Йўқлайдиган йўлбошчинг қолмади! Мана, қулоқ сол: раисинг Ботиров зиндонда ётиди. Ижроқўм раисинг Холиқулов зиндонда ўз томирини ўзи кесиб ўлди! Туманинг фирмаси биринчи котиби Мирзабоев зиндон иккинчи қаватидан ўзини ўзи ташлаб ўлди! Вилоятинг ижроқўми раиси Бекназаров зиндонда ўз жонига ўзи қасд этиб ўлди! Вилоятинг фирмаси биринчи котиби Каримов зиндонда ётиди. Ўзбекистон Ички Ишлар вазири Яҳёев зиндонда ётиди. Ўзбекистон Бош Прокурори Бўрихўжаев зиндонда ётиди. Ўзбекистон Бош Вазири Худойбердиев зиндонда ётиди, Ўзбекистон Жумхурияти Кўмитаси биринчи котиби Усмонхўжаев зиндонда ётиди! Ана, раисингдан тортиб пошшонггача зиндонда ётиди! Бор бошпаноҳинг зиндонда ётиди! Хўш, энди сени ким йўқлайди?

«Чин, чин, — дея ўйлаб қолдим. — Раисимиздан тортиб, пошшомизгачайин зиндонда ётиди-я!»

— Зиндонимда йигирма беш минг бўлдиларинг — йигирма беш минг! Бари зиндонбандларим — Йўлчи Юлдуз зиндонбандлар! Зиндонимда тўртта Марказқўм котиби ётиди — Усмонхўжаев, Айтмуродов, Салимов, Абдуллаева! Зиндонимда йигирмата генерал ётиди! Генерал Яҳёев... Дунёда генерал зоти тўлиб ётиди, баран. Лекин ўзбек Яҳёевдайи камдан-кам топилади. Ўзбек Яҳёевдан Масков генераллари ҳам сабоқ олар эди. Масков генералларидан битта Шчелоковни ўзбек Яҳёев билан ёнма-ён қўйса бўлар эди. Бошқа генераллар ўзбек Яҳёев олдидан ўта берсин эди. Ана шу Яҳёевдай йигирмата генералинг зиндонимда ётиди! Зиндонимда саккизта вилоят котиби ётиди. Зиндонимда ўнта Социалистик Мехнат Қаҳрамони ётиди! Ўнта Социалистик Мехнат Қаҳрамониям Ўзбекистон юлдузлари! Жами йигирма беш минг йўлчи Юлдузинг зиндонимда ётиди!

Иван Иванович зўрма-зўраки илжайди.

— Йўлчи юлдузларингни бола-чақаси-ю, қариндош-уруғлариям зиндонимда ётиди! — дея илжайди. — Пошшонг Усмонхўжаевни йигирма учта бола-чақаси билан қариндош-уруғи ётиди! Биласанми пошшонг Усмонхўжаевни зиндонбанд этиш учун ким қўл қўйди? СССР Олий Совети Президиуми раиси ўртоқ Громико қўл қўйди, Громико! Хў-ўш... Каримовни

йигирма битта бола-чақаси ётибди! Худойбергановни ўн бешта бола-чақаси ётибди! Камолов, Ражабов, Жабборов дегичларни саккиз-тўққизталаб бола-чақаси зиндонимда ётибди!.. Қахрамон Оналарингача зиндонимда ётибди — Қахрамон Оналарингача! Зиндонбандим Сайдова ўн иккита фарзанд онаси бўлади! Зиндонбандим Долиева ўн битта фарзанд онаси бўлади! Зиндонбандим Матғомова ўн битта фарзанд онаси бўлади! Зиндонбандим Алимова тўққизта фарзанд онаси бўлади...

Иван Иванович илжая-илжая чой ичди.

— Анави пайғамбарингни оти нима эди... Хў-ўш... хотирам ўлсин-а... Афсус, ўша пайғамбарингни қўлига кишан солишга улгуролмадим, афсус. Худо мендан олдин жонини олиб қўйди! Ўша пайғамбарингни оти нима эди...

— Мухаммад пайғамбар.

— Йўқ-йўқ... Хў-ўш... Шароф Рашидов! Афсус, Шароф Рашидовингни зиндонбанд этишга улгуролмадим, минг афсус!..

Иван Иванович пўриллатиб-пўриллатиб чой ичди. Иван Иванович киборона-киборона айтди:

— Энди... Ўзбекистон тож-тахтини ўзимиз бошқарамиз! Ўзбекистон Марказқўми котиби Анишев, Ўзбекистон Халқ Назорати Кўмитаси раиси Ефимов, Ўзбекистон Бош Прокурори Бутурлин, Тошкент шаҳар прокурори Теркин, Тошкент шаҳар фирмә кўмитаси биринчи котиби Сатин... Жами ўттизтacha азамат! Азаматларни Масков юборди! Насиб бўлса — ана шу азаматлар Ўзбекистонда пичноқка илашадиган ўзбекни омон қолдирмайди! Насиб бўлса — ана шу азаматлар бош кўтарган ўзбекни бошини янчиб-янчиб келади! Насиб бўлса — ана шу азаматлар кўзи очилган ўзбекни кўзини ўйиб-ўйиб келади!

Девордан садо бўлди — мендан садо бўлмади.

Мен тошдай-тошдай бўлиб ўтира бердим.

Иван Иванович ҳориқулодда айниди...

Иван Иванович заҳар юз бўлди.

Иван Иванович тана кўз бўлди.

Иван Иванович қалт-қалт қўл бўлди.

— Ҳали зиндонбандларим эллик мингта бўлади! Ҳали зиндонбандларим юз мингта бўлади!

— дея лик этиб турди. — Пичноқка илашажак ўзбек — омон қолмайди! Ўзбекистон — тутдай каллак бўлади!

27

«Садист» бир тарафимлаб келди, «Сокол» бир тарафимлаб келди.

Мен апил-тапил туриб ўтирдим.

— Тун совуқ келди, чурбан, — деди «Садист».

— Тиқилишиб ётайлик...исиб ётамиз, — деди «Сокол».

«Садист» билан «Сокол» ўнг-чапимни олиб ўтирди.

— Чурбан, — деди «Сокол». — Биласан, мен Шўро ҳукуматидан нафратланаман!

— Мен эса жирканаман! — деди «Садист».

— Аммо яшаб қолиш керак!

— Зиндонда бўлса-да, одамдай яшаб қолиш керак!

— Ташқаридан ичкилик олиб турдим.

— Тарёк олиб турдим.

— Олди-бердимизни Шўро қонунбозлари билади.

— Шўро Бош Прокуроригача билади!

— «Юла»дан бошлаб Бош Прокуроргача бизнинг дастёргимизни қилади!

— Баш Прокурор дастёrimiz бўлгач — емакни қусмоғи-да бўлади...
«Садист» билан «Сокол» билакларимдан олди. Кўлларимни кетим қайирди-кетим қайирди
— елкам олиб борди.
Кўлларим қирс-қирс этди.
— А-а-а-ай!.. — дея овоз бердим.
«Садист» билакларимни бир нима билан ўраб-ўраб бойлади.
Мен тишимни тишимга босиб-босиб турдим. «Сокол» бўйнимдан босди. Мен юзтубан
энкайиб-энкайиб турдим. Мен тиззаларимни йифиб-йифиб турдим. «Садист» чоловоримни
кўшқўллаб тортқилади.
— Оёқларини ёй!
— Тиззаларингни оч!
Мен жон-жаҳдим билан тиззаларимни қапиштириб-қапиштириб турдим.
— «Сокол», синдир оёғини, синдир!
«Сокол» этик учи билан тиззаларим кўзилаб-тиззаларим кўзилаб тепди.
Тиззаларим этик тепкиларни кўтаролмади. Тиззаларим ўз-ўзидан ёйилди.
Шунда, чоловорим лип этиб тушди...
— Бай-бай-бай! — дея, «Садист» қуймучларим шапатилади. — Тарвуз, мисоли тарвуз!
— Умр бўйи ётиб егач... тарвуздай бўлади-да!
— Билқиллайди-я, билқиллайди! — дея, «Садист» қуймучларим шапатилади.
Мен бор овозим билан бақирдим:
— «Юла»-а-а-а!..
— Бақирма, чурбан, бақирма! Ярим кечада «Юла» қолдими!
— «Юла»-а-а-а!.. — дея, йиглаб-йиглаб қўя бердим.
— Бақирма деяпман!
— Нима... қизмисан?
— Қизмидингки... дод дейсан?
— «Юла-а-а-а!.. — дея, йиглаб-йиглаб қўя бердим. Осмон — тош бўлди. Ер — тош бўлди.
Девор — тош бўлди...
— Айтаман, «Садист»бой, айтаман! — дея, йиглаб-йиглаб ёлбордим.
— Ана энди ўзингга келаяпсан! — дедилар.
— Қўйберинг, «Сокол»бой, мени қўйберинг! — дея, ёлбориб-ёлбориб йигладим. —
Айтаман, «Садист»бой, мана-мана айтаман!
— Ана энди эсинг кирди! — дедилар. Мендан қўл олдилар.

28

Оппоқ қоғоз тикилиб-тикилиб шайландим. Қалам ушлаб-ушлаб шайландим.
— Қани, ёз, қани, — деди Иван Иванович. — СССР Баш Прокурори ўринбосари ўртоқ
Сорокога...
Иван Иванович айтиб-айтиб турди.
Мен битта қолдирмайин, битиб-битиб турдим.
— Қани, менга бер, қани, — деди Иван Иванович. — Ай, кучингдан, жигит! Ана энди
жигитмисан-жигит бўлдинг! Шугина гап учун Шўро қонун посбонларини бир йилдан зиёд
қийнадинг-а!
— Энди... уст-бошимни берсангиз деб эдим.
— Уст-бош? Уст-бошни нима қиласан?
— Манави зиндони уст-бош билан қишлоқ бориб бўладими? Эл-юрт нима дейди? Дўст бор,
душман бор...

Иван Иванович оғиз ушлаб-оғиз ушлаб кулди.

Иван Иванович бет чанглаб-бет чанглаб кулди.

Иван Иванович күз артиб-күз артиб кулди.

— Ҳай, жигит-ай, жигит-ай!.. — деди. — Айт, тағин нима қилай?

— Тағин... мени кечаси бир маҳалда олиб келиб эдилар. Мен бедирамдан-бедирам келиб эдим. Шу боис... айта берайнми?

— Айт-айт?

— Шу боис... бир-икки сўм йўлкира қарз бериб турсангиз... деб эдим. Бола-бақрам олдига эсон-омон етиб борсам армоним йўқ... Омонатингизни чақама-чақа жўнатаман...

Иван Иванович хандон-хандон кулди.

ЎНИНЧИ БОБ

1

Сайёр суд Денов пахта заводи маданият саройида бўлди.

— Жойингиздан туриңг, суд келаяпти! Эл-юрт тўла сарой бир қалқиб олди.

— ...Айборд Жамолиддинов Дехқонқул Ақрабовичга сўнгсўз берилади!

Бола-бақраларим қошимда бўлди. Хеш-ақраболарим қошимда бўлди. Кўнгил етарларим-да қошимда бўлди. Унда, тағин, кимим... тағин кимим йўқ бўлди?

— Шу... шу, далаларимни бир кўриб кетайин, — дедим.

— Кимни-кимни? — деди қозикалон.

— Далаларимни бир кўриб кетайин...

Қозилар ўзаро қарашиб-қарашиб олди. Қозилар ўзаро бош иргашиб-бош иргашиб олди.

— ...Жамолиддинов Дехқонқул Ақрабович Ўзбекистон Жумҳурияти жиноят тузугининг 153-моддасига биноан... саккиз йил муддат билан озодликдан маҳрум этилади!

Эл-юрт тўла сарой бир йиғлаб олди!

2

Зиндонмашина равон-равон юрди. Зиндонмашина дўқиб-дўқиб юрди.

Зиндонмашина бир жойда манзил этди.

Темир эшик ланг очилди.

Қизил аскар автомат билан туш, ишорасини берди.

Мен зиндонмашинадан тап этиб тушдим.

Фавқулодда ёруғдан кўз очолмадим. Кўзларимни чирт юмиб турдим.

Оҳиста-оҳиста кўз очдим...

Ўзимни... ўзимни шийпонимиз олдида кўрдим!

Теварак-бошим далаларим бўлди.

Далаларим сокин-сокин бўлди.

Далаларимда қарғалар учиб-кўниб турди.

Далаларимда қорамоллар ўтлаб-ўтлаб юрди.

Ғўзалар шипшийдам ғўзапоя бўлди.

Ғўзапоялар шумшук-шумшук бўлди. Ғўзапоялар сариқ-сариқ бўлди.

Ғўзапоялар бўй-бастидан... ушбу йил ҳосили мўл-мўл бўлди!..

3

Қизил сорбон бир далаларим қаради, бир мен қаради.

«Мана, далаларингга-да олиб келдик, — демиш бўлди. — Хўш, энди нима дейсан?»— демиш бўлди.

— Ну? — деди Қизил.

Қизил! Далаларимда Иван Ивановичлик этмай тур, энди.

Далаларим билан омон-эсонлашиб олайнин, энди.

Қизил! Далаларимда Иван Ивановичлик этмай тур, энди.

Кўнглим туб-тубида куюкларим бор, куюкларим... Куюкларимни далаларимга ёрайин, энди.
Куюкни куюк олсин, энди...

4

Иван Иванович! Мен сенга юз ўттиз йил юртим тўрини бердим, юз ўттиз йил уйим тўрини бердим — аммо сен билан эл бўлмадим!

Иван Иванович! Мен сен билан юз ўттиз йил елкама-елка кун кечирдим, юз ўттиз йил чизган чизифингдан чиқмадим — аммо сен билан эл бўлмадим!

Юз ўттиз йил десанг турдим, ўтири десанг ўтиридим, юз ўттиз йил кул десанг кулдим, ийғла десанг йигладим — аммо сен билан эл бўлмадим!

Иван Иванович! Мен юз ўттиз йил ўзим киймадим — сенга кийдирдим!

Иван Иванович! Мен юз ўттиз йил ўзим киймадим — сенга кийдирдим, юз ўттиз йил ўзим емадим — сенга едирдим, юз ўттиз йил ўзим ичмадим — сенга ичирдим... аммо сен билан эл бўлмадим!

Иван Иванович! Мен юз ўттиз йил кофир тўқ — мусулмон тинч, мақомда кун кўрдим... аммо сен билан эл бўлмадим!

Дини бошқа минбаъд-минбаъд эл бўлмайди!

Тили бошқа минбаъд-минбаъд эл бўлмайди!

Иван Иванович! Сен тиригим тирноғин единг, сен ўлигим ёғин единг — аммо тўймадинг!

Иван Иванович! Мен очликдан ўлмадим — сен тўқлиқдан ёрилмадинг!

Иван Иванович! Мен сени юз ўттиз йил тўнғич акам, дедим. Бўлди — мен энди сен тўнғич акам, демайман.

Мен энди сени тўнғич ака дегич тилларимни кесиб итга ташлайман!

5

— Ну? — деди Қизил.

Иван Иванович! Далаларимда ну-нуламай тур, энди.

Далаларим дийдорига тўйиб-тўйиб олайнин, энди.

Иван Иванович! Сен дала нималигини билармидинг? Сен садқаи дала кет!

Сен қўш жомадон кўтариб дайдишини биласан. Сен ғилдиракли жомадон судраб дайдишини биласан.

Сен қайси юрт мевазор — шу юртни макон этасан. Сен қайси эл меҳнаткаш—шу элни макон этасан.

Иван Иванович! Қайси юрт мевали-чевали бўлади — шу юрт сен учун ватан бўлади!

Қатор-қатор дейдигиб келасану... осойишта-осойишта эл-юртни алғов-далғов этасан.

Ота билан гиж-гиж этасан.

Ака билан укани ков-ков этасан.

Ҳамсоя билан ҳамсояни оқкалтак-қоракалтак этасан.

Үртада маза-маза... Сен маза этасан! Сен үртада пайғамбар бўлиб даврон сурасан. Сен үртада қозикалон бўлиб даврон сурасан.

Иван Иванович! Сен қадам қўймиш эл-юрт асло тинч-тотув бўлмайди. Сен қадам қўймиш эл-юрт асло тиниб-тинчимайди.

Иван Иванович! Сен кўзингга тупроқ тўлмагунча — сен эл-юртга тўймайсан!

6

— Ну? — деди Қизил.

Иван Иванович! Пича оёқ ил, энди.

Далаларим билан хайр-хўшлашиб олайнин, энди.

Далаларим боболарим аччиқ-аччиқ кўз ёшларидан дала бўлди.

Далаларим оталарим шўрпешона терларидан дала бўлди,

Далаларим аёлларим гулдай ҳазон умридан дала бўлди.

Далаларим — боболарим шўр-шўр пешонаси.

Далаларим — оталарим яғир-яғир елкаси.

Далаларим — аёлларим ҳазон-ҳазон умри.

7

Мен... далаларимни дея, қайтиб келаман!

Тупкани тагидан бўлса-да, қайтиб келаман!

Ана шунда шўртупроқ даламга аъло нав пахта экаман. Ундан аъло-аъло тола оламан.

Кумлок даламга мой бергич пахта экаман. Ундан хуштаъм-хуштаъм пахтамой оламан.
Тўйимли-тўйимли пахтамой оламан.

Оқтупроқ даламга оқлик мўл пахта экаман. Ундан егулик оқлик оламан. Ичгулик оқлик оламан.

Мен қайтиб келаман!

Мен ҳали далаларимда электр моторли тракторлар миниб тер тўкаман. Кун нури билан юргич тракторлар миниб тер тўкаман. Олти ғиддиракли тракторлар миниб тер тўкаман.

Мазкур тракторлар қар-қарламайди — билинар-билинмай одимлайди!

Кабинасида барча шароитлар муҳайё бўлади: митти совутгичи бўлади. Митти музхонаси бўлади. Митти чой қайнатгичи бўлади. Тайёралардагидай чаноқ-жўмраги бўлади.

Мен қайтиб келаман.

Етти иқлимдан бўлса-да, қайтиб келаман.

Ана шунда пахтамни чўткали-чўткали машина билан йигиб-териб оламан.

Машина билан бир оралабоқ териб оламан. Бошқа қайтиб дала ораламайман.

Йигим-теримни бош-адоқ бир машина билан бажараман. Бир вақтни ўзида бажараман.

Машина аъло тола пахтамни алоҳидалайди, мундайроқ тола пахтамни алоҳидалайди.

Айни вақтда пахтамни хас-чўпдан покизалайди. Чанг-ғубордан фориғлайди.

Толани бир ёқли этади, чигитни бир ёқли этади.

Пахтамни ўзи тахлайди, ўзи тойлайди. Тойларни юқ машина жойлайди.

Юқ машина пахтамни далаларимдан фабрика олиб жўнайди.

Мен қайтиб келаман.

Етти қават ерни остидан бўлса-да, қайтиб келаман.

Мен далаларимни дея, қайтиб келаман.

Мени далаларим қайтариб келади...

1986—1991 йиллар.

МЕН

Мен Сурхондарё вилояти, Денов тумани, Хўжасоат қишилогида дунёни кўрдим.

Шу қишилоқда катта бўлдим. Шу қишилоқда ўрта мактабни битирдим.

Мактабда ҳикоялар машқ этдим.

Тошкент Давлат Дорилфунуни Журналистика факультетини тамомладим.

Дорилфунунда ҳикоялар машқ этдим.

Жумҳурият радиосида тўрт йил муҳаррир бўлиб ишиладим.

Қизил Армия сафларида ҳарбий хизмат қилдим.

Икки йил «Ўзбекистон физкультурачиси» газетасида таржимон бўлдим.

«Фан ва турмуш» журналида икки йил муҳаррир бўлиб ишиладим.

Москвадаги Жаҳон Адабиёти институтидаги ўқиб келдим.

Мен ўрта мактабни битириб, шундай ният этдим: ўттиз-ўттиз беши ёшларгача уйланмайман, оила қурмайман, бирор идорада фақат тирикчилик учун ишилайман.

Мен фақат бир мақсадни кўзладим: ўттиз-ўттиз беши ёшларгача жаҳон адабиётини ўқииш. Фақат ўқииш, ўқииш, ўқииш, қўл қотиб олмасин учун майдо-майдо ҳикоялар машқ этиб туриши.

Мен шу ният йўлида иморат солмадим, машина олмадим, мансаб эгалламадим, шоншуҳрат қизганмадим.

Мен дунё талашмадим!

Фақат изландим, фақат ўқидим.

Ганимларим мени ишдан ҳайдадилар.

Курашида бир табиат қонуни бор: полвон даврада маглуб бўлса, тақдирга тан бериб кетмайди. Йўқ, полвон ўзини боқади. Полвон ўзини парваришлайди. Полвон тинимсиз машқ олади. Рақибидан маглубият аламини олиш учун шайланади. Рақибидан аламини олмасдан-да қўймайди.

Мен гўдаклигимдан давраларда курашиб катта бўлдим. Полвонлик аждододимда бор, полвонлик қонимда бор.

Менда ана шу полвонлик қоним қўзгалди.

Мен ганимларимдан алам олиш учун шайландим.

Мен ким эканимни бир кўрсатиб қўйши учун катта асарга қўл урдим.

Ниҳоятда... ниҳоятда саноқли кунларда «Юлдузлар мангу ёнади» номли биринчи қиссамни яратдим.

Мен бу қиссам билан ганимларимга: «Мана, мен кимман!» деган бўлдим.

Қисса элга манзур бўлди.

Ўзбекистон Ёзувчилар Уюшимаси ҳисобот йиғилишида йилнинг энг яхши қиссаси, дея баҳоланди.

Ганимларим бир куйди, бир куйди-е!

Бу — тасодиф, дедилар. Кесакдан олов чиқди, дедилар. Фисқ-фасод тарқатдилар.

Бир чақасиз кунларим бўлди. Ижара ҳақини тўлай олмай, ижарадан ҳайдалмииш кунларим бўлди. Бошпанасиз кунларим бўлди.

Мен қишилогимга қайтдим.

Онам сандиқ ковлади. Латталар остидан бир тугунча олди. Тугунчани уч-тўрт айлантириб очди.

Тугунчадан беш-олти сўм пул чиқди.

Онам шу пулни менга узатди.

Шунда... мен бир бошқа бўлиб қолдим. Мен ташқари отилиб чиқиб кетай, дедим.

Бу пул... онамни... ўлимлик пули бўлди.

Мен деворни ушлаб қолдим.

— Олмайман... — дедим.

— Ол, сен шоир бўлсанг бўлди, ол, — деди онам.

— Йўқ... — дея боши чайқадим.

— Ол, сен шоир бўлмагунингча мен ўлмайман, — деди онам. — Мен сенинг шоирлигинги кўрмагумимча ўлмайман.

Мен тагин Тошкент қайтиб келдим.

Мен энди онамни ўлимлик тули билан тирикчилик кечириб изландим.

Бир журнал муҳаррири мени ишга оламан, деди.

Аммо ганимларим хабар топиб, мени ишга олдирмадилар.

— Ўзи бошиқа, асари бошиқа, — дедилар.

— Ўзидан асари яхши, — дедилар.

— Асари керак, ўзи керак эмас, — дедилар. Ана шунда полвонлик қоним тагин қайнади.

«Уҳ, қорақўнгизлар! — дея, ганимларимни ичимда яндим. — Сен қорақўнгизлар ким-у, мен ким эканимни ана энди кўрасанлар!» — дея қўзголдим.

Кеч кузда юртимиизга йўл олдим.

Саттор чавандоз дегич билан тил топшидим. У менга бир от топиб берди. Мен... отландим!

Саттор чавандоз билан қишлоқма-қишлоқ юрдим. Тўйма-тўй юрдим. Кўпкаrima-кўпкари юрдим.

Кундузлари турли юртлардан келмиши чавандозлар билан кўпкари чопдим.

Неча бор отлардан йиқилдим.

Кечалари тўйхоналарда чавандозлар билан гурунг қилдим.

Чавандозлар дўмбира чалиб, кўпкарилардан сўйлади, отлардан сўйлади, чавандозлардан сўйлади.

Узун қиши кўпкарихона — иши жойим бўлди, чавандозлар — ҳамхонам бўлди, отлар — биродарим бўлди.

Ниҳоят, кўкламда «От кишинаган оқшом» номли иккинчи қиссамни журналга кўтариб келдим.

Қисса адабиёт осмонида бир момоқалдироқ бўлди.

Ўзбекистон Ёзувчилар Уюшмаси ҳисобот йигилишида йилни энг яхши қиссаси, дея баҳоланди.

Мен елкамдан нафас олдим. Мен энтиқдим. Мен хумордан чиқдим!

Юртимииз тоз этагида Сўфи Оллоёр қабри бор. Шу қабр қабатида тоғчорбоғ бор.

Мен бир қишини ана шу юртим чорбогида қишиладим. Сўфи Оллоёр бобо билан қабатмакабат ётиб, «Ойдинда юрган одамлар» номли қисса битиб келдим.

Қиссани чоп эттириши учун уч йил сарсон-саргардон бўлдим. Тўртинчи йил куя-пиша чоп эттиридим.

Шу қиссадан кейин мени олқишиловчилар кўпайди. Мени қўллаб-қувватловчилар кўпайди.

Ўзбекистон Ёзувчилар Уюшмаси қиссаларимга Ойбек мукофотини бердилар.

Иттифоқ Ёзувчилар Уюшмаси съездига делегат этиб сайладилар.

Иттифоқ Ёзувчилар Уюшмаси правлениеси аъзолигига сайладилар.

Ганимларим қорақуртдай гимирлаб қолдилар.

Дунёда қанақа мағзава бор — мени бошимдан тўқдилар. Дунёда қандай фисқ-фасод бор — мени номимга тупуклаб ёпиширдилар.

Тогай Мурод номимни қон-қора этдилар.

Мен улар ҳақида «Момо Ер қўшиги» номли қисса яратдим.

Савоб иши барча учун бўлади. Аёл-эркак учун бўлади. Ёш-қари учун бўлади. Етти яшар-у,

етмииш яшар учун бўлади.

Мен эл-юрт учун ана шундай бир савоб иши қилгим келди.

Сетон-Томпсонни «Ёввойи йўрга» китобини ўзбекчага таржима этдим.

Табиат, жониворлар ҳаётидан сўйлагувчи мазкур китоб етти яшар китобхон учун-да, етмииш яшар китобхон учун-да бирдай суюкли, бирдай ардоқлидир.

Ана шу вақт қатагон авж олди.

Ишдан ҳайда-ҳайдо авж олди. Фирқадан ўчир-ўчир авж олди. Сур-сур авж олди.

Ниҳоят... қама-қама авж олди.

Ўзбек зиёлилари кишианбанд бўлди. Ўзбек зиёлилари маҳбус бўлди.

Ўзбек зиёлилари кечалаб-кечалаб Москвага олиб кетилди.

Сўроқ Москвада бўлди. Суд Москвада бўлди. Ҳукм Москвада ўқилди.

Ана шунда полвонлик қоним қайнади!

Энди қоним ўз ганимларим учун қайнамади. Йўқ, ўз ганимларим ўз йўлида қолди.

Энди қоним... оламжсаҳон ганимларим учун қайнади. Энди қоним... қудратли ганимларим учун қайнади.

— Мен ўзбек халқига ҳайкал қўяман!

Мен ана шундай шаҳд билан оламжсаҳон ганимларим сари шайландим.

Жаҳон Адабиёти институтидан ўқиши учун йўл олдим.

Барча ҳайрон бўлиб қолди.

Боиси — мен эндигина уйланиб эдим.

— Саводни мазаси йўқ, Москвада ўқиб келмасак бўлмади, — дедим. Дардим ўқиши бўлмади.

Дардим прокуратуралар бўлди, дардим судлар бўлди.

Бир оёғим институтда бўлди, бир оёғим судларда бўлди.

Мен таниши-билисиг йўли билан тергов матнларини сотиб олдим. Икки оғиз ахборот олиши учун яримталар қўйдим.

Ўшанда Ўзбекистон Ёзувчилар Уюшмаси қиссаларим учун Ойбек мукофотини бериб эди. Ана шу мукофот тулини зинданлардан ахборот олиши учун сарфладим.

Мен эртадан кечгача судларда ўтиридим. Суд йўлакларида ўтиридим. Суд зинапояларида ўтиридим. Суд дарвозалари ортида тик турдим.

Судга киритмаса, қўшини уйлар чердагига чиқиб судни пойлаб ўтиридим.

Мен узун кунлар суд идоралари теварагида айланиб-айланиб юрдим.

Мен ўз кўзим билан кўрдим: ўзбек халқини юлдуз зиёлиларини тепиб-тепиб зинданмашинага босдилар. Ўзбек халқини гултож зиёлиларини уриб-уриб зинданмашинага солдилар... Ўзбек халқини сара зиёлиларини оёқ-қўлидан олиб, зинданмашинага отдилар...

Мен Москвада ўқимадим, мен Москвада ўзбек зиёлилари қайгуси билан яшадим.

— Мен ўзбек халқига ҳайкал қўяман!

Мен Москвадан ана шу ният билан қайтиб келдим.

Мен бешинчи синфдан бошлиб пахта тердим. Дорилфунун даврида, иши даврида пахта тердим.

Бўйим пахтада ўсади. Ақлим пахтада кирди. Саводим пахтада чиқди.

Аммо романни бошлиб... пахта нима эканини билмаслигимни англаб қолдим. Оппоқ қозоз билан юзма-юз бўлиб... пахта билан мен бегона эканимизни билиб қолдим.

Мен учун пахта қайси бир... қайси бир денгиз остида ўсажсак ўтдай бўлиб туюлди.

Мен пахта масаласида бир... гўрсўхта эканимни билиб қолдим.

Мен энди неча ўнлаб пахтацилик дарсликларини ўқидим. Неча ўнлаб қишилоқ хўжалик китобларини ўқидим.

Пахтада ўтмиши кунларимни бир-бир эсладим. Ўзим билмиши пахтакорларни бир-бир ёдладим.

Барибир... барибир бўлмади.

Мен ўзимни... ҳалқ ҳаёти билимдони, дея ўйлар эдим, ҳалқ характери билимдони, дея ўйлар эдим, ҳалқ руҳияти билимдони, дея ўйлар эдим.

Мен пахта билан юзма-юз бўлиб... мен ҳали ўзбек дехқонини билмаслигимни англадим. Мен пахта билан юзма-юз бўлиб... мен ҳали пахтакор ким эканини билмаслигимни англадим.

Мен қоғоз-қалам гамладим. Мен Сурхон далаларини нишонладим.

Икки бор жумҳурият газетасида: «Мен пахта далаларига кетаман», дея сўз бердим. Эл-юрга икки бор сўз бердим.

Илк кўкламда Олтинсой туманига йўл олдим. Туман катталари билан юзлашдим.

— Мен сизни Алиқулов бригадасига олиб бораман, — деди хўжалик раиси Тошибоев. — Фақат айбга буюрмайсиз, Алиқуловни бет-боши сал оқариб қолган.

— Оқариб қолган? — дея анграйдим.

— Чин, чин, — деди туман вакили. — Дастлаб кўришиимда мен ҳам шундай деб ўйлаб эдим.

— Бети ҳалиги бир касалдай оқариб қолган, — деди Тошибоев. — Бари жазирамада куйиб-пиишиб ишилашидан.

Раис айтмиии Алиқулов дала шийпонини макон этдим.

Мен бўлажак... Дехқонқул билан юзма-юз бўлдим.

Мен бўлажак... Дехқонқул далаларини иш жойим этдим.

Дехқонлар қандай кийимда бўлса — мен ҳам шундай кийиниб олдим.

Дехқонлар ўтирса — ўтирдим, дехқонлар турса — турдим.

Чигит экши бошланди.

Мен дехқонлар билан чигит экдим.

Мен... дехқон бўлиб, чигит экдим!

Мен гўза яганаладим. Гўза чопиқ қилдим. Гўза ўтоқ қилдим. Гўзага гўнг бердим. Гўзага сув тарадим. Гўза чилтидим.

Мен дехқонлар билан пахта тердим.

Мен гўзаларга сув тараи-тараи, неча-неча тонгларни оқладим.

Мен шийпонларда ухлаб қолдим. Ўқариқ бўйларида ухлаб қолдим. Эгатларда ухлаб қолдим.

Мен Сурхон далаларида олти ой кездим. Сурхон офтобида олти ой куйдим. Сурхон чангларини олти ой ютдим.

— Мен ўзбек ҳалқига ҳайкал қўяман!

Мен ана шундай орзуда далалар билан хайр-хўшилашдим.

Ниҳоят, орзуларим охир-оқибати — ушбу роман бўлди.

Мен нимага эришиган бўлсан — барчаси учун ганимларимдан миннатдор бўлдим.

Ганимларим бўлмаса — мен Тогай Мурод бўлолмас эдим.

Яшасин, ганимларим!

ТОҒАЙ МУРОД